

قهوة مائو

أغاني العدوي

عنوان الكتاب : قهوة مانو

المؤلف : أماني العدوي

المراجعة اللغوية : عبد الهادي عباس

الإخراج الداخلي : رشا عبدالله

فوتوغرافيا : أحمد رأفت

موديل : سمر أحمد - أحمد وأفت

تصميم الغلاف : ويندا عادل

رقم الإيداع : ٢٠١٧ / ١٤٧٣٧

ردمك : 978-977-66549-39-5

الطبعة الأولى: أغسطس 2017



المدير العام : هاله البشبيشي

مدير المبيعات : شريف الليثي



دار توييا للنشر والتوزيع



dartoya2015@gmail.com



دار توييا للنشر و التوزيع Dar.toya



@Dar_Toya



Dar.toya



(+2) 01140899887 - (+2) 01000706014



٣٥ شارع النصر - المعادي - القاهرة - مصر

جميع حقوق الطبع والنشر محفوظة للدار

تموة مانو

أعاني العدوي

دار تويلا للنشر والتوزيع

الإهداء

هذا طفلي الأول.... من رحم الحياة....

أهدي ثوابه إن وُضع في ميزان عملي الحسن في هذه الرحلة
العابرة إلى أبي...

أهديه إلى صديقة العمر... إلى من تحملت الأسود قبل الأبيض....
إلى من شاركتني جميع لحظات انكساري وضعفي وهزيمتي... إلى من
سبقتني إلى الهاوية قبل أن أسقط بلحظاتٍ لتلتقطني قبل أن ألمس
القاع....

أهديه إلى معلمي الذي آمن بي.. وظل يهمس في أذني مرارًا
وتكرارًا....

“if they can not Reach you .. they will Break your legs”

أهديه بابتسامةٍ باردةٍ إلى كل من أخبرني بنفيسٍ لئيمةٍ أنني
تأخرتُ كثيرًا... وأن المركب قد انطلقت بالفعل... ها هي ذي مركبي
الخاصة... أنا قبطانها الأول والأخير....

المقدمة

سأكتبُ... وليكرهني الجميعُ...
سأكتبُ لليالي الوحدة... للألم... للخوف...
سأكتبُ للحب... الكثير من الحب...
سأكتبُ رغم أنف مجتمعٍ لم ينج منه أحدٌ سوي...
سأكتبُ وليكرهني الجميع في العلن... ليبتسمَ ثغرٌ واحدٌ في
الخفاء...

”قهوة مانو“.. يحمل الكثير من التفاصيل التي تتشابه من
الخارج... ولكنها تحمل مشاعر أخرى من الداخل... جلسات المقاهي
المعتادة... مكالمات في منتصف الليل... البكاء... وما أكثر البكاء في
”قهوة مانو“... ربما لأنني لطالما آمنتُ بالبكاء... طهارةً للأرواح
وخلصاً للمُعذبين...

عزيزي القارئ... كل ما عليك فعله قبل أن تبدأ بقراءة هذا
الكتاب... ألا تُحضر معك سوى عقلك وقلبك والكثير من القهوة
والموسيقى... ولا تنس أنك ”إنسان حر“ في المقام الأول والأخير... هذا
الكتاب للأحرار فقط دون سواهم...

قهوة مانو

- " أنتي غير... "

قالها "علي" بعد أن ألحت عليه كثيراً في معرفة سبب تركه لها بعد ثلاثة أعوام من قصة حب يتحاكى الجميع عنها..

- (تعقد حاجبئها) أنا غير؟ لا مش فاهمة...

- أيوه غير، وصدقيني هوه ده السبب، مفيش أسباب تانية نهائي.. ببساطة أنتي غير...

- (نظرة ألم ممزوجة بغضب ونكران) علي.. أنا مش فاهمة!...

- (يُدبر وجهه نحو النافذة... يتنهد... ثم يُشعل سيجارة.. ثم يُطيل نظره إليها كما لو أنه يشعر بالحنين..)

- يا علي... (عينين دامعتين)...

- سارة.. لو عيطتي هسيبك وهمشي... (ثم يُناولها منديلا ورقيا من على طاولة المقهى)..

- (تتدارك دموعها.. تعتدلُ في جلستها.. وتستجمعُ بعضاً من قواها) طيب فهمني إزاي أنا غير....

- (صمتٌ قليلٌ.. ينفث دخانه) غير يا "سارة".. غير أي حد أنا عرفته... غير بشكلٍ مرهقٍ... غير لدرجة إني حاسس إنك عبء

عليًا.. شكلك.. طموحك.. طريقة كلامك... كل حاجة.. كل حاجة
فعلا... حاسس إني في منافسة على طول معاي.. في كل حاجة...
أنا عاوز واحدة عادية.. أحس إني راجل كامل معاها... أنتي
حرمتيني من الإحساس ده... حاسس إنك كتير عليا.. كتير أوي...
(يتنهد) مش قادر... مش قادر أكمل...

- (صمت... وعينان كالصقر.. لم ترمشا... ونصف فم ملتوٍ يُعبر
عن أسفٍ بنكهة السخرية... وبنبرة قوة غريبة) أنا همشي...
مع السلامة....

لم يستوعب "علي" ما حدث... وبقي صامتًا لدقائق بعد أن
رحلت "سارة".. ولكنه لم يركض خلفها.. فقد كانت عبئًا ثقيلًا على
صدره.. ومضى...

وما أن عبرت سارة باب المقهى وتأكدت أنها قد اختفت عن
ناظري "علي" حتى انفجرت في البكاء المكتوم، منذ أن هددها
بالرحيل أن بكت ثم سارعت إلى سيارتها تفاديًا لعلي... وانطلقت
بعيدًا..

لم تستطع سارة كبت ذلك الغضب فأخذت تصرخُ في السيارة
كالمجنونة لا تدري أين تذهب... غضبٌ عظيمٌ يستعمر روحًا
محطمةً وجسدًا متعبًا وعقلا مشتتًا... حالة لا تُحسد عليها... ثم
أدركت أن لا مكان تذهب إليه سوى منزلها الفارغ.. البارد.. فقد
قطعت علاقتها بأغلب أصدقائها منذ ثلاثة أعوام... لا أحد لها... لا
عائلة... لا أقارب.. لا أصدقاء.. لا أحد...

"كيف يبدو الكوكب صغيرًا إلى هذا الحد.. كيف أشعر بأنني
أعيش بمفردي في هذا العالم.. أين ذهب الناس؟!...!"

أعدت "سارة" كوبًا من الشوكولاته الساخنة... أدارت مفتاح التدفئة المركزية... وارتدت بيجامتها الصفراء الثقيلة... فقد كانت ليلةً شديدة البرودة... كقلب "علي"... هكذا ظننت... ثم ارتقت على السرير.. نامت بعد أن أعلن جسدها المرهق استسلامه...

وفي تمام الساعة الرابعة فجرًا.. تصلها رسالة نصية قصيرة... أيقظها ضوء الهاتف الذي كانت قد وضعت أمام عينيها مباشرة.. أملًا منها في أن يصلها اتصالٌ من "علي"... يُعبر لها عن أسفه وتراجعته عن قراره...

((سارة في حاجة مقدرتش أقولها لك النهاردة الصبح.. أتني مفصولة من الشغل.. مقدرش أشوفك كل يوم في نفس المكان.. صدقيني كده أحسن ليا وليكي... ممكن تيجي بكرة تستلمي كل مستحقائك المادية وتعويض كمان... أنا آسف جدا))

قامت بقراءتها خمسة وأربعين مرة... خمسة وأربعين... أخذت تتأمل تلك الكلمات الوضعية.. بأي قلب كتبت.. ثلاث سنوات من عمرها.. تنتهي بعبارة: "تعويض كمان.. أنا آسف جدا"... ثم تذكرت ذلك اللقاء.....

- صباح الورد يا سارة..
- صباح الخير يا علي.. وصلتني مسج منك إمبراح إنك عاوزني في موضوع مهم..
- ممكن تستريحني الأول.. طلبتلك قهوتك المانو... عارفك بتحبها مانو...
- (تجلس.. نبرة حازمة) شكرًا.. خير كنت عاوزني في إيه؟ في حاجة في الشغل؟

- (بيتسم بشغبي) لا الشغل تمام جدا... أنا عاوزك في حاجة تخصصنا..
- (تعقد حاجبيها) تخصصنا أنا وأنت؟ طيب.. اتفضل!!
- (ما زال بيتسم) يا ساتر يا رب.. أتتي ليه على طول جد كده...!
- هوه ده الموضوع اللي أنت جاييني عشانه?!
- (صمت قليل) سارة... أنا بحبك..
- تنتفضُ سارة... وكأن عقربًا قد لدغتها... تسكب القهوة على ملابسها... فيسارع علي إلى مساعدتها...
- (بيتسم لها) خير خير... دلِق القهوة خير..
- (تبتسمُ له باستحياء)...
- أيوه يا شيخة اضحكي كده بدل الفزعة اللي فزعتهلنا دي..
- اقعدي اقعدي... (يعود أدراجه) المهم كنا بنقول إيه.. بنقول إيه يا واد يا علي.. أيوه... بحبك يا سارة..
- (تُخفض رأسها) مش فاهمة...
- مش فاهمة إيه... بقلك بحبك...
- أيوه ليه؟ بتحبني ليه؟
- أمر الله يا أختي.. أمر الله ونفذ...
- (تعقد حاجبيها) نعم!!
- لا إله إلا الله.. بهزر معاكي يا أختي.. بحبك عشان بغض النظر عن وجهك العابس أنا شايف جواكي إنسانة طيبة وحنونة ومُخلصة، وبس حبيتك.. الموضوع بسيط وجميل....
- أنت بتهزرر!؟

- (يتنهد) لا أنا ما بهزرش، أنتي اللي بتعقدي كل حاجة في حياتك....

- (تُحدق به) أنت ما تعرفش حاجة عن حياتي عشان تتكلم عني بالطريقة دي....

- (بيتسم لها) ده صحيح، أنا فعلا معرفش حاجة عن حياتك.. بس أنا عندي رغبة كبيرة إني أعرف كل حاجة عنها.. وأشارك فيها... لو تسمحيلي....

- (تنظر بعيدًا) صدّقتي أنا غير صالحة للحب..

- (ينكزها في ذراعها) طيب هاتي فلوس القهوة....

- (تبتسم...)

- إيه ده ما أنا بضحك أهو... (يغمز لها) وده ما يحصلش.. يبقى أنا مختلف... يبقى تديني فرصة....

كانت تلك أولى محاولات علي لكسب قلب سارة... واستمر على ذلك أيامًا وأشهر كثيرة.. تارة بالورود.. وتارة بالعود... وتارة أخرى بالنوم في سيارته أمام منزلها.. كان قد فعل كل شيء لإقناعها بحبه... كل شيء... حتى امتلك قلبها... أحبته.. أحبته حبا مؤلماً... أحبته كأنه أول وآخر الرجال في الكون....

تذكرت "سارة" ذلك اللقاء.. وتلك المحاولات... ثم أخذت بتأمل الرسالة من جديد...

ثم قامت بدفس رأسها في غطاء السرير.. بكت بحرقّة... بكت وكأنها أجهضت السعادة في جوفها.....

استيقظت "سارة" حين داعبت أشعة الشمس عينيها الدابلتين... أحبت ذلك الشعور كثيرًا.. حين أحسّت بذلك الدفء يتسلل إلى

قلبها وكأنه يُسَعف نبضاته الضعيفة... شيء ما يختلف.. شيء ما يدفعها للقيام من قوقعة الحزن... ارتدت أجمل ما تقنتي من خزانة الملابس... فستان أسود صوفي قصير ذو ياقة مفتوحة يبرز جمال قوامها... وحذاء أسود ذو كعب عالٍ.. ثم وضعت مساحيق التجميل لتخفي انتفاخ عينيها الجميلتين... وشعر مرفوع... "ملكة أنتي يا سارة".. هكذا تمت سارة قبل أن تهتم بالمغادرة منطلقاً إلى عملها....

- صباح الخير يا وفاء.
- صباح الخير يا سارة.
- أنا جايه آخذ حاجتي من المكتب عشان همشي..
- (تعقد حاجبيها)، تمشي تروحي فين؟
- هسيب الشغل، جالي عرض من شركة أجنبية كبيرة..
- و"علي" عارف إنك هتمشي؟
- (بنصف ابتسامة) أكيد عارف يا وفاء...
- وموافق؟ هيسيبك تمشي عادي، ده نص الشغل أنتي اللي شيلاه!!
- (تمتت في سرها... نص الشغل بس... ده الشركة كلها على راسي) لا لا عادي هوه عامل حسابه وهيجيب بديل في أسرع وقت ممكن وهيكون كفاءة عني كمان إن شاء الله..
- (تبتسم) خلاص أكيد كلنا هنا نتمنالك الخير وربنا يوفقك في أي مكان تروحيه...
- تسلمي يا وفاء... خلي بالك من نفسك.. أنا هستأذنك عشان ألم حاجتي....
- تجه "سارة" إلى مكتبها وفي صدرها ألم.. فالمكان مُعبأ بالذكريات...



تجاهلت ذلك الألم.. وهَمَّت بجمع صناديقها وأوراقها... دقائق..
ثم طرق على الباب...

- صباح الخير يا "سارة" ..

- (دون أن تلتفت) صباح الخير يا أستاذ "علي" ..

- أستاذ؟! طيب... امممم ... عديتي على الحسابات؟

- (نظرة دونية... نصف ابتسامة.. ثم تكمل ما قد بدأت به)

- (يتنهد) أنتي ليه مصممة تعقدي الموضوع؟!.. ده حقك ملوش
علاقة بموضوعنا تمامًا...

- (لم تلتفت.. واصلت جمع أشياءها...)

- (نبرة لطيفة) طيب اقعدى شوية نشرب قهوة مانو مع بعض....

- (ضحكات عالية).. شربتها من ثلاث سنين... (تتجاوزه) معجبنيش
طعمها...

ثم تهم بالرحيل.....

- "سارة" ...

- (ولم تلتفت...)

ودَّعت "سارة" جميع العاملين بالشركة متمنيةً لهم كل الخير
والحظ ووعدهم بالقاء التحية من حينٍ لآخر ثم غادرت... غادرت
لمستقبلٍ مجهولٍ... وماضٍ لم يترك لها إلا الألم....

أخذت "سارة" تحوم بلا هدفٍ بسيارتها في شوارع القاهرة...
وقعت عيناها على أسطوانةٍ مدفونةٍ بين أكوام من الورق... تقوم
بالتقاطها...

(إلى حبيتي ونوارة حياتي ونور عينا سارة)

كانت تلك أسطوانة لفيروز أهدها إياها والدها منذ زمنٍ..
قبل أن يلاقي منيته في حادث سيارة مؤلم... لم تتحمل والدتها فراق
الحبيب.. فتوفيت بعده بعدة أشهر...

تملاً عينها الدموع... أتراها ما زالت صالحة؟ أم أن غبار الزمن
أفقدتها صلاحيتها كما فعل معي؟!...!

(شايف البحر شو كبير... كبر البحر بحبك... شايف السما شو
بعيدي... بعد السما بحبك.....)

ما زالت تعمل.. كانت تلك الأغنية المفضلة لوالدها.. كان دائماً
يُرددها لوالدتها في الصباح.. حين يُراقبها بحب وهي تقوم بإعداد
الطهور... "كم كان يحبها... كم كنا سعداء...."

أحسّت "سارة" بمشاعر غريبة تجتاحها... أهذه إشارة من
السما؟... لماذا الآن؟ لماذا وقعت عيني عليها الآن؟ ثلاث سنوات لم
ألتفت إليها؟ لماذا الآن؟!...!

أفاقت "سارة" من أحلام اليقظة حين أتاها اتصالٌ هاتفي.. رقم
غريب...

- ألو.. آنسة سارة..

- أيوه اتفضل!!..

- أنا أستاذ "محمد" من شركة real echo ... أنا أستاذ "علي"
كلمني على حضرتك... أنا عندي مكان مدير تنفيذي وأستاذ
علي قال إن حضرتك عندك خبرة كافية في الوظيفة وبعث
توصية باسم حضرتك للشركة.

- شكرا ل حضرتك جدا.. بس أنا للأسف راحة أمضي عقد مع شركة
تانية أنا آسفة جدا..



- بالسرعة دي؟
- حضرتك لسه شاهدلي بخبرتي في المجال.. أنا آسفة للمرة الثانية...
- أنا آسف جدا للإزعاج، ولو غيرتي رأيك ممكن تكلميني في أي وقت...
- أكيد طبعًا.. شكرًا مرة ثانية.. مع السلامة..

أدركت "سارة" أن تلك هي إحدى محاولات "علي" الضعيفة لئلا يشعر بالذنب تجاهها.. "أناني" ذلك العلي.. أیظن أنه قد یمحو ثلاث سنوات من عمرها حين ینحها وظيفة أفضل بعائد مادي أكبر... وهنا تذكرت "سارة" ما قد قالته "لوفاء" صباح اليوم.. بخصوص ذلك العرض الكبير من الشركة الأجنبية.. حين حاولت أن تعزز جبهتها أمامها... (وليه لا؟).. هكذا تمتت "سارة".. لماذا قد تقوم برفض ذلك العرض من "أستاذ محمد".. فهي بلا وظيفة.. وقد يستغرق البحث عن وظيفة مناسبة بعض الوقت.. هذا إن وجدت ما يناسب خبرتها ووضعها الاجتماعي... .. ماذا إن وافقت؟ فأی إنجاز سوف تحققه في تلك الشركة سينسب فضله إلى "علي".. فهو من أتى بها إلى هناك.. أفكار ومخاوف.. أنهتها قائلة:

(لا، إحنا نقطع الصفحة دي كلها على بعضها.. ونبدأ على نظافة)

قامت بتريديد تلك العبارة وهي تقوم بحذف رقم "أستاذ محمد" من الهاتف.. حتى لا تساورها نفسها للحظة أن تتصل به.. ثم قامت برفع صوت الأغاني ليغطي على صوت أفكارها وقامت بفتح جميع السيارة.. أطلقت سراح شعرها للهواء... وانطلقت غير مباليةٍ بحدود السرعة...

كانت "سارة" على ثقة تامة.. بأن الأيام خير شافٍ... تذكرت كلام أبيها الحبيب.. حين كان يغرس في كيانها بذور القوة... كيف كان

يُخبرها دائماً وأبداً أن من أكبر نعم الله علينا نحن البشر.. نعمة النسيان... وأن الوقت كفيل بإخماد نيران الألم.. وأنا كلما تناسينا.. نسينا..

أعدت "سارة" لائحة بالأشياء التي لطالما أرادت تطبيقها.. ولكنها كانت في كل مرة تخلق الأعذار.. لضيق الوقت.. ووجود أولويات أخرى... قررت أخيراً أن تستغل تلك الفترة في تحقيق تلك اللائحة.. لطالما أرادت تعلم الفرنسية... والسفر إلى باريس... وركوب الخيل... وتعلم طهي بعض الأكلات... وتعلم لغة الإشارة... وقراءة "هيتا"... والكثير الكثير من الأشياء...

لم تكن يوماً "سارة" من الباكين فوق الأطلال... لم تسمح لفترة التعاسة أن تطول... أنهكت أنفاسها في إفراغ تلك القائمة... ولم تحزن... جميل أنت أيها الوقت... جميل أنت أيها النسيان.... قوية أنت يا "سارة"....

وفي ليلة باردة جميلة من ليالي يناير... وفنجان قهوة ساخن... وسجائر المارلبورو.....

(كل ثانية يوضع أمامك اختيار بسيط قد يجعل الحياة كلها مختلفة.. وكل ثانية تختار أن تؤجل القرار خوفاً، فتظل كما أنت)... استوقفتها تلك الكلمات.. من رواية "هيتا"... أخذت تفكر في كلام ذلك التعيس... وعن أنها (غير أي حد)... هل حقاً كانت سعيدة معه؟ هل حقاً كان هو فارس أحلامها؟ هل كان باستطاعتها أن تكمل حياتها معه؟ كيف كان يحط من شأنها في كل مرة كان يراها؟ كيف كان يشعر بالضيق في كل مرة كانت تنجح في إتمام صفقة ما.. كان قد فشل هو في إتمامها... كيف تناست كل هذا؟ ما الذي منعها من إنهاء تلك العلاقة؟ هل هو الخوف من الوحدة؟ هل هو الإعجاب بهريق

ذلك الغلاف الخارجي.. الذي لظالمًا لفت الأنظار... "علي وسارة"..
ثنائي ناجح.. يبدوان معا كما النجوم على السجادة الحمراء..؟ هل
هو التمسك بظل رجل شرقي.. كما يلي عليها مجتمعها؟ مئات
الأفكار... التي مرّت في رأسها ولكن في سلام تام... فقط... تساؤلات...
بلا ندم.. بلا حسرة...

ثم تابعت قراءة "هيبتا"... التي تمنيت.. لو أنها قرأتها في وقتٍ
أبكر... بكثير....

مرّت الأيام.. والأسابيع والأشهر... استعادت "سارة" كامل قوتها
واتزانها... شعرت كما لو أنها قد وُلدت من جديد.. خسرت بعضًا
من الباوندات... أصبح شعرها قصيرًا جدًا... تعلمت الفرنسية
وبطلاقة... أصبح ركوب الخيل شيئًا أساسيًا.. تخصص له يومًا محددًا
من أيام الأسبوع... توقفت عن شراء الأطعمة الجاهزة.. أصبحت
تستمتع بطعام المنزل... قامت بتكوين بعض من الصداقات أثناء
تعلمها للغة الإشارة والفرنسية... أضافت "سارة" لأيامها.. الكثير من
نكهة الحياة...

شعرت بأنها في كامل استعدادها للعودة لماراثون "سوق العمل"..
اشتاقت لروح المنافسة.. ولذة النجاح... وقد كان... خلال أسابيع
قليلة فقط.. حصلت "سارة" على وظيفةٍ مناسبةٍ في إحدى شركات
التأمين الكبرى...

وفي أحد الأيام.. بعد انتهاء ساعات العمل.. ذهبت "سارة" إلى
أحد المولات للتبضع... وأمام باب أحد المحلات التجارية... صادفت
"سارة" زميلتها "وفاء"..

- سارة؟! -

- (تحتضنها)، "وفاء"!!.. إيه الصدفة الجميلة دي، عاملة إيه؟
وحشتيني...
- أنتي كمان وحشتيني أوي.. شكلك اتغير أوي...
- (تبتسم) آه خسيت شوية...
- خسيتي وقصيتي شعرك.. احلوتي أوي.. عاملة إيه في شغلك؟!
- أنتي اللي جميلة.. أنا الحمد لله.. كلو تمام...
- عرفتي اللي حصل مع علي؟
- امممم.. للأسف معرفش حاجة عنه من سنين..
- اتجوز بعد ما سبتي الشركة بشهرين وطلق بعدها بست
شهور..
- (نبرة لا مبالاة) يلا ربنا يصبره.. وأنتي أخبارك إيه وبيتك وبنوتك
وجوزك؟
- كلنا بخير الحمد لله... (بتردد) سارة.. أنتي فعلا مش مهتمة
بأخبار "علي"؟
- (تبتسم) مش مهتمة نهائي...
- امممم... بس عارفه.. ده ذنبك أنتي والله..
- أكيد لا.. ده مش ذنب حد.. ده قدره... ونصيبه.. وإن شاء الله
ربنا يعوضه خير.....
- يعني مش فرحانة فيه يا سارة؟!
- خالص يا "وفاء" .. خالص....
- (تبتسم) أنتي جميلة يا "سارة" .. طيب أنا لازم أمشي عشان
اتأخرت على البيت جدا..

- ماشي يا حبيبتي... خلينا نشوفك..
- أكيد.. هكلمك.. باي..
- ومضت كلتاها في طريقها....
- وبعد يومين... في الساعة العاشرة.. يدق هاتف المنزل..
- ألو، مساء الخير.. سارة؟
- مساء النور.. أيوه؟ مين؟
- أنا علي يا سارة.. فكراني؟
- (نصف دقيقة من الصمت والذهول).. أكيد فاكراك.. عامل إيه يا علي؟
- أنا مش كويس... (صمت قليل).. "وفاء" حكيت لي إنها شافتك من يومين.. بتقول إنك اتغيرتي أوي... من فترة كبيرة كنت عاوز أكلمك.. بس كنت متردد... كلام وفاء شجعني إني أكلمك.. كلمتك على موبايلك لقيته مغلق... فدورت علـ...
- علي علي علي... هات من الآخر لو سمحت!!..
- (يتنهد)، عاوز أشوفك يا سارة.. محتاج أتكلم معاك..
- طيب مفيش أي مشاكل.. إمته؟
- دلوقتي لو ينفـع..
- لا للأسف مش هينفع دلوقتي... ممكن بكرة الساعة 7 بالليل؟
- أكيد ممكن... نتقابل في مكاننا؟
- لا بردوا مش هينفع... بطلت أروح هناك من زمان... نتقابل في كازينو؟
- اللي في المنيل؟

- بالظبط...
- تمام.. أشوفك بكرة.. تصبحي على خير..
- وأنت من أهل الخير....
- وفي اليوم التالي... بعد انقضاء ساعات العمل... اتجهت "سارة" إلى المكان المتفق عليه.. ولكن في تمام الساعة الثامنة والنصف... وها هو يجلس في مكانه.. يحرق سجائره كالمجنون..
- (تبتسم) أهلا أهلا "أستاذ علي"...
- (يُسارع بتقبيلها فتبتعد) لا مش أوي كده... عامل إيه يا ابني؟
- (يشعر ببعض الإحراج...) أنا كويس.... شكلك اتغير فعلا..
- (تجلس) مش شكلي بس... ما علينا... وإيه أخبار الشركة؟
- (صمت قليل) سارة.. أنتي ليه اتأخرتي كل ده على ما جيتي.. معادنا كان من ساعة ونص.. أنا كنت همشي على فكرة...
- (تبتسم ببرود) لا صدقني ما كنتش هتمشي.. كنت هتفضل مستني...
- (يجحظ بعينه مبتسمًا) ياه.. وإيه اللي خلاي واثقة كده..!؟
- (تبتسم ابتسامة عريضة) يعني... تقدر تقول عندي خبرة من موقف مشابه... من سنتين... كنت قاعدة نفس القعدة... مستنية إجابات كان لازم أسمعها... ومكنتش همشي من غير معرفها... عشان كده بقلك.. مكنتش هتمشي...
- يعني أنتي فعلا قصدة تتأخري؟
- (تبتسم بلؤم) حاجة زي كده آه.... يلا احكي بقى... كلي أذان مصغية... كنت عاوزني في إيه يا بطل؟
- (صمت قليل) أنتي عارفة إني طلقت صح؟

- علي... كنت عاوزني ليه؟
- عاوزك عشان أتكلم معاكي يا "سارة".. بس من الواضح إني جايباني تهزئيني وتنتقمي مني...
- أهزءك ممكن.. بس أنتقم منك لا يا "علي".. صدقني أنت فعلا مش في بالي من سنين... وإوعى تفتكر إن خير طلاقك ده فرحني... والله العظيم أبدا.. أنا مش كده يا علي... عمري ما كنت بفرح بأذى الناس.. حتى لو هما نفسهم آذوني..
- (بيتسم) عارف يا سارة... عشان كده حبيتك... من خمس سنين...
- طيب عارف إني عمري ما حبيتك؟!
- نعم؟
- (تحرك رأسها بالإيجاب مبتسمة) آه واللهي.. عمري ما حبيتك.. ده الي أنا اكتشفته بعد ما سبنا بعض.. أو بعد ما سبتني أنت تحديدًا...
- كذابة.. أنتي كذابة... أنا أول وآخر راجل تحبيه في حياتك...
- (تبتسم بتعالٍ) اممممم.. لا أنا مش كذابة يا "علي".. فإكر لما قتلتي إني غير أي حد.. وإني عبء كبير عليك.. وإني حرماك من إحساس الرجولة جنبي؟ ساعتها أنا مفهمتش قصدك... بس فهمته بعد وقت... أنا فعلا كتير عليك... ودايما كنت بتحاول تحسسنني بالنقص وأنا جمبك.... حب الناس ليا كان بيضايقك... نجاحي كان بيقتلك... إحساسك بالعجز أدامي كان صعب عليك.. وده الي خلاك تمشيني من الشركة... كنت عاوز تثبت لنفسك.. إنه مش أنا سبب نجاح الشركة دي... وإنها بيا ومن غيري هتنجح.. (نصف ابتسامة) مش إنك مش قادر تشوفني كل يوم... في الثلاث سنين الي عشانهم مع بعض...

مش فاكراه في مرة إنك مدحتني أدام حد.. أو حتى لما نكون
لوحدنا... إحساسك إني ست قوية في وسط الناس.. خلاك أعمى
عن حاجات تانية كتير.. ما حستش بحناني عليك.. ما حستش
بإني جنبك أنت بس ببقى طفلة.. ما حستش إني كنت بحاول
أخلي العلاقة دي.. أساسها المشاركة.. مش التحكم... ثلاث سنين
بتحاول تكسر فيا.. وأنا بحاول أطلعنا السما.. سوا...

- سارة... أنتي بتتكلمي في حاجات عمرها ما هترجع... العمر لسه
قدامنا.. والأيام جايه كتير... خلييني أعوضك عن كل حاجة...
خلييني..

- (تقاطعه) ممكن أسألك سؤال وتجاوبني بصراحة يا علي؟

- آه طبعا...

- أنت سبت مراتك ليه؟

- (يُبعد نظريه عنها.. ولا إجابة...)

- (تُحدق به.. صمت قليل) أقلك أنا ليه يا علي؟... عشان لقيت
فيها كل حاجة ملقتهاش فيا.. ست البيت.. اللي بتستناك كل يوم
لحد ما ترجع.. ما بتعملش حاجة غير إنها بتستناك... بقيت
أنت كل محور حياتها... بس في المقابل... بتقعد تَؤرف فيك طول
اليوم.. رايح فين... جاي منين... اتأخرت ليه... لحد ما كرهتك
في حياتك... دي الحالة اللي وصلت ليها يا "علي"... إنسان تايه..
مش عارف هو عاوز إيه... عاوز كل حاجة في نفس الوقت...
ظلمتني.. وظلمتها... الله يسامحك...

- (يتنهد) يمكن تكوني صح يا "سارة"... بس أنا اتغيرت.. وعاوزك...
أنا لسه بحبك...

- (تُحرك رأسها بالإيجاب) وأنا كمان اتغيرت... ولو كنت فاكر زمان أني قوية... فأنا دلوقتي بقيت أقوى.. أكثر كلمة قلتها صح يا "علي".. أني كثير عليك....
- يا سارة أنا..
- (تقاطعها) علي... مينفعش... بجد مينفعش....
- وما أن أنهت "سارة تلك الكلمات.. حتى هَلَّ عليهما.. شاب أسمر.. طويل.. قوي البنية... قَبَل "سارة" من وجنتها..
- (ابتسامة لطيفة) مساء الخير..
- مساء الورد حبيبي.. أعرفك.. ده "علي".. صديق قديم ومديري السابق..
- (يمد كريم يده للسلام) مساء الخير.. أهلا وسهلا..
- وده "كريم"... (ثم تقف.. وتقترب منه..).. نصي الثاني..
- (نظرة ارتباك من "علي")... أهلا..
- (ينظر كريم لسارة) طيب إيه يا "سارة" مش يلا بينا؟.. الجماعة مستنينا من بدري..
- (تبتسم له بحب) آه.. أكيد.. طيب "علي".. معلش هضطر أمشي دلوقتي...
- (يبدو عليه التوتر) آه طبعًا... مفيش مشكلة... فرصة سعيدة يا كريم...
- (يمد يده للسلام) أنا أسعد يا "علي"....
- وفي السيارة...
- كريم.. بجد مش عارفة أقلك إيه.. أنا...

- (يُقاطعها) متقوليش حاجة... كان لازم تطوي الصفحة دي يا
"سارة".. من غير بقايا.. أنا عاوز نبدأ حياتنا صح مع بعض...
عشان كده خلتك تقابليه النهاردة...عشان كان في حنة جواكي
لازم تبقى راضية... تطلعي كل الكلام اللي متقلش من سنين...
- (تُحدق به بحب) كريم... أنا بحبك أوي... أنت أحسن وأطيب
وأحن راجل في الدنيا...
- (يُقبل يدها) وأنا كمان.. بحبك أوي....

كاميليا والقدر

- يضع مفاتيح سيارته وعلبة سجائره على المنضدة... يقوم بسحب كرسي... يجلس أمامها....
- (يعقد حاجبيه....) المكان فاضي....
- (تبتسم له في هدوء...) وأنت عاوزه زحمة ليه؟!
- (يحرك يده باللامبالاة....) عاوز أشوف بشر... ما كنا قعدنا في البيت عندي وخلص....
- (تتنهد.... تحدق به....)
- (يشعل سيجارة دون أن ينظر إليها....) إيه.. هنتخانق؟!
- (تحرك رأسها بالنفي...) لو اتكلمنا عادي زي البني آدمين... مش هنتخانق... لو قعدت تستظرف وتتوه في الكلام.... آه... هنتخانق....
- (ينفث دخانه.... يحدق بها بابتسامة باردة....)
- (تحدق به... تبدو عليها علامات الغضب....)
- (يحرك رأسه بالنفي....) عاوزه إيه يا كاميليا!
- (تحدق به.....)

- (يطرق بأصابعه على الطاولة.....)
- (تنظر إلى داخل عينيه مباشرةً.....) عاوزه أتجوزك....
- (بنبرة باردة مباشرة....) ليه؟!
- (تبتسم...) عشان زهقت... زهقت من الأرف والعك والقذارة اللي إحنا عايشين فيها.....
- (يحرك رأسه بالإيجاب....) تمام... أنتي زهقتي... أنا مزهقتش... ومش عاوز أتجوز..... إيه الحل؟!
- (تتنهد....) أنا حقيقي مش فهماك... بجد مش فهماك.... عارف... (تحرك رأسها بالنفي....) أنا لو عندي شك واحد في الميه إنك مبتحبنيش... كنت سيبتك... ومن زمان... أنا لو عندي شك إنك شايفني شمال بقى... والجو الحمضان بتاع عملت معايا علاقة قبل الجواز ومش هينفع وبتاع... كنت سيبتك.... أنا ست مش غبية يا محمود.... وبحس... بفهم... وبحس.....
- (ينفث دخانه....) طيب... كويس إنك عارفة.... عاوزه إيه أنتي دلوقتي؟!
- (بنبرة أكثر علوا....) نتجوز!! ما دام بتحبني وبحبك... ويقالنا مع بعض سنين.... إيه المانع؟! إيه المانع في إننا نبقى ناس محترمة؟! إيه المانع إني أبقى مراتك في الحلال...؟! بدل الأرف اللي إحنا غرقانين فيه ده؟! إيه المانع?!!
- (يحرك رأسه بالنفي....) مش من حقك تسألني السؤال ده.... أنا من أول يوم عرفتك فيه.... وأنا كنت صريح معاكي من البداية.... قتلتك إني مش بتاع جواز.... ورضيتي بالوضع.... وحبينا بعض... وحصل اللي حصل ما بينا.... والحقيقة مفترکش

إني في يوم هنتك أو حسستك إنك رخيصة... دايما بديكي حقك
وزيادة... وبعاملك معاملة ملوكي....

- (تتنهد...) وأنا عمري ما في يوم أنكرت حاجة زي دي يا
محمود... بس أنا زهقت.... والله زهقت....

- (يحرك رأسه بالنفي...) إيه اللي جد؟!!!!

- (بنبرة منفعلة...) اللي جد إني بقيت بخاف... بقيت مرعوبة...
مرعوبة من ربنا... خايفة من سخطه علينا!!

- (نصف ابتسامة...) لا معلش مش فاهم... برده إيه اللي جد؟!
إيه؟! مكنتيش بتخافي زمان.....!؟

- (تحرك رأسها بالنفي... تبتسم بأم...) لا... مكنتش بخاف...
مكنتش دريانة ولا حاسة باللي أنا بعمله... كنت بعيش اليوم
بيومه وخلص....

- (ينفت دخانه... يحدق بها....)

- (تتنهد... تخفض رأسها...) محمود... إديني سبب مقنع واحد...
سبب واحد بس يخليك ترفض الجواز بالطريقة الغريبة دي.....!!

- (يطفئ سيجارته.....) مش هديكي حاجة... أنا مكذبتش عليكي
في حاجة... أنا كنت واضح معاكي من البداية... قتلتك...
(يبتسم ابتسامة عريضة ساخرة...) والله العظيم قتلتك... مرة
وعشرة ومية... أنا راجل حر... مش بتاع جواز..... وده آخر كلام
عندي يا كاميليا....

- (تطبق على فمها... لحظات صمت...)

- (لحظات صمت... يبعد نظره... ثم...) أنا مش فاهم... ما إحنا
كنا كويسين وزى الفل... أحسن من أي اتنين زفت متجوزين
حوالينا... وعايشين بالطول والعرض... وموفرلك كل احتياجاتك

النفسية والجنسية... (ينفعل....) إيه اللي جد عشان تهبي الهبة دي!!!!

- (تدمع عيناها.... نبرة خافتة....) اللي جد إني إرفت... وبقيت بخاف...

- (يحرك رأسه بالإيجاب....) تمام.... وإيه الحل؟!

- (تخفض رأسها.... نبرة خافتة....) معرفش.....

- (يعقد حاجبيه.... لحظات صمت....) كاميليا.. أنتي حامل؟!

- (نصف ابتسامة... رأسها ما زال منخفضًا....) لا... مش حامل...

- (يعقد حاجبيه....) أمال في إيه؟!!!

- (ترفع رأسها... عيناها غارقتان بالدموع الصامدة....) في إيه فأيه؟!

- (يحرك رأسه بالنفي سريعًا.... نبرة غاضبة....) مالك؟!!!! أنا

بصراحة مش داخل دماغي فكرة بقت بخاف وبقيت أرفانة والهري اللي بتهريره من الصبح ده؟! في إيه؟!!

- (تسقط دمعة....) في إيه إني بحبك.... بحبك أوي.... بحبك

وعاوازاك تبقى حلالي.... بحبك وآه بقت بخاف... بقت بخاف

علينا.... ومبقتش طايقة حاطة إيدك على جسمي... ومش

حاسة إني بطلب حاجة مش من حقي..... حتى لو كلامك

زمان كان غير.... الوضع دلوقتي مختلف.... والوضع يستاهل

إنك تقعد وتفكر وتعيد ترتيب حساباتك.... أنا أستاهل إنك

تكسر الحاجز ده..... (تجز على أسنانها غضبًا... نبرة باكية....)

أنا أستاهل إني أعيش محترمة.....!!!

- (نبرة تحدي ممزوجة بالغضب) وأنا مش هعيش غير حرياً

كاميليا.....!!

- (لحظات صمت... أكثر هدوءًا....) يعني إيه؟!

- (يقوم بالتقاط علبة سجائره ومفاتيح سيارته ويهم بالمغادرة...)
يعني كل واحد يعمل الي هوه عاوزه... وخليكي فاكرة... إن
ده اختيارك... قبل ما تقنعي نفسك إني راجل واطي.... وبتخلي
عنك.... (ثم يُغادر المقهى...)

دقائق... لتهم هي الأخرى بالرحيل... تتجه إلى منزلها... لتجد
والدها يجلس أمام التلفاز.... يحتسي قهوته... ويدخن سجائر
الكلبيوباترا....

- مساء الخير...

- (دون أن ينظر إليها...) مساء النور... أتأخرتي ليه؟!

- (تنظر إلى هاتفها.. الساعة العاشرة مساء...) متأخرتش...

- (يرتشف قهوته... دون أن ينظر إليها...) واللا أتأخرتي... (ثم
يتمتم ببعض السباب غير المسموع....)

- (تخفض رأسها....) ماما فين يا بابا؟!

- (لا إجابة....)

تتنهد تحرك رأسها بالنفي.... تتجه إلى غرفة والدتها... لتجدها
في شرفة الغرفة... تحتسي قهوتها... وتستمع إلى بعض طريبات أم
كلشوم... تضع يدها على وجنتها... وتبتسم.... تبتسم "كامليا".. ثم
تقبل والدتها من جبهتها... تجلس أمامها....

- (بابتسامة....) رايقة أنتي أوي يا ماما....

- (تبتسم لها....) آه... رايقة أوي....

- (ما زالت تبتسم....) أنتي إزاي قادرة تنفصلي عن الواقع بالشكل
ده... وتعيشي مع نفسك في الخيال.... إزاي؟!

- (تبتسم بسخرية... بألم... بأسف....) محيلتيش غيره يا بنتي....
- الخيال ده هوه اللي مصبرني على العيشة دي كل السنين دي....
- هوه اللي مخليني أستحمل صوته وحسه في البيت....
- (تبعد نظرها... ابتسامة أم....) ظلمتي نفسك... وظلمتينا معاكى...
- (تتنهد....) فات الأوان على الكلام ده....
- (تحرك رأسها بالإيجاب....) فات فعلا....
- (تضع يدها على يد ابنتها....) أحضرك العشا؟!
- (تغادر مقعدها...تقبل يدها) لا... لا... أنا هاخذ دوش سخن وأنام....
- (تقبلها من وجنتها...) ماشي يا نور عيني....
- تتجه "كاميليا" إلى غرفتها.... تقوم بالاستحمام.... تُعد كوبًا ساخنًا من الشاي الأخضر.... تجلس على سريرها.... تتفقد هاتفها.... "لا شيء".... القليل من خيبة الأمل.... القليل لأنها تعي جيدًا أن ما حدث بينها وبين "محمود" ليس بالهين.... ولكنها تخاف.... تخاف من قساوة قلبه.... تخاف أن يتخذ قرارًا لا رجعة فيه بالانفصال.... أو لربما.... ربما عليها أن تتخذ هي قرارًا كهذا.... الكثير من التفكير.... الكثير من الضياع.... الكثير من القلق.... ساعة ونصف الساعة.... من التفكير.... الآن... تبدو أكثر صلابة.... الآن تثق بقرارها أكثر.... يقينًا... إنه الحلال يا محمود.... أو الفراق بلا رجعة.....
- يمر أسبوع... دون أي اتصال من الطرفين.... كلاهما يتفنن في إظهار قسوته وقدرته على الفراق.... ولكن "كاميليا" في حالة نفسية يُرثي لها... تحتاج إلى الحديث... إلى مشاركة أحدهم ما بداخلها.... تقوم بهاتفه "وفاء"... صديقة الطفولة.... يتفقدان على المكان والزمان.... وقد كان....

وفي المقهى... وبعد أن أخبرتها بكل ما حدث في آخر لقاء بينها وبين "محمود".....

- (تتنهد وفاء.....) بتحبيه؟!

- (تبتسم بأم....) بحبه...

- (تحقق بها.....) متأكدة؟! بتحبيه بجد؟! واللا اتعودتي عليه...؟! واللا خيفة منه؟! خيفة من فراقه؟! خيفة من الحياة من غيره؟! خيفة على نفسك من بعده؟! خيفة تصارحي الي هيجي بعده بالتجربة الي عشتها معاه؟! بتحبيه؟! واللا كل ده!!!

- (تبتسم بتنهيدة.....) لا يا وفاء..... بحبه... بحبه بس... بحبه عشان مشفتش منه غير كل خير وحنية... بحبه عشان كان بيستحملني وأنا في أسوأ حالاتي... بحبه عشان قدر يحبني بجد وأنا عارفة ومتأكدة إن راجل زي محمود صعب أوي أنه يحب... بحبه عشان بحس معاه إني مميزة... وغير أي ست مرت عليه في حياته..... (تحرك يدها باللامبالاة...) سيبك من كل ده..... بحبه عشان قدر يحبني وأنا أصلا كلي عقد وكلايخ وأرف من جوه..... بحبه عشان حبه ليا خلاني أبقى سوية إلى حد ما يا وفاء... بحبه لدرجة..... (تتنهد... تطبق على شفيتها... تدمع عيناها.....) لدرجة إني قبلت إني أسلمه نفسي.... وأنا مش خيفة... قبلت بكل شروطه زمان... عشان بحبه... وكان عندي أمل إنه يتغير مع الأيام..... إنه يقبل بفكرة الارتباط الرسمي والجواز..... كان عندي ثقة في نفسي عالية أوي إني هقدر أغيرله تفكيره..... إني هكنله كل حاجة في حياته..... هخلي حضني ده بالنسباله الجنة وما فيها... بيته... وأمانه.....

- (ترتشف قهوتها... تبتسم....) وعرفتي عملي كده؟!

- (تحرك رأسها بالإيجاب مبتسمة....) آه عرفت.. وأكثر كمان....
- (تتنهد....) عندك فكرة عن سبب رفضه لفكرة الجواز؟! عنده مشاكل معينة؟! أهله؟! تجارب سابقة؟! أي حاجة من اللي بنسمع عنها دي؟!!
- (تحرك رأسها بالنفي....) فيه أسباب... بس اللي هيه عادية... اللي عند معظم الناس أساسًا... عادي... الكلام العادي.... (ابتسامة سخرية....) الكلام العادي الأهل....
- (تبتسم باستغراب...) زي إيه؟!!
- (تحرك يدها باللامبالاة....) يعني.... الجواز بينهي الحب... الجواز يجيب مشاكل... كل المتجوزين تعسا وحياتهم تقرف... الجواز يقيّد الناس.... الكلام ده.... بس لما بيتكلم عن الحاجات دي... بيتكلم بشكل سطحي جدا...!
- يعني إيه؟!!
- يعني مش ده السبب.... ولا حاجة من دول السبب....
- (تحقق بها قليلا....) ما يمكن مفيش سبب... يمكن الراجل فعلا مش عاوز يتجوز.... وبعدين ما تحطي نفسك مكانه.... بس مكانه بجد... لو مكانه.... في حالته دي... في وضعه ده.... واخذ كل حاجة تقريبًا... هيتجوز ليه؟!!
- (نبرة حازمة....) هيتجوز عشان اللي بنعمله ده حرام... اللي بنعمله ده اسمه زنا.... هيتجوز عشان مفيش سبب يخلينا نكمل العلاقة دي بشكل غير رسمي.... هيتجوز عشان ربنا ممكن يسخطنا من كتر الأرف اللي إحنا عايشين فيه.... هيتجوز عشان إحنا مش عيال صغيرة فرحانة بشوية جنس وخروجات

وفسح وبحبك ووحشتيني ومقدرش أستنغى عنك..... هيتجوز
عشان ألف سبب يا وفاء.....!!

- (تبتسم....) كاميليا... واضح إنك واخدة قرار....

- (تخفض رأسها.....) أنتي إيه رأيك؟!

- (تحرك رأسها بالنفي...) هوه أنا إمته وافقتك عالي أنتي

بتعمليه معاه عشان يوم ما تيجي تقوليلي إنك هتنتهي المهزلة

دي أقلك لا.... (تبتسم...) طبعًا معاكي.... وطبعًا لازم تسيبيه... لو

رفض إنه يكمل العلاقة دي بشكل شرعي وحلال قدام كل الناس

وقدام رب العالمين... يبقى تسبيه... وأكد ربنا مش هيسيبك...

وهيساعدك.... هيساعدك عشان أنتي أولا وأخيرًا واخدة القرار ده

خوف منه..... مش معنى إنك عملتي حاجة غلط... حتى لو

كانت كبيرة أوي زي دي إنك تكلمي فيها... ربنا رحمته واسعة...

ربنا حنين أوي يا كاميليا..... أوي....

- (تدمع عيناها.... تبتسم.....) هعمل كده... مش هعمل غير

كده.....

يمر أسبوع آخر... فالثاني... فالثالث... وخطوط الوصال بين

"محمود" و"كاميليا" لا تحمل رجاء... لا شيء... حتى إن "كاميليا"

قد أغلقت جميع حساباتها على مواقع التواصل الاجتماعي... لا

تعلم شيئًا عن أخباره... تشتاقه كثيرًا... ولا تعلم إن كان يبادلها

تلك المشاعر... لا تعلم إن كان يؤلمه الفراق حقًا... أم أنه قد تجاوز

ذلك بسلاسة.... يقتلها الحنين.... تفكر كثيرًا في الاتصال به... ولكنها

تراجع... كلما تذكرت آخر لقاء بينهما... آخر عبارة قبل الرحيل....

وأنا مش هعيش غير حر يا كاميليا".... كان صارمًا... جادا..... وكأنه

قد اتخذ هذا القرار من قبل أن يولد.....

- مالك؟!؟
- (يبتسم محمود ممسكًا بكوب المياه الزجاجي مبتسمًا...)
مفيش....
- (يتنهد صديقه المقرب فهد...) كاميليا...؟
- (نصف ابتسامة... يُحرك رأسه بالإيجاب....) وحشتي أوي...
طب مت...
- (يقاطعه....) مينفعش... مينفعش أكلها... كل واحد منا أخذ قرار... الموضوع انتهى.... (يبتسم بسخرية...) لا.. هوه واضح فعلا إنه انتهى... داخلين على شهر... معرفش عنها أي حاجة... محاولتش حتى إنها تكلمني... مكنتش متخيل إنها بالقساوة دي....
- (يحرك إصبعه بالنفي.....) قصدك بالقوة دي....
- يا سلام... وإيه الفرق يعني؟!؟
- لا فيه فرق طبعًا.... قساوة دي لما تبقى خلاص بايعاك... بايعاك يعني معتش فارق معاها... هونت عليها... بس هيه دلوقتي مش قاسية... هيه قوية وقادرة تستحمل أو بتحاول على قد ما تقدر إنها تستحمل بُعدك... عشان هيه مقتنعة بقرارها... زي ما أنت مقتنح بقرارك..... (نصف ابتسامة...) قرارك السخيف....
الأناني....
- (يشعل سيجارة.... يُبعد نظره.....)
- محمود أنا عاوز أسألك سؤال وتجاوبني بأمانة.... بمنتهى الصدق...
- (ينفث دخانه... نبرة سلام...) اسأل....

- أنا عارف إنك بتحب كاميليا.... بس.... يمكن... يمكن... مش
قادر تكمل معاها بشكل رسمي عشان اللي حصل ما بينكم
طول السنين دي... يمكن شبعنا منها... يمكن زهقت... يمكن...
(بتردد....) يمكن باصصلها بعين النقص أو حاجة.....

- (بيتسم بسخرية....) آه.. وإيه كمان... وإيه كمان يا متخلف!!؟

- (بيتسم محررًا رأسه بالنفي....) مش متخلف... أنا بحاول أفكر
معاك بصوت عالي..... بحاول أوضحك حاجة ممكن تكون مش
واحد بالك منها أو خايف تواجه نفسك بيها... يمكن تكون
مكسوف أو مستعيب تقول الكلام ده بصوت عالي.... عشان
كاميليا مقصرتش معاك في حاجة.... (يحرك رأسه باللامبالاة.....)
يمكن.....

- (ينفث دخانه.....) أنا بحب كاميليا... بحبها وعمري ما بصتلها
بصة نقص زي ما بتقول.... بحبها وأنا أول واحد في حياتها...
بحبها وأنا عارف ومتأكد زي ما أنا متأكد إنك قاعد أدامي
إن كاميليا كانت مخلصالي لأقصى درجة.... في وجودي وغيابي...
(ينفعل...) مخلصالي أكثر من نص مرات صحابك وصحابي اللي
إحنا عارفين عنهم بلاوي سودة.... بحبها وأنا.... (يصمت....)

- وأنت إيه!!؟!.... كمل.....!؟

- (يتنهد بعمق.... نبرة هادئة) مفيش.... أنا بحب كاميليا يا
فهد....

- (يعقد حاجبيه....) أنت فيه حاجة مخبها عليا يا ابني!!؟

- (يحرك رأسه بالنفي....) صدقني مفيش.... أنا بس.... مخنوق...
مكنتش متخيل إني بحبها الحب ده كله.... مكنتش متخيل إني
فراقها هيوجعني أوي كده.....

- مش قادر أتعاطف معاك الحقيقة..... عشان الحل في إيدك...
الحل اللي هوه أصلا فرض عليك..... مش همزاجك.... ده لو عاوز
تكمل معاها فعلا...

- (نصف ابتسامة....)

- (يرفع حاجبًا....) إيه مبتخفش؟! مخفتش؟! زيه!...!!

- (يحدق به دون إجابة.....)

- (يعقد حاجبيه.....) لا متقنعنيش إنك مبتخفش.... متقنعنيش
إنك فاجر لدرجة إنك بتعصيه وأنت مش خايف منه!?!

- (يحدق به دون إجابة)

- (يحدق به بقوة.... لحظات صمت....)

- (يبعد نظره.....)

- في إيه يا محمود?!?

- (ينفعل....) في إيه أنت يا فهد?!?!

- (يكرر.....) مبتخفش?!?

- (يحرك رأسه بالنفي.....) معرفش.... ساعات... ساعات بخاف.....

- والساعات الثانية اللي مبتقاش خايف فيها؟! بتبقى حاسس
بإيه?!?

- (بيتسم بسخرية....) يبقى مبسوط..... ومرتاح....

- (يحرك رأسه بالنفي.....)

- (نصف ابتسامة....) رد أنت بقى....؟! تفسرلي بإيه اللي أنا بحسه

ده؟! تفسرلي بإيه إني بقالي ثلاث سنين بعمل علاقة غير شرعية
مع واحدة... وحاجات تانية كتير..... غلط... وحرام.... وحياتي
ماشية فلة.... يمكن دي أكثر فترة في حياتي أنا مبسوط ومستقر



فيها جدا.... ماديا ونفسيا وكل حاجة ممكن تتخيلها..... flash
back بقى الله يكرمك من خمس سنين مثلا.... لما كنت ماشي
على الصراط المستقيم.... ده أنا مكنتش بفوت فرض يا أخي....
(يتنهد....) حياتي بقى كانت عاملة إزاي؟! ديون لطوب الأرض....
كنت كل يوم بصحى على مصيبة شكل... مكنتش ملاحق أقسم
بالله....

- (يقاطعه...) محمود أنت أألحدت؟!!!

- (يحرك رأسه بالنفي....) لا..... أألحدت دي معناها إني مش
مؤمن بوجوده..... بس أنا مؤمن.... مؤمن بوجوده..... أنا
بس مش فاهم.... مش فاهم هوه بيعمل فيه كده ليه....
ليه كل ما أقربله خطوة بيعذبني أكثر.... ليه كل ما أتناسي
وجوده.... ويفرجها عليا أكثر.... أنا مش فاهم..... (يحرك رأسه
بالنفي.....) ووصلت لمرحلة إني مش.. عاوز... أفهم..... أنا
مبسوط... ومرتاح..... ومعايا فلوس... ومش مديون... ومش
مذلول.... وبصحتي..... وبعصيه... وهوه شايفني.... وساييني....
يبقى إيه الي يخليني أخاف?!!! بالمنطق كده?!!! إيه الي
يخليني أخاف?!!!

- (يحدق به.... صمت تام....)

- (بيتسم....) رد..... جابوب.....!!!

- (يتنهد....) بص... والله العظيم.... أنا ما هقلك خطب ولا
مواعظ ولا كلام أنا متأكد إنك سمعته بدل المرة مليون.... بس
أنا هقلك حاجة واحدة بس.... (والله خير الماكارين).... إوعى...
إوعى... تفتكر إن فيه كلمة من كلامك ده صح.... حتى لو
كلامك مترتب بالمللي.... حتى لو وصلت لمرحلة ما أقنعت فيها
نفسك إنك صح.... إوعى تآمن للدنيا... ولا لبطش اللي خلقك...

لو مرجعتش عن اللي في بالك ده.... لو مستغفرش ربنا في اليوم
ألف مرة وأكثر... لو مرجعتلوش ذليل على ركبك.... هيخسف
بيك الأرض.... هيمدلك الحبل على الآخر.... وهيديك أكثر...
وأكثر... هيعميك أكثر... هيضلك أكثر.... وفي الآخر... هيزلك...
وهيكسرك.... وهيخليك تتمنى الموت... الموت اللي عمرك ما
هطوله بالساهل..... الفرصة لسه قدامك... إنك تراجع نفسك.....
يمكن ربنا بعثلك كاميليا في الوقت ده كآخر إنذار ليك... من
رحمته بيك.... يمكن حاجات عملتها زمان.... وبتشفعلك دلوقتي
عنده... ولسه بيديك الفرصة.... إنك ترجعه... وتخاف منه....
وتتحامى فيه.... تتحامى فيه حتى منه.... تقوله يا رب أنا مش
قد غضبك عليا.... ارحمني... ارحمني واغفرلي.....

- طب ما...

- (يُقاطعه بتعنيف....) اسمعني!!!! أنا لسه مخلصتش كلامي!!!
إوعى تكون فاكر إنك الوحيد اللي حاسس باللي حاسس بيه
دلوقتي...! لا فيه غيرك وأكثر منك كمان... ومروا بحاجات أوسخ
بكتير أوي من اللي أنت مريت بيها... وكانوا بيقولوا ليه يا
رب؟! ليه...؟! بس كانوا على درجة من العقل... مش هقلك
الإيمان.... الإيمان اللي في اللحظات دي بيتعرض لهزات في منتهى
العنف..... أنا بقلك.... العقل.... صوت العقل... اللي بيقلك...
إحنا ملناش غيره.... إحنا بتوعه.... إحنا عباده.... هتهرب منه
هتروح فين... لما الكون ده كله بتاعه.... هتهرب تروح فيه...
حتى لو هو اللي ظالمك... حاشا لله طبعًا إنه يظلم حد...
أنا بكلمك بمنطقك أنت.... يعني أنت دلوقتي لو محبوس في
أوضه متر في متر.... واللي حابسك مانع عنك ميه وهو وأكل....
وأنت بتموت خلاص... ومقتنع تمامًا أنه سجانك ظالم.... بس
هتتذللله.... هتقله والنبى أكلني... شربني... خرجني..... ما



بالك بقى بخالق الكون كله.... الي سمى نفسه الحق والعدل
والحنان والمانان..... مش هيعطف عليك... مش هيحن عليك....
مش هينصفك؟!..... فوق يا محمود.... فوق واستغفر.....
فوق وارجله.... ارجعله وارمي كل تكالك عليه... في الشر قبل
الخير..... في المصيبة قبل الفرج..... آمن بيه... بقوته... بجبروته...
بعده..... والأهم.... بحكمته.... حكمته الي ممكن تعد سنين
وسنين قبل ما تفهمها.... بس بعد ما بتفهمها.... هتحس قد
إيه أنت صغير وتافه.... هتحس قد إيه أنت كنت مذنب في
كل مرة رفعت عنيك فيها للسما وعاتبته... إحنا مش عايشين في
الدنيا سهيلة... الي عاوز حاجة بيعملها.... من غير رادع... رادع
نفسى قبل أي حاجة..... لو الإنسان كسر حاجز خوفه من الي
خالقه... لو كل واحد فكر بمنطقك ده في لحظة يأس.... صدقني
الدنيا دي هتفنى في لحظة.... أنا عارف إنك مريت بظروف
صعبة... بس أنا مدخلتش قلبك... معرفتش إيمانك ساعتها بربك
كان عامل إزاي... بتصلي وتصوم كده وخلص.... واللا كنت
بتصلي وأنت خاشع... وأنت ذليل... لما كنت بتدعي... كنت
بتدعي وأنت واثق فيه... واثق إنه عمره ما هيردك... ولا كنت
بتدعي بنص قلب... يا صابت يا خابت..... معرفش علاقتك
بالناس ساعتها كانت عاملة إزاي..... ظلمت كام واحد في حياتك
يا محمود؟! واللي ظلمتهم.. فاكرهم؟! فاكرهم كلهم?! وجعت
كام قلب?! هنت كام بني آدم في كرامته وكبريائه...؟! استقويت
على كام إنسان?! افتريت على كام روح?! راجعت كل الكلام
ده?! قبل ما تقرر إنك تبطل تخاف منه?! عمرك.... عمرك...
ما هتعرف تدابير ربنا ماشيه إزاي..... كل الي نقدر عليه.... كل
الي لازم نعمله... إننا نسلمه... ونخاف منه... ونحبه... غير

كده... أنت لا حول ليك ولا قوة... هو ده حجمك الحقيقي....
فاهمني؟! ولا أقلك أكثر!!!!!!

- (يحدق به بقوة..... صمت تام.....)

- (يتنهد بعمق.....) أنا خايف عليك..... خايف عليك زي ما
كاميليا خايفة عليك..... الناس الي بتحبك خايفة عليك يا
محمود.....

- (يُبعد نظره.....)

- (يُحرك رأسه بالنفي....) معنديش حاجة أقولها لك أكثر من الي
أنا قولتهولك..... ونصيحة أخ.... أخ بيحبك بجد... كاميليا تمسك
فيها بإيدك وسنانك... اعملها الي هيه عاوزاه..... اتجوزها...
على الأقل لسه في حد فيكوا بيخاف.... يمكن هيه تقدر تعدل
المائلة..... يمكن.....

- (يحدق به..... دون إجابة.....)

- (يقف مغادراً.....) أنا همشي... بيتهيألي أنت محتاج تقعد
لوحك شوية... (يربت على كتفه..... ثم يرحل.....)

يرحل "فهد" ليترك صديقه "محمود" في حالة نفسية يُرثي
لها... يبدو أن حديثه صادم... يجلس "محمود" ولأول مرة منذ
سنوات ليفكر ويتفكر... ليتذكر... ليراجع حساباته القديمة... كما
أخبره صديقه... يفكر... ويفكر... يستخدم عقله... كما أخبره
صديقه أيضاً... ولكن قلبه... بشكلٍ لا إرادي... يشعر... ولأول مرة...
منذ سنواتٍ... يشعر أنه خائف... بأنه مشتاق... بأنه محتاج...
ضعيفاً.....

ست ساعات متواصلة من التفكير..... تتتابه حالة من الفزع...

يقوم بمهاتفة "كاميليا".....

- ألو...
- (نبرة باكية.....) أنتي فين؟!
- (نبرة فزعة.....) في إيه؟!!!!
- (نبرة باكية... يكرر) أنتي فين؟!
- (نبرة فزعة....) أنت اللي فين وأنا أجيلك حالا!!!
- (نبرة باكية... حالة من الضياع...) مش عارف... مش فاكر...
- (تتنهد وقلبها يوشك على الانفجار من القلق عليه...) محمود.....
- محمود... حبيبي..... أنا معاك... أنا معاك ومش هسيبك...
- (تحاول تمالك أعصابها... نبرة شبه باكية...) والله العظيم ما هسيبك... بس قولي أنت فين حبيبي... وأنا هجيلك...
- (لحظات صمت..... يُحاول التركيز قليلا....) أنا في...
- أيوه!! فين!!
- (بيكي على الهاتف.....)
- تقوم بإنهاء المكالمة.... تتصل بـ"فهد" على الفور.. فهي تعلم بأنه صديقه المقرب....!!
- ألو؟!
- (نبرة فزعة....) فهد! محمود فين؟!
- (بقلق...) في إيه؟!
- (نبرة باكية....) متصل بيا وهو منهار وأنا مش عارفه هو فين ومش فاهمة منه حاجة... شكله زفت على دماغه شارب!!!!
- (بيتسم.....) طب إهدي... إهدي لو سمحتي... أنا هعدي عليك هخدك ليه....

- (يتنهد... يستغفر الله.....)
- (بنبرة باكية....) محمود فين؟!
- (يُحرك رأسه بالإيجاب...) هوديكى لمحمود....
- جراه حاجة?!?!
- (يُحرك رأسه بالنفي....) محمود كويس وزى الفل... لو سمحتي إهدى بقى شوية... عشان هو دلوقتي فعلا محتاجك جدا.. ومينفعش تقابليه بالمنظر ده... أنا أصلا مش هوديكى ليه لو مهديتش يا كاميليا!!!!
- (تحاول السيطرة على خوفها... تُحاول أن تهدأ قليلا.....)
- (يتنهد... ويستغفر الله.....)
- (نبرة خافتة... حزينة....) محمود ماله يا فهد؟!
- (ينظر إليها....) هو هيفهمك كل حاجة..... هو قلك إيه لما كلمك؟!
- (تُحرك رأسها بالنفي....) مفهمتش منه حاجة... كان بيبيكي....
- (يُحرك رأسه بالإيجاب... دقيقة... يقوم بالوقوف أمام on the run) ثواني وجايلك....
- وبعد مرور ثلاث دقائق... يناولها عصير ليمون مثلج.... ثم ينطلق بالسيارة مرة أخرى....
- (ينظر إليها....) إهدى بقى لو سمحتي خالص... إهدى...
- (تُحرك رأسها بالإيجاب.....)
- (يشير للعصير....) إشرية بعد إذنك....
- (تُحدق بالعصير....)

- (منفعلا...) ما تشريني يا كاميليا.. أكيد مش هخدرك وأخطفك!!!
- (تبتسم بخجل...) أنا آسفة والله مش قصدي.. أنا بس...
متخلبطة ومش فاهمة حاجة... أنا....
- (يُقاطعها.....) مفيش حاجة.. بس إشربيه وإهدي... مينفعش
تقابلي محمود وأنتي كده.... إشربيه وحاولي تظبطي وشك...
وإهدي....
- (تبتسم... بحزن... تُحرك رأسها بالإيجاب... وتبدأ بتناول العصير)
نصف ساعة.... يقف أمام المقهى الذي قام بترك "محمود" فيه...
- (يبتسم لها...) إنزليه....
- (تلتفت حولها...) أنزله فيه؟!
 - (ما زال يبتسم....) هتلاقيه جوه.... في الكافيه....
 - (تُحدق به....)
 - (يُحرك رأسه بالإيجاب...) يلا....
 - (لحظات.... تقوم بفتح باب السيارة... تنظر لفهد...) شكراً...
 - (يُحرك رأسه بالإيجاب....)
 - (تُغادر السيارة....)
 - (يُناديه فهد...) كاميليا...!!!
 - (تلتفت له....)
- (ينظر إلى داخل عينيها مباشرة...) محمود ده راجلك!! خليكي
ست على حق ورجعيه لحضنك تاني.....!! محمود عمره ما حب
واحدة غيرك!!! ولا هيحب واحدة غيرك!!!!
- (تبتسم.. تدمع عيناها.....)

- (بيتسم لها.....) يلا!!!

بخطواتٍ بطيئةٍ.... تتجه إلى المقهى.... الساعة الآن... الواحدة بعد منتصف الليل.... والمقهى قد خفت إضاءةته... فارغ... بلا بشر.... ها هو "محمود" يجلس على طاولةٍ في زاويةٍ بعيدةٍ في المقهى.... يضع رأسه على الطاولة.... يلف ذراعه حول وجهه.... تتقدم ببطء نحوه.... تضع يدها على كتفه برفقٍ... يرفع رأسه ببطء.... تلمحها عيناه الحمران كالدم... فيقفز من مقعده... يلف يديه حول خصرها كالطفل.... وينهار في البكاء.... تُمسك برأسه وتضمه بقوةٍ.... نصف دقيقة.... نصف دقيقة تُعادل عمراً.... وأكثر.... يفلتها برويةٍ.... ينظر إليها.... بنبرةٍ خافتةٍ... "متسبنيش....".

- (تبتسم.... عينها دامعتان.. تُحاول تمالك أعصابها...) مش
يهيصل... أنا معاك.... معاك يا قدرتي....

- (بيتلغ غُصته... يُحذق بها...) قدرك!؟

- (تمسك بيده... تدعوه للجلوس على المقعد.... تجلس بجواره....)
آه قدرتي.... قدرتي.... قدرتي ومش هسيبك.... وهتجوزك....
(تبتسم...) يا إما هقتلك.... وأنت عارف إني أعملها.... (تبتسم)
(أعملها... ونص....

- (يمسك يدها بقوة.... تتساقط دموعه...) أنا تايه... وضايح....

- (تبتسم....) وأنا بحبك....

- (يضم يدها بقوة أكبر.. ما زالت دموعه تتساقط....) أنا
خايف....

- (تبتسم بألم....) وأنا بحبك....

- (نبرة باكية....) أنا خايف أوي....

- (تبتسم.. تبدأ دموعها بالتساقط....) وأنا بحبك أوي....

- (يضع كلتا يديه على وجنتيها بقوة.... نبرة باكية....) بتحبيني!!؟
- (تضع يدها على يده....) بحبك... وغفرتلك... ولسه هغفرك....
- كل اللي جاي..... أنت مني.... أنت قدري.....
- (يحدق بها..... تتساقط دموعه بشراسة.... ما زال يضع يده على وجنتها.. ولكن... بحنان.... يتأملها....)
- (تُحدق به هي الأخرى... بابتسامة حنان.....)
- دقائق على هذا الوضع..... يبتسم لها..... يقف... يُمسك يدها....
- يلا نمشي.....
- (بتردد....) محمود.... أنا... مش هروح معاك....
- (يبتسم...) هوصلك البيت.... بيتك.....
- (تُحرك رأسها بالإيجاب مبتسمة...)
- (يقترب منها....) لحد ما تبقي مراتي.... أدام ربنا.. وأدام العالم كله...
- (يتجمد وجهها.... تتساقط دموعها... تضمه بقوة....)
- (يضمها هو الآخر...)
- وبعد مرور شهر.. ونصف....
- اليوم... هو اليوم الموعود... يوم الزفاف.... زفاف "محمود" و"كاميليا"...
- الساعة الآن..... "العاشرة" صباحًا.... تستيقظ "كاميليا" بابتسامة رضا... تتنهد.... ثم تتجه إلى غرفة والدتها.... لتجد ثلاث حقائب خلف الباب... تعقد حاجبيها.... ها هي ذي والدتها.. تستمع إلى فيروز... ترتشف قهوتها في الشرفة.... تبتسم....
- (نبرة قلق....) ماما...!!

- (تمسك يدها... تقبلها....) إيه يا نور عيني....
 - (تبتسم بألم.....) إيه... إيه الشنط دي....
 - (تشير إلى المقعد الفارغ....)
 - (تجلس أمام والدتها.....)
 - (تبتسم.....) النهاردة أسعد يوم في حياتي..... النهاردة أنا بجوز بنتي ونور عيني..... النهاردة بنتي عروسة... عروسة قمر.....
 - (تبتسم.. بألم...) ماما... إيه الشنط دي....
 - (تبتسم.... تنظر للسماء... ثم تنظر إلى كاميليا....) النهاردة... أنا حرة...
(تُحدق بها....)
 - (تُحرك رأسها بالإيجاب... بابتسامة جميلة....) النهاردة... أنا حرة... دوري في البيت ده انتهى..... النهاردة أنا ست حرة.....
 - (تبتسم.... تتساقط دموع عينيها..... ثم تُسارع لضم والدتها بقوة...)
 - (تبكي هي الأخرى.....) سامحيني يا بنتي... سامحيني على كل حاجة...
 - (تُقبل يدها بحنان....) مسامحاكي... مسامحاكي يا أمي.....
- اليوم.... هو اليوم الموعود.... يوم الزفاف... زفاف "كاميليا" إلى نصفها الثاني.... إلى قدرها "محمود".... وزفاف أمها... إلى "الحرية" ... إلى العيش بكرامة.... من قال إن القدر غير منصف؟! كل شيء ميعاد... بمشيئة السماء....

قدرها لتشفع

الساعة الرابعة فجرًا.... ونور الفجر قد بدأ بالانسياب بين سواد الليل.... نافذة الشرفة مفتوحة على مصراعيها.... و"لمى" تُلقِي بجسدها العاري على صدر زوجها "يوسف".... يوسف الذي أنهكته ليلة الحب.... أما هي... فلم تستطع النوم.... ما زالت تتأمل وجهه.... تمر بأصابع يدها برقّةٍ على عينيه ووجنتيه وشفتيه.... تُحاول على قدر المستطاع أن تُشبع ذاكرتها وجميع حواسها بكل تفاصيله.... استوقفها ذلك المشهد الذي كان يسبق ليلة الحب هذه بيوم واحد فقط.... فأزاحت جسدها من على صدره ببطء.... وقامت بارتداء قميصه الذي قامت بتمزيق أزراره منذ بضع ساعات فقط.... ابتسمت.... واتجهت نحو الشرفة.... تنهدت....

- (بعينين دامعتين...) ليلة واحدة أخيرة....
- (صمت قليل.... يُحرك رأسه بالنفي....) ليه....!؟
- (تطبق على فمها... تتساقط دموعها....) عشان خاطري... ليلة واحدة بس.... عاوزه أشبع منك.... عاوزه أودعك....
- (يقوم بمسح دموعها بحنان.... يُقبل ثغرها....) حاضر....

- (هنا تنظر له... تنهمر دموعها مرة أخرى.... تدفس رأسها في صدره... تنفجر في البكاء.....)

- (هنا يقرر حملها إلى الداخل..... وعلى الفراش... يضمها إلى صدره... بلا حديث..... ما زالت دموعها تتساقط على جسده نصف العاري)

- (وبعد نصف ساعة... يستسلمان إلى النوم.....)

وفي تمام الساعة العاشرة... يستيقظ هو... فيقرر إعداد فطور شهي مكون من كل ما تحبه "لمى" بالإضافة إلى القهوة بالحليب المحلى..... يقف في منتصف المطبخ... ليجدها تقف أمامه بعيدا... بابتسامة..... يتبسم لها هو الآخر..... تقترب منه... تُحيط عنقه بذراعيها... يقوم بحملها ثم وضعها على طاولة إعداد الطعام..... "دقايق... وأحلى فطار هتكليه في حياتك هيبقى أدامك"... تبتمس له.....

وعلى طاولة الطعام.... لا حديث بينهما.... يكتفیان بالابتسامة.... ثم يقرر هو كسر هذا الصمت....

- هشوفك بالليل؟!

- (تتنهد....) أكيد.....

- (يبعد نظره.... يخفض رأسه) لمى....

- (تحقق به.....) هتشوفني بالليل يا يوسف....

- (يحرك رأسه بالإيجاب.... يبتسم..) حلو الفطار؟

- (تقف... تضع يدها على وجهه.... تقترب منه كثيرا.... تتأمله....

تبتسم له) مش أوي..... (ثم تتجه إلى الغرفة لتبديل ملابسها.....)

أنا هلبس وأنزل.... كلمني لما تخلص عشان نتفق هنتقابل

فين.....

وبعد مرور عشرين دقيقة.... تتجه إلى باب المنزل مغادرة...
يستوقفها "يوسف".....

- أوصلك!؟

- (تبتسم له ابتسامة عريضة...) لا.. ما أنا هاخذ مفاتيح العربية...
صرف نفسك أنت بقى النهاردة..... سلام.

- (يبتسم لها ابتسامة جميلة...) هي بقت كده..... سلام.

تلوح له بابتسامة.... تغلق باب المنزل.... وفي السيارة تُجري
مكالمة هاتفية بشريكها في العمل...

- ألو...

- أيوه يا رحيم... الدنيا عندك عاملة إزاي!؟

- لا... كله تمام.. مفيش جديد.

- محتاجني في حاجة طيب!؟

- أنتي مش جاية ولا إيه!؟

- لو محتاجني في حاجة ضروري هاجي... لو مفيش... فبعد إذذك
هاخذ النهاردة off

- (يصمت قليلا...) امممممم... لا مفيش حاجة مهمة أوي....

- طب تمام....

- أنتي تمام طيب!؟

- آه آه... كله تمام....

- (يتنهد...) ماشي...

- لو فيه حاجة كلمني.... سلام.

- سلام.

تُنهي المكالمة وتُجري أخرى بصديقتها "منال"...

- فاضية؟

- إمتى؟!

- دلوقتي؟! هعدي عليكى لو فاضية....

- آه.. فاضية لحد ثلاثة كده...

- طب البسي....

- باي.

- سلام.

تمر عليها... لتصحبها إلى أحد المطاعم ذات الطلة النيلية الرائعة....

وفي المطعم.....

- (تبتسم لها.....) وشك مجهد ولا أنتي مش حاطة ? make-up

- (تبتسم لها.....) لا حاطة.... بس أنا تعبانة شوية....

- (صمت قليل...) طب اتكلمي.... أنا سامعاكي....

- (تنظر بعيداً.. ثم تُحرك رأسها بالنفي.....) عاوزه أطلب منك

طلب...

- (تحقق بها.... تحرك رأسها بالإيجاب.....)

- (تتنهد... ثم تنظر لها مباشرة بابتسامة....) عاوزاكي تسحليني

معاكي الفترة الجاية.... اشغليني بأي حاجة.... أي حاجة يا

منال.... متسبنيش لنفسى.... الفترة الجاية مينفعش أكون

لوحدي.... حتى لو أنا شخصيا طلبت منك إنك تسبيني

لوحدي..... إوعي تسبيني لوحدي..... تقدرى تعملي ده؟

- (تحرك رأسها بالإيجاب... ولكن تبدو عليها علامات التساؤل....)

مش هسيبك.... بس فهميني.... في إيه؟!

- أنا ويوسف هنطلق.....
- (تعقد حاجبيها بذعر...) نعم!!!!!!
- (نصف ابتسامة.....) هنطلق..... (تبتسم ابتسامة عريضة....)
- النهاردة غالباً.....
- أنتي بتقولي إيه?!?!
- (تحرك رأسها بالإيجاب.....) إهدي!!.....
- (تتنهد بسخونة... تنتظر بعيداً... ثم تعاود النظر إليها....) إيه اللي حصل؟! فجأة كده...!?
- (تحرك رأسها بالنفي.....) لا.... بقالنا فترة علاقتنا فيها خلل... بس مكناش عارفين نخط إيدنا على الخلل ده.... أو مكناش فاهمين بمعنى أصح.... (تتنهد) بصي.... الكلام كتير أوي.... وأنا بجد مش قادرة أتكلم دلوقتي في حاجة.... هفهمك كل حاجة بعدين..... أنا بس كنت عاوزه أقلك الكلمتين دول..... خليكي معايا الفترة الجاية.... (تبتسم لها بحزن... بصوت ضعيف مهزوز) متسيبنيش.....
- (تضع يدها على يدها بحنان..... تُحدق بها... تحرك رأسها بالإيجاب مراراً وتكراراً.....)
- (تحرك رأسها بالإيجاب هي الأخرى..... تنتهد مبتسمة.....) عاملة إيه مع رحيم?!
- (تبتسم... تخفض رأسها... تنظر لها....) رحيم مش بتاع جواز يا لمى.... (تنظر بعيداً....) رحيم أهبل باين....
- (تبتسم ابتسامة عريضة.....)
- (تبتسم لها....) آه والله يا بنتي.....

- بتحببته؟! -
- (تحرك رأسها باللامبالاة....) ساعات.... -
- (تعقد حاجبيها.....) -
- ساعات.... ساعات بحس إني بحبه.... -
- عاوزه تتجوزيه طيب؟! -
- (تبتسم ابتسامة استهزاء.....) أنا عاوزه أتجوز وخلص يا لمى.... -
- مش فارقة بقى.... رحيم من عبد الحليم..... أنا زهقت.... بجد -
- زهقت.... وعاوزه أتجوز..... زهقت من المرحلة اللي أنا فيها -
- دي..... يا ستي إن شاء الله أتجوز وأطلق.... مش مهم.... المهم -
- إني أطلع من المرحلة اللي أنا فيها دي..... أي تغيير.... أي حاجة -
- يا شيخة..... -
- (تحرك رأسها بالنفي..... بحنان...) غلط..... اللي بتقوليه غلط... -
- (تحرك يدها باللامبالاة...) مش مهم.... غلط بقى صح.... مش -
- مهم.... -
- واضح إنك جايبه أخرج..... -
- (تتنهد ثم تبتسم ابتسامة عريضة....) ياااااه... أخري بس؟! ده -
- أنا عديت أخري ده من زمان والله يا بنتي.... -
- (بحنان....) مالك بس.....؟! -
- (بلهجة اندفاعية قوية....) تعبانة!!!! تعبانة!! جنسيا ونفسيا -
- وماديا وخزعليا وكل حاجة ممكن تتخليها.....!! أنا تعبانة.....!! -
- تعبانة وزهقت... زهقت من كل حاجة... وكل حد.....!! زهقت -
- من كلمة استنتي....! زهقت من إحساسي بالوحدة.....!! زهقت -
- من كتر ما أنا عمالة برخص نفسي وأنا أصلا ما بعملش حاجة -
- لا حرام ولا عيب!!! زهقت من كمية العلاقات اللي عمالة أدخل

فيها وأطلع منها.....!! يا بنتي أنا بطلت أحس بأي حاجة والله... اللي هوه أنا ممكن أحب أي حد... أي حد... أي حد هيقى كويس معايا وحنين عليا... أنا هحبه... معدش ليه شروط ولا مواصفات ولا مقاييس ولا طلبات... أنا عاوزه حد ييقى كويس معايا وخلص.....

- (تحديق بها... بشفقة....)

- (تبتسم... نصف ابتسامة...) آه يا لمى... أنا وصلت للمرحلة دي... ويمكن أقل كمان..... أنا بقيت بكراش على عامل الـ delivery يا أمي... تخيلي!!!! (تحرك رأسها بالنفي مستهزئة....) وتقولي جايبة آخرك....

- (تتنهد..... صمت قليل.....) وضعك إيه مع رحيم يعني دلوقتي!؟

- (تحرك كتفيها باللامبالاة.....) ولا أي حاجة... قتلتك رحيم مش بتاع جواز.. ده واحد عاوز يقضيها تنطيط وخروجيات وكافيهات وسفر.....

- خلاص... سيبيه...!!!

- مش عارفه أسيبه....

- ليه!؟

- (تبتسم باستهزاء....) بيسليني.... بيملى وقتي....

- (تبعد نظرها حانقة عليها....) لا.. ده اسمه استهبال... ورخص!!

- (تحرك رأسها بالإيجاب مبتسمة....) ما أنا عارفة....

- (تنظر لها....) وآخرتها!؟

- (تحرك رأسها بالنفي.....) معرفش.....



- (تحديق بها..... صمت قليل..... تنتهد....) الفترة الجاية دي بتاعتك دي..... أنا مش هسيبك كده.....
- (تبتسم....) وأنتي هيبقى فيكي حيل تشدي حد يا "لمى".... ربنا يعينك على اللي أنتي داخله عليه.... أنا بس....
- (تقاطعها....) تاكلي؟!
 - (تحرك رأسها بالإيجاب....) يلا ناكل.....
- الساعة الآن الثانية والنصف ظهرا... بعد أن قامت "لمى" بإيصال صديقتها إلى مقر عملها.... تتجه هي إلى مقر عملها هي الأخرى... وفي الشركة...
- (يعقد حاجبيه....) أنتي مش قلتي مش جاية....
- كان عندي حاجة خلصتها بدري فقلت أعدي... يمكن تكونوا محتاجين حاجة.....
- اتغديتي؟!
 - (تحرك رأسها بالإيجاب...) آه... اتغديت مع منال...
 - (يرفع حاجبيه....) منال؟!
 - (تبتسم....) آه... إيه الغريب في الموضوع يا رحيم؟!
 - لا.. مش غريب ولا حاجة...
 - (تبعد نظرها....) طيب....
 - (يحدق بها.....)
 - قولي.... عملت إيه مع الوفد الكوري؟!
 - مضيئا الحمد لله معاهم.....
 - بشروطنا؟!
 -

- (بيتسم لها....) بشروطنا.....
- (دون أن تنظر له....) طب تمام.....
- (صمت قليل...) هوه أنتي زعلانة مني في حاجة؟!
- (تحرك رأسها بالنفي... ببرود تام) لا... ليه؟!
- مش عارف... حاسس إنك مضايقة.... أو قرفانة.....
- (تتنهد..... تحدق به دون إجابة....)
- منال قاتلك حاجة؟!
- (نصف ابتسامة....) هتقولي إيه؟! وإيه اللي هيحيب سيرتك في قعدتنا أساسًا يا رحيم...؟!
- آه صح... إيه اللي هيحيب سيرتي في قعدتكم أساسا...! يمكن عشان الهانم تبقى صحبتي...!! مثلا يعني!!!!
- (بتتسم....) أنا מבجش كلمة صحبتي دي على فكرة... وحشة أوي... ممكن تقول حبييتي... ألطف مش كده؟!
- (يحرك رأسه بالإيجاب...) هيه ألطف طبعًا... بس منال مش حبييتي.... عشان أقول عليها حبييتي.....
- وهيه عارفه إنها مش حبييتك؟!
- آه عارفه يا لمى.....
- إزاي؟!
- إزاي إيه؟!
- عرفت إزاي إنها مش حبييتك؟! أنت قتلتها إنك ما بتحبهاش...؟!
- وش كده؟! صراحة!!

- أكيد مش كده يعني..... مش هروح أقولها أنا מבحبكيش على
فكرة.... بس ببيان... في طريقة التعامل... في المشاعر... كده
يعني... وهيه أكيد حاسة بحاجة زي دي..... أنا اللي أعرفه
إن الستات شطار أوي في حكاية المشاعر دي.... بتلقوها وهيه
طائرة....

- (تحقق به... في منتصف عينيه... صمت قليل...) طب أنت
معاها ليه؟! طالما الموضوع كده؟!

- (يتنهد.....) ردي مش هيعجبك....

- (بتتسم له.....) بتسليك.... بتملى وقتك.....

- (يحدق بها.....) آه يا لمى... بتسليني وبتملى وقتي... زي ما أنا
بعمل بالطبط في حياتها..... بسليها... وملى وقتها....

- (تحرك رأسها بالنفي..... باستهزاء) هايل والله يا شباب....
هايل....

- أنتي مضا....

- (تقاطععه.....مغادرة) أنا لازم أمشي دلوقتي..... لو فيه حاجة في
الشغل كلمني.... سلام....

وهكذا... غادرت "لمى" مقر الشركة... تشعر بالسخط التام...
تجاه كل شيء.... حالة من الغضب... تقرر التوجه إلى أحد المقاهي...
لتختلي بنفسها قليلا قبل أن يهااتفها زوجها "يوسف"..... وقد كان....
وفي المقهى.... تقوم بتدخين "الأرجيلة" وترتشف قهوتها المضاعفة....
تستوقفها الذكريات.... لا مجال لهدنة نفسية الآن....

- حلو!!?

- (بيتسم ابتسامة عريضة.... تبدو عليه علامات الدهشة....)

- يوسف..... (تبتسم...) حلو؟!
 - (يقترب منها.....) حلو إيه بس..... حلو أوي..... أوي.....
 - (تدفعه بعيدا... بدلال.....) يوسف.....!!
 - (يتمالك نفسه.....) حلو يا حبيبي.... بس أكيد مش هتلبسيه....
 - ليه؟!!!!
 - (يقف خلفها... ثم يديرها باتجاه المرأة... يشير إلى صدرها...)
 ده إيه ده؟!
 - (باستغراب....) إيه؟!!
 - إيه أنتي؟! عريان يا حبيبتى.... عريان يا ماما.....!!
 - (تلتفت له... بحنان...) يا يوسف... ده فستان فرح... يعني عادي
 لما يكون مكشوف شوية يا حبيبي.... ما كل البنات بتلبس كده
 يوم فرحها.....
 - ده عند أم لطفي.... اللي بتنور وتطفي.... مفيش الكلام ده..
 انسي!!
 - (بدلال...) يوسف.....!!
 - (يدفعها إلى غرفة تبديل الملابس....) اللي بعده.....!!
 - (على باب الغرفة...) يوسف.....!!
 - (يقوم برفع حذائه مزاحا....) هتدخلي ولا.....!!!!
 - (تتأفف... متجهة إلى الداخل.....)
 - (يقف خلف الباب...) شوفلنا حاجة حشمة كده الله يكرمك....

بعد مرور عشر دقائق.... تطل عليه بفستان رائع.... أكمام دانتيل... عاري الكتفين... لا يبرز من منطقة الصدر الكثير.... تبدو جميلة للغاية....

- (يحدق بها.... تدمع عيناه.....)

- (تبتسم....) هو ده؟!!

- (يحرك رأسه بالإيجاب....) هو ده..... (يقترّب منها... يضمها...)

يقبلها من رأسها.... يهمس لها.....) ملكة.... أنتي ملكة....

"تشرّبي حاجة ثانية يا فندم..." هكذا قاطعها النادل... قاطع

جبل ذكرياتها... تنظر له شزرا بعينين دامعتين.... بغضب...

- أنا ناديتك؟!!

- (لا إجابة.. يشعر بالإحراج....)

- أنا بشرب قهوة.... هشرب إيه تاني وأنا في إيدي فنجان

قهوة.....؟!!

- (يخفض رأسه.... منسحبا....) أنا آسف....

تتنهد.... تمسح دموعها... تدخن "الأرجيلة.." تتفقد هاتفها....

"أنت فين يا يوسف.." هكذا تمتمت.....

نصف ساعة.... وها هو "يوسف" يتصل بها....

- ألو....

- أنت فين يا يوسف...؟

- لسه مخلص حالا.... أنتي فين؟!!

- أنا في zuchino

- طب حلو أوي.... نصاية هكون عندك....

- متتأخرش.....
- حاضر..... سلام.
- سلام.....
- نصف ساعة... تمر كأيام..... وها هو يوسف... يطل عليها...
- بيتسم لها... يُقبلها من جبينها كما هي العادة..... يجلس أمامها.....
- (تحقق به.....)
- (يحدق بها..... بابتسامةٍ... ثم يكسر الصمت...) أنا...
- (تقاطععه....) يوسف... إحنا هنطلق..... صح؟!
- (يتنهد.....)
- (تحرك رأسها بالنفي... تبعد نظرها... ثم بنبرة حزينة للغاية...)
- يوسف أنا مش فاهمة حاجة..... أنا بجد تعبانة أوي..... أنا
- مش فاهمة حاجة.....
- (يضع يده على يدها بحنان....) وحياة أغلى حاجة عندك...
- متعيطيش.....
- (تبتسم له... تمسك يده بقوة...) أنت... أنت أغلى حاجة عندي
- يا يوسف...
- (يسحب يده برفق.... يحرك رأسه بالنفي.....)
- (تخفض رأسها..... صمت... كثير... مؤلم.....)
- (بتردد....) أنا..... أنا....
- (تنفجر غضبا بنبرة باكية.....) أنت إيه!!!! أنت إيه يا يوسف!؟!!
- انطق!... اتكلم!!! أسبوع شفت فيه المزار!! قتلتي مش هينفع
- نكمل.....! بحاول أفهم..... وأنت ساكت..... !! بقالك ثلاثة شهور
- متغير معايا وأنا مش فاهمة حاجة!!! ويقول ضغط شغل...

وضغط حياة... وضغط زفت!!! (تبكي....) إيه يا أخي..... إيه!!

ارحمني بقى!!! ارحمني.....!!!

- (يمسك رأسها بقوة.... يحدق بها بعينين دامعتين... يقترب منها

كثيرا.....) أنا..... خنتك!!!!!!

- (تجحظ بعينها... دموعها ما زالت تتساقط....)

- (ما زال ممسكا برأسها... بنبرة خافتة....) أنا خنتك يا لمى.....

- (صمت قليل.... ثم تدفعه بعيدا.....)

- (يخفض رأسه.....)

- (تكسر الصمت... بنبرة مهزوزة) يعني إيه... يعني إيه خنتني!!!?

- (دون أن ينظر إليها.....) يعني خنتك.... فمت مع واحدة

تانية....

- (تحرك رأسها بالنفي... بنبرة خافتة جدا....) يعني إيه.....

- (ينظر لها بعينين كالدم..... لا إجابة...)

- (بنبرة باكية...) يوسف.... يعني إيه!?

- (يضع يده على وجنتها...)

- (تزيح يده بقوة....) متلمسنيش....!!

- (.....)

- (تبتلع غصتها.... بصوت منخفض جدا...) مين....!?

- (يتجنب النظر إليها...)

- (بنبرة سريعة هستيرية....) مين.... مين؟! مين يا يوسف.... قولي

مين?!?

- (ينظر إليها.... بضعف شديد....)

- (يعلو صوتها... بغضب...) مين!!!! انطق!!!!!!!!!!!!!!
- (يحدق بها.....) منال....
- (تعقد حاجبيها...) منال؟! منال... مين؟!؟
- (ما زال يحدق..... لا إجابة.....)
- (بنبرة باكية.....) منال مين يا يوسف؟! يوسف..... منال مين؟!؟
- (يحدق بها.... تنساب دموعه.....)
- (تبكي.....) منال مين يا يوسف..... منال مين؟!؟
- (تضاعف دموعه..... تنساب..... بأم....)
- (تبكي بحرارة... بجنون.....) لا يا يوسف... لا..... لا..... مش منال
يا يوسف..... لا يا يوسف..... لا.....
- هنا.... يلتفت يوسف بأن جميع من في المقهى ينظر إليهما.....
- لمى..... اهدي.....
- تنطلق "لمى" مسرعة إلى دورة المياه..... تبكي بجنون..... تبكي
بشكل مرعب... هيسستيري.....
- ينتظر هو بالخارج.... يجتاحه القلق.... يتجه إلى طاولة تجلس
عليها سيدة بمفردها.....
- (باستحياء...) مساء الخير....
- (تبتسم له باستغراب...)
- أنا آسف جدا... بس.. أنا مراتي في الحمام واتأخرت أوي جوه...
مممكن بس تبصيلي عليها.... أنا قلقان..... أنا آسف جدا...
(تغادر طاولتها...) اسمها إيه؟!؟
- لمى.....

تحرك رأسها بالإيجاب.. وتتجه إلى دورة المياه..... لتجد فتاة تجلس على الأرض..... تبكي بشكل هستيري..... نعم.. إنها الفتاة المنشودة.....

- (تبتسم لها...) لمى؟!!

- (ترفع رأسها بعينيها المنتفتحتين من شدة البكاء....)

- جوزك قلقان عليكي أوي بره.....

- (تقف.... تحرك رأسها بالإيجاب مع ابتسامة لطف....)

- (تضع يدها على كتفها....) أنتي تمام؟! محتاجة حاجة؟!!

- (تساقط دموعها... تحرك رأسها بالنفي.....)

- (تحرك رأسها بالإيجاب... تبتسم لها..... ثم تلتفت مغادرةً للخارج)

- (تجلس مرة أخرى على الأرض.... تتنابها نوبة بكاء هستيري أخرى)

- (تعود الغريبة مرة أخرى إلى "لمى" تحديق بها بحزن شديد.....)
لمى؟!!

- (لا إجابة.... بكاء.... مؤلم....)

- (تقرر الغريبة الجلوس بجوارها على الأرض..... صمت قليل....
تحديق بها..... ثم تكسر الصمت..... دون أن تنظر لها....)
خانك؟!!!

- (ترفع رأسها... تحديق بها..... تحرك رأسها بالإيجاب....)

- (تقوم بمسح دموعها..... تبتسم لها....) كلهم كده.....
صديقي... كلهم كده.....

- (تحرك رأسها بالنفي... تساقط دموعها بشكل جنوني....)

- (تحديق بها بشفقة كبيرة....) اهدي..... كل اللي هقدر أقولهولك... إن الوجد اللي أنتي حاسة بيه دلوقتي.... هيخف....

مع الأيام..... مع السنين... أنا عارفة إن قلبك مكسور....
ووجعك مفيش حاجة ممكن توصفه.... بس... (تحرك كتفيها
باللامبالاة.....) هيه دي الحياة.... ملهاش أمان.... لما تكبري
أكثر... هتعرفي إن الحياة فعلا ملهاش أمان.... مفيش أي حاجة
فيها مضمونة.....

- (تبتسم باستهزاء... تقوم بمسح دموعها وأنفها المبلل...)
صحتي...

- (تعقد حاجبيها...) إيه...!؟

- (تسند رأسها على ركبته... تبتسم بدموع...) خاني مع صحتي...
صحة عمري.....

- (تحقق بها..... صدمة كبيرة... لا إجابة.....)

- (بنبرة باكية ضاحكة...) خاني مع صحتي... صحة عمري.....

- (تتنهد بسخونة شديدة... ييدو عليها الغضب.....)

- (تقف لمى... تستعد للمغادرة.....)

- (تقف الغريبة هي الأخرى...)

- (قبل أن تغادر... تلتفت لها...) شكرا..

- استني.....!

- (تلتفت لها...)

- (تقترب منها... تضع يدها على كتفها...) احرقهم... هما
الأتنين... الخيانة ملهاش غفران..... سامعاني... الخيانة ملهاش
غفران.....

- (تبتسم لها..... تحرك رأسها بالإيجاب... ثم تغادر.....)



تعود لطاولة زوجها "يوسف"..... يضع كلتا يديه على وجهه....
تجلس أمامه...

- (تبتسم له.....)

- (يرفع رأسه...)

- (ما زالت تبتسم...) طلقني.....

- (يحدق بها.....)

- (تحرك رأسها بالإيجاب...) في أسرع وقت ممكن.....

- لمى... اسمعيني...

- (تحرك رأسها بالنفي...) مش عاوزه أسمعك....

- لازم تسمعيني... حتى لو هنطلق لازم تسمعيني.....

- (تحرك رأسها بالنفي.....) لا... مش هسمعك.....

- لمى... أنا.....

- (تقاطععه....) أنت إيه؟! أنت إيه يا يوسف؟! أنت وسخ يا

يوسف...! أنت زبالة.....! أيا كان اللي هتقوله... أنا مش مهتمة

أسمعه... ومش هيفرق معايا في حاجة؟! إيه؟! أغرتك!!!

ضعفت؟! كنا بنمر بأزمة مثلا فمكنتش في حالة اتزان ودي

كانت غلطة لا سمح الله؟! إيه؟! صعبت عليك؟! ضحكت

عليك?!؟!؟!؟! استغلتك?!؟!؟! إيه؟! إيه اللي ممكن تقوله؟! إيه

اللي لازم تقوله?!?!?

- (يحدق بها..... يبدو ضعيفا للغاية.....)

- (تحرك رأسها بالنفي مبتسمة بألم... تبعد نظرها....) ثلاثة

شهور موريني الويل.... وأنا فاكهه المشكله من عندي.....

فاكرة إني كنت مقصرة معاك.... جيت على نفسي وعلى شغلي

وعلى حياتي كلها... وفضتلك نفسي.... ادتلك كل وقتي وتركيزي
وطاقتي.... وأنا بحاول أفهم سبب التغيير المفاجئ ده..... كنت
هتجنن.... (تبتسم...) والله العظيم كنت هتجنن.... لدرجة
إنك لما قلتلي إننا لازم نفصل.... لازم نبعد.... جزء مني كان
مرتاح.... على الأقل كان فيه نهاية ما للعذاب اللي أنا كنت
عايشاه في الفترة الأخيرة.... كان كل اللي شاغل بالي وقتها....
إني أشبع منك.... قبل ما نتفارق.... والله كنت راضية....
كنت موجوعة.... بس راضية.... قلت عادي... بتحصل... بطل
يحبني.... بطل يحسني.... بتحصل... والله بتحصل..... بس....
ولا جه في بالي لحظة..... لحظة.... إنك ممكن تخون.... لا... ومع
مين؟! مع منال..... منال يا يوسف؟! مش دي منال اللي كنت
بتقول عليها بيئة ومبالغ فيها وفي تصرفاتها.... مش دي منال
بتاعت الرجالة اللي كل يوم مع واحد؟! مش دي منال اللي
ياما اتخانقنا بسببها....؟! مش دي منال اللي عاملة زي الكلبة
الصعرانة....؟! اللي هتموت على أي جوازة والسلام?! (تبتسم....
بحزن... بسخرية....) إيه بقى؟!!!!! (تبعد نظرها) إيه بقى يا
أخي.....

- (يتنهد..... يخفض رأسه.....)

- (تنظر له باشمزاز شديد.....) يا ريت الطلاق يبقى بشكل
ودي... مش عاوزين ندخل في أي مشاكل من أي نوع....
(تبتسم..) ومتخفش... سرك في بير..... (تبعد نظرها.....) أنا اللي
أخذتك... أنا اللي اخترتك... أنا اللي اتحديت الدنيا عشانك.....
أنا اللي خيلتك كبير في عين الكل..... (تنظر له.... تحرك رأسها
بالنفي.....) مينفعش بعد كل ده.... أقول للناس إنك ضعيف.....
وخاين..... و(نصف ابتسامة.....) ورخيص.....

- (ينظر لها بندم شديد..... تتساقط دموع عينيه.....)
تحرك رأسها بالنفي..... تتنهدهد..... تقف..... لتغادر دون التفوه
بأية كلمة..... تغادر مسرعة..... تتجه إلى السيارة... ثم تقوم بإجراء
هذه المكالمة.....

- (بنبرة حادة....) أنتي فين؟!!

- في الشغل... في إيه؟!!

- طب أنا هستناكي في الكافيه الي في آخر الشارع عندك.....
متتأخريش!

- لاء... مش هينفع..... عندي شغل كثير لازم يخلص.....

- منال..... نص ساعة... هكون في الكافيه..... ألاقيكي هناك.....

- في إيه يا بنتي؟! أنتي كويسة طيب؟!!

- (تبتسم.....) نص ساعة.....

- طب.....

- (تقاطعها.....) سلام.

ثم تنهي المكالمة.....

وبعد مرور خمسة وأربعين دقيقة.....

تطل "منال" على "لمى".... تضع لمى يدها على جبهتها.... ويدها

الأخرى تطرق بأصابعها على الطاولة..... تجلس أمامها.....

- (ترفع لمى عينيها لتتأمل لها..... تحديق بها في صمت تام....)

- (تحديق بها الأخرى..... تتنهدهد... تخرج علبة سجائرهما..... تشعل

سيجارة)

- (ما زالت تحديق بها..... صمت تام....)

هنا يقتحم النادل هذا الصمت...

- مساء الخير يا فندم تشرى حاجة ولا شويه كده؟! (تنظر لى إلى منال.....) هاتلها سم..... (تنظر له...) عندكوا سم؟! (يشعر النادل بالإحراج... يبتسم... ثم يُغادر الطاولة.....)
- (تنفث منال دخانها بكثافةٍ..... تحدق بها... صمت... ثم...) قلق؟! (تحدق بها دون الإجابة.....)
- (تحرك رأسها بالإيجاب... تنظر بعيدا.....)
- (ما زالت تحدق بها... والكثير من الغضب... من الأم.....)
- (تنظر لها... عيناها دامعتان...) عاوزه إيه يا لى؟! (نصف ابتسامة..... بأم.....) عاوزه إيه؟!!!!!!
- (تحرك رأسها بالإيجاب) آه... عاوزه إيه؟! جايباني ليه؟! تهزئني؟! تهينيني؟! تمسحي بكرامة أهلي الأرض؟! (تحرك رأسها بالنفي...) ولا هيفرق..... أنا أصلا معنديش كرامة..... أنا معنديش حاجة... أنا ولا حاجة..... أنا نكرة..... جاية عملي إيه يا لى!!!
- (صمت قليل.. تتساقط دموعها... بصوت خافت...) ليه؟! ليه يوسف؟! (تبتسم.....) مز... وكان نفسي فيه... من زمان... من قبلك... وأنتي أخذتيه... وبقى بتاعك... لوحدك... أنا بقى استلفتة ليلة..... (نصف ابتسامة...) من نفسي يا شيخة..... وبعدين جوزك كان في حضني بإرادته... أنا ما أجبرتوش... وقضينا ليلة حلوة... وكل واحد راح في حال سيبله... (تنفخ دخانها بكثافة...)
- بس..... عاوزه إيه أنتي دلوقتي!!

- (تساقط دموعها بكثافة أكبر.....) أنا..... مش مصدقاي..... أنتي
مستحيل تكوني بني آدمة.....

- (تقترب منها قليلا.....) هو أنتي كنتي متخيلة إنك هتجيبيني
هنا تذيليني وتهنيني وأنا كنت هنهاري بقى وكده؟!!!!!!
(تبتسم.....) أنتي هبلة يا بنتي؟!

- (تمسح دموعها بأناملها.....)

- (تتنهد..... تعتدل في جلستها..... تنفث دخانها.....) لى.... ارجعي
لبيتك ولجوزك..... جوزك بيحبك..... آه هو غلط.... بس....
صدقيني... مكنتش غير مجرد ليلة ملهاش أي معنى.... زي ما
يقولوا نزوة.... متهديش بيتك عشان نزوة... غلطة واحدة....
يوسف بيحبك..... متبقيش غيبة.....

- (صمت قليل.... تحديق بها..... تبتسم.....) يعني أنتي مش
virgin?!

- (تبتسم لها.....) هو أنا عبيطة.... عيب عليكي.... virgin طبعاً.....

- (تبتسم لها.....) لا عبيطة إيه بقى.... ده أنتي أستاذ.....

- (تدير وجهها بعيداً.... تنفث آخر نفس في سيجارتها.....)

- (ما زالت تبتسم.....) أنتي عارفة أنا هعمل فيكي إيه؟!!!

- (تحرك رأسها بالنفي..... مبتسمة ببرود) هتعملي إيه؟!

- (تبتسم ابتسامة عريضة.....) هدمرك..... هخليكي تتمني الموت
يا منال.....

- (تجحظ بعينها مبتسمة.....) الموت؟!!!!!!

- (تحرك رأسها بالنفي مبتسمة....) عارفة... عارفة إنك بتتمنيه....
عارفة إن الموت للي زيك رحمة من عند رب العالمين.... بس

أنتي لسه عايشة ... لحد بقى ما أمر الله ينفذ ويأخذك عنه
يحاسبك بعدله حساب الملكين... أنا بقى هعيشك أسود أيام
حياتك.... كل اللي فات في حياتك كوم... واللي أنا هعمله فيكي
كوم تاني خالص.....

- (تبتسم لها....)

- (تحرك رأسها بالإيجاب....) اضحكي..... عاوزاكي تضحكي.... اضحكي
على قد ما تقدرى.....

- (تبعد نظرها...) والله يا بنتي أنتي بتضيعي وقتك معايا...
(تشعل سيجارة أخرى.....) أنا لو مكانك..... (تنفث دخانها
بكثافة... تبتسم....) أروح بيتي... لجوزي حبيبي..... (تغمز
لها...) المزم... أعمله أكلة حلوة... أبلسه قميص حلو... وأخده
في حضني..... وأقفل عليا بيتي... وأنسى..... (تحدق بها...
لكنة دون سخرية.....) أنا لو مكانك هنسى يا لمى..... هنسى
وأكمل حياتي مع الراجل اللي بجه..... أنا لو مكانك... هسامحه
وأغفرله.....

- (تحدق بها... صمت قليل....)

- (تبتسم لها.....) عاوزه تعرفي إيه اللي حصل بالظبط...!؟

- (تبعد نظرها.....)

- (تنفث دخانها.....) قابلته بالصدفة وأنا خارجة من كافيه في
مصر الجديدة... وكان الوقت متأخر..... سلم عليا... بعدها
طلبت منه إنه يوصلني البيت لأني خايفه أركب تاكسي لوحدي
في وقت زي ده... كان متردد في الأول... بس بعدها وافق.....
ووصلني..... وفي العربية.....

- (تقاطعها.....) اخرسى.... متكمليش.....



- (تكمل.... مبتسمة....) وفي العربية..... (تبتسم ابتسامة عريضة....) بصراحة جوزك مز أوي بصراحة يا لمى.... وال perfumes الي كان حاطها يومها كانت تحرك أي واحدة..... ما علينا يعني..... في العربية بقى يا ستي..... قعدت أعيطله شوية.... وقعدت أقله قد إيه أنا وحيدة... وضعيفة... ومحتاجة راجل في حياي.... وقد إيه كل اختياراتي كانت غلط كلها..... وإني ندمانة عليها كلها.... وهاتك يا عياط بقى.... وأنتي عارفة صحبتك.... في الدراما متتوصاش..... المهم يعني... صعبت عليه... لحد ما وصلنا البيت..... شكرته... وحضنته..... (تبتسم لها..)

عرضت عليه يطلع يشرب حاجة.... هوه كان رافض.... بس كان حاسس إني مدمرة ومينفعش يسبني في حالة زي دي..... (تبتسم ابتسامة عريضة....) أو أنا اللي أقنعتة يعني..... (تنفث دخانها.....) ما علينا يعني.... بس وطلع معايا فعلا..... وفضلنا نتكلم.... وفضلت أعيط.... وهوه يطبطب عليا.... (تبتسم....) وأنا أعيط.... وهوه يطبطب..... لحد ما ضعفنا..... وحصل الي حصل بقى..... بس.....

- (تحقق بها... تتساقط دموعها....) وهوه.....!؟

- هوه إيه يا لمى!؟

- (تخفض رأسها.....)

- (تتنهد....) لمى.... العلاقة الي إحنا عملناها دي ممكنش فيها أي نوع من أنواع المشاعر..... شهوة.... بس.... كانت شهوة وبس..... وقبل ما يمشي..... اتفقنا... إن الموضوع ده كان غلطة.... وإنك مستحيل تعرفني أي حاجة عن الموضوع ده.... وأنا وعدته إني هبعد تماما عن طريقه... طلب مني إني أبعد عنك.... بس أنا رفضت.... وقتله لو أجبرتني إني أبعد عنها... إني هقلك كل

حاجة..... وده كان الاتفاق..... ونفذناه.... لحد ما قرر هوه إنه
يخلف بيه..... (نصف ابتسامة.....) هوه حر... يشرب بقى....
(تهمس.....) غبي.....

- وليه رفضتي إنك تبعدني عني... (نصف ابتسامة...) عشان
توصليله تاني؟!!

- (تحرك رأسها بالنفي..... صمت قليل) لا.....

- (تحقق بها.....) آمال إيه?!!

- (تحقق بساعة هاتفها.....) بقلك إيه..... أنا قتلتك كل اللي
عندي.... (تنظر لها.....) شوفي بقى هتعملي إيه ولا هتتصرفي
إزاي..... اللي أنتي عاوزه تعمله اعمله.....

- (تدمع عيناها.....) أنتي عارفة.....

- (تبتسم لها..... مقاطعة) لمى..... كل اللي هتقوليه....
أنا عارفاه... والله العظيم... كلمة... كلمة... وحرف حرف....
(تحرك رأسها بالنفي.....) صدقيني ملوش لازمة.....
آخر حاجة ممكن أقولهاالك... متسيبش جوزك..... يوسف
يحبك..... ربيه..... عاقبيه..... بس متسبهوش..... (تقف استعدادا
للمغادرة.....)

- (تراقبها... تحقق بها..... يبدو أن الكلام لا جدوى منه.....)

- (وتغادر منال..... في صمت تام.....)

تغادر منال... لتترك لمى في حالة لا يرثي لها..... غضب... قهر....
غيظ... حيرة... تضع يديها على وجهها..... تتساقط دموعها.....
عشر دقائق..... على هذا الوضع..... لتتفاجأ بيدين تلتفان حولها
من الخلف..... تحيطها بقوة..... وبكاء شديد..... إنها "منال".....
تبكي فوق كتفها من الخلف..... تحيطها بقوة..... تبكي.....

وتبكي..... والأخرى.... تجلس دون حراك..... تعجز عن التفكير.....
عقلها في حالة جمود تام..... ما هذا الجنون بحق السماء؟!..... ثم
تركض "منال" هاربة.... لتختفي من جديد.....

تجلس "لمى" بلا حراك..... لا تستطيع استيعاب شيء..... قلبها...
يعتصر ألما..... وعقلها..... شارد..... نصف ساعة..... فالساعة..... على
هذا الوضع..... يدق هاتفها الجوال..... إنه "يوسف".... تقوم
برفض المكالمة..... مرة أخرى.... يتصل..... تقوم برفضها.....
الثالثة.... فالخامسة..... حتى قررت إغلاق هاتفها.....

ساعة أخرى قد مضت على وضعها هذا... حتى أتاها النادل
بالباتورة معذرا لها..... "أنا آسف... بس إحنا بنقفل خلاص"....
تحرك رأسها بالإيجاب... تقوم بدفع الباتورة..... لتغادر.....
تنطلق بالسيارة.... تتجه إلى منزلها..... حيث "يوسف".... ينتظرها
على الأريكة.... في إضاءة خافتة.... تتجاوزه إلى غرفة النوم.....
تتجاهل مناداته..... تقوم بغلق الباب بإحكام..... تجلس على
طرف السرير..... تتساقط دموعها.... تتجاهل طرق "يوسف" لباب
الغرفة..... تمسك بهاتفها.... تتذكر أنها قامت بإغلاقه منذ ثلاث
ساعات وأكثر..... تقوم بتشغيله... ثم تضعه جانبا.... تتجه إلى شرفة
الغرفة..... الليلة باردة..... تضم جسدها بيديها..... دقائق... ليلفت
انتباهها ضوء الهاتف..... تتجه إلى الداخل..... تجد رسالة Sms
طويلة من "منال".....

((محدث بيختار قدره.... يمكن دي الجملة الي كنت متشعلقة
عليها طول حياتي.... يمكن دي الجملة الي وصلتني للبي آدمة
الي أنا وصلتها دلوقتي... أنا ضعيفة أوي يا لمى.... ضعيفة بشكل
خلاني أتمنى الموت كل ليلة... ضعيفة بشكل خلى الموت هوة الرغبة
الوحيدة الي عندي..... أنا ضعيفة لدرجة إني خفت أتعالج.... أنا

مريضة يا لمى.... كان نفسي تاخدي بالك من حاجة زي دي.....
 حاجة واضحة زي دي.... كان نفسي تاخديني من إيدي وتقولي لي
 مش هسيبك إلا لما تتعالجي.... أنا مريضة ومرضي مؤذي لكل اللي
 حواليه..... بس أنا عمري ما فرق معايا حد..... أنا أصلا مبجش
 حد... أنا عمري ما حبيت حد..... بس حبيتك... حبيتك يا لمى...
 حبيتك وخنتك... خنتك مع حب عمرك... خنتك وكنت مبسوفة وأنا
 بخونك... كنت بثبت لنفسي إن محدش أحسن من حد..... عارفة إني
 وجعتك... وجعتك أكثر ما يوسف وجعتك..... وجعتك دبح قلبي...
 وجع مفهوش غفران..... وجع ميشفعلوش غير الموت..... أنا تعبانة
 يا لمى..... تعبانة... زهقت... زهقت مني..... ومن حياتي... ومن
 وساختي..... ومن وحدتي..... ومن ضعفي..... أنا مش هستنى الموت
 يا لمى..... أنا هروحله..... سامحيني..... لمى... جوزك
 بيحبك يا لمى..... يوسف بيحبك يا لمى..... سامحيني يا لمى))
 كانت تلك رسالة "منال"..... قرأتها "لمى" ودموعها تتساقط
 بقوة... ما أن قامت بإنهائها... حتى اتجهت مسرعة إلى الخارج...
 إلى زوجها.....

- قووووووم!!
- (فزعا.....) في إيه!!
- وديني لـ"منال"..... مش قادرة أسوق!!!
- (يعقد حاجبيه....) في إيه!!!!
- (تتجه إلى خارج المنزل مسرعة..... باكية) يلا!!!!
- وفي الطريق... تبكي "لمى" بشدة..... و"يوسف" عاجز تماما عن
 معرفة أية معلومة قد تكشف له سر هذا البكاء الهستيرى.....
 ولكنه قلق..... قلق للغاية..... وها هو منزل "منال".....

تغادر لمى مسرعة إلى الطابق الثالث... حيث تسكن "منال".....
تتجه ببطء تجاه الباب... لتجده مفتوحا على مصراعيه..... تتجه
بخطوات ثابتة بطيئة إلى الداخل..... لتجد منال ملقاة على الأرض.....
عارية تماما..... غارقة بدماؤها..... تقف متجمدة أمامها بخطوة
واحدة..... تضع يدها على فمها..... تتساقط دموعها بلا توقف.....
ثم تنهار فجأة لتسقط على ركبتيها..... تقوم باحتضان "منال"
وتبكي بكاء الفراق..... يقتحم يوسف بعدها المنزل.... ليجد
هذا المشهد..... تخونه قدماه هو الآخر..... ينهار أمام الفتاتين.....
بكاء.... بكاء ندم..... وما شفيح الندم الآن يا يوسف؟!.....

ومرت سنة على هذه الحادثة.....

تقف "لمى" أمام قبر "منال".... تحمل باقة من الورود..... تجلس
أمام قبرها.... تضع لها الورود.....

(بابتسامة حنان.....) وحشتيني..... (تتنهد...) أنا مسبتش
يوسف..... (تبتسم.....) ربيته وعاقبته زي ما قولتي لي..... يوسف
طيب أوي يا منال... (تبتسم ابتسامة عريضة.....) سامحته يا
منال..... سامحته... وسامحتك..... وحشتيني أوي..... أوي يا
منال.....

غرفة الأحلام

- متيجي نازل؟! -
- (دون أن تنظر إليها) لا.. -
- ليه؟! لا ليه?! -
- (تنظر إليها) أغنيها لك؟! معيش زفت فلوس.. -
- يا ستي أنا عزمائي... قومي بقى!! -
- (ممسكة هاتفها...) لا... -
- أنتي مش عاوزه تنزلي؟! -
- (تبتسم لها) وده من إمتة إن شاء الله؟! -
- أمال إيه?.. بقلك هعزمك... قومي بقى!! -
- هوه أنتي لسه عارفاني إمبراح؟! منتي عارفة إني لا بحب أعزم -
- ولا أتعزم... -
- خلاص اعتبريه سلف.. أنتي مش قبضك نازل بكره.. أول ما -
- تقبضي رجعلي الفلوس!! -
- (تبتسم لها ببرود...) لا... -
- لا أنا زهقت بجد!! -

- مالك يا بت في إيه؟! معنا كل يوم بره.. مجتش على النهارده
يعني... اهمدي بقى!!
- خلاص... أنا هقوم أمشي...
- (تبتسم لها...) امشي...
- (تنتفض من مكانها وتمسك بوسادة صغيرة تكتم بها نَفْس
صديقتها) أنتي إيببييه يا شيخة... إيببيبيبييه... موتي بقى...
موتي!!
- (تدفعها عنها بقوة.. ثم تلتقط أنفاسها) يا بنت المجنوووونة..
كنت هموت يخريبتك...!!
- (تعتدل في جلستها ثم تلتقط أنفاسها هي الأخرى)
- اتبطيتي خلاص?!?
- يا ريم أنا بجد زهقانة... قومي نزل... والنبى... عشان خاطري...
- طيب... بالعقل كده... إحنا لما نزل هنروح فين?!?
- هننزل نقعد في أي حته...
- كافيه يعني!?
- آه كافيه... آمال هوديكي قصر الرئاسة!!
- حلوو... إيه بقى الزيادة في الكافيه عن القعدة اللي إحنا قعدناها
دي؟! معنا هناك بردو هنقعد نفس القعدة وشي في وشك
وهنقعد نرغي!!
- (تبتسم... تحرك رأسها بالنفي) لا.. في الكافيه.. هنشوف ناس...
وشوش.. ناس طالعة خارجة.. أشكال جديدة... يعني.. تغيير
جو...

- (تبتسم...) مش كان نفسك تشوفي أوضتي من زمان...
- (تتقدم بضع خطوات لتقف في منتصف الغرفة في ذهول تام....)
- لا بجد.. إيه ده.... إيه الجمال ده!!!؟
- (تضغط على زر آخر لتضيء نافورة مياه صغيرة باللون الأزرق...
ثم تبتسم....)
- (تقترب منها في ذهول...) يخربيت دماغك... إيه الجمال ده!!!؟
- (تضغط على زر أخير لتمتلئ الغرفة بإضاءة خافتة فتظهر بقية
معالم الغرفة التي تمتلئ بالعديد من اللوح والقطع الفنية
الرائعة... ثم تبتسم....)
- (تلتفت هنا وهناك بابتسامة كبيرة وفرحة عارمة)
- إيه رأيك؟!؟
- (تفتح فمها باستغراب...) رأيي؟! إيه الفجر ده!!!؟ عشان كده
قافلة عليها ومبتخليش حد يدخلها!!!؟
- (تقترب من باب شرفتها...) تعالي...
- (تتقدم بخطوات...) في حاجة تانية!!!؟
- (تفتح باب شرفتها ثم تضغط على زر بجوار الباب لتضيء
عشرات النجمات الكبيرة على حائطة الشرفة.... وبانعكاس
ضوء القمر... ترى سراب تلك الجلسة الرائعة.. كرسيان من
الخشب الهزاز... ومنضدة زجاجية بالكامل وسور الشرفة يلتف
حوله الورود والفل....)
- (تتنهد بسخونة...ثم تنظر لها بابتسامةٍ واسعةٍ) مش مصدقاي
بجد.....
- (تبتسم..) هيه دي بقى جنتي الصغيرة على الأرض...

- (تلتفت هنا وهناك دون أن تنظر لها....)
- (تبتسم.. طيب اقعدى بقى لحد ما أعملنا فنجانين قهوة
مظبوطين... ومتلعبيش في حاجة... أنا بقلك أهو...!!!)
- (تجلس على الكرسي دون أن تنظر إليها.. ثم تتفقد تلك النجمات
الرائعة الجمال على الحائط.....)
- وبعد قليل...
- (تضع أمامها فنجاني القهوة) آدي القهوة... لتقوليلي بقى كافيه
ولا أبصريه.. مدلعاكي أهو...
- (تتنهد ثم تبتسم لها...)
- مبسوة؟!)
- (ترفع حاجبيها دون أن تزيل ابتسامتها) جدا!!!)
- (تحرك رأسها بالإيجاب ثم تشعل سيجارة)
- ريم....
- (تنظر إليها...) عاوزه تسألني أنا ليه عمري ما دخلتك هنا قبل
كده؟!)
- (تحرك رأسها بالإيجاب...)
- (تنفث سيجارها..) أنا عمري ما دخلت حد هنا قبل كده يا
سراب... أنتي أول واحدة....
- طب ليه فيه كرسيين هنا... مش واحد بس؟!...)
- (تبتسم ابتسامة عريضة..) لا لثيمة يا بت.... كان عليه عرض...
- ها ها ها.... بتكلم جد!

- (تبتسم..) طب واللّه العظيم كان عليه عرض... واحد والتاني هدية... فجبت الإثنين.. هقلهم لا يعني!!
- طب إيه؟!
- (تنظر إليها..) عشان ده عالمي الخاص... ده معبدي اللي بهرب منه من الدنيا كلها... ده مملكتي الصغيرة يا سراب... كل حاجة هنا.. كل قطعة... شبهي.. مني... أنا اللي بنيتها... أكثر مكان يرتاح فيه....
- (لحظات صمت) أنا فعلا حسيت بحاجة غريبة أول ما دخلته.. بس مش عارفه ده إيه... بس كان إحساس حلو....
- (تبتسم) ده بقى اللي بيسموه علم الطاقات... المكان هنا مشبع بحكاوي كتيرة أوي... كل لوحة متعلقة فيها... ليها قصة.. وفيها روح.... عارفة النجمات المتعلقة بره وهنا... جيباهم منين?!!!
- منين؟!
- هقلك... (ثم ترتشف قهوتها...).. كان فيه محل أنتيكات في الزمالك... قديم أوي... كنت متعودة أروحه من زمان.. وكانت أكثر حاجة بتلفت نظري فيه.. النجمات دي... كانت محطوة في مكتب صاحب المحل... في مرة عرضت عليه إني أشترتهم... رفض... قتلته هدفح المبلغ اللي هوه يطلبه... بردو موافقش... ومرة في الثانية... كل ما أروح يلاقيني متنحة للنجمات دي... وفي مرة سألني.. أنتي ليه مشدودة ليهم مع إن المكان مليون تحف فنية غالية جدا وقيمة جدا... قتلته معرفش... لحد ما في مرة رحى وقاللي إني ممكن آخذهم... بس بشرط إني أحافظ عليهم ومدهمش لحد أبدا... استغربت جدا... لأنه فعلا كان رافض تمامًا إنه يتخلى عنهم... وسألته إيه اللي اتغير... قاللي إنه تعبان... كان عنده سرطان في الدم وفي مراحل متأخرة جدا..

وإن المكان كله هيتباع... وإنه مش عاوز يدي النجمات دول لأي حد... سألته إيه قصة النجمات دي... قاللي بوجع.. إنهم كانوا بتوع بنته الي اتوفت في حادثة عربية من سنتين... وإنها كانت فنانة زي أبوها.. وهيه الي صممتهم كلهم... نجمة نجمة... عشان كده كان محتفظ بيهم في مكتبه.. وفعلا ادهملي... ومخدش مني ولا جنيه... وحلفني إني مفرطش فيهم أبدًا....

- (تنظر إليها بذهول...)

- (تبتسم ثم تحرك رأسها بالإيجاب... كل لوحة هنا ليها موال وقصة... حتى لو كانت لرسام مش معروف.. بس ليها قصة... عشان كده المكان هنا فعلا ليه روح.....

- أنتي غريبة أوي يا ريم...

- (تبتسم باستغراب... ليه؟!

- مش عارفة... مختلفة عن أي حد عرفته في حياتي قبل كده.. ليك دماغ كده غريبة لوحدهك.... مميزة فعلا

- (تنفث سيجارها) بيتيالك... فيه زيي كثير...

- (تُحدق بها بابتسامةٍ) يمكن.. بس أنتي أول حد أقابله يكون كده....

- أنا متولدتش كده يا سراب... كلنا بنتغير مع الوقت.. كلنا بنعافر عشان نوصل لشكل الحياة والشخصية الي تريحننا....

- (لحظات صمت) كنتي إزاي؟!

- يعني إيه؟!

- بتقولي إنك مكنتيش كده... عندي فضول أعرف كنتي إزاي؟! الشخصية الي قاعدة أدامي دي.. كانت عاملة إزاي؟!

- إمته؟! إمتة لقيتي اللي أنتي عاوزاه؟....
- بعد ما خسرت أهم اتنين في حياتي... أبويا وأمي... للأسف تجربة طلاقهم كانت قاسية جدا بالنسبالي... صدمة عمري بجد... تخيلي إنك تتربي في بيت فاكهه إنه مفيش زيه في الدنيا... دلح وحب وحنية.. واتنين بيعشقوا بعض....
- وإيه اللي حصل...؟
- (تتنهد بعشق) اللي حصل إني اكتشفت بعد كل العمر ده... إنهم كانوا بيمثلوا... بيمثلوا أدامي الحب عشان المركب تمشي... كانوا خايفين عليا... كانوا عاوزين يوفرولي بيئة سوية كلها حب واهتمام... وميحسسنيش إني أقل من أي بنت تانية في أي حاجة... بس اللي كان بيحصل في الكواليس غير....
- (تمسك يدها بحنا...)
- (تربت على يدها وتبتسم...) اكتشفت بقى إيه يا ستي... اكتشفت إن أمي عمرها ما حبت أبويا.. وإن أبويا كان الطرف المظلوم في العلاقة... طول الفترة دي كان بيحاول يعملها كل حاجة عشان تحبه... بس للأسف... عمرها ما قدرت تحبه... وكل اللي كان رابطها بيه.. أنا... حبها ليه وخوفها عليا خلاها تتمسك بالعلاقة دي.. لحد ما كبرت وحسوا إني أقدر أستوعب الموقف من غير ما أنهار نفسيا... وفهمت كل حاجة... مبقتش عارفة ألوم على أبويا إنه ضحى بأجمل سنين عمره مع ست عارف إنها مبتحبوش... واللا ألوم على أمي اللي اتمسكت بعلاقة مش مرتاحة فيها عشاني... واللا ألوم على نفسي إني كنت السبب في كل ده....
- ووصلتي لإيه؟! -

- (تبتسم..) وصلت إن كل واحد مسئول عن قراراته يا سراب... كل واحد يتحمل نتيجة اختياره... وإني مش مطلوب مني إني ألوم على حد ولا ألوم على نفسي...

- طب ليه بتقولي إنك خسرتهم!!?

- خسرتهم.... خسرتهم يا سراب... خسرت الناس اللي عرفتهم... بعد الطلاق... بقوا ناس تانية... كل واحد فيهم بيحاول يلحق اللي باقي من عمره... كل واحد بقى يفكر في نفسه وبس... وكانوا متخيلين إني خلاص كبرت ومش محتاجة منهم أي حاجة طالما بيوفروني كل مستلزماتي المادية.. ونسيوا إن حضنهم أهم مليون ألف مرة من أي فلوس بتتحطلي في حسابي كل أول الشهر... وأهم من العربية الصاج اللي مركونة تحت البيت.... فجأة بصيت لقيت نفسي لوحدي.... لقيت أبويا بيتجوز بنت أكبر مني بخمس سنين عشان تعوضه عن عمره اللي راح... لقيت أمي بتلف على دكاترة التجميل تشفط وتنفخ وتشد عشان ترجع الزمن وتعيش سن مش سنها..... (تبتسم..) وبس.. لقيت نفسي لوحدي.... حتى لما قررت إني أعيش لوحدي هنا.. محدش فيهم عارضني... وقالولي إنهم بيثقوا فيه وفي اختياراتي... وإني خلاص بقيت مسؤولة عن حياتي... زي ما يكون كل واحد فيهم حاسس من جواه إني كنت السبب في كل اللي حصل... وما صدقوا يخلصوا مني....

- (بحزن شديد) ريم.... أنا بجد آسفة....

- (تبتسم بحنان) متأسفيش... أنا نفسي متأسفتش على كل اللي حصل ده.... ده بقى يا ستي كان أهم منحى في حياتي...

- إزاي قادرة تبقي بالقوة دي.... إزاي!?



- (لحظات صمت) عشان معنديش اختيار تاني... مش أنا بس... ده أنا وأنتي وأي حد في الدنيا دي... أصل أنتي أدامك اختياراتين ملهمش ثالث... يا تقعدني تندي على حظك وتعيشي في دور الضحية اللي الزمن جه عليها طول الوقت وساعتها الدنيا هتديكي بالجزمة فوق دماغك.. يا تبقي قوية وقد نفسك وتكملي طريقك صح وتشوفي حياتك وتحددي مصيرك وتصحى كل يوم بحلم.. يخلص.. تحققى غيره.... تدخل عالدنيا بصدرك... وأهم حاجة في كل ده.... إنك متمديش إيدك لحد.. متسحتيش العاطفة والاهتمام من حد....

- (تُحدق بها) بس محدش بيعرف يعيش لوحده.. من غير اهتمام وحب يا ريم...

- (تبتسم) صح... معاكي حق... بس الحب والاهتمام اللي بيبجي بدافع الشفقة ميلزمكيش يا سراب... فيه ناس حسيصة بتعرف تحس... بتعرف تميز... من غير ما تتكلمي... بيبقى عارف إنك محتاجه من غير ما تطلبي.. ويديكي كل اللي أنتي عاوزاه حتى من غير ما يعايرك في لحظة ضعف... ده الاهتمام المطلوب..

- (تبتسم.. ثم تبعد ناظرها..) ياه.. هوه لسه فيه ناس كده؟! أنتي بتحلمي والله...

- طبعًا... طبعًا في ناس كده... أنتي كده يا سراب...

- (تنظر لها...) أنا?!?

- (تُحرك رأسها بالإيجاب...) آه أنتي... كام مرة كنتي حاسة إني مضايقة من غير حتى متكلم ولا أشتكي.. وبتسيبي كل اللي في إيدك وتجيلي حتى من غير ما تفتحي معايا أي مواضيع.. وبتحاولي تخرجيني من اللي أنا فيه... كام مرة اتخانقنا فيها

- عادي... (تنفث سيجارها..) أصلي سمعت كلمة معقدة دي
كثير...

- طب... (ترتشف قهوتها مبتسمة) إيه؟!

- لا طبعا.. مفيش الكلام ده... أنا أكثر واحدة في الدنيا دي كلها
بتعرف تحب... أنا بحب الحب يا بنتي... أنا إنسانة عايشة
على الشغف أساسا... بصي حواليك كويس... بس عشان أنا
عارفة طاقتي بتوصل لفين في الحب... مش عاوزه أديها لأي حد
يا سراب... عاوزه حد يستاهل الحب ده كله... أنا عارفه أنا
ببقى عامله إزاي لما أحب.. أنا لو حبيت ممكن أموت عشان
اللي بحبه ده... أموت حرفيا مش كلام أفلام.... طاقتي في الحب
مرعبة.... مش عاوزه أختار غلط... ولا عاوزه أختار بدافع الضغط
ولا الخوف من الوحدة ولا كل الكلام ده.... وبعدين أنا مرتاحة...
وبحاول أتعايش مع وحدتي وأخذها فرصة إني أفهم نفسي أكثر
وأعرف أنا عاوزه إيه أكثر.... واللي ربنا كاتبه في الآخر هيكون....

- يعني حوار أهلك ده مش عاملك عقدة!!?

- حوار أهلي ده كان اختيارهم هما.... مهياش قاعدة في الكون...
هما اللي اختاروا يعيشوا في التمثيلية دي... وهما اللي دفعوا
تمنها.... وأنا أكبر وأعقل بكثير أوي من إني أتعتقد من موضوع
زي ده.... وزي ما قلتلك مبحبش ألعب دور الضحية....

- (تبتسم...)

- بتضحكي ليه!!?

- أصلي افتكرت حاجة كده....

- حاجة إيه.. ضحكيني معاكي....

كثير أوي.. وفيهم اللي افكرتها صاحبة عمري... وكنت مستعدة
أعمل أي حاجة عشانها... وطبعًا أنتي عارفه الباقي... بس أنتي
غير... أنتي واضحة أوي... وصريحة أوي... ودي أكثر حاجة
بطمني ليكي....

- (تبتسم..) بصي.. طالما مش هعملك نسخة للمفتاح... أنا أمين..
معاكي في أي حاجة....

- (تنكزها) ده أنتي سخيفة بجد...

- ممكن بقى تسكتي شوية... عاوزه أسمعك مزيكا هايلة
اتكعبلت فيها امبارح عال soundcloud

- (تبتسم ثم تعتدل في جلستها لتنظر إلى القمر...) ماشي سمعينا...

- (تُشغل مقطوعتها الموسيقية ثم تُشعل سيجارة ثم تعتدل
في جلستها هي الأخرى...) هششششش... مش عاوزه أسمع
نفس... ده وقت الاستكناص!!

- (تبتسم..) ساكتة أهو....

- (في منتصف المقطوعة.. تبتسم ثم تنظر إليها) بكره هعملك
نسخة....

- لا لا مفيش... لما أبقي أشوفك بقى.... هستناك تحت في العربية
متتأخرش.. سلام.
- ماشي.... سلام....
- وبعد مرور عشرين دقيقة... وفي السيارة....
- (بيدو عليه الاستياء...) اطلع....
- (يعقد حاجبيه.... يُدير محرك السيارة...) في حاجة والا إيه؟....
- (ينظر من النافذة ليتفقد شرفة منزله.. ليجد زوجته تراقبه
لتتأكد أنه بصحبة "طارق".. يتنهد..... بصوتٍ خافتٍ جدا....)
الله يحرقك....
- (يُشعل سيجارة... يُناوله واحدة أخرى) في إيه يا ابني؟!....
- لا لا مش عاوز... مش عالريق كده...
- (يضع السيجارة جانبًا...) طب في إيه؟!...
- (يتنهد....) يا عم فكك!!....
- (يعقد حاجبيه....) لا بجد في إيه؟! اتخانقت مع هبة؟!...
- (ينظر إليه بابتسامة غضب....) ما طبعًا اتخانقت مع الهانم...
مش متخيلة إني ممكن أصحى الساعة خمسة الصبح عشان
أنزل أشرب كوباية قهوة مع واحد صاحبي....
- (يعقد حاجبيه...) طب وإيه اللي فيها؟!...
- (نصف ابتسامة... يُمسك السيجارة... يُشعلها....)
- (بيتسم....) ما تستنى تشرب والا تاكل حاجة طيب....
- (يُحرك يده باللامبالاة... ينفث دخانه بكثافةٍ... يفتح زجاج
النافذة....)

- (صمت قليل...) هيه مش مصدقة إنك معايا يعني؟! واللا إيه
مش فاهم؟!

- (يعبث بتردد قنوات الراديو...) تصدق بقى واللا متصدقش....

- (ينفث دخان سيجارته...) تحب أرجعك طيب؟!

- (ينظر له شزرًا...) هنجيب واللا إيه؟!

- أعملك إيه طيب!! ما أنا بصراحة مش منزلك عشان تقفلي
يومي من أوله كده يا وائل... لو كنت أعرف إن الموضوع
هيعملك مشكلة مكنتش كلمتك... وبصراحة برده أنا مش
شايف إن الموضوع فيه أي مشكلة... ما إحنا ياما عملناها....

- (نصف ابتسامة...) آه.. الكلام ده قبل ما أتجوز حضرتك... دلوقتي
الوضع غير.. دلوقتي كل حركة بحساب... ومشكلة.. وقرف....

- (يقف بالسيارة في منتصف الطريق... يتنهده...) وائل....
أرجعك؟!!!

- (يُحرك يده باتجاه الطريق.... ينظر إليه شزرًا...) اطلع!!!

- (ينظر إليه قليلا.... ثم يكمل طريقه.....)

- (صمت قليل.....) خنقة والله يا ابني.... اتخنقت!!!

- (ينظر إليه... ثم ينظر للطريق... يُحرك رأسه بالنفي...)

- (يتنهده... ينفث دخانه...) واللّه العظيم أنا بحبها وكل حاجة...
بس مش كده يا أخي... مش كده يعني... إيه المشكلة في
إنه يهف على بالي أشرب كوباية قهوة الفجر لوحدي فأنزل
أشربها... إيه يعني!!!

- (بيتسم دون أن ينظر إليه...) طب إهدى.... هنقعد ونتكلم
وكله هيبقى تمام...

- (صمت قليل....) بتهب إليه أنت وأمك عندنا فوق؟!
- (بيتسم ابتسامة عريضة....) لا... ده حوار ممكن يجبلك جلطة لو قلتهولك دلوقتي....
- (يجحظ بعينه....) بتتكلم جد...
- (ينظر إليه....) بيتسم.. يُحرك رأسه بالإيجاب... ثم ينظر للطريق....)
- (يجحظ بعينه أكثر....) في إيه يا طارق?!?!
- (دون أن ينظر إليه....) لما نقعد....
- طارق!!!!
- (يربت على كتفه...) خلاص بقى.... قلتك لما نقعد....
- ثم يقوم برفع صوت الموسيقى... ولا حديث بينهما....
- وفي المقهى.... يطلب طارق إحضار فنجاني قهوة مضاعفة من النادل... وقد كان...
- (يحدق به....) في إيه يا طارق?!
- (يتنهد....) بيتسم له... مفيش حاجة... موضوع عادي جدا... بس عاوزك تاخده على عقلك مش على أعصابك... وتسمعي للآخر.... ممكن؟!
- (يشعل سيجارة... يبدو متوترًا للغاية.... يرتشف قهوته...) طب قول....
- (ينظر إليه قليلا... بابتسامة هادئة...) مامتك عاوزه تتجوز...
- (بيتسم له ابتسامة عريضة....) ما تخلص بقى يا طارق!! في إيه بجد?!?!?!

- (يُحرك رأسه بالإيجاب.....) ما هو ده الجد.... والدتك عاوزه تتجوز.... وأمي أصلاً كانت قاعدة معاها من الصبح بيتكلموا ولما عديت عشان أجيها على أساس خلصوا كلام وكده... لقيتها مقعداني وطلبت مني إني أتكلم معاك في الموضوع ده.... لحد ما الوقت اتأخر وماما رفضت إنها تسيبها لوحدها فقالت تبات للصبح.... فأنا قلت آخذك عالرايق كده ونتكلم و نشوف الدنيا فيها إيه.....

- (صمت قليل.... ينفث دخانه، بيتسم....) ده حوار صح؟!!

- (يُحرك رأسه بالنفي.....) لا يا وائل... ده مش حوار.... والدتك فعلا عاوزه تتجوز... وأنا في البداية كده كنت زيك... بس لما سمعتها للآخر بصراحة اقتنعت جدا ومكنتش فاهم أساساً أنا كنت رافض ليه واللا مش متقبل الفكرة ليه.....

- (يُحرق به بغضبٍ شديدٍ.....) مين؟!!

- (يُشعل سيجارة.... يُحرق به....) أستاذ إبراهيم....

- (يجحظ بعينه... بتاع الكيمياء!!!)

- (يُحرك رأسه بالإيجاب...) ينفث دخانه.....: بتاع الكيمياء....

- (يُحرق به...) طب احلف بالله إن ده مش حوار!!

- (يتنهد....) وائل.... والدتك كبرت... وإحساس الوحدة قاتلها.... وفعلا محتاجه ونيس... والراجل محترم جدا وأرمل وظروفه زي ظروف والدتك.... إيه المشكلة؟! وقبل ما ترد واللا تنفعل... شغلي مخك شويه بس... وحط نفسك مكانها ومتبقاش أنا... لو تسمعها وهيه بتتكلم النهارده... أقسم بالله كنت بكيت... الست فعلا محتاجه ونيس... الوحدة دي أقدر وأصعب وأقسى إحساس في الدنيا.... طب بالله عليك يا أخي... أنت بقالك قد

إيه مشفتش أمك.... مع إنها ساكنة معاك في نفس العمارة....
يعني بينك وبينها مفيش.... سلمتين.... وحتى لما بتروح تزورها...
بتقعد قد إيه؟!!! ساعة؟! اتنين؟! ثلاثة بالكثير أوي؟!!! ولما
بتبقى قاعد؟! مش بيبقى نفسك تمشي؟! بتعد تبص للساعة؟!
وعندك ميت ألف حاجة في دماغك وميت ألف مشوار
ومشكلة وحوار!!!! هيه بقى بتحس بكل الكلام ده.... بتحس
إنها ثقيله... ثقيله عليك وعلى بيتك وعلى مراتك.... حتى لو
كفيت كل احتياجاتها المادية وجبتلها أحدث ثلاجة وغسالة واللا
أكبر شاشة تلفزيون واللا واللا لا..... ده معدش ليه أي قيمة
عندها قصاد الونس.... الونس الحقيقي... السن ده صعب أوي يا
وائل.... أوي..... الست مش طالبة أي حاجة غير إنها تتجوز....
وأنا شايف الشخص ده مناسب جدا.... راجل محترم وعارفين
أصله وفصله والناس كلها بتشهد بأخلاقه وطيبة قلبه وتعاملاته
الإنسانية مع الكل..... أنا فعلا مش شايف إن الموضوع فيه
أي مشكلة.... خالص بقى!!!!

- (الآن يبدو أكثر هدوءًا.... يُحذق به....) يعني لو أمك كنت
وافقت؟! كنت وافقت يا طارق؟!!!

- (يرفع حاجبيه.... يجحظ بعينه....) طب أقسم بالله العظيم
لو أمي اللي في الوضع ده كنت وافقت فورًا.... بص أنا فعلا
اتأخذت أول ما فتحت معايا الموضوع وفعلا كنت فاكرها بتهزر
زي ما أنت كنت فاكرني بشتغل.... بس مع أول جملتين ثلاثة
قالتهم.... بدأت أقتنع... ومحستش إن الموضوع مهين لأي طرف
من أي اتجاه... وبعدين هيه أمك دي مش لا مؤاخذه تبقى
عمتي؟! أخت أبويا؟!!! وأمك دي هيه اللي مرباني.... فاكر واللا
ناسي؟! فمتجيش بقى تلعب على حته أمك وأمي وهل تقبله
لأختك والكلام التافه ده!!!!

- (يُحرك رأسه بالنفي..... صمت قليل.....) صعب.... مقدرش....
(يتنهد....) مقدرش!!

- (نصف ابتسامة....) متقدرش؟! ليه؟! أنت مين أساسًا؟! أنت مين
عشان تتحكم في قرار زي ده؟! على فكرة.... والدتك مقررة أصلا...
ولو كانت طلبت مني إني أتكلم معاك... فده احترامًا لمشاعرك لا
أكثر ولا أقل.... فاهم الكلمتين دول واللا أفصهملك؟!!

- (ينفث دخانه بكثافةٍ في وجهه... يُحدق به....)

- (يصمت هو الآخر.... ينظر بعيدًا....)

- (ما زال يحدق به....)

- (يتنهد... يتسم له....) وائل....

- (يطفيئ سيجارته....) طارق قفل عالموضوع ده دلوقتي.... سبني
آخد وأدي مع نفسي كده شويه.... الموضوع مش بالبساطة
دي.... دي أمي على فكرة.... مش أختي.. ولا حتى طليقتي
عشان أنقبل فكرة جوازها من راجل تاني بالسهولة دي.... دي
أمي.... أنت بتتكلم كده عشان الموضوع مش طايلك.... بس
صدقني الموضوع فعلا مش سهل.... (يتنهد بسخونة....) أبدًا...
مش سهل....

- (يُحرك رأسه بالإيجاب.... يُدرك صعوبة الأمر....) ماشي... بس
إوعدي إنك هتفكر فعلا في الموضوع من غير أنانية وأفكار
ظالمة.... وإوعدي كمان إنك مش هتعرضلها ولا هتثديها بأي
كلام جارح....

- (يُشعل سيجارة أخرى.... يُحرك رأسه بالإيجاب.... ينظر
بعيدًا....)

- ما كفاية يا ابني!!!! إيه كمية السجاير دي!!! مش كده يعني!!!

- (يُحرك يده باللامبالاة.....)
- (يرتشف قهوته..... يُحدق به... يبدو مشغول البال.....)
- (ينظر له بابتسامةٍ... يُحرك رأسه بالنفي... إيه؟!)
- (يُحرك رأسه بالنفي... بعدين....)
- (وبعدين ليه؟! هات هات... هات اللي في بطنك....)
- (ينظر بعيدًا بابتسامةٍ... لا مش وقته... أنا عارف إن دماغك مش رايقه دلوقتي...)
- (ينفث دخانه... يا ابني اخلص....)
- (ينظر إليه... أنت تمام يعني?!)
- (مش أوي... بس قشطة... قول... أنا عارف إن النزولة دي نحس من أولها....)
- (بيتسم ابتسامة عريضة.....)
- (يُحدق به بابتسامةٍ... بتحب يعني وكده?!)
- (يُحرك رأسه بالنفي بشكلٍ متقطع... يطبق على شفثيه... مش عارف... بس هيه حالة غريبة كده... مش فاهمها... الموضوع كله متلخبط... وغلط....)
- (يعقد حاجبيه... غلط؟! غلط إزاي يعني?!?)
- (يُحرك كتفيه بالنفي... مش عارف... مش فاهم....)
- (ينفث دخانه... طب احكي....)
- (ينظر للأسفل....)
- (يضربه على رأسه... أنت لسه هتمثل?!?! ما تحكي!!!!)

- (بيتسم ابتسامة عريضة.... صمت قليل....) في بنت معايا في الشغل... لسه جديدة... بقالها شهر تقريبًا متعينة.....
- (بيتسم بهدوء...) اسمها إيه؟!
- (بيتسم له بحب....) خديجة... اسمها خديجة...
- (يُحرك رأسه بالإيجاب....) تمام.... كمل!!!
- خديجة دي بقى... من ساعة ما شفتها وأنا مشدودلها بطريقة مش طبيعية... متفهمش ليه... مع إن البنات جمالها عادي جدا... عادية جدا يا وائل.... (صمت قليل...) المهم يعني... إني مشدودلها جدا....
- (يعقد حاجبيه....) وإيه المشكلة؟! أنت مستغرب إنك مشدودلها وهيه مش حلوة يعني؟!
- (يُشعل سيجارة....) أنا مقلتش مش حلوة... بقلك عادية... ملامحها عادية... بنت عادية... الجمال المتوسط المقبول يعني....
- طب ما اختلفناش؟! إيه مشكلتك؟! فين الغلط اللي بتتكلم عليه؟!
- (صمت قليل.... بيتسم بهدوء.... ينفث دخانه) مش شبها....
- (يعقد حاجبيه مجددًا....) يعني إيه مش شبها؟!
- (يُحرك رأسه بالنفي....) مش شبها.... مش شبه أمي وأمك كده....
- (بيتسم ابتسامة عريضة....) طب الحمد لله إنها مش شبهم... لا أمي حلوة واللا أمك حلوة!!

- (يُحَدِّقُ بِهِ..... ابْتِسَامَةٌ خَفِيفَةٌ.....)
- (يُحْرِكُ رَأْسَهُ بِالنَّفْيِ..... صَمَتٌ قَلِيلٌ.....) طَبِّ إِيَّاهُ؟!
- (يَنْفِثُ دَخَانَهُ... اتَّكَلَمْتُ مَعَهَا؟!
- لا....
- لِيهِ؟!
- (ابْتِسَامَةٌ....) هَقْلَهَا إِيَّاهُ؟!!
- (يَبْتَسِمُ ابْتِسَامَةً عَرِيضَةً.....) مَشَّ عَارَفٌ.... بَسَّ اتَّكَلَمْتُ مَعَهَا... شَوْفَ مَيْنِ دِي... مَيْنِ الْيَ خَطْفَتِكَ الْخَطْفَةُ السُّودَةُ دِي... يَمْكُنُ لِمَا تَتَكَلَّمُ مَعَهَا أَكْثَرَ تَتَقَفَّلُ مِنْهَا مِثْلًا.... يَطْلَعُ إِحْسَاسَ مَوْقَتٍ... حَالَةٌ وَهَتْرُوحٌ لِحَالٍ سَبِيلَهَا... أَيُّ حَاجَةٍ بَقِيَ... بَسَّ اتَّكَلَمْتُ مَعَهَا....
- (يُفَكِّرُ قَلِيلًا.....) عَادِي كَدَهُ....
- (يُحْرِكُ كَتْفَيْهِ بِاللَّامْبَالَةِ.....) هُوَ إِيَّاهُ الْيَ عَادِي كَدَهُ؟!
- أَطْلَبُ مِنْهَا إِنِنَّا نَتَكَلَّمُ عَادِي كَدَهُ.... افْرَضْ كَسْفَتْنِي... رَفَضْتُ.... أَعْمَلُ إِيَّاهُ سَاعَتَهَا؟!
- (نِصْفُ ابْتِسَامَةٍ.....) ابْقَى احْبَسْ نَفْسَكَ فِي الْمَكْتَبِ وَاقْعُدْ عَيْطٌ.... جَتَهَا نَيْلَةَ الْيَ عَايِزَهُ خَلْفَ...!!!
- (يَتَنَهَّدُ مَبْتَسِمًا..... صَمَتٌ قَلِيلٌ.....) يَعْنِي أَكَلَمَهَا؟!
- مَعَاكَ رَقْمَهَا؟!
- لا... بَسَّ مَمْكُنُ أَجْبِيهِ يَعْنِي مَشَّ حَوَارٍ....
- لا لا فَكِّكَ.... مَتَّصَلِشْ بِيهَا... لِمَا تَشَوْفُهَا النَّهَارِ دَهْ كَلَمَهَا... اعْزَمَهَا عَلَى فَنْجَانِ قَهْوَةٍ بَعْدَ الشَّغْلِ.....
- لا.... أَكَلَمَهَا عَلَى التَّلْفُونِ أَحْسَنَ....

- يا ابني استرجل بقى جبتلي المرض..... لا طبعًا.... كلمها to face
face كده... خلي مشاعرك تبقى واضحة كده وصريحة.....
- (ينظر للأسفل.....) مشاعري؟! أنا حتى مش عارف هيه إيه
مشاعري دي....
- (يُحرك رأسه بالإيجاب....) هتعرف.... لما تقرب منها أكثر
هتعرف.....
- (يُحدق به.....) يعني أكلهما؟!
كلمها.....
- (بتردد....) أكلهما?!
- (يجحظ بعينه.....) مالك ياض في إيه?!
- (يتنهد.... ينظر بعيدًا.....) مش عارف....
- مش عارف.... يبقى تعمل اللي لازم يتعمل عشان تعرف....
متسبش الموضوع عايم كده ينخر في راسك طول ما أنت
صاحي!!!
- (بيتسم....) هوه بينخر في دماغى فعلا.....
كلمها يا طارق!.....
- (يُحرك رأسه بالإيجاب.....) ابتسامة هادئة..... يتفقد ساعته....
يلا!!!
- لا..... أنا قاعد شويه..... اتحرك أنت على شغلك.....
- (يعقد حاجبيه....) طب وشغلك.....
- شويه كده..... شويه وأتحرك.....
- مالك?!

- (بيتسم له.....) مش هعرف أقعد لوحدي تاني..... محتاج أقعد شويه لوحدي....

- (يُحرك رأسه بالإيجاب..... يربت على كتفه بحنان..... يقف مغادراً....) سلام...

وفي مقر العمل.... يجلس "طارق" في مكتبه... ينتظر قدوم "خديجة"

ساعة... اثنان.... ثلاثة..... ولم تحضر بعد..... يتفقد ساعته كل حينٍ وآخر....

يتجه إلى مكتب الاستعلامات....

- هيه خديجة مجتش النهاردة؟!

- (تجيبه "تغريدة" موظفة الاستعلامات بنظرة لؤم واضحة....) لا مجتش النهاردة....

- أجازة؟!

- (بنبرة فظة...) معرفش....

- (يلاحظ سوء معاملتها... صمت قليل... ثم بنبرة احتقار) إيه اللي أنتي حاطاه على راسك ده؟! طوق!! حطه طوق فوق الحجاب؟! (بنبرة خافتة جدا...) جتك القرف...

- على فكرة...

يتركها دون أن تكمل عبارتها.... ليزيد جرعة الإهانة.... ثم يُصادف في طريقه إلى المكتب "منة"... فتاة لطيفة للغاية... مساملة... وعلى علاقة جيدة بـ"خديجة"....

- (بيتسم لها...) صباح الخير...

- (ترد له الابتسامة....) صباح النور MR. طارق...

- كنت عاوز أسألك خديجة مجتش النهاردة؟
- لا... اتصلت واعتذرت النهاردة الصبح وبلغت المكتب إنها مش جايه....
- (بتردد....) خير؟! هيه تعبانة والا حاجة؟!!
- (تعقد حاجبيها.. تُحرك رأسها بالنفي...) معتقدش إنها تعبانة....
- كنت لسه معاها إمبراح وكانت كويسة.... بس أكيد حصلها ظرف معين... مستتية بس أخلص شغلي وهكلمها أطمئن عليها...
- (يُحرك رأسه بالإيجاب....) تمام...
- (بنبرة فضول مهذب....) كنت عاوزها في حاجة؟!!
- آه... كنت طالب منها حاجة معينة وكنت عاوز أسألها عليها...
- بس خلاص مش مشكلة... الموضوع مش طارئ...
- (تبتسم له بأدب....) طب... تؤمрни بحاجة تانية؟!!
- (يُحرك رأسه بالنفي....) لا، تسلمي.... اتفضلي....
- ثم تنصرف بابتسامةٍ.... يعود إلى مكتبه... ليفكر.... أهذه إشارة من السماء... أهذه علامة ألا يُقدم على ما قد أشار إليه به "وائل".....
- هل عليه أن يتراجع الآن....؟!..... يتنهّد بعمقٍ.... يتفقد ساعته.... لا يشعر أنه بمزاجٍ مناسبٍ للعمل اليوم.... يفكر بالاستئذان من رئيسه في العمل... ولكنه "مُحرج"... ف"حازم" صديقه قبل أي شيء.... ولم يعتد أن يُطالبه بأي خدمات تحت مسمى هذه الصداقة.... ولكنه في مزاجٍ سيئٍ بالفعل.... فيقرر أخيراً الاتجاه نحو مكتب "حازم"....
- يطرق الباب.... ليجده مشغولاً بمكاملة عمل تضعه في مزاجٍ سيئٍ... يشير إليه الآخر بالجلوس.... وبعد بضع دقائق....
- (يتنهّد حازم.... يبدو مستاء) أرف يا ابني والله أرف....

- (ينظر له نظرة شزر مخلوطة بابتسامة هزلية...) أبوك لأبو تغريد في ساعة واحدة يا أخي..... تصدق بالله... أنا همشيها النهاردة....
- تكون عملت خير ومعروف في الشركة كلها والله يا ابني.... محدش طايقها أساسًا....
- (يُحرك يده باللامبالاة....) وأنت مالك؟! مزاجك وحش ليه!؟
- هبقى أقلقك بعدين.... مرة ثانية نكون إحنا الاتنين أروق من كده....
- (يُحرك رأسه بالإيجاب مبتسمًا....)
- (يربت على كتفه....) يلا سلام....
- ثم يُغادر الشركة..... وفي السيارة... يقوم بمهاتفه "وائل"...
- خلصت شغل!؟
- ولا اتحركت من مكاني...
- (يعقد حاجبيه....) مرحتش الشغل!؟
- (بنبرة حادة...) بقلق متحركتش من مكاني... هروح الشغل إزاي يعني!!!
- أنت بتزعأ ليه يا حيوان أنت!؟!!!
- (يتنهد....) أنا في نفس الكافية.... تعالى....
- عنده أكل!؟!!
- مش عارف... استنى لما أبص في الـ menu كده.... (لحظات....)
- لا معندوش....
- طب خلاص هعدي عليك نروح ناكل في أي حته....

- سلام... ..
- وفي السيارة....
- هنروح فين؟! ..
- بفكر ناكل سمك....
- (بنبرة لا مبالاة....) قشطة... أي حاجة....
- أنت....
- (يُقاطعُه....) طارق.... بعد ما نقعد وناكل ونشربلنا كوبايتين شاي كده... نبقى نتكلم في اللي أنت عاوزه... (ينظر إليه....) أمين؟! ..
- (يرفع صوت الموسيقى....)
- (يخفض صوت الموسيقى....)
- (يبتسم له...) أمين....
- وفي المطعم وبعد تناول وجبة "سمك" شهية... دون تبادل أطراف الحديث... يطلب "وائل" من النادل إحضار كوبي شاي.... وقد كان....
- (يتفقد طارق ساعته...) إيه اليوم الطويل ده؟....
- الساعة كام؟! ..
- خمسة....
- (يرفع حاجبيه....) فعلا....
- (صمت قليل....) أنت مضايق ليه دلوقتي؟! لسه حوار مراتك مضايقك؟! ..
- (يُحرك رأسه بالنفي...) مش موضوع مضايقني... أنا الحالة العامة هيه اللي مش جايه على هوايا يا طارق....

- (يعقد حاجبيه...) الحالة العامة؟!
- آه... حوار الجواز كله... فكرة الربطة والبيت والخلفة بقى....
(يُحرك رأسه بالنفي سريعاً...) لا لا لا.... الجو ده كله على بعضه
مش جوي.... من زمان وأنا عارف كده..... أنا راجل حر.... من
يوم يومي وأنا حر.....

- يا ابني مش ده كان اختيارك.... هوه حد فينا كان غصبك!!!!?
- (يتنهد بسخونة...) محدش غصني.... وأنا فعلا بحبها... واخترتها
بإرادتي... بس الوضع كله اتغير بعد الجواز يا طارق... أنا
كنت فاكِر إني اخترت الإنسانة اللي هتريحني بعد كده... هتفهم
دماغي.... هتفهم على الأقل تفهم إني فعلا راجل حر.... بس
للأسف كله اتغير بعد الجواز.... اتعلقت بيه بزيادة.... وحبها
بقى مرضي.... بقى حب مرضي.... بقى يخنق....

- حاولت تتنهد...
- (يُقاطعه...) اتكلمت... والله اتكلمت... فهمتها... فهمتها إنها
كده بتخسرني... وحبّي ليها أبداً مش ضمان لاستمرار علاقتنا...
وإني لو فعلا جبت أخري هسبها... في أي لحظة... هسبها....

- (يتنهد...) وفهمت؟!
- (يُحرك رأسه بالنفي...) بعد كل مرة بنتكلم فيها... بتتظبط
يومين ثلاثة شهر بالكثير... بعد كده بترجع تاني زي الأول وأسوأ
كمان....

- (بيتسم له...) أنت بتحبها يا وائل... مش كده...؟!
- (بيتسم بأم... يُحرك رأسه بالإيجاب...) بحبها... بحبها يا طارق
والله... بس اتخنقت.. اتخنقت وخايف الوضع يفضل زي ما
هوه.... ساعتها فعلا هضطر أسببها... وأنا مش عاوز أسببها....

- حاول تاني... وثالث.... وعاشر..... اتكلم معاها بكل الطرق
الممكنة.... خدتها عالهادي وعالهامي.... خليكي وراها لحد
ما تفهم.... اعمل اللي عليك من الآخر... لو بتحبها زي ما
بتقول.... اعمل اللي عليك للآخر.... مكنش ذنبها إنها اتعلقت
بيك بزيادة بعد الجواز.... وكل واحد بيحب التاني بطريقته....
ودي طريقتهها.... حاول أنت بقى بذكائك تظبط الوضع.... لحد
ما توصل لطريقة تعامل ترضيكو أنتوا الاتنين....
- (يُشعل سيجارة.... يُحرك رأسه بالإيجاب.... صمت قليل....)
كلمت خديجة...!؟
- (بيتسم باستهزاء....) لا.... مجتش أصلا الشغل النهاردة....
- (يعقد حاجبيه... ينفث دخانه) أجازة يعني؟!
- (يُحرك رأسه بالنفي...) لا... ظرف طارئ....
- طب وإيه؟! جبت رقمها!
- ولا جبت ولا نيلت.... ولا هكلمها أساسًا....
- (يرفع حاجبيه....) كل ده عشان مجتش....!
- آه..... حاسس إنها علامة إني أصرف نظر....
- (نصف ابتسامة...) علامة؟! ما تيجي أقرالك الفنجان بالمرة
نشوف ميلان بختك سببه إيه؟!
- (ينظر بعيدًا مبتسمًا...) معرفش بقى... ده اللي أنا حسيته....
- بقلك إيه؟!
- (ينظر إليه....) ها!!
- (يحدق به.... ينفث دخانه) عجبك؟!

- (يُحرك رأسه بالنفي...) مش دي القصة.... خطفاني أكثر ما هيه
عجبانى... شغلالي بالي... بفكر فيها كثير... بحب أبصلها حتى لو
من بعيد كده... بحب أتفرج عليها... على حركاتها... ضحكتها...
ردود أفعالها.... (يبتسم له...) كده يعني.....

- (يتنهد..... صمت قليل....)

- (يُحرك يده باللامبالاة.....) خلاص بقى.....

هنا يرن هاتف طارق.... رقم غريب.... يستقبل المكالمة....

- ألو... (صوت نسائي غريب...)

- (يعقد حاجبيه...) ألو...

- مساء الخير.... طارق؟!!

- اتفضلي!.....

- أنا خديجة....

- (يجحظ بعينيه.... يضع يده على الهاتف... يهمس لـ"وائل") دي
خديجة!!!!!!!

- (يجحظ بعينيه هو الآخر....) طب رد... رد!!!!!!!

- (لحظات صمت... يكمل مكالمته....) أيوه... أوُمري....

يضربه "وائل" على كتفه بقوة... بصوتٍ خافتٍ "ما تتكلم عدل
يا حيوان أنت"!!!

- (بصوتٍ مبتسمٍ... بترددٍ... تُجيبه) لا... ما... أنا متصلة عشان
واضح أنت اللي عاوز حاجة مني.... ده اللي أنا فهمته من
"منة"... بتقولي إنك كنت طالب مني حاجة وبتسأل عليا
عشانها.... وأنا الحقيقة مش فاكره إن دار بينا أي حوار من

النوع ده... فحببت أفهم الموضوع بنفسى..... يُمكن يكون في
حاجة أنا مسقطاها....

- (صمت... لا إجابة.....)

- ألو.....

- (لا إجابة.....)

- ألو؟!!!!

- ممكن أكلمك كمان دقيقة؟!

- (تعقد حاجبيها....) أكيد....

- باي....

ثم يُنهي المكالمة..... يجحظ بعينه أمام "وائل"....

- أنا.....

- (يضربه على رأسه....) أنت إيه؟! ما أنا شفت وسمعت!!! أنت

عيبط يلا!!!!

- مش عارف إيه اللي أنا عملته ده..... اتوترت!! معرفتش أقولها

إيه.....

- تقوم تعمل كده!!!!!! زمانها فاكهه إنك متخلف دلوقتي!! عيل

أهبل!!!

- (يتنهد بسخونة... يضع يده على جبينه....) أعمل إيه دلوقتي!!

أعمل إيه؟!

- كلمها تاني.... حالا!! دلوقتي حالا!!!

- أقولها إيه؟!



- قولها انزلي عاوزه أشوفك.... هتقولك ليه؟! قولها لما أقابلك
هحكيلك!! ومتكلمش نص كلمة زيادة عالتلفون!!!!!!
- (مُسك هاتفه... يبدو متوترًا للغاية....) ماشي... ماشي.... (يُحذق
بالهاتف..)
- (يضربه على رأسه... يلا!!!!!!)
- (يتنهد... ثم يقوم بمعاودة الاتصال بها....) ألو....
- أيوه يا طارق....
- (بلطف...) أنا آسف على اللي حصل من شوية... بس كان...
(تقاطععه...) حصل خير... كنت عاوزني في إيه?!
- (صمت قليل... يُحذق بكوب الشاي....) عاوز أشوفك... ممكن
أشوفك?!
- أنا نازلة بكرة الشغل....
- لاء... عاوز أشوفك بره الشغل.... (صمت قليل...) عاوز أشوفك
النهاردة....
- في إيه يا طارق... شغلتي بالي...?!
- (صمت قليل... يُحذق بصديقه....) عاوز أشوفك.... النهاردة...
النهاردة يا خديجة....
- (تتنهد... تشعر بالقلق....) يناسبك الساعة عشرة?!
- (بيتسم....) يناسبني جدا... فين?!
- left bank الزمالك....
- تمام....
- تمام..... باي.

- يتنهد بسخونة.... يضع كلتا يديه على وجهه....
- (ينكره وائل....) ها!!
- (يزيح يديه... يشعل سيجارة... يُحرك رأسه بالإيجاب....) هقابلها....
- ما أنا فهمت.... أنا قصدي... إيه الدنيا!؟
- (ينفث دخانه....) معرفش..... زي ما سمعت.... هقابلها الساعة عشرة في left bank
- (بيتسم...) حلو left bank رومانسي ولطيف....
- (نصف ابتسامة... ينظر بعيدًا....)
- مالك يا ابني!؟
- (يُحرك رأسه بالنفي....) مش عارف هقلها إيه....
- قلها أي حاجة.... قلها كل اللي عاوز تقوله.... وبعدين من الـ image اللي تخيلتها لخديجة دي إنها دماغها حلوة.... هتفهم يعني.... فقول كل اللي عاوز تقوله من غير تخطيط ولا تجهيز.... قول كل اللي أنت حاسس بيه....
- (بيتسم له.... يُحرك رأسه بالإيجاب....)
- (يتفقد ساعته....) لسه بدري على حوار عشرة ده... متقوم ندخل سينما....
- (يُحذق به.... ينفث دخانه) ما أنت هتدخل سينما.... بس مش معايا... مع مراتك....
- (يُحرك يده باللامبالاة....) فكك...
- لا مش هفكني.... هتكلمها وهاخرجوا وهاتكلموا... وهاتحلوا الي ما بينكم يا وائل...

- (يتنهد... يُحرك رأسه بالنفي كثيراً...) لا لا لا... مش قادر... مش قادر أرجع البيت أساساً.....

- متكبرش المواضيع عالفاضي.... حل ما تعقدش.....

- (نصف ابتسامة...) أنا لا عاوز أحل.. ولا عاوز أعقد....

- أمال عاوز إيه؟!!

- (يُحرق في كوب الشاي... صمت قليل....) عاوز إيه.... عارف

عاوز إيه بجد يا طارق... دلوقتي حالا...!!

- (يُحرك رأسه بالنفي....) عاوز إيه?!

- (بيتسم....) عاوز أروح البيت فعلاً... بس مش عاوز أتكلم..

مش عاوز أتخانق... مش عاوز عتاب وأرف... عاوز أرجع البيت

أخدها في حضني ونقعد نتفرج على فيلم حلو إحنا بناكل....

بس كده.... من غير كلام.... (يتنهد.... نصف ابتسامة... ينظر

بعيداً..) بس ده مش هيجصل.... أنا عارف إنه مستحيل

يجصل.... ولازم اليوم ينتهي بخناقة قد كده.... فعلى إيه بقى

يا ابني.... خليني مرزوع هنا أحسن لحد ما تمام....

- (بيتسم له بحزن... يربت على كتفه.... يطفئ سيجارته) طب

أنا هقوم أدخل الحمام وأرجعلك...

- (يُحرك رأسه بالإيجاب.....)

يتجه "طارق" إلى دورة المياه... وهناك يقوم بمهاتفة "هبة" زوجة

"وائل"....

- ألو؟!!

- (بنبرة حزن...) أيوه يا طارق إزيك....

- أنا تمام يا هبة.... ممكن تسمعيني للآخر؟!!

- (بذعر...) في إيه؟! وائل جواله حاجة؟!
- لا..... وائل كويس.... بس أنا عاوزك تسمعيني للآخر ومتقاطعينش لحد ما أخلص كلامي....
- (بترقب...) سمعك...!!
- تمام... دلوقتي أنتي عشر دقائق هتكلمي وائل تقويله أنت وحشتني أوي... وإنك آسفة عالموقف السخيف اللي عملتيه معاه الصبح...
- (تقاطععه...) بس هوه...
- (يقاطعه...) اسمعيني للآخر يا هبة.... وائل مأجرمش لما نزل يشرب فنجان قهوة معايا الفجر.... وأنتي عارفه كويس أوي إنه معايا... وأنتي عارفاني... مليش في أي حاجة من اللي ممكن تكون في دماغك..... أنتي غلطتي... وأنتي عارفه إنك غلطتي.... ووائل بجد مخنوق.... فوق ما تتخيلي... وأنا لو مكانك فعلا هبدأ ألق عالوضع اللي بقينا فيه.. وهقعد مع نفسي وأراجع حساباتي... ده لو فعلا بتحبيه وباقية عليه..... كل اللي أنا طالبه منك دلوقتي... إنك تكلميه... بهدوء وحنيه... وتقويله إنك آسفة.... وإنك مستنياه في البيت وإنه وحشك أوي.... بس كده... (ينفعل قليلا..) مش صعبه يا هبة!!
- (صمت قليل.... تشعر بالندم حقا.... والقلق أيضًا...) طب.... افرض هوه اتخانق أو...
- (يُقاطعها...) لا هيتخانق ولا هيزأ ولا هيعمل حاجة... على ضمانتي.... اسمعي اللي بقلك عليه.... مفيش حد هيخاف عليكوا قدي.... أنتي عارفه كده كويس....
- (تتنهد...) عارفه.... والله عارفه.....

- تمام أوي.... عشر دقائق وتكلميه يا هبة... ومتجبلوش سيرة
عالمكامة دي لو سمحتي...

- حاضر.....

- سلام...

- باي....

يعود مجددًا إلى طاولته.... يتسم لـ"وائل" الذي يبدو عليه
علامات الضجر.....

- ما تيجي نمشي يا طارق... أنا زهقت من القعدة....

- (يُحرك رأسه بالإيجاب....) ماشي... نشرب سيجارة بس ونقوم....

- (ينظر بعيدًا.... صمت....)

وبعد مرور عشر دقائق.... تتصل "هبة" بزوجها كما أخبرها
طارق....

- (ينظر وائل للهاتف.... يتجاهل المكالمة...)

- دي هبة؟!

- آه...

- طب مترد....

- (يُحرك يده باللامبالاة....)

- يا ابني رد... ما يمكن فيه حاجه.... دي مراتك على فكره مش
صحتك!!

- (يُحذق به... ثم يُجيب هاتفه... نعم؟!)

- (صمت قليل.... بحنان....) وحشتني... وحشتني أوي....

- (يشعر بنشوة غريبة.... لا إجابة....)

- (بحنان...) وائل..... ارجع البيت... عشان خاطري.. أنا آسفة..
حقك عليا....

- (بيتسم ابتسامة عريضة....) وأنتي كمان وحشتيني....

- (بدلال....) طب.... إيه؟!!

- (يهمس لها....) نص ساعة وأكون عندك.....

- (بدلال...) هستناك.... (ثم تنهي المكالمة.....)

ينظر لصديقه.... بيتسم له.....

- (بتردد....) أنا..... هقوم بقى....

- (بيتسم ابتسامة عريضة....) قوم... قوم يا خويا!!!!!!

- (بيتسم هو الآخر..... مغادراً مقعده...) بحبها يا أخي.....!!!!!!

- (يُحرك رأسه بالنفي مبتسماً....) ماشي... اتكل على الله....

- (يربت على كتفه.... ثم يُغادر..... نصف دقيقة... يعود مجدداً....

ليهمس لـ"طارق") شكراً يا كبير..... (ثم يُغادر مجدداً.....)

وفي تمام الساعة الثامنة يتجه "طارق" للمكان المتفق عليه لمقابلة

"خديجة"... قرر الذهاب باكراً... ليستجمع أفكاره... أو قواه بالأحرى....

موقف لم يمر به من قبل.... حالة بلا مسمى....

الساعة الآن التاسعة.... وما زال ينتظر.....

التاسعة والنصف..... وها هي ذي "خديجة" تطل عليه بابتسامتها

الجميلة... تمد يدها للسلام...

- مساء الخير...

- مساء الورد.....

- (تجلس أمامه.... تتنهد بابتسامةٍ كبيرةٍ....) عامل إيه؟!!

- (يُحرك رأسه بالإيجاب.. ابتسامة لطيفة...) الحمد لله... أنتي كويسة؟!
 - كله تمام....
- (يُحذق بها بابتسامةٍ بلهاء....)
 - (تشعر بالقليل من الخجل.... تحاول أن تكسر حاجز هذا الصمت....) مبسوط في الشركة؟!
 - (يعقد حاجبيه مبتسمًا...) مفروض أنا اللي أسألك السؤال ده... أنا بقالي سنين فيها... أنتي مبسوطه فيها؟!
 - (تبتسم...) حازم هايل... وصديق أكثر منه رئيس عمل.. وده مريحني جدا....
 - (ساخرًا...) طب وتغريد؟!
 - (تبتسم ابتسامة عريضة....) تحاول أتجاهلها على قد مقدر....
 - بتضايقك؟!
 - (تحرك رأسها بالنفي....) معرفهاش عشان تضايقني... بتحاول تضايقني... بس أنا بالعادة مفيش حاجة بتضايقني إلا إذا كانت تخصني أو تعز عليه... ف لأ...مش بتضايقني....
 - (يُحرك رأسه مبتسمًا...) تمام....
 - (صمت قليل....) كنت عاوزني ليه؟!
 - (يُطبق على شفثيه مبتسمًا....) مش عارف...
 - (تعقد حاجبيها...) بمعنى؟!
 - (يُحرك كتفيه باللامبالاة....) بمعنى إني مش عارف....
 - (تبتسم بأدب...) آه... يعني أنا دلوقتي هنا ليه؟!
 -

- (يُحَدِّقُ بِعَيْنَيْهَا..... دُونَ رَدِّ.....)
- (تُحَدِّقُ بِهِ هِيَ الْأُخْرَى... لَا حَدِيثَ.....)
- (دَقِيقَةٌ صَمْتٍ.....) بِحُبِّ عَيْنِي أَوْي.....
- (مَا زَالَتْ تَحَدِّقُ بِهِ..... لَا إِجَابَةً.....)
- (يَبْتَسِمُ بِحَنَانٍ.....) وَبِحُبِّ ضَحْكَتِكَ.....
- (تَشْعُرُ بِالخَجَلِ... وَلَكِنْ هَذَا لَا يَمْنَعُهَا مِنَ النَّظَرِ إِلَى دَاخِلِ عَيْنَيْهِ مَبَاشَرَةً.....)
- (يَتَنَهَّدُ.....) أَنَا آسَفُ عَالِمُوقِفِ السَّخِيفِ الِلي أَنَا حَاطِكُ فِيهِ دُلُوقْتِي..... أَنَا عِنْدِي كَلَامٌ أَقُولُهُ صَدِيقِي... بِسَ مَشِ عَارِفِ أَبْتَدِيهِ مَنِينٍ... وَإِزَاي.....
- (تَبْتَسِمُ لَهُ.....) أَنَا مَشِ مَضَايِقَةٌ يَا طَارِقُ... قَوْلِ كُلِّ الِلي عَاوَزِ تَقَوْلَهُ...
- (يُحَدِّقُ بِعَيْنَيْهَا بِحَنَانٍ.....)
- (بِصَوْتٍ دَافِئٍ.....) طَارِقُ.....
- (يُحَرِّكُ رَأْسَهُ بِالِإِجَابِ...) أَنَا بِقَالِي فَتْرَةٌ مَتَعَلِّقٌ بِيكِي بِشَكْلٍ غَرِيبٍ وَمَشِ مَفْهُومٍ...
- (تَبْتَسِمُ...) لِيهِ؟! لِيهِ غَرِيبٌ؟! وَلِيهِ مَشِ مَفْهُومٌ!؟
- (صَمْتٌ قَلِيلٌ...) عِشَانٌ مِينْفَعِشِ... عِشَانٌ الْمَفْرُوضِ إِنَّكَ مَتَعَجِبْنِيَشِ... عِشَانٌ أَتِي حَيَاتِكَ غَيْرِ حَيَاتِي... وَتَرْبِيَتِكَ غَيْرِ تَرْبِيَتِي... عِشَانٌ حَاجَاتُ كَثِيرٍ يَا خَدِيجَةَ.....
- (تَبْتَسِمُ لَهُ بِحَنَانٍ...) يَعْنِي أَنَا عَجْبَاكَ!؟
- (يَشْعُرُ بِالخَجَلِ... يَنْظُرُ لِلْأَسْفَلِ.....) مَشِ عَارِفُ.....
- (تَنْظُرُ بَعِيدًا مَحْرَكَةً رَأْسَهَا بِالِإِجَابِ.....)

- أنا مضايقتك!؟
- (مبتسمة.....) خالص... خالص يا طارق....
- (يتنهد.....) أنا عندي كلام كثير..... بس...
- (تقاطععه...) قوله....
- (يُحدق بعينها... بصوت حنون خافت...) نفسي أضمك....
- (تُحدق بعينه... عيناها لامعتان....)
- (يبتسم لها...) بحب أتفرج عليك من بعيد... لما بتكوني في مكان أنا فيه... لما بتعدي من جنبي... بجد ببقى مبسوط..... أقلك على حاجة كمان... أنا فعلا كنت بفكر بشكل جدي إني أسيب الشركة قبل ما تيجي... من ساعة ما جيتي... وأنا الفكرة راحت من بالي... بقيت بنزل مخصوص عشان أشوفك.... بقيت بصحى من النوم وأنزل شغل أنا مبحبوش... بس عشان أشوفك....
- (تبتسم له بحنان.....)
- (يتنهد... يُحرك رأسه بالنفي...)
- بس أنت شايف إنه مينفعش... مينفعش أتشد لواحدة مختلفة عني... إلى حد كبير متحررة ومستقلة و...
- (يُقاطعها...) وقوية... (يبتسم...) وقوية يا خديجة... قوية وعنيدة وصعبة وبأينة وواضحة... ومتمردة... (ويتنهد بسخونة.....) ومختلفة....
- (تعقد حاجبها...) هو الوصف ده... مفروض إنه مدح واللا ذم....
- (يبتسم...) دي الحاجات الي أنا حبتها فيكي... ودي الحاجات الي مستحيل أقبلها... واللا ينفع أعيش معاها....

- (تنظر بعيداً بنصف ابتسامة....) فهمت....
- (صمت قليل.... بنبرة انكسار) زمانك بتقولي إيه الراجل المتخلف
...٥٥
- (تنظر إليه بحنان.... تُحرك رأسها بالنفي...) كنت قلتها بصوت
عالي يا طارق....
- بتفكري في إيه طيب؟!
 - (ابتسامة ألم....) مضايقة عليك....
 - (يُحدق بها....)
 - (تُحرك رأسها بالإيجاب... مبتسمة.... بصوت حنون....) مضايقة
عليك....
 - (يُحرك رأسه بالنفي....)
 - (تعقد حاجبيها مبتسمة...) إيه؟!
 - بس؟! ده اللي عاوزه تقوليه؟!
 - (تبتسم له بحنان....) لا.... في حاجة تانية لازم تعرفها....
 - (بصوتٍ قلقٍ...) إيه؟!
 - (تُحدق به... صمت قليل....) أنا هسافر....
 - (يعقد حاجبيه...) تسافري فين؟!
 - تونس.... جالي عقد عمل هناك من فترة.... وكنت بقلّب
الموضوع في دماغي... من أسبوع بس أخذت قرار.... وعلى آخر
الشهر إن شاء الله هكون مقدمة استقالتى....
 - (يُحدق بها.... يشعر برغبةٍ ملحةٍ في البكاء....)
 - (تبتسم له.... ثم تبعد بنظرها بعيداً....)

- (صمت قليل..... دقائق.....) هتسافري؟!!!!
- (تحرك رأسها بالإيجاب.....)
- يعني..... مش هشوفك تاني؟!؟
- (تُحرك رأسها بالنفي... مع ابتسامة خفيفة...)
- (يتنهد بعمق.... يحكم قبضته تحت المنضدة.... يشعر بالغضب... بالضعف... بقلّة الحيلة..... يشعر بالألم..... نصف دقيقة... تدمع عيناه.....)
- (تُحدق به بدهشةٍ..... تمسك يده اليمنى.....) طارق.....
- (يُفلت يدها ببطءٍ.... يتنهد ثم ينظر بعيدًا.....)
- طب.... طب أنت عاوز إيه؟!؟ أنا مش فاهمة.....
- (يطبق على شفّتيه.... بصوتٍ دفينٍ.. مختنق.... دون أن ينظر إليها...) مش عارف... مش عارف... مش عارف....
- (تُحدق به....)
- (ينظر إليها.....) خديجة..... أنا... أنا مش جبان.....
- (ما زالت تُحدق به.... لا إجابة.....)
- أنا بجد مش جبان.... ولا ضعيف.... أنا بس.....
- (تُحرك رأسها بالنفي....) بس إيه....؟
- (يُحكم قبضته بقوة.... يشعر بالغضب.....) أنا بس..... مش فاهم.... مش فاهم حاجة.... أصله.... مينفعش.... (يبتسم بأم....) مينفعش.... أنتي فاهماني؟!؟ كل حاجة فيكي.... مينفعش تعجبني.... مينفعش تشدني.... مينفعش....
- (تُقاطعه....) تحبني؟! مينفعش تحبني.....!؟

- (يُحَدِّقُ بِهَا..... يَتأمل عينيها..... ثَغْرَهَا... شَعْرَهَا القَصِير
المَجْعَد... لِحْظَات صَمْت...)

- (تَبْتَسِمُ لَهُ بِحَنَانٍ.....) أَنْتِ لِيهِ مَسْأَلَتُنِيشِ مِنْ أَوَّلِ القَعْدَةِ أَنَا
حَاسَةً نَاحِيَتِكَ بِأَيِّهِ؟!

- (لَا إِجَابَةَ.....)

- (لِحْظَات صَمْت.....) أَنَا كَمَا مَنِ مَنفَعَشِ أَحْبَبَكَ عَلَى فِكْرَةٍ...
وَفَافِهِمِ كُلِّ كَلِمَةٍ قَلْتَهَا... وَحَاسَةً بِيهَا أُوِي... وَعَلَى فِكْرَةٍ...
أَنْتِ جِبَانٌ... وَأَنَا كَمَا جِبَانُهُ... يُمْكِنُ دِي الحَاجَةِ الوَحِيدَةِ
المَشْتَرَكَةِ مَا بَيْنَا يَا طَارِقُ..... إِحْنَا الِاتْنَيْنِ مَعْدِنَاشِ الشَّجَاعَةِ إِنْنَا
نَخُوضُ تَجْرِبَةَ زِي دِي..... صَعْبٌ إِنْ حَدَّ يَحْسُ بِيكَ بِالطَّرِيقَةِ دِي
وَأَنْتِ مَتَخَدِّشِ بِالك... صَعْبٌ إِنْ كُنْتِ أَتْجَاهِلُ نَظْرَتَكَ لِيهِ...
عَيْنِكَ..... عَيْنِكَ الِلي مِيشْ بَهْوشِ عَنِينِ أَيِّ رَاجِلِ قَابَلْتَهُ فِي حَيَاتِي
يَا طَارِقُ.....

- (يَتَنَهَّدُ بِسَخُونَةٍ.....) خَدِيجَةُ... أَنْتِي مَسَافِرُهُ عِشَانِ تَهْرَبِي مَنِي؟!

- (تُحْرِكُ رَأْسَهَا بِالنَّفْيِ.....) لَآ... أَنَا مَبْهَرَبِشِ مِنْ حَاجَةٍ فِي حَيَاتِي...
أَنَا بَوَاجِهِ...

- مَسَافِرُهُ لِيهِ؟!

- (تُحْرِكُ رَأْسَهَا بِاللامْبَالَةِ... تَبْتَسِمُ... مَشِ مَكَانِي... مَشِ مَرْتَاخَةٍ.....

- طَبِّ ... وَأَنَا؟!

- (تَبْتَسِمُ ابْتِسَامَةً عَرِيضَةً... بِحَنَانٍ.....) وَأَنْتِ إِيهِ يَا طَارِقُ؟!!

- (صَمْتٌ... وَلَا إِجَابَةَ.....)

- (تَنْظُرُ بَعِيدًا..... بِصَوْتٍ خَافِتٍ) طَيِّبٌ...
يَنْظُرُ لِلْأَسْفَلِ... يَشْعُرُ بِحُزْنٍ عَمِيقٍ... يَوْمُهُ صَدْرُهُ.....)



- (تنظر إليه بأسفٍ شديدٍ... تربت على يده بحنانٍ.....)
- (يُمسك يدها بقوةٍ.... يُحدق بعينها.....) خليكى.....
- (تبتسم له... تُحرك رأسها بالنفى... عمرنا ما هنتفق....
- (بصوتٍ مختنقٍ....) مش مهم....
- (تُفلت يده بهدوء.....) لا.... مهم....
- هنتفق.....
- (تبتسم ابتسامَةً عريضةً... تمحوها ببطءٍ.. تحرك رأسها بالنفى...)
- ولا عمرنا هنتفق....
- (بصوتٍ متقطعٍ حزينٍ دافئٍ.....) مش... مهم....
- (تتنهد بسخونةٍ.... تقف استعدادًا للمغادرة.... تقترب منه... تضع يدها على وجنته بحنانٍ.....) الحياة دي ظالمة....
- وقاسية..... بس أنا عاوزاك تعرف إني عمري ما هنسأك....
- (تُحدق بعينيه...) ولا عمري هنسى عنيك.... ولا نظرتك ليه... ولا إحساسى بيهم..... (تقبله من جبينه..... ثم ترحل.....)
- ترحل خديجة عن مرمى نظره رويدًا رويدًا... حتى تختفي تمامًا.... هنا... يشعر "طارق" بوخزةٍ في صدره.... يشعر للمرة الأولى بألم ما يسمى بالـ "حب".... مؤلم هو ذلك الحب... تلك اللعنة.... مؤلم للغاية.... مؤلم حين تمنحنا الأقدار شعورًا عظيمًا نادر الوجود لا يوصف كهذا الذي يُكنه "طارق" لـ "خديجة".... وأكثر ما يؤلمنا حقا... عندما نوقن وبكل صدق دون أن نخدع أنفسنا... أن الحب للشجعان دون سواهم.... وأنك "جبان" و"ضعيف" أيها الـ "طارق".... فلتمض من حيث جئت... لتعود إلى القطيع...

حافضة حرارية^{١٩}

الساعة الواحدة صباحًا بعد منتصف الليل....

على أحد شواطئ (العين السخنة)... ليلة باردة في آخر أيام كانون الأول... تجلس "تمارا" مباشرة أمام البحر... لا يفصل بينها وبينه سوى خط التقاء الموج بالرمال.... تُمسك بحافضة حرارية من الكاكاو الساخن.. وفي يدها الأخرى... سجائر الـ Merrit.... ترتدي كل ما أمكنها ارتدائه من الملابس الثقيلة.... كما تجري العادة منذ أربعة أيام مضت... بلا هاتف... بلا مصدر للضوء... بلا شيء.... تكتفي بسجائرها وحافظتها الحرارية الكبيرة.... أربعة أيام على هذا الحال... وها هو الخامس على التوالي.... بلا ونيس.... وأي ونيس قد يشاركها جنونًا كهذا.... الطقس بارد للغاية... والشاطئ مظلم... ومخيف.... ولكنها تجد في هذه البقعة من العالم.... الكثير من الصمت... والهدوء.... وال.... لنقل.... السلام.... الكثير من السلام.... حيث اللا ضجيج... اللا أذى... اللا بشر....

وتنتهي ليلتها الخامسة في تمام الساعة السادسة صباحًا.... تتجه إلى شرفة "الشاليه" الذي يتمتع بدوره بطلقة رائعة مباشرة على البحر... تعد كوبا آخر من الشاي... تدخن المزيد من السجائر....

تبدأ بالبكاء... ليس بنحيب... ولكنه بكاء هادئ... إلى أن يهاودها
النوم... على أريكة الشرفة...

تستيقظ على مشهد رائع لغروب الشمس..... كل هذا الجمال...
لها وحدها....

قطرات دمع تتساقط من عينيها... تتنفس بعمق.... تفيق...
لُتعيد الكرة... تملأ حافظتها الحرارية بالقهوة... سجائرها الـ Merrit..
لتنجّه إلى البحر... والليل قد شارف على كسو السماء بسواده...
الليلة تبدو مختلفة... أمواج البحر مخيفة... عالية جدا... والطقس
جنوبي... ولكنها تأبى العودة إلى الداخل... تلتفت يمينا ويسارا...
تلاحظ وجود أحد المقاعد الخشبية على مسافة لا بأس بها من
موقعها... تتجه إليه بخطوات بطيئة ثابتة... وها هو الليل...
ظالم... بارد... ومخيف....

تدخن تارة... تحتسي قهوتها تارة... تبكي تارة... تبتسم تارة...
تصاب بنوبة ضحك هستيري تارة... تعود لتبكي..... كالمجانين....

الساعة الآن... الثانية والنصف بعد منتصف الليل... تمسك
بحافظتها الحرارية... التي ما باتت حرارية... لم يبق بها سوى القليل
من الدفء الذي قررت "تمارا" استخدامه لتدفئة يديها... تحدق
بالحافضة... تتساقط دموعها لمتزج بالقهوة... لحظات لتشعر بلمسة
يد على كتفها... تتجاهلها... يخال لها أن هذا ضرب من الخيال...
من الوحدة... ما زالت تحدق بحافظتها الحرارية....

"دخان سجائر؟!..... أهذا ضرب من الخيال أيضًا يا "تمارا"؟!...."

تلتفت يمينا... لتجد رجلا يحدق بها بابتسامةٍ باردةٍ ممسكا بيده
زجاجة "جعة".... تنتفض فزعًا من مكانها... بينما هو... ثابت... بلا
حرك... ما زال يبتسم لها... يحتسي جعته...

- (مبتسمًا... نبرة جافة) أنتي عبيطة؟! -
- (تحقق به... تقف أمامه..... لا إجابة....)
- (يبتسم ابتسامة عريضة... يحتسي جعته... يدخن سيجارته.....)
- (تنظر إلى حافظتها التي لم تنج من إثر اصطدامها المفاجئ بالأرض... تقترب منها... تدنو من الأرض... تمسك بحافظتها... الكثير من الشقوق... أغلب الظن أنها لما تعد صالحة للاستخدام... تملأ عينيها الدموع... تتأملها بحزن شديد....)
- (يندهش من ذلك المشهد... يشعر أن به الكثير من المبالغة... نصف ابتسامة... يعقد حاجبيه) إيه الـ over ده....
- (ما زالت تمسك بحافظتها... ترفع عينيها لتنظر إليه... تتساقط دموع عينيها....)
- (يعتدل في جلسته... يضع زجاجة الجعة جانبًا...) إيه ده... في إيه؟! -
- (تقف... تنظر إلى البحر... لحظات... تتنهد بعمق... ثم تغادر لتتجه إلى الشاليه...)
- توصد الباب جيدًا... تُغلق أنوار "الشاليه"... ترمي على سريها لتنام... لتنام بعمق....
- لينتهي يومها... كسابقه... أيام تمضي... بلا معنى... وكأنها تتعمد إحراق أيام عمرها... واحدًا تلو الآخر....
- يوم جديد... الساعة الآن... السابعة ليلا....
- الطقس بارد... ولكن البحر هادئ... والقمر رائع... السماء مضيئة... و"مارا" لا تشعر برغبة في البكاء هذه الليلة..... تستمع إلى مقطوعاتٍ هادئةٍ للبيانو والكمان....

”دخان سجاير“..... لا بد أنه ذلك المتعجرف..... لم تلتفت.... تعلم أنه بجوارها... ولكنها لم تلتفت..... دقائق... ليقوم هو بنقرها بلطف في كتفها..... تتجاهله تمامًا..... يقوم بنقرها مجددًا.... للمرة الثالثة على التوالي..... تقوم بإيقاف الموسيقى..... تنظر إليه.....

- (بيتسم لها..... يناولها حافظة حرارية جديدة.....)
- (تحقق بالحافظة الحرارية..... دون إجابة.....)
- (ما زال مبتسمًا.....) أنا آسف....
- (تشعل سيجارة..... تعود لتتجاهله من جديد.....)
- على فكرة... أنا ممكن أضربك..... لأنك فعلا مستفزة!!!
- (تنفث دخانها في وجهه بكثافة.....)
- (بيتسم.....) إيه يا بت الشبحنة دي كلها?!!
- (تحقق به بابتسامهٍ لا معنى لها...)
- (يتنهد.....) أنتي خرسة طيب?!
- (تبتسم له.....)
- (يعقد حاجبيه.....) خرسة?!!
- (تنظر إلى البحر لتنفث دخانها بكثافة.....)
- (يتنهد مرة أخرى.....) البحر حلو النهاردة... هادي... وحين....
- (لا إجابة..... ما زالت تنظر إلى البحر.....)
- (دقيقة صمت... يقوم بإشعال سيجارة من علبة سجايرها التي تضعها بجوارها.....)
- (تنظر إليه شزرًا.... ثم تقوم بوضع علبة سجايرها في جيبتها....)

- (بيتسم لها ابتسامة عريضة....) أنت منوفي واللا إيه يا شبح....!؟
- (نصف ابتسامة... تنظر بعيدًا للبحر.....)
- (ينفت دخانه بكثافة.... يحدق بها..... ينقرها في كتفها....)
- (تنظر إليه.....)
- أنا..... (ينظر للأسفل....) أنا بجد آسف على اللي عملته إمبراح....
- (تنفت دخانها... تُحرك رأسها بالإيجاب.....)
- (بيتسم لها.... يقف مغادرًا.... يشير للحافظة الحرارية السوداء.....
- ثم يغادر.....)
- تمسك بالحافظة الحرارية الجديدة.... تتهدد.... لتعيد تشغيل
- الموسيقى....

ويمضي الليل.....

الساعة الآن.... الرابعة فجرًا.... هاتفها ما زال في وضع "الطيران"....
تجلس على سريرها... تحدق بالهاتف.... هل تقوم بتشغيله؟!... هل
تقوم بإزالة وضع الطيران؟!... لحظات تردد.. ولكن..... لا.... لا شيء
تنتظره.... تقوم بغلق الأنوار.... لتنام.....

الساعة الآن..... الثامنة مساء.... تقوم بإعداد قهوتها... لتضعها
في حافظتها الحرارية الجديدة التي أهداها إياها ذلك الغريب
المتغطرس.... ترتدي ثيابها الثقيلة.... لتتجه كما هي العادة إلى
البحر..... الطقس بارد.... والقمر غائب.... ولكن السماء مرصعة
بالنجوم.... آلاف النجوم التي تنير شاطئ البحر بأكمله.... تقوم
بالاستلقاء على الرمال.... تحدق بالسماء.... مشهد رائع.... السماء
جميلة بالفعل....

الساعة الآن... الثانية عشرة بعد منتصف الليل....

”دخان سجائر“!!؟..... إنه ذلك المتغطرس..... تلتفت إليه.....
بيتسم لها... تعتدل في جلستها...

- (يشير للحافظة الحرارية.....) عجبك؟!!

- (تحرك رأسها بالإيجاب.....)

- (يمسك بالحافظة....) قهوة؟!!

- (تحرك رأسها بالإيجاب.....)

- (بيتسم لها.....) ممكن أشرب؟!!

- (تحرك يدها باللامبالاة.....)

- (يقوم بفتح غطاء الحافظة مبتسما....) الله يكرمك....

- (تنظر إلى البحر.... تقوم بإشعال سيجارة.....)

- (يعتدل في جلسته... ليجلس بجوارها تمامًا.....)

- (تنظر له شذرا.....)

- (يقوم برفع يديه إلى الأعلى...) No touch ... No touch

- (تنفث دخانها بكثافة... إلى الأمام.....)

نصف ساعة.... فالساعة... يجلس بجوارها.... دون حديث... يقوم

بتدخين السجائر... واحتساء قهوتها..... ثم...

- (بيتسم....) طيب... بما أنك غالبا خرسة... أو عاملة نفسك

خرسة... مش عارف يعني... أنا هستغل الموقف ده....

وأفضضلك شوية.....

- (لا إجابة.... تحدق بالبحر.... تنفث دخانها)

- (بيتسم لها....) هايل....

- (لا إجابة....)



- (لحظات صمت..... يتنهد....) أنا بقى يا ستي... خمورجي....
ونسوانجي.... مش نسوانجي بتاع بنات وكده... لا لا... أنا
نسوانجي بتاع علاقات غير مشروعة... كتير بقى... (لحظات
صمت... نبرة خافتة....) كتير لدرجة تئرف... (يتنهد بعمق....
نبرة حزن....) بس... مفيش حاجة تانية مفيدة ممكن
أقولها لك.... مليش أي انجازات في الحياة... حيوان....
- (تنظر إليه....)

- (بيتسم لها بألم... يحرك رأسه بالإيجاب....) حيوان... أقذر
إنسان ممكن تقابليه في حياتك...

- (تمزقه بنظرات غريبة... ثم تنظر إلى البحر....)

- لا.... متبصليش كده.... أنا حاولت... حاولت والله... حاولت
أتغير... حاولت أتعالج... بس..... (يتنهد....) مفيش
فايدة....

- (تنظر له.... نصف ابتسامة....)

- (يحدق بعينيها....) متبصليش كده..... أنا....

تنهد "تمارا" بعنف.... ثم تلتقط حافظتها الحرارية.... لتتركه
وحيداً.... لتتجه إلى "الشاليه"....

آخر ما قد تحتاج إليه الآن... هو بكاء ذلك المتغطرس على
الأطلال.... تقوم بإعداد "فنجان قهوة".... تتجه إلى شرفة "الشاليه"....
لتراه ما زال ينتظر أمام البحر... حيثما تركته.... تقوم بإغلاق أنوار
الشاليه.... تحتسي قهوتها في الشرفة.... ساعة... ونصف الساعة....
لم يعد في مرمى نظرها.... اختفى تماماً.... "تبتسم".... لعله ليس
بأدمي.... لعله "جني" أو ما شابه.... وسيم ذلك الـ..... الشيء....

وسيم للغاية..... كهذا كانت تتمم بابتسامة لؤم..... قبل أن تخلد
إلى النوم.....

الساعة الآن.....

كم هي الساعة الآن؟!..... تتفقد هاتفها... ها هو... ولكنه لا
يعمل... قد فرغ من الشحن... تتأفف... ثم تلقيه بعيدا على
السرير.....

كم هي الساعة الآن؟!..... تقف أمام باب "الشاليه".... إنه الليل...
رهما هي الساعة مساء... ربما أكثر... ربما أقل..... لم تكثرث حقا
لإعادة شحن هاتفها... تتجه لإعداد قهوتها... لتضعها في حافظتها
الحرارية السوداء..... تضع سجائرها في جيبها الخلفي... ثم تتجه إلى
البحر.....

ساعة... فالثانية... فالثالثة.....

أين هو ذلك الأحمق؟!..... أين دخان سجائره؟! لم يظهر بعد...
ولماذا يخطر على بالها من الأساس؟!..... أتفتقد وجوده؟! أم أنها
تحن لضجيج البشر؟! لا... بالطبع لا..... هكذا كانت تفكر.....

ساعة... فنصف الساعة... ها هي تعاود الكرة... تفكر بذلك
الغريب المتغطرس من جديد... ما الذي يدفعها إلى ذلك؟! أهو
الإحساس بالذنب تجاهه... ولم لا؟! فقد كانت قاسية جدا معه ليلة
أمس...

الشمس تشرق... والغريب لم يأت بعد... والنوم سلطان يا
"تمارا"...

تعود لك "شاليه".... تقوم بوضع هاتفها ليتم إعادة شحنه...
تلقي بجسدها على السرير... لتستسلم بعد مرور دقائق للنوم.....

الساعة الآن..... التاسعة مساء....

وهاهي ذي أمام شاطئ البحر.... تمسك بحافظتها الحرارية... وفي يدها اليمنى سيجارة Merrit تدخنها بشراهة.... تلتفت يمينا ويساراً..... أين هو ذلك الأحمق بحق الجحيم؟! ولم لا زلتى تبحثين عنه يا "تمارا"!!

ساعة... فالثالثة.... فالخامسة.... ويمضي الليل.... ولم يأت الغريب....

ثلاث ليال على هذا الحال.... ثلاث ليال.... تنتظر فيها غريباً... لا تعرف عنه سوى أنه "حيوان" كما قام بوصف ذاته..... أي نوع من البشر قد يصف نفسه بذلك على أي حال؟!.... هكذا كانت تتمم..... "النوع الصادق" يا "تمارا"..... هكذا قد أجابت بابتسامة.... النوع الصادق يا تمارا....

الليلة الرابعة..... الساعة الآن... الواحدة بعد منتصف الليل.... تقف "تمارا" أمام البحر.... تعود لنوبات البكاء.... والضحك.... لنوبات الجنون..... الكثير من الوحدة.... الكثير من الضياع... لا شيء ينصف ابن آدم في لحظات كهذه.... قمة الضجر.... حتى إنك في منتصف الحياة.... تملك كل شيء.... وما بات شيء يعينك.... لا شيء....

"دخان سجائر"..... تلتفت يمينا.... لتجده هناك.... يتسم للبحر.... يدخلن سيجارته بكبرياء.... بتعال.... يضع يده في جيب بنطاله..... تقف متمسرة للحظات.... قلبها ينبض.... تقف... لتتجه نحوه بثلاث خطوات بطيئة ثابتة.... تقف أمامه.... تحددق به.... طويل القامة... ووسيم... مغرور... متعال....

- (يتسم لها.... ينفث دخانه في وجهها....) إيه؟!!!

- (تحددق به.... دون إجابة....)

- (يقوم برمي سيجارته.... يتنهد....) آه.. نسيت إنك.... (ثم
يبتعد....)
- (تمسك يده.....)
- (يقف... لبيتسم لها....)
- (تفلت يده.... تشير للحافظة الحرارية....)
- (مبتسمًا....) قهوة!؟
- (تحرك رأسها مبتسمة بالإيجاب..... تجلس على الرمال....)
- (يجلس بجوارها....)
- (تنهد.... تناوله الحافظة الحرارية....)
- (بيتسم ابتسامة عريضة.....) لو سبتيني ومشيتي تاني.... هعمل
معاكي السليمة... تمام!؟
- (تبتسم بخجل.... تحرك رأسها بالإيجاب....)
- (يحرك رأسه بالإيجاب.... لحظات صمت....) أنتي مؤمنة!؟
- (تحقق بعينه.... تخفض رأسها....)
- (بيتسم....) يبقى مؤمنة..... (نصف دقيقة....) أنا كمان.... أنا
كمان مؤمن.... عمري ما شكيت في وجوده لحظة.... رغم كل
حاجة مريت بيها في حياتي.... أنا بس.... (بيتسم... لينظر إليها
بحنان....) أنا بس زعلان منه..... مش عارف بتقال إزاي.... أنا
مش متدين أوي يعني.... (بيتسم ابتسامة عريضة.....) حلوة
متدين دي..... (يتنهد....) مش عارف.... (يبعد نظره) أنا بقلك
الي أنا حاسه وخلص..... أنا زعلان منه.... حاسس إنه سايني
لوحدي.... حاسس إنه كارهني.... غضبان عليه..... ومش عاوز
يساعدني....



- (تنظر له بحزن.....)
- (يبتسم....) إيه البصة دي؟! أنتي فاهمة حاجة أصلاً؟!
- (تحرك رأسها بالإيجاب مبتسمة.....)
- (يرتشف قليلا من القهوة من الحافظة....) والله ولا أنتي فاهمة حاجة أساسًا.... وعماله تهزيلي في راسك وخلص.....
- (تبتسم ابتسامة عريضة....)
- (يحدق به.... لحظات صمت) على فكرة أنا مش وحش أوي زي ما أنا وصلتك المرة اللي فاتت..... يعني.... (يحرك كتفيه باللامبالاة.....) بيتهياي... إني لو وحش أوي كده... مكنتش حسيت بالذنب... مكنتش بقيت أرفان من نفسي أوي كده... مكنتش حاولت أغير من نفسي... مكنتش حاولت إني أتعالج سنين عند دكاترة نفسيين..... مكنتش خفت منه.... (يبتسم... بعينين دامعتين.....) عارفة... أنا بخاف منه أوي..... بخاف... وبتكسف.... بتكسف منه....
- (تتنهد بعمق..... ثم تنظر إلى السماء.....)
- أنا بقالي هنا حوالي شهر ونص.... قافل تلفوني... ومنفصل عن العالم كله.... قاطع نسوان... والخمرة.... يعني.... تفاريح كده.... (يبتسم ابتسامة عريضة...) مش تفاريح أوي يعني... بس..... (يتنهد.....) بحاول..... (يحرك رأسه بالإيجاب.....) بحاول....
- (تحرك رأسها بالإيجاب.... تبتسم له....)
- عارفه اسمك إيه أنتي....
- (تبتسم ابتسامة عريضة.....)

- من الحاجات المرعبة اللي اكتشفتها في قعدتي هنا لوحدي الفترة دي..... إن.... مفيش حد وحشني..... تخيلي..... ولا... أي... حد..... يعني اللمة اللي حواليه دي كلها... ولا ليها أي ثلاثة لازمة.... مفيش غير أبويا... وبحاول أطمئه عليا كل يومين ثلاثة كده... الباقي بقى... أقسم بالله ولا فارقين معايا بالجزمة..... حتى بنت الـ..... (بيتسم ابتسامة عريضة... لحظات صمت)... حتى هيه... اللي كنت متخيل إني متعلق بيها بشكل أو بآخر... لما قعدت وفكرت... وحسيت..... لا... فعلا مش فارقة معايا... ومش عاوزها... تخيلي لما حياتك كلها تبقى وهم... شوية قصص عايش فيهم بشكل يومي... شوية ناس فاكرة إنهم فارقين معاك... فاكرا إنهم غير..... غير كل الناس... يطلعوا في الآخر وهم... حواديت أنت اخترعتها... عشان يبقى ليك حياة..... (بيتسم ابتسامة عريضة....) إيه السخافة دي.....
- (تحقق به... تستمع له بتركيز شديد.....)
- أنتي مين يا ست أنتي؟! إوعي تكوني عيفريت؟!!
- (بتتسم ابتسامة عريضة..... تنظر إلى البحر....)
- (يشعل سيجارة.... يهمس....) واللا عيفريت..... (ينفث دخانه) مش هتفرق....
- (تنكزه بإصبعها في منتصف جبهته....)
- (بيتسم....) فل.. يعني مش عيفريت... كده مضطر أقتلك وأتاويكي في أي حته في الهو اللي إحنا فيه ده.....
- (تحرك يدها باللامبالاة.....)

- (لحظات صمت....) أحلى حاجة في إنك خرسة (بيتسم...) أو عاملة نفسك خرسة... إني مش مضطر أسمع عبر ومواعظ وأرف من الي أنا بسمعه من كل من هب ودب....
- (ترتشف قهوتها....)
- (بيتسم.... يحدق بها بحنان....) عندي شوية فضول... إني أعرف قصتك....
- (تخفض رأسها....)
- اسمك على الأقل....
- (ترفع رأسها.... تحرك كتفها باللامبالاة....)
- (يحدق بها.... يحرك رأسه بالإيجاب....)
- (تتنهد.... تشير إلى معصمها....)
- (بيتسم...) عاوزه تقومي...!؟
- (تحرك رأسها بخجل مبتسمة....)
- (ابتسامة عريضة....) طب ما تقومي!!!
- (تضربه برفق في صدره مبتسمة... وتقف لتغادر... لتتجه إلى الشاليه....)
- (على بعد خطوات يقوم بمناداتها....) أنتي يا بت يا عيفريته...!
- (تلتفت له....)
- (يمسك بالحافضة الحرارية... يرفعها للأعلى....) بالنسبة!؟
- (تعود أدراجها إليه بابتسامة... تمسك بالحافضة....)
- (يمازحها....) لا... مش هينفع كده... تحافظي على حاجتي لو سمحتي....

- (تقوم باحتضان الحافظة الحرارية... وتوجه إلى الشاليه....)

الساعة الآن.... الثالثة صباحا....

ولكنها.... لم تستطع النوم..... لا بد أنها احتست الكثير من القهوة
اليوم....

القهوة يا "مارا"؟!.... أم أنه ذلك الغريب؟!..... هكذا كانت
تفكر.....

تقرر الاتجاه إلى شرفة الشاليه.... لا يزال هناك.... لا يزال ذلك
الغريب هناك.... يقف بلا حراك..... يحدق... تارة بالبحر... وتارة...
يرفع عينيه للسماء....

تقوم بإعداد حافظتها الحرارية.... لتملأها بالشوكولا الساخنة....
وتقرر الانضمام إليه من جديد..... تتجه نحوه.... تقف خلفه....
تنكزه في كتفه.... يلتفت إليها.....

- (يبتسم....) متخمدتيش ليه عيفرته....

- (تناوله الحافظة الحرارية... تبتسم... تحرك كتفها باللامبالاة....)

- (يمسك بالحافظة...) يادي أم الزمزية اللي محيراكي.... هاتي....

- (تقف بجواره.... تحدق بالبحر.... ترتعش.....)

- (بصوت حنون....) بردانة؟!!

- (تحرك رأسها بالإيجاب....)

- (يبتسم ابتسامة عريضة....) أحسن....

- (تبتسم هي الأخرى ابتسامة عريضة....)

- (لحظات صمت....) عارفة... أنا بقالي أربعة أيام مشربتش.....

- (تجحظ بعينها مبتسمة... تربت على كتفه بحنان....)



- (يبتسم...) آه والله....
- (تتنهد... ترفع حاجبيها... تشير للحافظة الحرارية.....)
- (يحرك يديه بالاستغراب.....) مالها؟!)
- (تقوم بفتحها... تشير إلى ما بداخلها...)
- (يرتشف منها... يبتسم.....) شوف... وأنا اللي فاكرك جاييالي
- wine واللا ويسكي... ولا أي زفت على دماغك...!!!
- (تضربه برفق على صدره... تمازحه...)
- بنت !! no Touch
- (تبتسم... ثم تحدق بالبحر.....)
- (دقائق صمت... يقوم بإشعال سيجارة... وإنهائها... ثم....)
- طيب... أنا هرجع الشاليه بقى....
- (تنظر له بحزن..... تحرك رأسها بالنفي....)
- عاوز أنام عيفريته!!!
- (تخفض رأسها.....)
- (يتنهد...) أشوفك بكرة..... (ثم يغادر... ليتركها وحيدة على الشاطئ....)
- (تقف... تحدق بالبحر... دقائق... تتساقط دموعها... تشعر
- بوحدة كبيرة... بحزن لا معنى له... ولا مبرر... تشعر بأنها
- ضعيفة... وهشة....)
- دقائق أخرى..... عشر دقائق... ليعود الغريب... ينكزها في كتفها....
- (مبتسما...) عيفريته.....

- (تلتفت إليه... تقوم باحتضانه بقوة.... تتشبث بذراعيه كأنه آخر آدمي على سطح المعمورة...)
- (يدفعها برفق...) لا... لا... لا... بنت.. بنت.... no Touch
- (تبدأ بالبكاء... ما زالت تتشبث بذراعيه...)
- (يعقد حاجبيه... يقوم باحتضانها برفق.....) طب... خلاص....
- (تزيد من بكائها... بكاؤها يشبه بكاء الأطفال....)
- (يتنهد... يربت عليها بحنان...)
- (تبكي... وتبكي.....)
- (ما زال يحتضنها.... برفق...) يا بنتي خافي مني... أنا مدمن علاقات غير شرعية بقلك....
- (تبتسم وسط بكائها... تقوم بضربه على ظهره برفق.... مرتين....)
- (يدفعها برفق..... يبتسم لها... يحدق بها....)
- (تقوم باحتضانه مرة أخرى.... تتشبث به بقوة...)
- (يدفعها مجددا.... برفق تام....) بس....
- (تقوم باحتضانه بقوة.... تبكي مرة أخرى....)
- (يقوم باحتضانها بقوة هذه المرة... يضمها بقوة بين ذراعيه...)
- (تتشبث بذراعيه... تهمس له.... بيبكاء) مخنوقة....
- (يتركها برفق.... يحدق بها...)
- (تبتسم باكية....) عيفريته مخنوقة....
- (يمسك بيدها... يجلس على الشاطئ... تجلس بجواره....)
- (تضع رأسها على كتفه.... لحظات صمت... نبرة أكثر هدوءا...)
- أنا مش خايفة منك....

- (ينظر لها مبتسماً....)
- (تدفس رأسها في صدره.... تغمض عينيها....)
- (يضمها بحنان..... يغمض عينيه هو الآخر....)
- تنام بين ذراعيه في أمان تام....
- الساعة الآن..... الثامنة صباحاً....
- تستيقظ بين ذراعيه.... لتجده يحرق بها مبتسماً....
- صباح الخير عيفرته....
- (تدفس رأسها في صدره خجلاً....)
- (يتنهد.....)
- (دقائق صمت.....)
- (يبتسم لها.....) يلاً...!؟
- (تحرك رأسها بالإيجاب.....)
- يتجه كل منهما إلى "الشاليه" الخاص به....
- تقوم "تمارا" بالاستحمام..... تعد فجانا من القهوة.... تتجه إلى الشرفة.... تبتسم.... إنه "النهار".... ذلك الذي كانت تحاول تفاديته منذ أول يوم لها هنا في المنتجع.... اليوم... يبدو النهار مساملاً للغاية... هادئاً.... ومفعماً بالحياة..... بالحب....
- الساعة الآن..... الواحدة ظهراً....

تقوم بارتداء فستان من الصوف زهري طويل.... ذي أكمام... يبرز جمال عنقها.... تضع قليلاً من المساحيق.... ونفحة عطر olompia.... تقف أمام المرأة.... تتنهد.... تبتسم.... ثم تتجه إلى الشاليه الخاص بذلك الغريب.... تقف أمام بابه الزجاجي.... تطرق الباب.... يبتسم

لها.... يدعوها للدخول..... تتفاجأ بحقيقية بجانب الباب..... تنظر إليه
باستغراب....

- أنت..... أنت ماشي؟!!
- (بيتسم لها.... يمسك بيدها.... يدعوها إلى الجلوس.....)
- (تتسارع نبضات قلبها.....) أنت... ماشي?!!
- (يحرك رأسه بالإيجاب.....)
- (تخفض رأسها.....)
- (بيتسم... يقوم برفع رأسها.....)
- (تبعد نظرها.... تحرك رأسها بالرفض.....)
- (يتنهد.....)
- (لحظات صمت.....)
- عاملة إليه النهاردة?!!
- (تبتسم.... نصف ابتسامة....) كنت مبسوفة..... مبسوفة أوي....
- وإيه كمان?!!
- (تحرك رأسها بالنفي مع ابتسامة هادئة....) يعني إيه..?!!
- (يمسك يدها بحنان.....) أنا معرفش عنك حاجة.... قوليلي....
أي حاجة....
- (تقترب منه قليلا...) قولي أنت..... عاوز تعرف إيه ... وأنا أقلك....
- (يخفض رأسه.... نصف دقيقة صمت... يتنهد.... بيتسم لها....)
ولا أي حاجة....
- (تجلس على الأرض... تمسك بيده بقوة....) لا.. أنا ممكن
أقلك.... (نبرة باكية....) ممكن أقلك إني قبل ما أشوفك... قبل

ما أقابلك.... كان بيني وبين الموت خطوة.... القرار كان موجود...
والمسألة كانت مسألة وقت مش أكثر.... أنا معرفش أنت
مين... أنا معرفش حتى اسمك إيه... ديانتك إيه.... معرفش...
ومش فارق معايا أعرف.... (تبكي....) واللله العظيم ما فارق
معايا..... أنا..... أنا بس عاوزه أبقى معاك.....

- (بيتسم لها.... يمسخ دموعها....) اسمك إيه!؟

- (تبتسم باكية....) تمارا....

- (يحدق بها.... لحظات صمت.....) الله.....

- (تميل برأسها على كف يده....)

- (بيتسم بألم....) تمارا....

- (تحرك رأسها بالنفي..... نبرة باكية) لالا.... لالا....

- (ما زال يبتسم....) اسمعيني.... لازم تسمعيني....

- (تبكي....) لالا....

- (يجلس على الأرض... أمامها.... يمسك يدها بقوة....) أنا كنت

بحكيلك... إن حياتي كلها... في يوم وليلة... طلعت وهم... الناس

الي أنا بقالي سنين معاهم... وعارف تفاصيل حياتهم بالميلي....

طلعوا وهم.... الكام ساعة الي قضتهم معاي... يسووا عمري

الي فات كله يا تمارا..... دول أصدق لحظات حياتي....

- (تبكي....) خليك.... خلاص... خليك....

- اسمعيني..... اسمعيني حبيبي..... أنا مش سوي.... أنا إنسان

مريض....

- (تضع يدها على وجهه....) هداويك.... هنداوي بعض....

- (يمسك بيدها على وجهه.... يتنهد.... يحرك رأسه بالنفي....)

- (تساقط دموعها....) إديني فرصة.....
- (ينظر باشمئزاز....) هتكرهيني..... هتأرني مني.... أنا مؤرف يا
تمارا... أنا حيوان...!!
- (تبتسم... تساقط دموعها....) اللي نمت في حضنه إمبراح... وأنا
حاسة بكل أمان الدنيا... مكنش حيوان..... أنا عشت سنين....
سنين..... بحلم بالإحساس ده..... (تبكي...) أنا معايا فلوس.....
فلوس كثير..... وعندى بدل العريية اتنين... وبدل الصحة...
عشرة... عندي شغل..... عندي..... عندي كل حاجة.....
ومكنتش مبسوفة... ولا مرتاحة... مكنش عايشة... أنا
معرفش أنت مين... ومش فاهمة الإحساس اللي أنا حساه...
بس أنا عاوزاك... بأرفك... مرضك..... بكل حاجة فيك.....
عاوزاك..... (تبكي...) عاوزاك.....
- (يتنهد.....) إهدي.....
- (تبكي...) عاوزاك.....
- (يحرك رأسه بالإيجاب...) إهدي.....
- (تنظر إلى حقييته بجوار الباب.....)
- (ينظر بدوره إلى الحقيبة.....) متخافيش.....
- (تحرك رأسها بالنفي سريعًا...) لا هخاف..... لا هخاف... أنا أول
مرة أحس بالخوف... أول مرة أحس إن عاوزه حاجة بجد.....
(تبكي...) قلبي واجعني... واجعني أوي....
- (يبتسم لها بعينين دامعتين.....)
- (باكية...) نحاول؟!..
- (يحرك رأسه بالنفي.....)

- (تبتسم... تحرك رأسها بالإيجاب... باكية....) نحاول!!!!!!
- (يحرك رأسه بالنفي سريعًا.... تتساقط دموعه بقوة....)
- (تقترب منه أكثر فأكثر....) نحاول!!!!! نحاول!!!!!
- (ما زال يحرك رأسه بالنفي....)
- (تقبله من ثغره.... من جبهته... تقبل كفي يديه....) نحاول!!!!!
- (ينهار بالبكاء أمامها... يضع رأسه بين أحضانها.... يبكي....)
- (تضع رأسها فوق رأسه.....)
- (دقائق.... ليرفع رأسه.... ينظر إليها....) ليه؟! ليه?!!
- (تبتسم له..... تتساقط دموعها....) لما كنت بدعي... كنت بقوله... لو مش عاوز تاخدني... إديني سبب أعيش عشانه.... أعيش بجد.... عاوزني لما ألقى السبب.... بعد كل السنين دي.... أسيبه وأمشي.... تخيل كنت قد إيه متمسكة بفكرة الموت... دلوقتي.... تخيل قد إيه ممكن أتمسك بفكرة الحياة.....
- (يقوم بدفعها بقوة إلى صدره.... يهمس لها....) نحاول.....
- غريبة تلك الحياة.... غريبة تستحق الانتظار.... تستحق الإيمان.... تستحق الحياة....

لأنها مُهرة

”عندك مشكلة؟“....

بابتسامةٍ.... ”عندك مشكلة؟“... مُكرراً لـ ”مهرة“....

- (تُحرك رأسها بالنفي بعينين لامعتين....)
- (يضع يده على كتفها بحنان مبتسماً....)
- (يُحدق بها... ما زال يضع يده على كتفها....) لو اضايقتي في أي وقت.... قوليلي.... هنمشي على طول....
- (تبتسم له... تربت على يده الحنون.....)

نصف ساعة... وقد اكتمل عدد الحضور.... خمسة عشر فرداً على طاولةٍ كبيرةٍ في أحد فنادق القاهرة الفاخرة.... طلة كلاسيكية رائعة للجميع.... يبدو أن الجميع قد قام بمجهودٍ لا بأس به من أجل هذه المناسبة.... وكيف لا؟! فهو عيد ميلاد ”زيد“ السادس والثلاثين.... الجميع بلا استثناء يكن له الكثير من مشاعر المحبة والاحترام.... فهو صديقٌ رائع.... ذو سمعة طيبة... خدوم... لا يتردد في مساعدة أحدهم.....

- (ينحني زياد ليهمس في أذن ”مهرة“) شكله مش هيبجي...

- (تُحرك كتفها باللامبالاة دون أن تنظر إليه)

- طب يلا بينا!!

- (تبتسم.. تُغادر مقعدها لتتجه إلى طاولةٍ أخرى حيث قالب الحلوى الكبير... حيث الجميع يقف في انتظار "زياد".....)

القليل من العتمة في زاوية المطعم... يقوم النادل بإشعال شموع عيد الميلاد... ليبدأ الجميع في الغناء والتصفيق... وزياد... ابن السادسة والثلاثين... ترتسم على وجهه ملامح الخجل... يُحاول تفادي التقاء عينيه بأصدقائه... يكفي بالابتسامة والتصفيق..... تُجاوره "مهرة".... تبتسم له.... وتضع يديها على كتفه.... يهمس لها... "نسيت أهلك... شكلك حلو أوي النهاردة...." وها هو ذو يطفئ الشمع....

- (تهمس له مهرة....) make a wish....

- (يُحرك رأسه بالإيجاب... دون أن ينظر إليها... ثم يقوم بإطفاء الشمع)

تصفيقٌ حار... والجميع يتسابق لاحتضانه.... ومن بين الجموع... يطل "عمران".... يحتضنه بقوة... يتفاجأ الآخر بقدمه.... ليبادل السلام بحرارة....

- كنت فاكِر إنك مش جاي.....!!

- (مبتسمًا ابتسامةً عريضةً....) الطريق يا ابني!!!

هنا... يلتفت "عمران" لوجود "مهرة" بجانب "زياد"... تُدير وجهها في الاتجاه الآخر.... يُحدق بها لثوانٍ.... ثم....

- مهرة....

- (تلتفت له.....)

- (تلتقي الأعين.... يمد يده للسلام.....)



- (ثوان... ثم تمد يدها هي الأخرى للسلام.....)

صمّتُ غريبٌ... وزياد... في ترقب تام لهذا الصمت... يُقاطعه التفاف أيدي نسائية حول خصر "عمران"... تقف بجواره... فتاة في أوائل العشرينيات... شعرها أسود طويل مكثف بوصلات شعر مستعارة... حنطية البشرة... متوسطة الطول... خصر دقيق... لافتة جدا باكتناز جزئها السفلي... والكثير من مساحيق التجميل.....

- (تمد يدها للسلام..... بابتسامة...) كل سنة وأنتي طيب يا زياد...

- (يبتسم لها..... يمد يده هو الآخر...) وأنتي طيبة...

- (يشير "عمران" إليها..... بابتسامة حب) سوزانا..... خطيبتني.....

هنا... تربت "مهرة" على كتف "زياد" بحنان... تهمس له... صوتها مرتجفٌ... "أنا هناك"... يُحرك رأسه بالإيجاب..... يربت على يدها بحنان..... لتبتعد مغادرة إلى الطاولة حيث الجميع.....

دقائق من المسامرة بين زياد وعمران... وسوزانا ما زالت تُحيط خصره بيده... وتضع يدها على صدره كل حين وآخر... ويضم يدها هو الآخر... يختلس نظراتٍ سريعةً نحو "مهرة" التي تجلس وحيدة... تتفقد هاتفها... وتكتفي بالابتسامة للحضور كلما وقع نظرها على أحدهم..... يتجه بعدها "زياد" و"عمران" و"سوزانا" إلى الطاولة..... يجلس "زياد" بجوار "مهرة"... يقابلهما "عمران" و"سوزانا".....

- (تبتسم "مهرة" لـ "زياد"... الهدايا دي نص بالنص... فاهم...

- (يُحدق بها... يبتسم... دون إجابة...)

- (تعقد حاجبيها... مبتسمة... مالك!؟)

- (يتنهد.....) مفيش.....

- (تبتسم له...) مبسوط طيب؟!
- (يُحرك رأسه بالإيجاب مبتسمًا.....) مبسوط.....
- (يُقاطع "عمران" حديثهما.....) عامل إيه في شغلك؟!
- (يلتفت إليه.....) شغل إيه؟!
- الشركة!!?
- (صمت قليل....) أنا سبت الشركة من ثلاثة شهور يا ابني....
- وبفتح شركة خاصة بيا دلوقتي.....
- (يجحظ بعينه مبتسمًا.....) إيه ده؟! هايل والله!! مقولتليش
- ليه؟!
- (يُشعل سيجارة.....) وأنت فاضي ولا بتسأل حتى؟! طب ما أنت
- خطبت ومحدث فينا عرف!!
- (ينظر لمهرة خلسة... ثم لسوزانا بحب....) يا عم هيه جت
- كده... في السريع....
- (يُقاطععه....) سريع بقى ولا بطيء... المهم يعني إن محدش يعرف
- عنك حاجة من ساعة ما سافرت.... (ينفث دخانه... ابتسامة
- عريضة) عادي بقى... طول عمرك معروف بندالتك.....
- (يشعل سيجارة هو الآخر.....) والله يا ابني ولا ندالة ولا حاجة...
- بس فعلا العيشة في دبي حاجة تانية... مبتحسش باليوم هناك...
- الناس هناك عمليين فوق ما تتخيل... رتم الحياة سريع
- جدا..... المهم... فكك... الشركة دي بتاعتك لوحدك واللا معاك
- شريك؟!
- (يبتسم....) لا معايا....
- (ينفث دخانه.....) مين؟!

- (ينظر لـ"مهرة".....) مهرة.... مهرة شريكتي....
- (تلتفت إليه... بعد أن كانت تعبت بهاتفها طوال مدة حديثهما.... تبتسم له....)
- (ينفث دخانه بكثافة..... يبتسم برود....) هائل....
- (تنظر إليه.... نصف ابتسامة... تُحرك رأسها بالنفي ثم تنظر إلى هاتفها مجددًا....)
- (هنا توجه سوزانا حديثها لمهرة....) أنتي بتشتغلي إيه يا مهرة!?
- (دون أن تنظر إليها.... ما زالت تعبت بهاتفها) مهندسة ديكور يا فندم....
- (هنا تنظر إليها سوزانا بغضبٍ... لكنها تعجز عن الرد... توجه نظراتها لعمران)
- (يتجاهلها عمران ليووجه سؤاله لمهرة.... بابتسامة) اتجوزتي!?
- (نصف ابتسامة.... تنظر إليه... ثم تنظر إلى هاتفها....) لا يا حبيبي متجوزتش....
- (هنا تستطرد سوزانا كلامها بسؤال... بنبرة لؤم....) إيه ده فعلا؟! بس أنتي شكلك كبير.... أنتي كام سنة!?!
- (تبتسم ابتسامة عريضة..... تتجاهلها تمامًا.... لا إجابة)
- (يُحذق زياد بـ"مهرة" ... يعلم أن خلف هذه الابتسامة... ألم لا يُحتمل.... ثم يوجه حديثه لـ"سوزانا".....) أنتي كام سنة يا سوزانا!?
- (تبتسم له.... بفخر...) أنا؟! لا، أنا ثلاثة وعشرون سنة....
- (ينظر لصديقه "عمران" ... يغمز له.... بصوتٍ منخفضٍ...) صغيرة أوي عليك..

- (ينفث عمران دخانه.....) وأنت مش ناوي تتجوز؟!
- (يجيبه زياد....) حالياً... مش ناوي... لما ربك يكرم وألاقي بنت الحلال...

- (يُحرك رأسه بالإيجاب... ثم يُوجه نظره إلى "مهرة".... ولكن حديثه ما زال موجهًا لـ "زياد"....) طب خليك في الصغير... حلو الصغير.... دلح وفرفشة... ويمين يمين... شمال شمال.... هتريحك.... متاخدش واحدة كاسرة الثلاثة والثلاثين..... (نصف ابتسامة....) راحت عليها خلاص.....

- (هنا... يسود الصمت... تحدق به "مهرة" بقوة.... يُحدق بها هو الآخر.... ينفث دخانه في صمت تام.... ما زال يُحدق بها... وكأن الطاولة لا يجلس عليها سواهما.... تُحدق به.... ألم لا يحتمل في صدرها.... تتساقط دموع عينيها... ما زال تحدق به.... يرى دموع عينيها.... فيقبض على يده اليمنى بقوة.... تلمع عيناه.... تتساقط دموع عينيها بقوة أكبر.... دون بكاء.... ما زالت تُحدق به.... الجميع الآن ينظر إليهما.... كل أفراد الطاولة.... الكل يشير لمسامره بأن ينظر.... بأن يستقطع حديثه وينظر.... صمت تام.... تُحدق به.... وقد أوشكت على الانفجار.... ما في صدرها لا يُحتمل.... تحمل حقيبتها... وتُسارع مغادرة....

يعض "زياد" بغضبٍ على شفثيه... يرمق "عمران" بنظرات احتقار عنيفة.... ما زال "عمران" يقبض على يده بقوة.... عيناه لامعتان... يُحدق بكرسي "مهرة" الفارغ... ثوانٍ ليهمّ بالمغادرة... مُمسك "سوزانا" معصمه بقوة... (رايح فين...!!?).... يفلت يدها بلامبالاة.... (ابعدي....).... ثم ينطلق مغادراً خارج الفندق.... يُحاول اللحاق بـ "مهرة".... ينظر يمينا... ويساراً.... أمام المبنى.... أين اختفت؟!...

يلمحها بعيداً تمشي بخطواتٍ سريعةٍ بين الأشجار..... يلحق بها....
يُهرول.... ويُهرول..... "مهرة"..... "مهرة".... يُناديها.... تزيد من سرعة
خطواتها.... يزيد من سرعة هرولته هو الآخر..... يصل إليها.... يضع
يده على كتفها... تُفلت يده بقوةٍ.... يُمسك بيدها بقوةٍ..... تُدير
وجهها إليه.... تدفعه بقوةٍ في صدره.....

- (باكية.....) راحت عليا؟!..... بعد ما أخذت عمري وسنيني...
دلوقتي راحت عليا?! (يزداد بكاءُها.....) راحت عليا؟! (تضربه
في صدره....) راحت عليا?!!

- (يُمسك يديها بقوةٍ.....)

- (تُحاول التخلص من قبضة يديه دون جدوى..... تبكي بحرارةٍ.....)
عمري الي راح هدر معاك؟! عمري الي اتسرق مني وأنا
جنبك?! (تبكي..... وتبكي....) راحت عليا?!!

- (يضمها لصدره..... بقوةٍ.....)

- (تُحاول دفعه بعيداً.... باكية....) ابعده.....

- (يضمها بقوةٍ أكبر..... يدفس رأسها في صدره.....) هششششش.....

- (تُمسك قميصه بيديها..... تدفس رأسها في صدره... وتبكي....
تهمس له) ابعده.....

- (يُحيطها بكلتا ذراعيه..... يُقبلها بحرارةٍ.....)

- (تتمنع.... ثم تستسلم لقبلته.....)

- (يزيح خصلات شعرها من على وجهها المبلل بالدموع... يُحرق
بعينها.....)

- (ما زالت تتشبث بقميصه..... تُحرق به ودموعها تتساقط.....)

- (يهمس لها.....) بحب.....

- (تضع يدها على فمه مقاطعةً.... تُحرك رأسها بالنفي....) لا....
(ثم تبتعد عنه خطوتين.... ما زالت تُحرك رأسها بالنفي....)
لا.... (تمسح دموعها بيدها مبتسمةً... تبتعد عنه أكثر... فأكثر....)
لا....

- (يقترّب منها بخطواتٍ مماثلةٍ....) مهرة....

- (بنبرةٍ حازمةٍ... تشير بإصبعها....) ابعد!!!

- (يقترّب....)

- (بنبرةٍ أكثر حزمًا.... صوتها يعلو....) قلت... ابعد!!

- (يتسمر مكانه.... يُحدق بها بحزنٍ شديدٍ....)

- (كلمات تبعثرها مع ابتسامة وخطواتها تزداد ابتعادًا....) أنت

اللي راحت عليك.... أنت اللي خسرت حب كبير.... عمره ما

هيبجي تاني.... ارجع للسنيرة.... (ابتسامة عريضة... تُدير معها

وجهها للأمام....) ضعيف.. ومؤرف.. (ثم تكمل طريقها دون أن

تلتفت حتى تختفي عن مرمى نظره....)

دقائق.... يهتز هاتفها الجوال.... إنه "زياد"...

- أنتي كويسة؟!

- (تتنهد.... تبتم....) آه.... جدا....

- بجد؟!

- (لحظات....) بجد....

- أنتي فين؟!

- بتمشى....

- (صمت...)

- زياد... أنا كويسة يا حبيبي.... صدّقني...



- (بيتسم....) مصدقك.....
 - يلا.... روح كَمَل يومك واتبسط... أنا آسفة جدا على الي حصل... هعوضالك والله.....
 - (يتنهد.....) آه فعلا... لازم تعوضهالي....
 - (تبتسم....) أشوفك بكره!!?
 - (بيتسم.....) مينفعش النهاردة!?
 - (صمت قليل....) لاء... خلي النهاردة يعدي بسلام.... وبكره تتقابل... تمام!?
 - (يُحرك رأسه بالإيجاب....) تمام....
 - باي يا حبيبي...
 - مُهرة...
 - (صمت....)
 - أنا.....
 - (صمت....)
 - (يتنهد.....) أنا.....
 - (لا إجابة.....)
 - خلاص خلاص..... مفيش حاجة.... تصبحي على خير.
 - تلاقى الخير....
- ثم تُتهي المكاملة..... وتضع سماعاتها... لتكمل طريقها إلى المنزل سيرًا على الأقدام.... كم كانت بحاجةٍ إلى هذه التمشية.... يبدو عقلها الآن أكثر صفاء... واتزانًا.... الآن هي بحال أفضل.... أفضل بكثير.....

يقف "زياد" أمام زجاج المطعم الذي يطل على النيل... ممسكا بهاتفه... ما زال يُحَدِّقُ به بعد إنهاء مكالمته.... يقطع شروده يد "عمران" على كتفه..... يلتفت إليه....

- كل سنة وأنت طيب يا معلم... أنا آسف على اللي حصل....

- (يُحَدِّقُ به قليلاً.....)

- (يُحَدِّقُ به هو الآخر.... صمت غريب....)

- ممكن تاخذ خطيبتك ومشي بعد إذنك؟! وجودك مبقاش مرغوب فيه هنا....

- (نصف ابتسامة... رأسه منخفض....)

- (يتجاوزة.....) بعد إذنك.....

يُشعل عمران سيجارة.... ينفث دخانها بكثافةٍ.... ليجد "سوزانا" أمامه تضع يدها في خصرها... تُحَدِّقُ به بغضبٍ شديدٍ.... يتجاهلها تمامًا....

- أفهم!!

- (دون أن ينظر إليها.... ينفث دخانه) تفهمي إيه؟!

- إيه الفيلم العربي الحمضان ده؟!

- (بيتسم لها....) يعني بدمتك مفهمتيش؟! ده أنتي لاقطها من ساعة ما شفتيها....

- (نصف ابتسامة...) هيه مين دي اللي أنا لاقطها؟!

- (ما زال بيتسم...) اللي علمت عليكي بذكائها وأخلاقها....

- (تبتسم ابتسامةً عريضةً....) حلو.... كده الكلام على المكشوف....

- (يُحَرِّكُ يده باللامبالاة.. وينفث دخانه....)



- (تقترب منه قليلا....) سبتها ليه؟!
- (صمت قليل.... يُخفض رأسه... صوت منخفض...) عشان غبي....
- (صمت قليل...) وأنا..... أنا إيه؟!
- (ينظر إليها....)
- (تكرر....) أنا إيه؟! أنا إيه يا عمران؟!
- (يُطبق على شفثيه.. يُحرك رأسه بالنفي....) مش عارف... مش عارف أنتي إيه....
- (تدمع عيناها....) بتحبي؟!
- (ينظر إليها بتمعنٍ... في منتصف عينيها... لحظات صمت...) ولا عمري حبيتك..... (يقترب منها أكثر....) وعارف.... عارف كويس أوي... إنك عمرك ما حبتيني....
- (تُحدق به بعينيها اللامعتين....)
- (يتنهد....) أنا عارف يعني إيه واحدة بتحب.... أنا عشت سنين في حزن واحدة بتحب.... (يبتسم....) فعارف.... (يُحرك رأسه بالإيجاب سريعًا....) عارف يعني إيه واحدة بتحب... بتحب بجد... بتحب واحد محلطوش اللضا... واحد يوم صاحي وفايق... ويوم مش داري بنفسه ولا عارف هوه فين.... واحدة مكنش ليها أي طلبات غير إنها تشوفني مبسوط وبخير.... واحدة عنيتها مكنتش بتلمع غير معايا وقصادي.... (يبتسم ابتسامة عريضة....) فصعب... صعب أوي إني أتخدع في واحدة زيك يا سوزانا.... أبقى معاكي مزايجي... بكيفي... بس إنك تقولي لي بحبك وأصدقك.... تـؤ... (يبتسم باستهزاء.... ينفث آخر دخان سيجارته) صعب...
- (تدمع عيناها أكثر....)

- (يلقي بعقب سيجارته أرضاً...) حتى دموعك دي.... مش دموع
وجع.... دي دموع قهرة وحسرة على فرصة ضاعت.... وقت ضاع
كان ممكن تستفيدي بيه مع واحد غيري... أنا بالنسبالك مش
أكثر من فرصة كويسه لجوازه شكلها الاجتماعي هايل.... بس
حب وبتاع... (بتتسم باستهزاء... يبعد نظره عنها....) لا لا لا....
(ينظر إليها....) مفيش الكلام ده.....

- (تبتسم....)

- (يُحرك يده باللامبالاة...) أهو الهبل اشتغل أهو....

- (تتنهد... تُحرك رأسها بالنفي... تتدارك دموعها...) لا والله مش
هبل.... أنا بس شمتانة فيك... شمتانة في وجعك.... أنا فعلا
عمري ما حبيتك.... وعشان كده... أنا مش موجهة... يمكن
مخنوقة شوية لأن كلامك قذر ورخيص وجارح.... بس وجع...
(تُحرك رأسها بالنفي....) لا.... (تبتسم...) بس شمتانة فيك.....
أوي..... أزيدك من الشعر بيت.... صحك اللي واقف هناك
ده..... بيحبها.... بيحبها بجد.... نظرة عنيه ليها.... نظرة راجل
بيحب... بيحب أوي.... وأقلك على حاجة كمان.... هتنسك....
وهتعبه..... هوه هيعرف يخليها تحبه.... تحبه بجد.....

- (يُحدق بها في صمت ممزوج بغضبٍ.... عيناه لامعتان...)

- (تبتسم... تقترب منه كثيراً.... كثيراً...) ودموعك دي.... دموع
وجع.... عشان الحقيقة بتوجع.... بيحبها... (تمرر أصابعها على
شفتيه...) بيحبها... ومحدش فيهم هيعملك أي اعتبار.... (تُحرك
رأسها بالإيجاب مبتسمة... لحظات... ثم تُغادر.....)

دقائق... يتجه بغضبٍ نحو زياد... بين الجموع... يقترب منه...

(عاوزك!!) ثم يسبقه بخطواتٍ بعيداً عن الحضور... يتنهد زياد...

لحظات... ثم يتجه إليه....

- (يُحرك رأسه بالنفي...) نعم؟!!
- (يُشعل سيجارة.... ينفثها بقوةٍ في وجه زياد..... نبرة غاضبة... صوت منخفض) بتحها؟!!
- (نصف ابتسامة...)
- (يُكرر... صوته يعلو....) بتحها?!!!!!
- (ببرود تام...) بموت فيها.... بعشقها.... بتجري في دمي.... (يبتسم) عارف إيه بتجري في دمي?!!
- (صمت قليل....) مفضلش فيها حاجة تديهالك.....
- (ما زال يبتسم...) ملكش فيه....
- أنا أخذت كل حاجة... (يبتسم...) عارف يعني إيه كل حاجة?!!
- (ما زال يبتسم...) آه عارف... وعارف كمان إنك كذاب.... (يتنهد... يُحرك رأسه بالنفي....) أنت عاوز إيه يا عمران?!!
- (ينفث دخانه بقوةٍ في وجهه....) أنت مش راجل يلا؟! معندكش نخوة؟! بقلك أخذت كل حاجة?!!
- (نصف ابتسامة... ينكزه في كتفه) بلاش أنت في حوار الرجولة والنخوة ده.... كلنا عارفين اللي فيها.... (يشير إلى الحضور...)
- كل الناس اللي واقفة دي... عارفه اللي فيها... عارفينك... واللي ميعرفكش... سمع عن وساختك وندالتك... رجولة إيه يا أبو رجولة.... ده أنت عشت سنين... سنين... حاطط إيدك في جيب واحدة.... ويوم ما ربنا كرمك... يوم ما قامتلك قومة.... خلعت... ده أنت أوسكار في الوطيان يا ابني....
- (يخفض رأسه... لحظات صمت... يطبق على شفثيه... تملأ عينيه الدموع)

- (يُدرِك زياد مدى ضعفه الآن.... يتنهد بعمق.... بنبرة مهذبة...)
امشي.... امشي يا عمران..... امشي.... كفاية الخراب اللي
عملته.... كفاياك أذى بقى يا ابن الناس وامشي..... امشي وسيبنا
في حالنا.....

- (تساقط دموعه.... ما زال رأسه منخفضًا...) بحبها... بحبها
وعمري ما حبيت غيرها.....

- (يُحرك رأسه بالنفي....) امشي يا عمران..... امشي معدش ليك
مكان في وسطينا..... امشي.... أنت خذلت الكل..... الكل يا
عمران.... الكل!!

- (يرفع رأسه....) مكنش ينفج.... مكنش ينفج أكمل.... كان لازم
أبعد.... (يحرك رأسه بالنفي... يعض على شفقيه...) نظرة عندها
ليه إني مش راجل.... وإني ضعيف.... كانت بتدبحني.... كان لازم
أبعد.....

- (نصف ابتسامة...) بعد كل اللي عملته معاك!!

- آه... آه.... بعد كل اللي عملته معايا.... عشان كل اللي عملته
معايا... كان لازم أبعده.....

- (بيتسم...) طيب.... وأديك بعدت.... (يربت على كتفه...)
خليك بعيد بقى.... صدقني... ملكش مكان في وسطينا... محدش
عاوزك....

يلتفت إلى ضيوفه تاركا "عمران" متسمراً مكانه.....

يرحل عمران..... و يمضي "زياد" ما تبقى من ليلة عيد ميلاده
بين أصدقائه... بجسده.... لا بقلبه... لا بعقله.... عقله وقلبه.... في
مكان آخر....

ويمضي الليل....

وها هو الصباح....

يقوم "زيد" بمهاتفة "مهرة" في تمام الساعة العاشرة....

- صباح الخير...

- (صوتها ما زال نائمًا....) صباح النور...

- (بيتسم....) لسه نائمة?!

- (تفيق قليلاً...) لا لا.... صحيت خلاص... الساعة كام?!

- الساعة عشرة....

- (نبرة فزع....) عشرة?!!

- (بيتسم ابتساماً عريضةً....) آه عشرة.... متقلقيش... مفيش شغل

النهاردة... أنا كانسلت كل حاجة.... النهاردة أنتي معايا.... طول

اليوم....

- (تبتسم.... لحظات صمت...) ماشي....

- خدي وقتك.... لما تفوقي وتحسي إنك جاهزة.... كلميني....

وتنتهي المكالمة...

ساعة... تستقبل "مهرة" مكالمَةً أُخرى.... رقم غريب....

- ألو....

- صباح الخير....

- (صمت....)

- مهرة.... أنا عمران....

- (لحظات صمت....) عارفة....

- عاوز أشوفك.... لازم أشوفك....

- لا... مش هينفع....

- (يتنهد... لحظات صمت...) لازم أشوفك....
- تمام... برده مش هينفع....
- (بصوتٍ منكسرٍ...) مهرة... اسمعيني... أنا عارف إنه...
- (تُقاطعه...) اسمعني أنت يا عمران... لو أنت متخيل إني مبسوفة باللي بيحصل دلوقتي... وإني حابة أذك وأهينك تبقى غلطان... زي ما طول عمرك كنت غلطان... أنا فعلا مش حابة إني أشوفك في الوضع ده... وفي نفس الوقت (تبتسم..) أنا فعلا مش عاوزه أسمع منك حاجة ولا أشوفك ولا أعاتبك ولا أعرف عنك حاجة من الأساس... بعد إذناك ما تتصلش بيا تاني... ولا تظهرلي في أي مكان... ولو جمعنا صدفة حتى لو بعد ميت سنة... يا ريت تديني زهرك وتمشي... وأنت طبعا أستاذ في الموضوع ده...
- مهرة... اديني بس...
- (تقاطعه بانفعالٍ....) أنت إيه مدى غباءك؟! ويا ترى أنا إيه مدى صبري؟! حقيقي مش عاوزه أستخدم أسلوب مهين معاك... بعد إذناك... ما... تتصلش... هنا... تاني...!! سلام...
- ثم تقوم بإنهاء المكالمة... لتهاتف "زيد"...
- جاهز...!?
- (يبتسم...) من زمان...
- (تبتسم...) طب عدي عليا... أنا جاهزة....
- مهرها... يُقبل كف يدها بحنان فور ركوبها السيارة... يبتسم لها... تبتسم له... يُناولها كوب قهوة...
- يلا بينا!?

- (تبتسم في خجلٍ..... مُمسك بكوب القهوة...) أنا معاك.....
- (يتنهد مبتسمًا.... يرفع صوت موسيقى "أم كلثوم" أنت عمري... لينطلق مسرعًا إلى وجهته....)
- وفي المطعم..... تجلس أمامه... يُحدق بها كثيرًا...
- (تُحرك رأسها بالإيجاب مبتسمةً....) شوف.. وأنا اللي طول السنين دي فاكراك بجح.....
- (يبتسم خجلًا....)
- (تنهد... تبتسم له بحنان....) إيه اللي صبرك على الأرف ده كله....؟
- (يبستم باستنكار...) أرف؟! أنا مش شايف أرف... فين الأرف...!؟
- (تشير إلى صدرها بابتسامةٍ عريضةٍ....) أنا... أنا الأرف....
- (لحظات صمت.... يُحدق بعينيهما....) أنتي أحلى حاجة حصلتلي في حياتي...
- (تبتسم له بحنان.....) هوه أنت....
- أنا إيه؟!!
- (تنهد بعمقٍ.....) زياد... أنت حنين أوي.... أنت أحن راجل أنا شفته في حياتي.... (تُخفض رأسها... بحزن...) أي نعم أنا مشفتش حنية كتير في حياتي... ودائمًا نصيبي من الرجالة سيئ... (نصف ابتسامةٍ ساخرة...) أبويا بقى... أخويا... (ابتسامة عريضة....) عمران..... (تنهد...) الناس دي آذنتي أوي... آذنتي فوق ما تتخيل.....
- (يُحدق بها...)

- زياد.... أنا معرفش يعني إيه راجل حنين.... معرفش يعني
إيه حنيه أساسًا... (تبتسم له...) مكنتش أعرف.... مكنتش....
أنا قعدت فترة كبيرة على ما أترجم الإحساس ده..... (لحظات
صمت...) فإكر لما وقعت مرة في المكتب ورجلي اتلوت..
لقيتك بتجري عليا... خضتك عليا... (تبتسم.. تنتهد...) مكنتش
فاهمه... بس هوه كان إحساس حلو..... حلو أوي.... (تُحرك
رأسها بالنفي...) أنا محدش بيعمل معايا كده... (تبتسم
ابتسامه عريضة...) بيستقووني... الناس بتستقواني.... (تنتهد
بعمق)..... تخفض رأسها.... تُمسك يده.... زياد... أنا عارفه
إنك بتحبني.....

- (يبتسم لها....) وأنا عارف إنك عارفه إني بحبك....

- (تبتسم له ابتسامه عريضة...) وأنا عارفه إنك عارف إني عارفه
إنك بتحبني...

- (يبتسم إبتسامه عريضة... ينظر بعيدًا....)

- (تقبض على يده بقوة.... ما زالت تبتسم...) إيه؟

- (ينظر إليها بحنان....)

- (تكرر... بحنان....) إيه؟!

- (لحظات صمت....) أنا اتكلمت مع عمران إمبراح في الحفلة
بعد ممشيتي... و..

- (تُقاطعه... تُحرك رأسها بالنفي مبتسمة) مش عاوزه أسمع....
مش عاوزه أعرف.....

- (يُحرك رأسه بالإيجاب.... يُبعد نظره.... صمت قليل...) بيقول
إنه آخذ كل حاجة..... (ينظر إليها...) قالي أنا أخذت كل
حاجة.... ومفضلهاش أي حاجة تدهالك.....



- (تفلت يده..... بنبرةٍ مستاءةٍ للغاية) عمره ما لمسني..... عمره
ما حط إيدِه عليا..... حقير... وكذاب.....!!

- (يتنهد... يُحرك رأسه بالإيجاب... بنبرةٍ هادئةٍ) عارف... مش
دي النقطة... يمكن هوه لما قلها لي كان عاوز يوصلني المعنى
ده... عشان أنسحب... بس صدقيني مش دي النقطة خالص...
آخر همي..... مهرة، أنا عارفك... عارفك كويس... بس هوه لما
قلي الكلمة دي... مكذبش عليكي أنا خفت.....

- (تُحدق به.....)

- (بيتسم بأم... خفت يكون معاه حق... ومعدش عندك
حاجة فعلا تدهالي... مهرة أنا عارف علاقتك مع عمران قد
إيه استنزفتك... واستهلكت قوتك... وقضت على حاجات كثير
حلوه فيكي... أنا خايف فعلا... تكوني ادتيله كل حاجة...
كل مشاعرك... قوتك... ضعفك... حبك... كرهك... غضبك...
حنانك... كل حاجة..... خايف يكون فضاكي من جوه.....

- (تبتسم له.....) تشرب قهوة!؟

- (بيتسم باستغراب...) إيه!؟

- (تبتسم ابتسامة عريضة...) قهوة... قهوة... تشرب قهوة!؟

- (يتنهد بابتسامةٍ عريضةٍ...) نشرب قهوة.....

يشير للنادل..... فنجاني قهوة... وقد كان..... يُحدق بها كثيرا...
تبعد هي نظرها..... يحضر النادل فنجاني القهوة.....

- القهوة جت...

- (تبتسم له... تستبدل مقعدها بآخر بجانبه... تجلس بجواره...)

نشرها... ونكمل كلام.....

- (ينظر إليها بحنان... يُحرك رأسه بالإيجاب...)

- (تمسك يده... تتشابك الأصابع... تضع رأسها على كتفه....)
- (يبتسم لها بحنان... يُقبلها من رأسها.... يبدأ بارتشاف قهوته....)
- (دقائق صمت.... ثم..) الي قال إن فاقد الشيء لا يعطيه ده مغفل أوي على فكرة.... فاقد الشيء... بيعيش طول عمره يدور عليه... ويوم ما يبلاقيه... بيتفنن في إنه يديه.... (تعتدل في جلستها.... تنظر إليه مباشرة...) علاقتي مع عمران آذنتي نفسيا... ده حقيقي... استهلكتني زي ما بتقول.... بس مش بالشكل الي أنت متخيله.... بالعكس.... علاقتي بالشخص ده... خلت عندي جوع للعاطفة أكثر... (بتبسم له....) أنا جعانة حنية يا زياد... جعانة تقدير... الي أنا عملته مع عمران ده أنا مش ندمانة عليه... كل محاولاتي في إني أنتشله من البؤس الي كان عايش فيه... أنا فعلا مش ندمانة عليه... لأن دي طبيعتي.... (بتبسم له...) أنا كده.... (بتبسم ابتسامة عريضة...) أمي الله يرحمها كانت بتحكيالي إنه أول ما اتولدت... كنت رافعة إيدي اليمين لفوق.. ومكنتش بنزلها... كل ما الدكتور ينزلها... أقوم رافعاها.... (تحرك رأسها بالنفي مع ابتسامة عريضة جميلة... تتنهد... تُحدق به بعمق...) أنا كده... مولودة في وضع استعداد... أنا بكره الضعف... بكره الجبن... (لحظات صمت....) أقلك على حاجة... أنا أكثر حاجة شدتني للشخص ده... ضعفه.... ضعفه كان مستفز... جدا... حالة كده ولدت جوايا إحساس تحدي إني ممكن أساعده وأغير الحدودة كلها على بعضها... أشقبله حياته... (تتنهد...) بس الموضوع فلت من إيدي... والشهر بقى سنة... والسنة بقت اتنين وثلاثة و... (تتنهد بعمق....) كل ما كنت بفكر إني أنسحب... وأحس إني جبت آخري.... بفكر في كل الي فات... وكل الي عملته عشانه... (بتبسم ابتسامة عريضة...) كنت باستحرم... وأقول هاقي آخر

آخرك كمان.... لحد ما صحيت في يوم.... ولقيته هوو واخذ
القرار.... وسابني.... يمكن ده أشجع قرار أخده في حياته....

- (بحنان....) مهرة....

- (تبتسم له....) سيبي أكمل....

- (يُحذق بها....)

- اللي كان بيني وبين عمران مكنش حب.... أنا إمبراح بس...
إمبراح بس.... اتأكدت إن اللي كان بيني وبينه أبدا وعمره ما
كان حب.... إمبراح أنا كنت في حضنه.... حضنه اللي عمري ما
دقت طعمه.... ومحستش بحاجة....

- (يجحظ بعينه... يُقاطعها) حضنه؟!!!!!!!!!!!!!!

- (تبتسم له بشغب... تُحرك رأسها بالإيجاب....) آه... لما لحقني
بعد ما مشيت... شدي وخدي في حضنه....

- (يعض على أسنانه بغضب... ينظر بعيداً... عروق عنقه تكاد
تتفجر....)

- (تمسك يده بحنان....) أنا آسفة....

- (ينظر إليها دون إجابة....)

- (تبتسم له....) والله ما حبيته.... ولا عمري حبيته.... عمران ده
قصة وهم أنا اللي بنيتها من أولها لآخرها.... سنين ضاعوا وأنا
بحاول أثبت لنفسي إني بطلة... وممكن أحقق المستحيل.... كان
بيصعب عليا يا زياد.... (تتنهد...) زياد أنا كبرت في بيت اللي
شايلاه واحدة ست... وأب ملوش أي وجود على أرض الواقع غير
إنه يياكل ويشرب ويشتم وينام.... وأخ نسخة من أبوه... وعلى
الرغم من كل ده أمي كانت بتحاول.... ماتت وهيه بتحاول...
بتحاول تصلح حالهم هما الاتنين.... أنا بقى... كنت متخيلة

إن ده شكل العلاقة العادية... كبرت ولقيت نفسي بكرر اللي
أمي عملته... وده كان غلط... وأديني دفعت الثمن... بس
اتعلمت... (تبتسم له...) اتعلمت إن القوي مينفعش يعيش
غير مع القوي... (تضع يده على وجهه) القوي اللي زيك يا
زياد... القوي اللي قوته في حنيتته... أنت أحن راجل أنا شفته
في حياتي.....

- (يتنهد...) مُهرة....

- زياد أنا عاوزه أكون معاك... لا..... أنا نفسي أكون معاك...
ومن زمان... بس كان فيه حاجز بيني وبينك... الحاجز ده
اتشال إمبراح... اتشال لما اتأكدت إن مفيش ذرة عاطفة جويا
لي اسمه عمران... اللي كان باقي جويا ليه... شوية قهرة
وحسرة وندم... (تبتسم له بحنان...) وراحوا... أنا دلوقتي
ست حرة... ومشتاقة... مشتاقة ليك فوق ما تتخيل... نفسي
أعوضك عن كل لحظة كان نفسي أكون فيها معاك ومقدرتش...
نِفسِي أحبك... نِفسِي أهتم بيك... نِفسِي أشاركك كل تفاصيل
حياتك... نِفسِي....

- (يضع يده على فمها.....) تتجوزيني!!!

- (ما زال يضع يده على فمها... تشير إلى يده بابتسامة.....)

- (يبتسم... يزيح يده)

- (تُقبله من وجنته بحنانٍ..... تُحدق به.... عيناها لامعتان..)
أتجوزك.....



لعنة الماضي

- (يُحيطها بذراعه...)
- (تضع رأسها على صدره... ويدها بحنان على كتفه... تنظر إليه...)
- (يبتسم لها...)
- (تبعد نظرها.. تدفس رأسها بصدره... تتنهد...)
- (يضمها بقوة... يُقبل جبينها...)
- (دون أن تنظر إليه...) عمر... أنتي لسه بتحبيني؟!)
- (يعبث بشعرها دون إجابة...)
- (ترفع رأسها لتنظر إليه... عمر؟!)
- (يُحدق بها بابتسامة...)
- (بصوتٍ حنونٍ...) لسه بتحبيني...؟!)
- (يُزيح خصلات شعرها الأسود المجدد من على عينيها..... يُحدق بها بابتسامة...)
- (بصوتٍ خافتٍ...) عمر...
- (يُقبل شفيتها بحنان...)
- (تتنهد... ثم تضع رأسها على صدره من جديد... في صمتٍ تام...)

- (بعد مرور بضع دقائق.... عابثًا بخصلات شعرها...) أنتي حاسة إيه؟! -
- (ترفع رأسها لتحقق به....) مش عارفه....
- (بيتسم لها....) طب حسي....
- (تُحرك رأسها بالنفي...) مش عارفه يا عمر... ساعات بحس إنه
- لاء... وساعات بحس إنك متقدرش أصلًا تعيش من غيري.....
- (يتنهد... يُحديق بها....)
- عمر... أنا بخاف منك.....
- (يعقد حاجبيه....) بتخافي مني.....
- كنت فاكرة إننا بعد ما نتجوز... الإحساس ده هيروح.... بس....
- بس إيه؟....
- (تُحرك رأسها بالنفي...) لا يا عمر... أنا لسه بخاف منك....
- (يعبث بخصلات شعرها بحنان....) يعني إيه بتخافي مني....؟! -
- (تعتدل في جلستها... تجلس بجواره.... تنظر إليه...) مش
- عارفه... كتير بحس إنك بعيد عني.. حتى وأنا في حضنك يا
- عمر... بحس إنك في عالم تاني... مش معايا....
- (يعتدل هو الآخر في جلسته... يُشعل سيجارة... يضع يده على
- رأسه.... ينظر إليها دون رد....)
- (تقترب منه قليلًا.... تضع يدها على فخذة....) عمر... لو بطلت
- تحبني... قولي...
- (بيتسم لها...) عمري ما بطلت أحبك يا ساندررا...
- أمال في إيه... مالك....؟! -
- (ينفت دخان سيجارته...) مليش يا حبييتي... صدقيني مفيش حاجة....

- (بيتسم... يمك فنجان قهوته...)
- عمر...
- (ينظر إليها...)
- أنا إحساسي صح؟!
- (يرتشف قهوته... أي إحساس بالظبط... خوفك مني?!)
- لا... إحساسي إن فيه حاجة...
- (يُشعل سيجارة... بس أنتي بتقولي إنك من زمان بتخافي مني... مش من دلوقتي بس...)
- (تُحرك رأسها بالإيجاب...)
- (باستغراب... يعني إيه أصلاً بتخافي مني يا ساندراف!!!)
- بحس إنك....
- (يُحدق بها...)
- (تتنهد... مش عارفة...)
- (ينفث دخان سيجارته بعيداً... عاوزه إيه يا ساندراف... أنا عاوز أريحك والله... بس مش عارف... مش فاهم...)
- (تصمت قليلاً...) له كثير بحس إنك وراك حاجة أنا مش عارفها... له بحس إنك بعيد... بحس إنك...)
- (يُقاطعها...) موع... بتحسي إني موع...)
- (تُحدق به...) موع؟!)
- (بيتسم لها بآلم...) موع...)
- (بنبرة منخفضة...) له?!)
- (ينفث دخان سيجارته بكثافة...)

- (تقترب منه...)
- (يحدق بها....) أنتي عاوزه إيه يا ساندراف؟!
- عاوزه أعرف مالك.... إيه اللي أنا معرفوش عنك...
- اللي متعرفهوش عني مش هيفرق معايي في حاجة.. ولا معانا في حاجة.... أنا معاي أهو... معايي يا ساندراف... عاوزه إيه تاني...
- عاوزاك كلك يا عمر... عاوزاك بكل حاجة فيك... حتى بوجعك.... عاوزاك.... عاوزه أشيل معاك... عاوزه وجعك قبل فرحك يا عمر.....
- ليه؟! ليه يا بنت الناس.... ليه وجع القلب ده...؟!
- لا يا عمر... ده مش وجع قلب... وجع القلب اللي بجده... لما أبقى في حضنك ومعاك وتروح مني في حنة تانية خالص... حتى لو بس بعقلك.... وجع القلب... بصاتك ليه اللي مبفهمهاش....
- (بيتسم بألم دون أن ينظر إليها...) أنا آسف....
- (تُحرك رأسه تجاهها...) لا... لا يا عمر... أنا عارفة إنك عمرك ما قصدت توجعني... عارفة والله إن آخر حاجة ممكن تعملها... بس أنا مش مرتاحة... في الأول... أول ما عرفنا بعض... قلت.. يمكن عشان معرفوش كويس... عرفنا بعض... حبيتك... عشقتك... وبردو حسيت إن فيه حاجة غلط... قلت... يمكن لما نتجوز... الإحساس ده يروح... بس مرحش يا عمر... زاد... بتخوفني يا عمر.... (بنبرة حزنٍ عميقٍ) بتخوفني أوي...
- (يتنهد بسخونة... يصمت قليلا...) في حياة كل واحد فينا... صندوق أسود... فيه ذكريات وحاجات محدش يعرفها غير صاحب الصندوق ده... حاجات مش لازم تطلع....
- حتى لأقرب الناس ليه...؟!

- (بانفعالٍ...) بالذات لأقرب الناس ليه يا ساندرًا... بالذات للناس اللي بتحبه....
- ليه يا عمر؟
- (يحدق بها... يطبق على شفثيه....) عشان فيه حاجات بتدل... وفي حاجات بتكسر... وفي حاجات ممكن تغير رأيك فيه... فيه حاجات ممكن تخليكي تبطلني تحبيني....
- عمري... عمري ما هبطل أحبك... عمري ما هبطل أحبك يا عمر... فاهمني؟!!!!
- (بيتسم نصف ابتسامة...) بيتهيألك....
- عمر... الحاجات دي بقت في الماضي خلاص... الحاجات دي مهما كانت بشعة.. فهيه معدتش موجودة... راحت... حتى عمر بتاع زمان... معدش موجود....
- ومدام راح... عاوزه تقبلي فيها ليه يا ساندرًا!؟
- عشان عاوزه أفهم... مالك... إيه اللي وجعك...؟
- (يتنهد...) مفيش حاجة وجعاني... أنا كويس... صدقيني.... الوقت بينسي كل حاجة.... ووجودك في حياتي دي أكبر نعمة ربنا عوضني بيها عن كل حاجة يا عمري.... والله العظيم....
- (تُحرك رأسها بالنفي....) عمر....
- (يُحرك رأسه بعيداً....) كفاية يا ساندرًا....
- (تُطبق على شفثيها... ثم تُبعد نظرها عنه....)
- (تمر دقائق.... عشر دقائق... دون حديث... يُشعل سيجارة....) زمان.. زمان أوي... لما كان عندي تسع سنين... كان عندي ماتش كوره مع العيال.... رجعت متأخر... البيت كله كان نايم...

وإحنا بيتنا أصلا بالليل كان عامل زي بيت الرعب... متسمعيش فيه نَفَس... وضملة... وضملة أوي.... سمعت صوت في أوضة ليالي أختي....

- (في اندهاش تام...) أختك... أنت عندك أخت؟!!!!!!!
- (دون أن يلتفت لمقاطعها)... خدني الفضول واتسحبت بالراحة عشان أشوف في إيه من غير متشوفني... لأنها مكنتش بتحب حد يدخل عليها خالص... وكان صوتها عالي وعنيفة أوي.. كنت بخاف منها أوي.... اتسحبت براحة أوي على أطراف صوابعي.. وفتحت الباب شوية... لقيت أبويا قاعد جنبها على السرير... وقاعد بيعمل حركات غريبة....

- (تنظر إليه باندهاش....)

- (ينفث دخان سيجارته....) في البداية مفهمتش... كنت فاكره بيضطرب عليها واللا حاجة... دخلت نمت... ثاني يوم... خدني الفضول أعمل نفس الحركة... في نفس الوقت... لقيته قاعد جنبها برده... بس المرادي كنت سامع صوت ليالي بتعيط بصوت واطي.. وبتقله.. كفاية يا بابا... أنا خايفة... برود مفهمتش حاجة.... مفهمتش حاجة.... والله العظيم ما كنت فاهم.... ساعتها ليالي كان عندها 13 سنة.... بعدها بخمس سنين... ليالي انتحرت... (بيتسم بعينين غارقتين بالدموع....)

- (بصوتٍ مفزوعٍ....) انتحرت؟!!!!!!!

- (يُحرك رأسه بالإيجاب.... ينفث دخانه بغضبٍ...) انتحرت... (يتنهد) شقت عروقها.. وانتحرت... ومقدرناش نلحقها... سابت لي رسالة على مكتبي... قالت لي فيها كل حاجة... كل حاجة... ساعتها فهمت بس هيه ليه كانت دايما متعصبة وغضبانه... ليه كانت عنيفة... ليه كل ما كنت بقرب منها تضربني.... ليه

مكانتش بتقعد تاكل معنا عالأكل.... ليه حاجات كتير أوي كنت
واخد بالي منها بس مكانتش فاهمها.... قالت لي إنها بتكرهني....
وإني كان مفروض أحميها منه.... قالت لي قد إيه كانت بتحس
إنها وحيدة في الدنيا دي.... وضعيفة.... ورخيصة... (هنا ينهار
في البكاء....)

- (تقترب منه لتضمه لصدرها.... بقوة....)
- (يدفس رأسه في صدرها... ويبيكي بقوة....)
- (تضمه بقوة أكبر.... دون أن تتفوه بكلمة....)
- (بيكي لدقائق بين ذراعيها... ثم يرفع رأسه بروية... يبتعد عنها
قليلا.... يُحاول أن يُهدئ من روعه.... يُشعل سيجارةً أخرى....)
- (بعينين كالدم.... بصوتٍ يُحاول كبت بكائه...) عمر...
- (يبتسم لها.. والدموع تنهار من عينيه... ينفث دخان
سيجارته....) بس...
- عملت إيه؟....
- (يسمح عينيه مبتسمًا....) ولا أي حاجة... ساعتها ولا أي حاجة...
كنت أصغر وأضعف بكثير أوي من إني أعمل أي حاجة... بس
اتشوهت.... بقيت إنسان مشوه... مبقتش قادر أتعامل مع
الناس ولا أبص في عيون الناس....
- وأبوك....!؟
- (بانفعال...) متقوليش زفت!!!!!!
- أنا آسفة....
- كنت بسحب منه فلوس على قد مقدر... كنت بسرقة وهو
نايم.... كنت بتف في أكله من وراه... كنت بعمل أي حاجة

ممکن تنذیه من بعید... کنت فعلا أضعف من إني أعمل أي
حاجة تانيه.....

- ووالدتك؟!!!!

- (بيتسم بألم...) والدي اتوفت بعد حادثة انتحار ليالي بسنة...

- ما كنتش تعرف باللي كان بيحصل!!؟

- (يتنهد بسخونة... ينفث سيجاره...) الله أعلم بقى... جايز ما
كنتش تعرف... وجايز كانت تعرف وساكتة...

- لا يا عمر... مستحيل...

- (بابتسامه استهزاء..... ثم ينفعل) مستحيل؟! بتستعطي؟!!!!

- (بصوتٍ خافتٍ...) أنا آسفة...

- (يتدارك غضبه...) أنا اللي آسف.....

- (تُحدق به.... لا تسعفها كلمات الرثاء...)

- (بيتسم بألم...) ساندرأ... متبصليش كده...

- (تُبعد نظرها...)

- بعد ما أمي ماتت... مفضلش غيري أنا والحيوان ده... كنت

بتفنن في تطليع روحه وكسر نفسه... كنت كل يوم داخله بمصيبة

شكل... وبردو كنت أضعف من إني أعمل أي حاجة تانيه... أول

ما كملت الـ 21... أخذت ورثي من أمي وكل حاجة سابتهالي

وسبت له البيت ومشيت... مشيت يا ساندرأ... مشيت وأنا

قلبي قايد نار... كل ما بفتكر شكل أختي... صوتها... كل ما

بتخيل وجعها... إحساسها بالخوف... بالوحدة (بيكي...)

- (تمسك يده بقوة...)

- (بصوتٍ باكٍ...) مش قادر... مش قادر أنسى...

- (تضمه لصدرها مرة أخرى...) بس يا عمر.. كفاية... كفاية يا حبيبي.....
- (يُمسك بها بقوة... يبكي....) صورتها في بالي مبتفارقنيش..... مش قادر أنسى..... مش قادر... مش قادر... مش قادر.....
- (تضمه بقوة... بصوتٍ باكٍ) اششششششششش.....
- (ينظر إليها... بعينين كالدم....) أنا مش راجل يا ساندر!... أنا مش راجل.... أنا مقدرتش أحمي أختي... أختي كانت بيتهتك عرضها وأنا نايم في الأوضة اللي جنبها.... أنا مش راجل....
- أنت كنت طفل يا عمر... طفل... ميفهمش أصلا الكلام ده... واللي عمل فيها كده... مستحيل كنت تشك فيه.... مش ذنبك يا حبيبي... مش ذنبك يا عمري... (بصوتٍ باكٍ..) واللله العظيم ما ذنبك....
- لا.... لا.... أنا شفته... شفته بعيني... شفته... بس واللله العظيم ما كنت فاهم (بصوتٍ باكٍ..) واللله العظيم ما كنت فاهم حاجة....
- (تمسح دموعها بيدها...) اششششششششش... عشان خاطري إهدا... إهدا يا عمري....
- (يبتعد عنها قليلاً... يتنفس بعمقٍ... بعمقٍ أكثر...)
- (تضع يدها خلف ظهره... تنظر إليه بحنانٍ وشفقة)
- (يتنهد... دقائق دون حديث...)
- (تُحدق به... تربت على ظهره....)
- (يشعل سيجارة....)
- (بصوتٍ مترددٍ....) عمر...

- (لا ينظر لها...)
- (تحرك رأسه تجاهها...) أنا بحبك... بحبك... بحبك بكل حنة في جسمي وقلبي وعقلي وروحي... بحبك عشان أنت أعظم وأحن وأطيب راجل أنا شفته في حياتي... بحبك عشان بحس معاك بالأمان... بحبك عشان وأنا معاك بحس إن الدنيا كلها متساوش... مش عاوزة حاجة من عمري غير إنه يبقى معاك وليك وبس....
- (بيتسم نصف ابتسامة... يُفلت يدها... ينفث دخان سيجارته بعنف...) أنتي متعرفيش حاجة... متعرفيش أنا شفت إيه واللا مريت بإيه....
- (تُحرك رأسها بالنفي سريعًا) مش عاوزة أعرف... مش عاوزة أعرف حاجة... أنا لما سألتك... سألتك عشان ما كنتش فاهمة... بس دلوقتي أنا بجد مش عاوزة أعرف حاجة تانية... عاوزاك أنت بس... مش عاوزة حاجة تانية....
- (بيتسم بألم عميق...) ساعات لما يبصلك... بخاف... بخاف عليك... مش عارف إذا كنت عارف أحميكي واللا... مش عارف إذا كنت مخيبة عليه حاجة واللا... مش عارف... ساعات يبقى حاسس إني نفسي أحبسك هنا في البيت مفيش حد يلمح طيفك غيري... بس مقدرش... مقدرش أسلبك حريتك... مقدرش أظلمك معايا....
- (تبتسم له...) محدش يقدر يقرب مني طول ما أنت جنبي يا عمر... وبعدين مراتك هميت راجل... وأنت عارف كده كويس....
- (بصوتٍ حازمٍ...) إوعديني يا ساندر!... إوعديني لو حد مس شعرة منك... تيجي تقولي لي فوراً... إوعديني!!!!

ليالي بنت الأربعين

في ليلةٍ من ليالي نيسان الباردة... بعد منتصف الليل... تقف
"ليالي" خلف نافذة غرفتها المعتمة... لا ترتدي سوى حمالة صدر
تظهر جمال قوامها الأخاذ وبنطال من الكتان... تضع يدها حول
خصرها النحيل... يلامس صدرها العاري ذلك الزجاج البارد... تتنهد...
غدا... تتم عامها الأربعين... أربعون عامًا بلا رجل... بلا حب... بلا
عاطفة... بلا جنس... أربعون عامًا وما زال قلبها عذريا... كجسدها
الأربعيني الذي ما زال يحتفظ بجماله... قطرات من الدمع تنسال
على وجنتها الناعمة... لا يزال وجهها نضرا... كفتاة لم تتجاوز عقدها
الثاني بعد... ولكن بملامح مثيرة حادة... وجسد مفخخ بتضاريس
الأنوثة كما يجب أن تكون... لم ينتهك شرودها سوى جرس الباب...
لوهلةٍ أحست بالخوف... من هذا الذي يدق جرس بابها في تلك
الساعة المتأخرة... وما هي إلا لحظات حتى تذكرت أنها قد قامت
بطلب علبة سجائر والكثير من العصائر... ترتدي قميصا أسود
ملقى على السرير... تزرره بسرعة في طريقها إلى الباب... وفي
منتصف طريقها تتذكر أنها قد نسيت أن تحضر محافظتها... فتعود
أدراجها... لا تجد سوى فئات ورقية كبيرة... تعلم أن هذا البازار
دائمًا ما يتأفف كلما رأى فئات ورقية كبيرة... "يبقى يتصرف هو

بقى....." هكذا تمتت أمام باب منزلها قبل أن تفتحه لترى أمامها شابا في غاية الوسامة... شعره أسود كثيف... لحية خفيفة... ربعة... ليس بطويل... وليس بقصير... يبدو في أواخر العشرينات ...

- (بتسم له.....) اتأخرتوا أوي على فكرة... ده أنا كنت نسيت خالص إني طالبة حاجة ...

- (بيتسم لها... ثم يناولها أغراضها...) إحنا آسفين يا فندم.... بس النهاردة weekend وفيه ضغط جامد في البازار

- (تأخذ منه الأغراض..... تحرك رأسها بالإيجاب مع ابتسامة لطيفة...) كام كده؟!!

- 210 يا فندم ...

- (تخرج الأموال من محفظتها... لترفع رأسها لتراه يحدق في صدرها... وقد نسيت إغلاق آخر زر في القميص..... تنظر إليه بحدة..... بنبرة معنفة...) اتفضل!!!!

- مفيش فكة؟!!

- (بنبرة حادة...) لا مفيش !!!

- (يصمت قليلا...) طب ممكن أنزل أفك وأجيب الباقي لحضرتك؟!!

- (تتنهد...) ماشي... بس لو سمحت متتأخرش....

- حالا يا فندم

ثم يمضي..... تغلق الباب... تفكر فيما قد حدث للتو.... تحدق بصدرها الممتلئ... كم يبدو رائعاً.... كيف لشاب كهذا مفعم بالرجولة أن يتفادى النظر لصدر رائع كهذا.... هذا ما دار في رأسها... ابتسمت... ثم قامت بغلق ذلك الزر... وبعد مرور ثلاث دقائق... ثلاث دقائق فقط... يدق باب منزلها من جديد... "إيه السرعة

دي.... يخربيتك...." وقبل أن تقوم بفتح الباب.... أخذت تحدد بذلك الزر.... رغبة شديدة تجتاحها بفك ذلك الزر السحري.... الذي يبرز ما يكفي من جمال قامتها لجعل ذلك الشاب يأتي بالبقية في وقت قياسي كهذا..... لم تتردد كثيرا... أخذت بفك ذلك الزر.... تمسك بمقبض الباب... تحدد بصدرها.... تتنهد.... "احترمي نفسك بقى...." تعيد غلقه من جديد.... ثم تفتح الباب... فيرتسم على وجه ذلك المسكين نظرة تُوحى بخيبة الأمل.... تبتسم له بلؤم.... تأخذ البقية.... تُعطيه بقشيشا لا بأس به.... ثم تغلق الباب ...

تتفقد ما قد أحضره.... وفي المطبخ... تُعد كأسًا مثلجا من العصائر.... تعود إلى غرفتها... لتخلع قميصها... وحمالة صدرها تقوم بفتح النافذة على مصراعيها.... تغلق الأنوار... تقوم بتشغيل قائمة من موسيقى الكمان والجاز والساكسفون المثير.... تجلس نصف عارية على طرف السرير.... لا ترتدي سوى بنطالها الكتاني.... في يدها كأس العصير.... وفي يدها الأخرى سيجارة.... دقائق... وتضع كأسها على الأرض.... تلقي بجسدها العاري على السرير.... لا تكثرث بالبرد القارص.... تنفث دخانها بكثافة.... تشرد في سقف الغرفة.... تتحسس جسدها.... ترتعش.... أهذا انتشاء البرد.... أم نداء خاص من هرموناتها الثائرة.... ما زالت تدخن سيجارتها بكثافة.... لبضع دقائق.... نسيمات الهواء الباردة تزداد حدة.... وموسيقى الجاز تزداد جمالا.... تتنهد.... تعتدل في جلستها لتجلس على طرف السرير مرة أخرى.... لم تعتقد أنها في مزاج مناسبٍ اليوم لممارسة البؤس.... بل تفضل أن تمضي تلك الليلة في سلام.... مع الموسيقى... والسجائر.... وجسدها الأربعيني العاري.... والكثير من الظلام ...

تستمتع إلى تلك القائمة.... تحتسي مشروبها قطرة قطرة.... تبتسم تارة.... وتبكي تارة.... كم تشعر بالوحدة.... أليس على وجه ذلك

الكوكب البائس رجل واحد كفيل بضمها في ليلة كهذه.... دون أن يرمقها بنظرات انتقاص.... أخذت تفكر في ذلك الشاب الوسيم الأسمر... الذي كاد أن يثقب صدرها بعينه.... لما لم تدفعه بقوة تجاه الحائط لتنهال عليه بالقبلات..... ما الذي يمنعها من فعل كهذا..... لن يرفضها بالتأكيد.... ولن يخبر أحداً.... يبدو أكثر ضعفاً من ذلك النوع الذي يتباهى بممارسة الحب علناً.... "ممارسة الحب؟".... ما هذا الذي يدور في ذهنك يا ليالي.... لقد فقدت صوابك بالتأكيد.... هكذا تمتمت.... أو شكت كأسها على النفاد.... فقامت بتحضير أخرى.... لا تزال عارية.... ولا يزال برد نيسان يؤلم عظامها.... والكثير من الوحدة.... الكثير من الذكريات.... الكثير من الندم.... الكثير من الحنين..... والكثير الكثير من الخوف من المجهول.... و بعد وصولها لدرجة عالية من البؤس واللاوعي.... تقف على قدميها ببطء.... لتتمايل من ألحان الكمان الدافئة.... وكأسها لا تزال في يدها.... تتساقط منها قطرات هنا وهناك.... تسكب القليل على جسدها.... جسدها الجائع للحب... للحنان.... ثم تجلس على طرف سريرها مرة أخرى.... تتنهد... لا تستطيع التخلص من صورة ذلك الشاب العشريني الوسيم.... تتذكر نظراته.... كم هو مفعم بالحياة.... بالرجولة.... بالقوة.... بالحياة... وتخيّل لمستته ها هناك.... ذلك النوع من اللمسات الذي يترك أثراً لمدة طويلة.... تتنهد.... الكثير من الاحتياج.... والقليل من الرغبة في ممارسة البؤس.... لم تعد تلك الخيالات تكفيها.... تريده لهما ودما.... تجلس على الأرض.... تحديق بالنافذة.... بالسماء.... "ليه.... أنا عملتك إيه.... عملت في حياتي إيه... مين قلقك إني كان ممكن أستحمل كل ده.... ليه حرمتني من إني أكون إنسانة طبيعية.... ليه حرمتني من إني أكون عادية.... ليه خلتنى جبروت.... ليه خلتنى كده.... ليه عملت فيا

كده..... ليه..... ده أنا بحبك.... بحبك أوي..... بحبك وبخاف منك....
رغم كل حاجة عملتها فيا... لسه بخاف منك... لسه شايفاك...
ارحميني..... ارحمني... ”، ثم أخذت تشرع في البكاء..... بكاء دافئا...
لم يكن لديها ما يكفي من الطاقة لتبكي بكاء صارخا... لم يكن
لديها من الطاقة ما يكفي لترمي بجسدها المنهك على السرير...
واكتفت بسحب غطاء خفيف لتحيط جسدها المثلج به..... ومع
القليل من الدفء.... خلدت إلى النوم..... لتستيقظ في صباح اليوم
التالي.... تقف أمام المرأة عارية دون حراك.... تتفقد جسدها....
تبتسم لها.... تُقبل انعكاسها بقوة... تتنهد بقوة أكبر.... هذا ليلها
الضعيف البائس... وهذا نهارها القوي المفعم بالحياة والأمل...
وهذا قدرها.... لا هروب منه... منه وإليه نعود... وهذه هي...
ليالي.... بنت الأربعين ...

جالها عريس

تقوم "هند" بمهاتفة "فادي" ... مرة بلا إجابة... وأخرى.....

- (نبرة حادة....) أنت فين؟!!!!!!
- (بصوت استنكار) أنا فين؟! كده وش يعني.. طب قولي ألو.. صباح الخير... أي زفت على دماغك.. ده أنتي لو بتكلمي واحد جاي من الشارع كنتي هتكلميه بطريقة أحسن من دي!!
- (تتنهد... تصمت قليلاً...) أنت فين يا فادي؟!
- في الشغل.. هكون فين يعني!!!
- هتخلص إمتة؟!
- ليه؟!
- (بانفعال....) هوه إيه اللي ليه؟! هتخلص إمتة؟!!
- أيوه عايزه إيه يعني؟!
- (بصوت قلق) عاوزه أشوفك... ضروري...
- (بنبرة تعبر عن قلقه عليها...) في إيه؟! أنتي كويسة؟!!
- أنا كويسة.. بس لازم أتكلم معاك ضروري....
- (يتنهد...) ماشي... هخلص شغل وأعدني عليكي..

- أيوه يعني الساعة كام؟!!
- (نبرة أكثر هدوءاً...) معرفش يا هند... بس مش قبل سبعة يعني...
- سبعة؟!!!! مينفعش قبل كده؟!!
- يعني هوه بمزاجي.. أنا موظف يا هند يا حبيبتى... مش شركة باباه هيه!!
- (تصمت قليلاً...) ماشي... هستناك..
- سلام..
- سلام.
- وفي تمام الساعة السابعة والنص يهاتفها...
- ألو..
- أنت فين؟!!
- (يتنهد...) (بصوت خافت..) أستغفر الله العظيم يا رب... مفيش فايدة.. أنا في الطريق خلاص... ربع ساعة وهبقى عندك... جاهزة؟!!
- لا طريق إيه أنا مش في البيت أساساً...
- (يعقد حاجبيه) نعم؟!!! أمان أنتي فين?!!
- أنا في caffen اللي في وسط البلد مستنياك...
- مستنياني؟! وأنا أعرف مين أنك مستنياني هناك?!!
- ما أنا قلت بدل ما...

- (يقاطعها...) قلتي إيه... أنتي ما قلتيش حاجة.. ما كلمتنيش ليه وقلتيلي إنك هتتحركي على هناك كنت جيتلك على هناك على طول؟!!!

- ما أنا مكنتش أعرف إنك هتتحرك قبل ما تكلمني يا فادي...

- (يتنهد...) يا الله على حرقة الدم... أنتي عارفة الطريق شكله عامل إزاي دلوقتي؟! مش أقل من ساعة على ما أجيلك....

- (بصوتٍ منفعلٍ...) يعني أعمل إيه أنا دلوقتي مش فاهماك?!?!

- كمان... كمان بتعلي صوتك!!! متعمليش حاجة... خليكي مرزوعة لحد ما أجيلك... (يُنهي المكالمة دون أن يُلقي السلام.....)

وبعد ساعة وربع... يدخل من باب المقهى ليجدها تجلس على طاولة في الزاوية تحتسي قهوتها وهي تضع سماعاتها الخاصة.... يقوم بسحب السماعات... ثم يجلس أمامها....

- (تبتسم له....) أنا آسفة...

- (يُشعل سيجارة ثم يلتفت بعيدًا...)

- (تُمسك يده...) خلاص بقى....

- (يُفلت يدها بحنانٍ..) مش كل حاجة بتخلص بأنا آسفة يا هند... لازم تشغلي مخك قبل ما تعملي أي حاجة.. مش ماشية كده و خلاص هلاهوطة ... اكبري شوية !!!

- (بنبرةٍ منفعلَةٍ...) خلاص بقى يا فادي.. قلتلك آسفة!! فعلاً ما جاش في بالي إنك ممكن تتحرك قبل ما تكلمني... متكبرش الموضوع...

- (يبتسم ببرود... ينفث دخانه) طبعًا... ما أنتي مش حاسة.. مش فاهمة يعني إيه طالع عينك من الساعة ستة الصبح..

- واحد ابن صاحب بابا في الشغل... بيشتغل مهندس في قطر...
- (يُحرك رأسه بالإيجاب سريعًا...) حلو ده... تصدقي... (بيتسم...)
ما توافقي؟!
- (نصف ابتسامة) نعم؟! أنت بتقول إيه؟!
- (بيتسم بلؤم...) ما كفاية يا بيه....
- كفاية إيه؟!
- (يتنهد... ثم يُغطي وجهه بكلتا يديه... دون أن يُحرك يده...)
أنتي عاوزه إيه؟!!
- (تصمت قليلاً...) مش عاوزه حاجة....
- (يزيح يديه...) لا عاوزه...
- آه عاوزه... عاوزاك أنت...
- (يرفع كفوف يده) حلووووو... حلو أوي... عاوزاني أنا!!! طيب...
- تمام... (بيتسم) جاية تقولي لي جايلك عريس ليه بقى؟! ما
ترفضيه من بره بره... بتحرقني دمي ليه؟!!
- (تعقد حاجبيها) بحرقلك دمك؟!
- (بيتسم باستهزاء...) هوه أنتي لا مؤاخذة لما تجيلي كل فترة
تقوليلي فيه واحد متقدم لي وببشتغل مش عارف إيه... دي
مش حرقه دم؟!
- مش بعرفك... مش لازم تعرف!!
- (بانفعال...) لا مش لازم أعرف يا هند... صدقيني مش لازم
أبدًا.. معرفتي مش هتزد ولا هتنقص حاجة... ما دام أنتي
عاوزاني أنا زي ما بتقولي... يبقى خلاص.. خلص الموضوع على
كده... مين يبجي.. مين يروح... مفروض الحاجة دي متفرقش

معاي أساسًا... ولو بتتكلمي على أساس إني أتحرك وأعمل
حاجة مثلا... ما أنتي عارفة كل حاجة... وعارفة أنا طالع عين
أهلي قد إيه في الشغل.. وبشتغل زي الحمار فوق طاقتي ليل
ونهار.... ومضحكتش عليكي في حاجة... فضلتي تزني من سنة...
تعالى تعالى تعالى... تعالى اتقدم.. تعالى اتزفت... جتلك عشان
أبتلك بس إني راجل وقد كلامي وإني مبتهر بش من حاجة...
رغم إني عارف إني هترفض... وفعلا اترفضت زي ما كان متوقع...
مع إني قتلتك قبلها يا هند أنا مش جاهز... يا هند أنا معيش
دلوقتي... أبوكي هيزنقني في حطة الشبكة والشقة... استني
سنتين كمان.... ولا حياة لمن تنادي... وحطيتني في موقف عمري
ما هسامحك عليه... وصغرتيني قدام نفسي.... كل ده عشان بس
أبتلك إني فعلاً جاد في علاقتنا وإني فعلاً بحبك وعاوزك.... ومن
ساعتها وأنتي طالعالى في حوار.. جالي زفت عريس.... طب ما
تروحي... ما تروحيله... لا بجد... إيه اللي مقعدك معايا لحد
دلوقتي!!!

- (تتنهد...) عشان بحبك.... عشان بحبك يا فادي...
- بتحبيني.. يبقى تستنيني لحد ما أبقى قادر... يبقى تاخدي
يايدي وتشجعيني و....
- (يُقاطعه النادل):-
القهوة يا فندم..
- (شكرا!) ثم يُغادر....
- (يتنهد..) إحنا فعلا محتاجين نتكلم....
- (تُحدق به قليلا...) خلاص يا فادي... لو موضوع العريس ده
مضايقك بالشكل ده... اعتبره متقلش من الأساس....

- (بيتسم..) بس هوه اتقال... واتقال لغرض معين... ومش أول مرة.. وأنا متأكد إنها مش هتبقى آخر مرة يا هند....
- يا فادي ما أنا...

- (يُقاطعها...) وبعدين... (يصمت قليلا...) أنا حاسس إن الموضوع دلوقتي مش موضوع عريس متقدملك وجايه تحرقني لي دمي ولا حتى يا ستي بتسخنيني ولا أيا كان اللي في بالك بقى... أنا حاسس إن الموضوع أكبر من كده....

- (باستغراب...) يعني إيه؟!!!!

- (يُحدق بها...) يعني أنتي مبتحسيش يا هند....

- (تجحظ بعينها...) ما بحسش؟!!!!

- (يُحرك رأسه بالإيجاب...) آه.. ما بتحسيش... ما بتقدريش... أنتي بتقولي إنك بتحبينني.. بس كل كلامك وتصرفاتك مبتقلش كده....

- (تبتسم باستهزاء..) وأنا لو ما مبحكش.. إيه اللي هيفضل مقعدني جمبك سنيتين بالمنظر ده... ده أنا كل أصحابي اتجوزوا!!!!

- (بيتسم برود...) مقعدك جمبي؟! أنتي سامعة أنتي بتتكلمي عن نفسك إزاي؟! مقعدك جمبي دي على أساس إنك عقار مثلا؟!

- (تُخفض رأسها...) مش قصدي... قصدي إنك رابطني جمبك!!!

- (نصف ابتسامة) لا... لا يا هند يا حبييتي... لا أنا مش رابطك جمبي... أنا مكذبتش عليك في حاجة من ساعة معرفتك... وظروفي زي ظروف أكثر من ثلاث أربع شباب بلدك... وبحاول.. وبسعى وبعافر وطلعان عين أهلي أدامك طول السنيتين اللي أنتي كنتي مربوطة فيهم جمبي زي ما بتقولي... أنا ما أجبرت كيش تبقي معايا... أنتي معايا باختيارك... عشان أنتي

مفروض إنك بنى آدمة حرة... أو على الأقل ده اللي أنا كنت فاهمه... (لحظات صمت... يُخفض رأسه... يبتسم ساخرًا) أنتي فعلاً ما بتحسيش... عايزة كل حاجة عالجاهز من غير ما تتعبي فيها ولا تشاركي حتى....

- (تُحدق به...) يعني هوه ده جزاتي بعد كل السنين دي... أسمع منك الكلمتين دول؟!

- (ابتسامة عريضة) السنين دي؟! (يعقد حاجبيه مبتسمًا) عملتي إيه أنتي طول السنين دي أصلاً؟! قوليلي كده عملتي إيه معلش؟! كل اللي كنت بخدوا منه.. شكوى واستعجال وصربعة وكل شوية تيجي ترميلك كلمتين عن صحبتك اللي اتجوزت مش عارف مين... واللي سافرت مع جوزها مش عارف فين... كل ده وأنا ساكت.. وبقول ماشي... بنت بردو ونفسها تتجوز... بس ده كل كلامك بقى كده... كل كلامك بقى تجريح في تجريح... (ينفعل) مع إنك شايفة... شايفة بعينيكي أنا بعمل إيه.. وبسف التراب إزاي... مفيش حاجة كان ممكن تتعمل معملتهاش...!!!

- (تصمت قليلاً... تُحدق به) لا كان فيه... كان ممكن تسافر يا فادي... كان ممكن تسافر زي ما الناس دي كلها سافرت... أنت اللي رفضت... وكان اللي اتعمل هنا في سنتين... اتعمل هناك في شهرين وثلاثة... بس أنت اللي رفضت....

- (يرفع حاجبًا بابتسامة استعجاب...) فعلاً... ده أنتي شايلة جواكي بقى ومعيبه....

- (تبعد نظرها...) ولا شايلة ولا أي حاجة... أنت سألت... وأنا جاوبت... كان فيه حاجة ممكن تعمل؟! آه كان فيه... (تنظر إليه...) كان ممكن تسافر....

- (بيتسم..) وأمى؟! أمى الغلبانة دي أسيبها لمين هنا بعد ما إخواني الاتنين سافروا؟! أسيبها لوحدها في السن ده وفي المرحلة دي من حياتها بعد ما عاشت عمرها كله لينا...؟! ما فكرتيش في دي طبعًا!! ولا عمرها جت على بالك!!!!

- (نصف ابتسامة...) ما إخوانك سافروا.. ما حدش فيهم فكر زيك ليه؟! وفي الآخر كلكوا بتساواوا... الي عمل زي الي ما عملش... أنت نفسك الي قايلي إنها بتعشق أخوك عمر... ولما بيجي من السفر ما بتخلهوش يفارق حضنها... وفي نفس الوقت... خناقاتها معاك مبتخلصش... يبقى إيه؟! كلامك المثالي ده ولعب دور البطولة مين المستفيد منه في الآخر؟! مين؟!!

- (لحظات صمت... بيتسم..) أنا!!!! أنا المستفيد... أنا الي مستفيد... لما بختار إني أقعد جمب أمى عشان أرهاها وهيه في السن ده... أبقى أنا المستفيد... عشان في الأول وفي الآخر دي أمى... جزمته على راسي من فوق... أنا بعامل ربي... ربي الي أكيد مطلع على نيتي وعلى كل حاجة أنا اتخليت عنها عشان خاطر الست الي جابتنى عالدينا دي وعملت مني بني آدم... فاهمة حاجة؟! وللا أنتي الكلام ده مبيدخلش دماغك أساسًا!!!!

- (تتنهد.. ثم تبتسم...) طلعتي أنا الي شيطان في الآخر... طلعتي أنا الي زبالة....

- (يُحرك رأسه بالنفي..) لا أنا مش بحاول أطلعك شيطان... أنا بحاول أثبتلك إنك فعلا ما بتحسيش... وما بتفكريش غير في نفسك وبس.... وبردو ما جاوبتنيش عملتي إيه أنتي طول السنين الي فاتوا دول؟! دورك كان إيه!!!!

- (تحرك يدها باستغراب..)، يعني إيه دوري كان إيه؟!

- أنتي متخرجة بقالك أربع سنين!!! مفكرتيش طول السنين دي
إنك تنزلي تشتغلي وتحققي نفسك وتشيلي من على أهلك
شوية... فكرتي؟! بذمتك فكرتي?!!

- (ترفع حاجبيها.. تبتسم ساخرةً) والله أنا أهلي عمرهم ما
اشتكوا من مصاريفي يا فادي بيه... ولا عمرهم حسسوني إني
ثقيلة عليهم!!!!

- مش لازم... أنتي حسي!! حسي بيهم.... بقى عندك سبعة
وعشرين سنة ولسه بتاخدي مصروف من أهلك... بذمتك
الموضوع ده مش بيضايقك... مش بيحز في نفسيتك?!

- (تأفف....) ماشي... وبعدين?!!

- وبعدين إيه؟! ردي على سؤالي!! ليه عمرك ما فكرتي تشتغلي
يا هند!!!!

- (تبتسم..) عشان عمري ما فكرت أشتغل... أنا مش ناقصني
حاجة عشان أشتغل يا فادي... أهلي مكفيني وبزيادة....

- ما نفسكيش تمسكي فلوسك بإيدك... فلوسك أنتي.. تعبك?!
مجهودك?!! ما نفسكيش تحسي إنك بتعملي حاجة حقيقية
غير الفضا الي أنتي عايشه فيه ده!!!

- (تبتسم باستهزاء...) ما أنت واخديني كده... وعجبتك كده...
دلوقتي بقيت كخة ووحشة?!!

- (يُحرك رأسه بالنفي...) لا يا هند... أنا فعلاً أخذتك كده.. بس
لو رجعتي بذاكرتك ثلاث سنين ورا.. أول ما عرفنا بعض وقبل
حتى ما نقرر إننا نرتبط... افتكري كنتي بقلق إيه على حوار
الشغل ده... لما كنتي بتقوليلي إنك متخانقة مع والدتك أو
والدك وقاطعين عنك الفلوس... أو لما كنت بكلمك وتقوليلي أنا

قاعدة زهقانة ومستنيه فلانة تخلص شغل عشان نازل.. أو فلانة ترجع من سفريتها عشان أقابلها... أو... أو... أو.... افتكري كنت بقلك إيه... كنت بقلك إنك لازم تشتغلي... مينفعش تحطي حياتك تحت شروط حد لمجرد إنه بيعولك ويصرف عليكي..... مينفعش تبقى حياتك عبارة عن شوية أحداث بتحصل لما الناس بتفضالك.... فين أنتي... فين قيمتك أنتي... حدودتك أنتي... افتكري كويس.... ده أنا كنت بهاتي معاكي في الموضوع ده... لحد ما حسيت إنك فعلا مش فارق معاكي... وفعلا ارتبطنا.. لأني كنت فاكِر إن الموضوع يخصك لوحدهك.... بس طلع إنه يخصنا إحنا الاتنين... ودي كانت غلطتي فعلا... فراغك وفضاكي ده أنا بدفع ثمنه معاكي دلوقتي.... انعدام إحساسك بالمسئولية وقد إيه الحياة صعبة ومحتاجة معافرة ومجهود... استخفافك بكل حاجة بعملها.... عشان عمرك ما جربتيها.... ده أنا بدفع ثمنه معاكي دلوقتي.....!!

- (تصمت قليلاً... تحقق به بنصف ابتسامة...) كل ده عشان تقولي إنك عاوزني أشتغل وأساعدك في مصاريف البيت... ده لو ربنا كتبنا جوازه أساساً!!

- (يُشعل سيجارة... يتسم هو الآخر... يضع يده على وجهه...) مفروض إنك كده جرحتي رجولتي بقى وإني أحس قد إيه أنا مش راجل..... صح!!?

- (تتلعثم...) مش قصدي بس...

- (يُقاطعها بنبرة هادئة...) لا قصدك... وعلى فكرة... (يتسم) ولا الهوا.. والله العظيم ولا الهوا... لو فاكِر إنك كده طعنيتني في رجولتي تبقى غلطانة يا عمري... أنا أمي الله يخليها لنا يا رب... كانت ست عاملة... إيدها بإيد أبويا من ساعة ما وعينا

إحنا الثلاثة عالديا... وعمره ما حس إن شغلها ده ينقص من رجولته ولا حتى بتقلل من احترامها ليه... بالعكس... كانت فرحانة بيه وبتحبه قد الدنيا وما فيها وأكثر... كان دايمًا يشجعها إنها تبقى أحسن... وتترقى... وتاخذ postion أفضل بمرتب أفضل... وعمره في حياته ما قرب من فلوسها ولا حتى سألها أنتي بتاخدي كام وكان ليها حساب منفصل في البنك..... وهيه كانت بتشارك في البيت على قد ما تقدر... بإرادتها... باختيارها... لأن أمي ست حرة... وأبويا كان فاهم النقطة دي كويس أوي... كان عارف إن الست اللي معاه دي... تسوى ثقلها ذهب... فضلت معاه في حلوه ومره... حتى في أشد الأزمات رفضت تتخلي عنه... مع إنها كانت ممكن جدا في أي وقت إنها تمشي... بس فضلت... وكملت... وشالهالها طول العمر... ربتله عياله أحسن تربية... طلعت ثلاث شباب زي الفل... كانت بتاخده في حضنها بالليل أدامنا بعد ما يرجع من الشغل تبوس راسه وتقله إنه أحسن راجل في الدنيا كلها وإنها عارفة قد إيه بيتعب عشانا... كان بيوقف معاه في المطبخ إيده في إيدها في كل حاجة... كان بيعاقبنا أشد عقاب لو واحد فينا على صوته عليها... كان دايمًا بيقلنا إن الست دي مفيش زيها اتنين.. وإنها نعمة ربنا عالييت كله... حاجة كده تشرف... عشان كده بعد ما اتوفي... أمي حزنت عليه حزن... عمري ما شفته قبل كده في حياتي.... اتكسرت بعده... لأنه مكنش بس جوزها أبو عيالها اللي بيصرف وبيعيشها صح... لا... كان شريك عمرها اللي بيفرح بنجاحها ونيسها وصاحبها..... فاهمة حاجة يا حاجة من الكلام ده؟! ولا طلاسّم بالنسبالك...!!

- (بصوت منخفض...) واللّه يا حبيبي أنا مكنش قصدي.. أنت فهمت كلامي غلط... أنا كل اللي كنت أ...

- (يُقاطعها.... بابتسامةٍ...) عارفة أنا حاسس بإيه دلوقتي!!

- (تحقق به...)

- (يُحرك كتفه باللامبالاة) حاسس إني معرفكيش.... مش حاسس

بحاجة نحيتك.... حاسس إني مش عاوزك يا هند.... (يشير بيده)

كلك كده على بعضك.... أنا فعلا مش عاوزك....

- (تتسمر أمامه دون حراك... دون كلمة.....).

- (لحظات صمت.. يكتفي بالابتسامة وتحريك رأسه بالنفي... ثم)

أنا آسف على السننتين اللي ربطك فيهم جمبي يا ست الكل...

أنا آسف إني ضيعت وقتك ووقتي في علاقة غير متكافأة زي

دي.... أنا آسف إني كنت بتجاوز كل اختلاف جوهرى كان ما

بيننا باسم الحب.... أنا آسف على إني كنت بستحمل إهاناتك

وضغطك على أعصابي طول الفترة دي... أنا آسف إني خليتك

تتيمينى كل يوم وأنا شايل هم فوق طاقتي لمجرد إحساسى إني

مقصر وإني لازم أعمل أكثر وربنا وحده عالم أنا كنت بعمل إيه

وعايش إزاي وحارم نفسى من إيه.... أنا آسف إني ما قلتليش

روحي لحال سبيلك مع أول مرة جتيلي فيها تقوليلى إن متقدملك

عريس وكلامك كان زي السم.... أنا آسف إني مفهمتش إن الحب

ليه ناسه... وإن بنت الأصول مش لازم تبقى خريجة الـ GUC

ولا إنها تبقى حلوة وزى القمر وساكنة فى الكومباوند الفلانى....

آسف إني اتخدعت فيكى... أنا آسف إني حتى بعد ما حسيت

وفهمت واتأكدت كنت بأوح... وأصريت إني أكمل.... أنا آسف من

كل قلبى على سنتين عدوا معاكي محستش فيهم لا بحنيتك عليه

ولا بخوفك ولا بقلقك عليه وأنا صحتي كل يوم فى النازل ووزني

نزل النص.... أنا آسف... والله العظيم أنا آسف....

- (بعينين غارقتين بالدموع.... وصوت باك...) فادى أنا....

- (يرتب على يدها بحنان.....) قومي عشان أوصلك....
- (بصوت باك.....) فادي.... أنا بحبك... والله العظيم بحبك.....
- (يمسح دموعها بيديه بحنان....) متعيطيش... صدقيني بكره هتحمدي ربنا إننا مكملناش يا هند..... بكره هتتأكدي وتعرفي إننا مش لبعض..... وإن الحب عمره ما كان هيكفي عشان نكمل.....
- (بصوت متقطع....) يعني إيه؟!!!! خلاص!!! كده خلاص.....!؟
- (بيتسم لها....) ألف مبروك عالعريس.....

ماذا لو؟!

الساعة السابعة مساء... "تاك... تاك... تاك"... يطرق باب منزل "حسام".. يتجه نصف عاري ليقوم بفتح الباب... وها هو صديقه "معتز".. يقف بابتسامة بلهاء أمام الباب وفي يده سيجارة يقوم بطفيها أمام عتبات منزل "حسام"....

- (يتنهد...) قلتك ميت مرة متعملش الحركة القذرة دي...!!

ثم يتجه إلى الداخل....

- (نصف ابتسامة.. يُحدق بعقب سيجارته أمام منزل حسام... ثم يتجه إلى الداخل ويغلق الباب....) أنت لسه ملبستش!؟

- (ينتشل قميصا أسود من على الأريكة... يرتديه...مغلقا أزراره... نصف ابتسامة.. دون أن ينظر إليه....) لا لسه... لسه هحط
....make up

- (بيتسم بابتسامة عريضة... ثم يتجه إلى الشرفة....) طب انجز....

وبعد مرور عشر دقائق... يتجه حسام إلى الشرفة حيث يقوم "معتز" بتدخين سيجار كوبي... يبدو شاردا....

- (يضع يده على كتفه...) يلا؟! (يهتز....) كان شاردا حقا.... يحدق
(به....)

- (يعقد حاجبيه....)
- (يتنهد.....يطفىئ سيجاره في حائط الشرفة..) يلا بينا.....
- (بانفعال) يا ابني!!! يا ابني!!!!.... ما فيه زفت طفاية أهو!!!
ليه القذارة دي!!! ده أنا حاططك أنت بالذات طفاية في كل
ركن في البيت!!!!
- (نصف ابتسامة.... يضع المتبقي من السيجار في العلبه...) وسخ
بقى.. هتعمل إيه..... (ثم يتجه إلى الخارج يلتقط مفاتيح
سيارته من على المنضدة)
- (يتجه خلفه..... يطفىئ أنوار المنزل....)
- وأمام باب المنزل.... يقف "معتز" متسمرا.... يحدق بـ "حسام"....
بقلق إيه!?
- (يقوم بفتح الباب للخروج.... دون أن ينظر إليه...) إيه!?
- (صمت قليل....) أنا مش عاوز أنزل.....
- (ممسكا بقبضة الباب...) أهو الجنان اشتغل أهو.....
- (يحرك رأسه بالنفي.....) مش عارف.... مش حاسس إني عاوز
أنزل... مش طالبة معايا أشوف حد.....
- طب والناس اللي مستنينا دول!!؟ مش أنت يا ابني اللي مرتب
الخروجة دي أصلا!?!?
- (يتنهد....) عارف إني اللي مرتب الزفتة دي....
- (لا زال ممسكا بقبضة الباب...) آمال إيه بقى!?
- (صمت قليل...) خلاص خلاص... أنا هوصلك ليهم.. هدخل
أسلم عليهم وأعتذرلهم... وأمشي.... هقلهم أي حاجة بقى...
ظرف.. بتاع.. أي حاجة...

- (نصف ابتسامة...) لا والله!؟
- (يتنهد... يقوم بفتح الباب...) يلا بس.....
- (يقوم بغلق الباب بقوة.....) أنت أهبل يلا!؟!!
- حسام... من الآخر... أنا مش هقعّد مع حد... آه.. أنا اللي مرتب الخروجة دي وكل حاجة.. بس الكلام ده كان من أسبوع... أنا النهاردة مش طالبة معايا خالص إني أشوف حد ولا أكلم حد.....
- ومعتذرتش للناس ليه قبل ما يتجمعوا!؟
- معرفش بقى.... كنت فاكر إني هبقى أحسن على بالليل....
- (يتنهد... ينظر بعيدا.....) طب ادخل.....
- أدخل فين!؟
- (يحدق به بجحوظ عينيه....) ادخل....!! مش راحين في حتة!!!
- (ثم يقوم بفتح أنوار المنزل.....)....
- (يحدق به....)
- (يتجه إلى داخل الصالة... دون أن ينظر له...) خلاص خليك واقف مكانك...
- (يتجه إليه.... يجلس على الأريكة... يشعل سيجارة....)
- (يجلس حسام أمامه...) عارف أحسن حاجة فيك إيه!؟
- (بيتسم ابتسامة عريضة.. ينفث دخانه....)
- (يحرك رأسه بالإيجاب....) بالظبط كده... إنك معندكش دم...
- (يحرك رأسه بالإيجاب مبتسما هو الآخر...) ده حقيقي.. بسمعتها كتير الكلمة دي....

- طب اتصل بالناس اعتذرلهم.....
- اتصل أنت بيهم....
- (يجحظ بعينيه... يتأفف... يحمل هاتفه... يقف متجها للشرفة..
وفي منتصف المسافة...) لا أنت فعلا معندكش دم...
- (يحرك يديه باللامبالاة.....)
- وبعد مرور دقيقتين... يقف حسام على باب الشرفة...
- تعالى نقعد في البلكونة... الجو حلو أوي....
- (يتجه إلى الشرفة...)
- وبعد مرور دقيقة من الصمت....
- مش هتتكلم؟!!
- عن إيه؟!!
- عن اللي مضايقك؟!!
- (يحرك يده باللامبالاة.....)
- لا!! ما هو أنا مش سايب الناس والمزز الي معاهم ومضحى
بال weekend عشان معاليك تفضل قاعدلي كده زي قرد قاطع...
اتكلم!!!
- مش مضايق.... هبطان كده ومليش مزاج أعمل حاجة بس
مش أكثر.....
- (يحرك رأسه بالإيجاب...) هبطااااان... قولتلي..... (يتنهد...)
طب أنا هعمل فنجانين قهوة وأجيلك.... (ثم يهم بمغادرة
الشرفة....)
- (بصوت منخفض...) شاي....

- (يعود له... إيه؟!)
- شاي.. شاي... عاوز شاي.....
- (بلكنة استهتار....) موجود يا حبيبي... عندي شاي...
- (بيتسم له بلؤم...) طب عندك شاي بالخوخ؟! لبيتون؟!
- لا... عندي شاي معندوش دم.... تشرب؟!
- (بيتسم مبعدا نظره....) لا لا... خلاص شاي عادي.....
- (يغادر الشرفة....) ثم يعود بعد عشر ثوان... يصفعه على رأسه بقوة.. ثم يغادر مجددا.....)
- (بيتسم..... يتمتم...) طب والله لمالك البلكونة سجائر يا معقد يا ابن الجزمة....
- وبعد مرور خمس دقائق..... يعود حاملا فنجان القهوة وكوب الشاي....
- تلفونك....
- (يعقد حاجبيه....) ماله!!!?
- بيرن بقاله كتير برة....
- مين؟!
- (يحرك كتفيه باللامبالاة...) معرفش... واحدة اسمها توتا باين....
- (يعقد حاجبيه...) توتا؟!!!!
- (بيتسم...) نسيت طبعا مين توتا دي....
- والله يا ابني ما فاكر..... (يتجه للخارج... يحضر هاتفه.. ثم يعود)
- مين توتا دي بقى؟!

- بحاول أفكر أهو.....
- (بيتسم.... يرتشف قهوته) لا.. ده أنت ضايح....
- ولا ضايح ولا نيلة... ما هية لو حد مهم كنت افكرتها.....
- (يحرك رأسه باللامبالاة...) صدقني.. توتا دي أيا كانت هية مين.. لو فاهمة أنك بتتكلم عنها بالطريقة دي... مكنتش عبرتك أساسا.....
- (ممسكا بكوب الشاي...) صدقني أنت... فيه ستات معندهاش كرامة... بيتعمل معاها أكثر من كده بكتير أوي.... وبردو مبتفهمش... ولا بتحس....
- (يحدق به بغیظ شديد....)
- (يرن هاتف "معتز" مرة أخرى..... يغمز له....)
- ألو؟!
- أيوة مين؟!
- مين إيه؟! أنا فاطمة يا معتز!!
- فاطمة مين؟!
- (صمت قليل....) فاطمة!!
- أيوه.... فاطمة مين معلش مش واخذ بالي؟!
- فاطمة..... فاطمة.....
- (بنبرة حقيرة) أنا كده عرفتك مثلا؟! ما تخلصي قولي أنتي مين.....!!!!
- تصدق بالله... أنت فعلا واحد.....

ينهي المكالمة..... قبل أن تكمل عبارتها..... يحدق به صديقه
”حسام“..

- إيه يا ابني الأرف الي أنت بتعمله ده...؟! حد يكلم واحدة
كده؟!

- هوه أنا عارف مين دي أساسا عشان أكلها كده ولا مكلمهاش
كده!!!

- لاء... من الواضح إنك عارفها.... وأكبر دليل إن رقمها متسجل
عندك وبدلح كمان.... مش فاكرها دي قصة تانية خالص....
وعامة أيا كانت دي مين مينفعش تتكلم معاها كده.... دي
بنت.... واحدة بنت....

- (نصف ابتسامة...) إيه بنت يعني مش فاهمك؟! متتهزق
عادي... مش بني آدم....

- (يتنهد بغضب....) طب اخرس بقى... عشان كلامك مؤرف....

- (يرن هاتفه مجددا.... توتانا....) قابل يا عم... أهي بتتصل تاني....

- هات التلفون لو سمحت.... أنا هرد....

- (يناوله الهاتف بابتسامة استهزاء...) يا حنين.....

يقوم ”حسام“ بالإجابة على هاتفه....

- أنت واحد....

- (يقاطعها...) يا فندم أنا مش معتز....

- (صمت قليل...) ألو....

- أيوه يا فندم.... أنا حسام صاحب معتز....

- فين معتز؟!

- معتز مش في mood يسمح له يرد على حد... أؤمريني... أي حاجة ممكن أوصلها لو بإمكانني أساعدك.....
- (صمت قليل..... تتنهد.... بنبرة شبه باكية.....) آه قوله..... قوله حسبي الله ونعم الوكيل فيك.....
- طب...
- تقوم "فاطمة" بإنهاء المكالمة.....
- يحدق به..... نظرات حادة.....
- مالك يا ابني في إيه؟! عاوزة إيه؟! (يحدق بالهاتف... هيفرق معاك!!!)
- (يعقد حاجبها مبتسما.....) يمكن!!
- (بيتسم له بهدوء.....) طيب..... بتقلك حسبي الله ونعم الوكيل فيك....
- (يحدق به.....) ومالك متأثر أوي كده؟
- مين دي؟! مين دي يا معتز!!!
- (يحرك كتفيه باللامبالاة....) حقيقي مش فاكرك.....
- مش فاكرك!!!! واحدة قلبها مقهور وبتقلك حسبي الله ونعم الوكيل فيك من قلبها.... وبتقولي مش فاكرك.....!!! (نصف ابتسامة) ده إزاي يعني؟! (بيتسم له..... يتنهد بسخونة.... يرتشف الشاي... ناظرا للسماء....)
- (يحرك رأسه بالإيجاب....) طيب... أنا جوة.....
- (ولم يلتفت.....)

وبعد مرور "نصف ساعة"... يغادر "معتز" الشرفة... ليجد "حسام" يجلس باسترخاء على الأريكة ويشاهد إحدى مباريات "كرة القدم" التي يعاد بثها... يجلس بجواره... يقوم بخفض صوت التلفاز..... يتملقه الآخر بنظرات غير مفهومة.....

- (يشعل "معتز" سيجارة...) توتا دي واحدة عرفتها من شهرين تقريبا... شفتها أول مرة مع واحدة صحبتي... وعجبني شكلها... أخذت رقمها واتكلمنا فترة مش فاكر قد إيه الحقيقة على whatsapp بس مكنتش فترة طويلة أبدا... بعد كده اتقابلنا مرة واحدة بس... عزمته على العشا.. وفضلنا نرغي شوية... وبعد كده وصلتها البيت..... قبل ما أنزلها... قالتلي إنها بتحبني..... ف.....(صمت قليل.....) بوستها....

- (يعقد حاجبيه) بوستها!!!

- (يحرك رأسه بالإيجاب...) آه.. حضنتها وبوستها.....

- يعني حتى مردتش عليها؟! بوستها كده وخلص!!!

- لا... مردتش عليها.. بوستها وخلص... ونزلت من العربية....

- (يتنهد بغضب شديد..... يعتدل في جلسته....) طب خيليني بقى أقلك الباقي... نزلت من العربية... وقلبها طائر من الفرحة.... ومش بعيد تكون أول بوسة ولمسة في حياتها أساسا... كلمتك طبعا... فمردتش عليها.... وفضلت تكلمك على مدار فترة معرفش هيه قد إيه الصراحة بردو... بس أنت طبعا مكنتش بترد... وطبعا عملتها بلوك من كل حته... وهيه أصلا مش فاهمة في إيه... ولا ليه أنت بتعمل كده..... واختفت من حياتك.... ولا كأنك عملت أي حاجة.....

- (بيتسم....) هيه في واحدة محترمة تقول لواحد إنها بتحبه في أول مرة يخرجوا فيها؟!!!! ده إيه ده؟! (نصف ابتسامة...) ده اسمه إيه؟!!

- (يجحظ بعينه.... بيتسم بهدوء..) آه فيه... وفيه كثير كمان.... وفيه ناس بتحب ناس عمرها ما شافتها... وفي ناس مبيكنش قصدها الكلمة دي أساسا... بتبقى محتاجة تقولها... لأي حد... أي حد... في ناس نفسها تحس إنها بتحب... في ناس محرومة من الحب.... محرومة من الحب بشكل مخيف... فأه فيه... وبعدين تعالي هنا معلش.. إيه علاقة إنها قالتلك إنها بتحبك بإنك تقول عنها مش محترمة؟! حتى لو من أول نظرة مش من أول خروجة؟!!! يعني البنت قالتلك إنها بتحبك... فأنت كونت نظرية إنها سهلة مثلا ورخيصة وقررت إنك تبوسها وتحضنها... وبعد كده تقلبها؟! أنت مريض يا ابني؟!!! مش فاهمك الحقيقة..... (يحرك رأسه بالنفي...) ولا عاوز أفهمك.....
- يعني دلوقتي....

- (يقاطعه.... محركا رأسه بالنفي....) أنت سمعت صوتها وهيه بتعيط طيب؟! سمعت صوتها وهيه بتتحسن عليك من قلبها؟! عارف وجعها ده وجع إيه؟! ده مش وجع قلب..... ده وجع كرامة.... (يتنهد.... يحدق به... صمت قليل..... بيتسم له.....) ولا فارق معاك طبعا.... ولا أنت هنا....

- (يشعل سيجارة.....) مش عارف.....
- (نصف ابتسامة... يحرك رأسه بالنفي... يعتدل في جلسته مجددا... يقوم برفع صوت التلفاز مرة أخرى.....)

- (يحدق به قليلا.... ثم يتجه إلى الشرفة مجددا..... يضع سماعات الهاتف... يستمع إلى الموسيقى.... يرفع صوت الموسيقى لتعزله تماما عن العالم.... ويدخن المزيد من السجائر.....)
- نصف ساعة.... الوضع هادئ للغاية.... إلى أن طرق باب المنزل.... يتجه "حسام" ليقوم بفتح الباب... وإذا بها صديقته "هلا"...
- (يبتسم لها....)
- (تبتسم له....) مش هدخل طيب؟!
- (ينظر إلى الداخل....) عندي واحد صحي.....
- (تقوم بدفع الباب.... تقتحم خلوة المنزل.... تسبقه إلى الأريكة) وإيه يعني...
- (يتمتم....) على رأيك... وإيه يعني....
- (يجلس بجوارها.... تقوم هي بإشعال سيجارة....) عندك إيه يتشرب؟!
- (دون أن ينظر لها....) المطبخ كله تحت أمر معاليكي... قومي شوفي عاوزه تشربي إيه.....
- (تقف... متجهة إلى المطبخ....) تشرب حاجة؟!
- (يتنهد....) آه... اعميلي فنجان قهوة.... بس زودي البن.... عاوزه فنجان محترم..... (يغمز لها....) زيك كده بالظبط.....
- (تمتمة بابتسامة....) ماشي ياخويا....
- تتجه "هلا" إلى المطبخ.... دقيقتين... يخرج "معتز" من الشرفة.... يلاحظ وجود رائحة عطر نسائي قوي.... وحقيبة يد على الأريكة....
- (يعقد حاجبيه....) هو فيه حد هنا!!!
- (يحرك رأسه بالإيجاب....) واحدة صحبتي....

- (بيتسم... هيه فين؟!)
- (يحدق به شذرا...) في المطبخ..... بتعمل قهوة....
- (يتجه إلى المطبخ.....) طب....
- (يمسكه من ذراعه.....) اترزع اقعد هنا.....
- (يجلس بجواره.....) حلوة طيب؟!
- (يحدق به دون إجابة.....)
- (يحرك يده باللامبالاة.....)
- آه حلوة..... وبنت ناس.... ومش شمال..... ومتقربش منها....
- (نصف ابتسامة...) مش شمال؟!!! آمال بتهبب إيه عندك في البيت!!! إيه يا جدعان؟! إحنا في نيويورك وأنا معرفش واللا إيه؟!!!
- لا إحنا مش في نيويورك..... إحنا في بيتي.... وفي بيتي قوانيني وأفكاري هيه اللي بتمشي على كل اللي فيه..... والبنت دي تبغي يا "معتز"... يعني حسك عينك تقرب منها ولا تنذيهها حتى بكلمة ولا بنظرة.....
- (يجحظ بعينه.....) أمشي؟!!! تحب أمشي حضرتك?!!!
- (يتنهد.....) لا متمشيش..... بس لو سمحت متقربش منها... البنت فعلا كويسة جدا ومحترمة.... بغض النظر عن الفكر اللي في راسك.... واللي مستحيل يتغير في يوم من الأيام..... بس البنت فعلا كويسة..... فلو سمحت....
- (يقاطعه....) مقربش منها... فهمت.... وبعدين أنت ليه بتكلمني على أساس إني ذئب بشري مثلا.... في إيه ياعم.....

هنا... تطل "هلا" بفنجان قهوة..... فتاة ثلاثينية.... شعرها طويل
مجعد كثيف داكن... طولها فارغ.... ملامحها توحى بالقوة.... نمش
قليل على وجنتيها..... لا تضع أي مساحيق تجميل..... فستان زهري
طويل.... بحملات... شال أبيض رقيق..... وابتسامة... ابتسامة
جميلة.....

- (تبتسم) مساء الخير.....

- (يبتسم لها معتز.....) مساء النور.....

- (تضع فنجان القهوة على المنضدة... ثم تمد يدها له بالسلام.....)
أنا هلا....

- (يقف لها.... يقترب منها قليلا.... يمد يده للسلام) وأنا معتز.....

- (يقف حسام.... يمسكها من يدها.... لتجلس بجواره.....) أهلا
وسهلا... اتفضلوا..... اتفضلوا.....

- (تنظر لمعتز...) أنا آسفة لو كنت جيت في وقت مش مناسب....
(تنظر لحسام...) بس البيه كان واحشني جدا.... وكان لازم أشوفه
قبل ما أسافر....

- (حسام.. يعقد حاجبيه....) مسافرة فين؟!!!!!!

- (تبتسم له بحنان.....) هرجع لندن..... قرار نهائي....

- (يجحظ بعينه.....) خلاص!!!!

- (تحرك رأسها بالإيجاب.....) تبتسم... خلاص.....

- (يحدق بها حسام... يتنهد.... يحرك رأسه بالإيجاب... يبتسم
لها....)

- (تربت هي على يده بحنان.....)

- (هنا يراقب "معتز" هذا المشهد بترقب... يبدو أن العلاقة بينهما وثيقة للغاية... يبدو أنها صديقته بالفعل.....)
- (تعقد "هلا" حاجبيها مبتسمة لـ "معتز" بعد أن لاحظت على وجهه ملامح الدهشة.....) مالك!!!
- (يشعر بالإحراج... يحرك رأسه بالنفي مبتسماً.....)
- (يبتسم "حسام" ابتسامة عريضة.....) تشرب قهوة!!
- (يبتسم هو الآخر.....) أشرب قهوة....
- (يناوله فنجانته التي قامت بتحضيره "هلا"....) خد ده... أنا هقوم أعمل فنجان تاني.... (ثم يتجه إلى المطبخ.....)
- (دقيقة صمت... ثم تقرر "هلا" كسر ذلك الصمت....)
- (مبتسمة...) صحاب بقالكوا كثير!؟
- (قصدك حسام!؟)
- (تحرك رأسها بالإيجاب.....)
- (بابتسامة لطف...) آه... عشر سنين تقريبا...
- (رافعة حاجبيها...) فعلا!؟ أول مرة أشوفك..... مع إني تقريبا عارفة معظم صحابه.... المقربين على الأقل.....
- (ما زال محتفظا بابتسامته.....) يعني... تقدري تقولي صداقتنا غريبة شوية..... مختلفين جدا... في كل حاجة تقريبا... بس فيه حاجة رابطانا... مش عارف إيه هيه الحقيقة... بس كل اللي أعرفه إني بحبه جدا... ومقدرش أستغنى عنه... مش بشوفه كثير..... بس ليه مكانة خاصة في قلبي.....
- (تبتسم له.....) نضيف...
- (يعقد حاجبيه...) نعم!؟

- (تحرك رأسها بالإيجاب....) نضيف... حسام حد نضيف... قلبه نضيف... عقله نضيف.... مريح.... مريح جدا.... صعب إنك تقابل حد نضيف وتستغنى عنه.....
- (بيتسم... يشعل سيجارة....بنبرة هادئة....) ده حقيقي....
- هنا يطل "حسام" مرة أخرى... حاملا فنجان قهوته الخاص....
- (يحمل "معتز" فنجان قهوته.... متجها إلى الشرفة....) طب أنا هأقف برة شوية في البلكونة..... (ثم يغادر....)
- (يجلس "حسام" بجوار "هلا" يرتشف قهوته....)
- ماله؟!؟
- (دون أن ينظر لها....) معتز!؟
- (تنظر له دون إجابة...) شكله مضايق أوي.....
- (يحرك رأسه بالنفي....) ولا أعرف.... حاولت أفهم.... حرقلي دمي عالفاضي.....
- طب..... (صمت...)
- (بيتسم لها....) ممكن تتكلمي معاه عادي.....
- (تبتسم له هي الأخرى.... تربت على كتفه بحنان ثم تتجه إلى الشرفة... حيث "معتز"....)
- (تقف بجواره في الشرفة..... تبتسم له.... بيتسم لها هو الآخر.... ثم ينفث دخانه بعيدا عنها.....)
- شكلك.... مضايق أوي.... مالك!؟
- (يحرك رأسه بالنفي....) مفيش حاجة....
- (تبتسم له....) على فكرة... أنا لا أعرفك ولا أنت تعرفني... وثلاثة أيام بالظبط وهسافر وغالبا مش هرجع تاني هنا أبدا....

فدي فرصة كويسة جدا إنك تفضفض مع حد متعرفوش وغالبا
عمرک ما هتشوفه تاني....

- (صمت قليل... يحدق بها دون حديث....)

- (تعقد حاجبيها مبتسمة....) يا ماما....

- ممكن أسألك سؤال؟!

- أكيد....

- أنتي بتعملي إيه هنا؟! في شقة راجل غريب... مع واحد صحبه
بالليل!!!?

- (ترفع حاجبيها....) أنت شايفني بعمل إيه!!?

- (يتنهد.... ثم يدير وجهه بعيدا.... ينفث دخان سجارته....)

- (تحرك رأسها بالإيجاب.. صمت قليل.... بنبرة استياء) عامة... أنا

زي ما أنت شايف طبعاً بعينك الاتنين... مبعملش حاجة غير
إني واقفة معاك في البلكونة بنتكلم... والطبيعي إنك لو مش

موجود... كان زمني قاعدة مع "حسام" بنتكلم عادي زي البني
آدمين..... البني آدمين... مش الحيوانات..... (ثم تغادر

الشرفة... وتتجه إلى الصالة..... حيث حسام)

- (يلاحظ حسام استياءها..... يعقد حاجبيه....) مالك؟!!!!!! عملك

حاجة!!?

- (تحرك رأسها بالنفي.... تبتسم) لا لا.... خالص.... بس هوه فعلا

شكله مضايق وشكله عاوز يعد لوحده.....

عشر دقائق... يتناولان أطراف الحديث.... نصف ساعة....

فالساعة... وبعدها... يطل "معتز" مرة أخرى عليهما.... يجلس

أمامهما.....

- (يوجه كلامه لحسام.....) بقلك إيه... أنا هبات عندك النهاردة....
- ما تبات... من إمته وأنت بتستأذن....!!
- لا أنا بقلك بس.....
- (يعقد حاجبيه...) يا أخي أنت بقيت حد مريب غريب عجيب.....
- (يحرك يديه باللامبالاة.... يقف مغادراً إلى المطبخ....) أنا هقوم أشوف حاجة أكلها.....
- طب ما تخليك حلو كده وتجهز لنا عشا لينا كلنا.....
- (هنا تنظر له "هلا".....) أنا هقوم أساعدك.....
- (ينظر لها "معتز"....) طيب.....
- وفي المطبخ.... تقوم هي بإعداد طبق من البيض... ويقوم هو بتحضير طبق سلطة كبير.... بعد صمت قليل.....
- (دون أن ينظر لها.....) أنا آسف.....
- (دون أن تنظر له.....) لا عادي... شفت عقليات زيك كثير....
- تقدر تقول إن ده العادي أساساً.... الموضوع مبقاش يضايق ولا يزعل.... عادي.....
- (صمت قليل....) بس أنا مش هغير موقفني... وجودك هنا دلوقتي معنا إحنا الاتنين... غلط.... وعيب.....
- (تبتسم دون أن تنظر إليه.....) مع احترامي الكامل ليك... مش فاكرة إني طلبت منك إنك تغير موقفك... ولا فاكرة إني طلبت أعرف رأيك فيه من الأساس.... كل اللي حصل إني شفتك مضايق.... حاولت أتكلم معاك.... من باب الإنسانية مش أكثر.....

- أفكارك وانطباعاتك دي حاجة تخصك... بس مش من حقك إنك
تفرضها على حد..... بالذات لو الحد ده أنت متعرفوش....
- (بيتسم ابتسامة عريضة..... دون أن ينظر إليها هو الآخر) عنيفة
أنتي أوي يا "هلا...."....
- (صمت قليل....) أنا خلصت طبق البيض.... تحبوا تاكلوا إيه تاني؟!
مش عارف..... فيه إيه تاني في التلاجة؟!
- (تقوم بفتح باب التلاجة...) جبن وزبادي... و...
- (يقاطعها...) فيه فول؟!
- (تُمعن النظر....) فيه فول....
- طب اظطلنا واحد فول بقى الله يكرمك.....
- (تقوم بتجهيز علبة الفول... تضعها على النار.....)
- لمون كثير....
- (لا إجابة.....)
- وكمون..... كمون كثير.....
- (تلتفت له..... بنبرة حادة) ما تيجي تعمله أنت أحسن؟!!!!
- (بيتسم لها بلؤم....) مش بقلك.... عنيفة أوي....
- (تكمل ما قد بدأته..... محركة رأسها بالنفي.....)
وبعد مرور عشر دقائق.....
- الأكل جاهز....
- والسلطة جاهزة...
- (تبتسم ابتسامة لثيمة حاملة الأطباق إلى الخارج.....) تعبت
أنت أوي في طبق السلطة ده.....

وعلى طاولة الطعام.....

- ("معتز" يقوم بتوجيه الحديث إلى "هلا") بس أكلك حلو يا هلا....

- (دون أن تنظر إليه....) Thank you

- ("حسام" يقوم بتوجيه الحديث إلى "معتز") تلفونك رن كثير.....

- ("معتز" يعقد حاجبيه....) مين؟!!

- (ينظر له شذرا بجدة.....)

- آه..... طيب.....

- ("حسام" يحرك رأسه بالنفي.....)

- (بيتسم....) مردتش ليه؟!!

- وأرد ليه?!!

- يعني.... حنين بقى وكده.....

- (نصف ابتسامة من حسام....) الله يهديك.....

- (ساخرًا) ويهديك يا أخ حسام.....

- (هنا تنهد "هلا".....) بصوا... أنا مش فاهمة حاجة عامة...

بس من الواضح إن الموضوع مش لطيف... فيا تتكلموا فيه

عدل زي العام والناس... يا تسيبونا ناكل في سلام.....!!

- (بيتسم "معتز" غامزا لـ "حسام"....) عنيفة أوي.....

هنا يدق هاتف "معتز" مرة أخرى..... يحدق هو بالهاتف.....

ثم يوجه حديثه لهلا....

- ممكن أطلب منك طلب!!!?

- (تحرك رأسها بالإيجاب....) yeah..sure

- ممكن تردي عالتلفون!!؟
- (هنا تجحظ عين حسام....) مدخلهاش في حواراتك!!!
- (تربت على كتف حسام بحنان....) no no .. its okay
- ("حسام" يوجه كلامه لـ "هلا") يا بنتي لا... دي ضحية من ضحايا البيه.. وصوتها الواحده هيوجعلك قلبك أساسا... فبلاش!!!
- (تحديق "بمعتز" الذي يبدو مستاء للغاية.... تتنهده...) أنا مسموخلي أقلها أي حاجة.... صح!؟
- (بيتسم لها.... يحرك رأسه بالإيجاب... يبدو مسالما....) اللي أنتي عاوزاه اعمليه.....
- تقوم بأخذ الهاتف وتتجه إلى الشرفة.....
- ألو....
- (صمت قليل....) مين معايا؟!!!!!!!!
- مساء الخير...
- (بنبرة غاضبة....) مين معايا؟!!!!!!!!
- ممكن تهدي شوية بس... أنا هقلك كل حاجة.... بس إهدي شوية لو سمحتي.....
- (صمت.....)
- تمام..... أنا واحدة متعرفيهاش ولا أنا أعرفك الحقيقة.... وحققيقي صدقيني معرفش صاحب الرقم ده ولسه مقبلاه من ساعة تقريبا.... وهو اللي طلب مني إني أرد عليكى.....
- طب..... ممكن تدهوني.....
- (بحنان....) اسمك إيه!؟

- (صمت.....)
- طيب..... أنا شايفة اسم "توتا" قدامي... فهناديكي بيه لحد ما
تقرري تقوليلى على اسمك..... تمام?!

-
- طيب... بصي يا توتا..... أنا فعلا معرفش "معتز" ده.... ولسه
شايفاه من ساعة في بيت واحد صحبه.... وللأمانة يعني.... بيني
وبينك.... معتقدش إن الشخصية اللي قاعدة قدامي دي تستاهل
كل اللي أنتي بتعمليه في نفسك ده.... طبعا أنا معنديش خلفية
عن طبيعة الموضوع ما بينكم... بس من الواضح برده إنه مش
فارق معاه... ومعتقدش إنه فاكرك أساسًا..... يعني أنتي الطرف
الوحيد غير المستفيد من الموضوع... حرقه دمك دي محدش
حاسس بيها غيرك..... وهرجع وأقلك تاني... من باب خبرتي في
الحياة... أي نعم أنا معرفش الراجل... ومليش إني أحكم عليه
من أول قعدة.... بس ده من النوع اللي مفقود فيه الأمل.....
خسارة أي وقت يضيع عليه.....

- فاطمة....

- نعم?!

- فاطمة.... اسمي فاطمة.....

- عاشت الأسمي يا ست البنات..... وأنا "هلا" يا فاطمة...

- (بتبسم...) عارفة... قوليلي....

- بس يا ستي... وآدي كل الموضوع باختصار وببساطة... اقلني
عالصفحة دي.... لا، تقفلي إيه.... قطعها... احرقها.... امسحي
رقمه وأي حاجة تربطك بيه أول ما تقفلي معايا... ادخلي خدي
shower سخن كده.... واعمليلك كوباية سحلب والا حاجة....

واقعدي اتفرجي على فيلم كوميدي واللا رعب حتى.....
هتصحي الصبح هتلاقي نفسك زي الفل..... وشدي على نفسك
كده.... مش أي حاجة تجيبك أرض.....

- (صمت.....)

- وعاوزه أفلك على حاجة كمان..... قبل ما تقفلي... نصيحة غالية....

-

- إوعي... إوعي..... إوعي تدي... من غير ما تاخدي... تاخدي
وتشبعي... وبعد كده تبدئي تدي.....

- (تبتسم.....صوتها يبدو أكثر راحة.....) تمام.....

- تصبحي على خير....

- وأنتي من أهل الخير يا "هلا".....

تتهي المكالمة..... تحدق قليلا بالهاتف..... تتساءل عن مدى
سوء الوضع لدى "فاطمة".... وعن أي نوع من الجرح قد سببه لها
هذا الأبله.... (تتنهد).... تلتفت.... لتجده أمامها... يقف على عتبات
الشرفة..... يحدق بها.....

- واقف بقالك كثير؟!

- (يحرك رأسه بالإيجاب.....) آه... من ساعة ما كنت شخصية ما
تستاهلش اللي هيه بتعمله ده.....

- (تناوله الهاتف.... تبتسم.....) تمام....

- بقت كويسة؟!

- (نصف ابتسامة....) يفرق معاك!!?

- (ينظر بعيدا....)



- (تحرك رأسها بالإيجاب...) آه... بقت أحسن... وغالبا يومين وهتتسناك... هيه بس كانت محتاجة تسمع الكلمتين دول... أي نعم هيه عارفاهم كويس أوي... بس كانت محتاجة تسمعهم من حد تاني... مش أكثر من كده.....

- (يحرك رأسه بالإيجاب هو الآخر... يتجاوزها... ليقف أمام سور الشرفة... يخرج سيجارة.....)

- (بسخرية.....) قبل ما ترمي نفسك نادينا بس الله يكرمك.....

- (وہم يلتفت.....)

تتجه هي إلى الداخل....

- عملتي إيه؟!

- (تبتسم لـ"حسام"... عيب عليك... البنت تمام وزى الفل....

- (يبتسم ابتسامة عريضة.....) هتكلمي أكل...؟!

- لا لا... خلاص شبعت.....(صمت قليل...) هوه صحبك ده ماله؟!

- (يتنهد بسخونة.....) ماله كايه يعني؟!

- (تحرك رأسها بالنفي....) يعني.....

- (يبتسم.....) فكك..... أنا هقوم أغسل إيدي....

تجلس هي على طاولة الطعام.... تحدد بـ"معتز" من بعيد..... يبدو مستاء للغاية..... تتتابها حالة من الفضول..... تقرر الاتجاه إليه....

- (تضع يدها على كتفه بشكل مفاجئ.... ينتفض هو... يبدو أنه

في حالة لا يُحسد عليها.... عيناه دامعتان..... تحدد به.....)

أنا آسفة.....

- (يتدارك نفسه.....) في إيه..... عاوزة إيه.....

- (بخجل.....) مش عاوزة حاجة..... (ثم تهم بالمغادرة.....)
- (بعد أن تجاوزت عتبات الشرفة.....) هلا.....
- (تلتفت له.....)
- (صمت قليل.....) خليكي.... خليكي واقفة معايا.....
- (تعود أدراجها... تقف بجواره.....)
- (صمت قليل..... دقيقة..... اثنان.... ثلاثة.... ثم.....) أنتي فعلا شايقة إني سيئ للدرجادي?!!
- (تتنهد) معتز..... أنا معرفكش..... أنا لسة مقبالك من ساعتين باين.... بس... (ابتسامة خجل....) يعني..... كل اللي شفته منك لحد دلوقتي يوحى بإنك إنسان صعب الواحد يتعامل معاه.....
- على الأقل بالنسبالي..... بس..... (تردد.....)
- (يحدق بعينها.....) بس إيه?!!!!
- (صمت قليل....) فيه حاجة غلط.... أنا مش فهمها.... يعني فكرة إنك وحسام صحاب مثلا دي مش منطقية بالنسبالي... لأنكوا مختلفين جدا.... وفيه حاجة تانية كمان... أنا حساها... بس مش فهمها....
- إيه?
- (تحرك كتفيها باللامبالاة.....) يعني..... حاسة إنك مش بالسوء اللي أنا متخيلاه.... حاسة إنك بتتعمد تبان بالصورة دي..... مش عارفة... يعني... حاسة إن جواك ألطف من اللي أنت بتحاول تظهره.....
- (يحدق بها في صمت.....)

هنا يقتحم "حسام" حديثهما.... يناولها هاتفها.....

- ما أنا مش هفضل أجري وراكوا أنتوا الاتنين بتليفوناتكم!!!
- (تأخذ منه الهاتفف..... تتجه إلى الداخل..... تتلقى مكالمة ما... دقيقة..... ثم تعود إلى الشرفة....) طب أنا لازم أمشي دلوقتي.....
- ("معتز".....) ليه!!!!!!
- مفيش حصلت حاجة كده ولازم أمشي حالا...
- ("حسام"....) طب أنتي عاوزه حاجة?!!! محتاجة حاجة?!!
- لا لا.... كله تمام.... بس لازم أمشي دلوقتي.....
- ("معتز".....) أوصلك?!!!
- (بتبسم له..... تمد يدها للسلام.....) تسلم..... فرصة سعيدة...
- (يمسك يدها.... بسلام... برقة....) أنا أسعد.....
- ("حسام"....) لازم أشوفك تاني قبل ما تسافري.....
- (تحرك رأسها بالإيجاب.....) أكيد..... يلا لازم أمشي دلوقتي.....
- ثم تتجه مغادرة لتتجاوز عتبات المنزل إلى الخارج.... تتجه إلى المصعد.... لتجد "معتز" خلفها.....
- أنا آسف.... بس ممكن رقمك?!
- (تعقد حاجبيها....) هتعمل بيه إيه?! أنا يومين ومسافرة.....
- (يحرك رأسه بالإيجاب.... بخجل....) تمام....
- (تمسك هاتفه.... تقوم بحفظ رقمها.....) بتبسم له.... باب المصعد على وشك الإغلاق... سلام....
- (مبتسما.....) سلام.....
- يعود أدراجه إلى داخل منزل "حسام"... ليجده مستلقيا على الأريكة... يبتسم... دون أن ينظر له.....

- إيه؟! مش هتهزقني!؟
- (نصف ابتسامة....) أهزقك ليه!!!؟
- أنا أخذت رقمها....
- متاخذ رقمها..... "هلا" ميتخفش عليها... لا منك... ولا من غيرك.... وبعدين دي واحدة جاية من عالم... وأنت من عالم تاني خالص.... مش هتعرف تاخذ منها لا حق ولا باطل.....
- (يجلس أمامه....) بس أنا مش عاوز منها حاجة....
- ولو.... ولو عاوز منها حاجة... أنا بقلك مش هتعرف تاخذ منها حاجة.... لو اتشقلت كده.... مش.... هتعرف... تاخذ... منها.... حاجة....
- (بيتسم....) لذيذة هلا.... مرتبطة!؟
- ولا بتفكر في جنس الرجالة أساسا....
- (يعقد حاجبيه....) lesbian!؟!؟
- لا يا خفيف مش lesbian بس دماغها مستقلة حبتين.....
- آه..... من بتوع حقوق المرأة وال strong independent women وكده!!!
- ولا حتى كده..... دي واحدة حرة.... عارفة اللي ليها واللي عليها... ومش معقدة ولا آفشة عالدينا.... بسيطة فوق ما تتصور... بسيطة لدرجة إنها ممكن تكون بالنسبة لواحد زيك... لغز مكلكع.....
- حصل بينكم حاجة قبل كده!؟
- (يجحظ بعينه....) شوف أنا بقول إيه وهو يقول إيه!!!! يا ابني أنت مفيش في دماغك غير القذارة دي!!! متعقل شوية!!!!

- حصل؟؟!!
- لا ما حصلش... ومش هيحصل... هلا دي صحبتي.... صحبتي
- وليها مواقف جدعنة معايا كتير أكثر من اللي شفتها من أتخن
- واحد فيكوا... وقفت في ظهري كتير.... وبعدين بجد والله مش
- هزار ولا تريقة... حاول ترتقي بفكرك شوية.... كفاية عفن.....
- (صمت قليل....) هيه مسافرة ليه؟!
- (بيتسم...) جابت آخرها... من الناس... الناس اللي زيك....
- (يبعد نظره قليلا.....) ليه حد هناك؟!
- مامتها وأخوها الكبير.....
- أبوها فين؟!
- متوفى من سنين.....
- سنين قد إيه؟! من إيمته؟!
- (يعقد حاجبيه....) ليه كل الأسئلة دي؟؟!! معتز... البنت مسافرة
- خلاص... وغالبا... لا مش غالبا... هو الأكيد إنها مش هترجع
- ثاني.....
- (يتنهد..... صمت قليل...) تضايق لو خرجت معاها؟! لوحدنا؟!
- (بيتسم له....) لا مش هضايق.... لسه قايلك من شوية... هلا
- ميتخفش عليها.... لا منك..... ولا من غيرك.....
- (يحرك رأسه بالإيجاب دون أن ينظر إليه.....) تمام....
- (يقوم "معتز" بتغيير محطة التلفاز.....) تحب تتفرج على
- حاجة؟!
- لا لا... ما أنت عارف... مليش في التلفزيون.... (يقف متجها إلى
- غرفة النوم....) أنا هدخل أريح جوه شوية.....

- ماشي.....

يقوم "معتز" بتبديل ملابسه... يستعير أحد القمصان القطنية
وينطال منزل مريح من خزانة "حسام".... يقوم بفتح النافذة على
مصراعيها... يحضر "مخمدة سجاثر" بجواره على السرير.... يطفئ
الأنوار... ثم يلقي بجسده.... يتفقد هاتفه... لا شيء جديد....
يتصفح الـ facebook ... لا شيء جديد... الكثير من الترهات...
والملل.... يضع هاتفه بجواره... يقوم بإشعال سيجارة.... يعجبه هذا
الصمت.... هذا الهدوء....

نصف الساعة... فالساعة... على هذا الوضع.... يمسك هاتفه
مجددا... يفكر بالاتصال بـ "هلا".... ولكنه متردد.... ولا يعلم سر
هذا التردد... فهذا ليس بعادته... ليس من طبعه... يقرر محادثتها
عن طريق الـ whatsapp ليجدها في حالة نشطة.. "online

- هلا؟!

- (نصف دقيقة....) !!HeY

- كله تمام؟! خلصتي اللي عندك؟!

- not really.. iam in the middle of something....

- طيب....

- ????

- إيه؟!

- إيه أنت؟!... (بالإضافة إلى وجه مبتسم لتكسر به حدة الحديث)

- مفيش.... عاوز أشوفك بكره..

- الساعة كام؟!

- ستة كويس؟!

- كويس جدا...

- فين؟!

- sea gull

- اتفقنا.

- see you

انتهى الحديث النصي بينهما... وعلى وجهه ابتسامة سعادة...
لا يعلم سببها... ولكنه إحساس رائع... إحساس سلس... سهل...
وبسيط... نصف ساعة... ليجد نفسه يقوم بالاتصال بـ"توتا"....

- ألو....

-

- فاطمة.....

- فاطمة؟! أول مرة تقولي يا فاطمة.....

- عاملة إيه؟!

- عاوز إيه يا معتز؟!

- مش عاوز حاجة..... عاوز بس أقلك إني آسف.....

- (صمت.....)

- من قلبي... آسف....

- على إيه..... على إيه يا معتز؟! أنت عارف أساسا أنت بتعتذر

على إيه؟!

- بعذر إني ضايقتك...

- (بتسم.. بسخرية...) ضايقتني؟! عادي كده؟!!

- (يتنهد...)

- لا.. هوه أنت مضايقتنيش... تقدر تقول إنك هزرتني... كسرتني...
هزيت كياني كله... خلتنني أحس إني أرخص بنت في الدنيا...
شوهتني من جوه...

- أنا..... آسف.....

- (تبتسم.. صمت قليل....) لا أنت مش آسف ولا حاجة... أنت
مش فاهم أنت عملت إيه... فمتقوليش إنك آسف..... بص...
أنا معرفش مين البنت اللي ردت على تلفونك... ومش مهتمة
أعرف... بس عاوزاك تبلغها إني من قلبي بشكرها...

- (يتنهد..... صمت قليل) حاسه إنك أحسن طيب؟!!

- معتزر.... أنت عاوز إيه؟! لا بجد عاوز إيه؟! فكرة إنك متصل
تعذر دي مش داخله دماغي الحقيقة..... متجيب من الآخر
وتخليك صادق ولو مرة في حياتك يا أخي.....

- عاوز أقلق إني آسف.....

- (تتنهد هي الأخرى.....) سلام يا معتزر.....

ثم تنهي المكالمة.....

كان يعلم جيدا أن هذه ردة فعل منطقية.... ولم يتوقع منها تقبل
ذلك الاعتذار... ولكنه في المقابل... يعلم جيدا أنها كانت بحاجة لتلك
المكالمة.... ليرضي كبرياءها... لتتجاوزه تجاوزا تاما... هذا أقل ما قد
يقدمه لها.... ولكن... ما الذي دفعه لذلك من الأساس... هذا ما
كان يشغل باله بعد إنهاء المكالمة.. فهذا ليس بالسلوك المعتاد...
ليس في هذا شيء من خصاله.... (يتنهد...) يحدق بسقف الغرفة
المظلمة... وها هو يغفو..... لينام....

وفي تمام الحادية عشرة صباحا... يستيقظ "معتز" ليتجه إلى الصالة
حيث "حسام" يمسك بكوب من الشاي وأمامه الكثير من الأوراق
وجهاز الـ"لاب توب".....

- صباح الخير....

- إيه يا أخي.... سبتي نايم كل ده ليه؟!!!!

- (دون أن ينظر له... منهمكا في أعماله الورقية...) وأصحيك ليه؟!
هو أنا مراتك!! بعدين النهاردة أجازة.... هتصحى تعمل إيه....
نمت كويس؟!!

- (يجلس بجواره... يتنسم ممسكا بكوب الشاي الخاص بـ
"حسام") آه.. نمت كويس جدا.... بقالي كتير منمتش بالراحة
دي....

- (يتنسم دون أن ينظر له....) طب الحمد لله.... عاوز إيه أنت
دلوقتي...؟!!

- ("يصفعه على مؤخرة رأسه")

- (ما زال يتنسم.... صمت قليل.... دون أن ينظر إليه) هتشوفها
إمته...؟!!

- (ينظر له بلؤم....) ما أكيد قالتلك....

- (يحرك رأسه بالنفي...) والله ما قالتلي حاجة... بس أنا عارفك....
ها... هتشوفها إمته؟!!

- (يتنهد....) النهاردة.... الساعة 6...

- ليه؟!!

- ليه إيه؟!!

- هتشوفها ليه؟! عاوز منها إيه؟!!

- (يرفع حاجبيه....) يا سلام.... على أساس إنه ملكش دعوة وهلا
ميتخفش عليها لا مني ولا من غيري ومحاضرة طويلة عريضة
ملهاش أي تلاتة لازمة!!

- (بيتسم...) لا يا حبيبي ليها لازمة... وعلى فكرة أنا لسه عند
رأبي في هلا وواثق فيها ثقة عمياء... بس عندي فضول أعرف
معاليك ناوي على إيه....

- (يحرك رأسه بالنفي... يرتشف من كوب الشاي...) مش ناوي
على حاجة.. حابب أتكلم معاها شوية... بس... مش أكثر من
كده....

- (يحدق به....)

- في إيه يا ابني!?!

- (يضع يده على كتفه....) أنت آه صاحبي... بس والله العظيم..
والله العظيم يا حسام... لو قربت منها... لو أذتها بأي شكل
من الأشكال... ما حد هيقفلك غيري... وهخسرك فيها....

- (ينظر له بغضب...) ملوش لازمة الكلام ده.... قلته مرة وفهمت
اللي فيها.... (يغادر مقعده....) أنا مش وسخ أوي كده.... أنا
نازل....

يتجه للغرفة.... يقوم بتبديل ملابسه.... وقبل المغادرة يلقي
التحية على صديقه.... ثم يغادر في سلام....

وفي تمام الساعة الخامسة... يقوم بمهاتفة "هلا"....

- ألو....

- (بصوت مبهج...) iam on my way sir...

- (بيتسم....) هايل يا فندم...

- أشوفك هناك....

- تمام....

- bye

وفي تمام الساعة السادسة... يتقابلان أمام باب المقهى....

- (يبتسم لها...) ده أنتي تربية أجنب بصحيح بقى... مواعيدك هائلة!!

- (تتجه معه إلى الداخل.... مبتسمة)

وفي المقهى.... على الطاولة..... تجلس أمامه... تحديق به بابتسامة رائعة... ثم....

- (يتنهد....) كملي....

- (تعقد حاجبيها....) أكمل إيه!؟

- كلامك.... كلامك قبل ما تجيلك مكاملة وتمشي.....

- (تبتسم ابتسامة عريضة.....) فعلا؟! حابب تسمع....!؟

- (يحرك رأسه بالإيجاب....) آه.... (يخفض رأسه...) جدا....

- (تنظر له بأسف....) بس أنا معرفكش....

- (ينظر لها مبتسماً...) مش مهم.... كلميني زي ما كنتي بتكلميني يا هلا....

- (تتنهد... تنظر بعيدا.. ثم تعاود النظر إليه مبتسمة....) الحقيقة... أنا مش عارفة أتكلم معاك....

- (يشعل سيجارة....) ليه!؟

- (تحرك كتفيها باللامبالاة...) يعني.... يمكن إحنا مختلفين شوية... (تبتسم....) شوية كثير..... (تبتسم ابتسامة عريضة....) لا..

إحنا مختلفين بشكل مرعب... فلغة الحوار بينا هتكون مرهقة
شوية... شويتين....

- (ينفث دخانه....) ليه برده؟!

- ليه مختلفين?!!

- (يحرك رأسه بالإيجاب....)

- (تبتسم ابتسامة استهزاء....) بتهزر صح؟!... معزز... أنت من
كام ساعة بس كنت بتتهمني بشكل غير مباشر إني شمال عشان
شفتني في بيت صبحك... لا وكنت مُصر على موقفك كمان....

- (ينفث دخانه بكثافة....) حصل... وأنا فعلا كنت فارك شمال...
عشان مش طبيعي ولا منطقي بالنسبالي أبدا إنك تكوني قاعدة
في شقة مع اتنين رجالة.... أنا متربتش على كده.... وأكد
أنتي فاهمة حاجة زي كده كويس... دي مش نظرية أنا لسه
مخترعها من كام ساعة... ده عُرف مجتمع بحاله.... وأنا ابن
المجتمع ده.... بيتهيا لي عذري... واللا إيه?!

- (تبتسم له.... صمت قليل....) عارف... مع إن الكلام وحش وفيه
إهانة كبيرة.... بس أنا متقبله رتم الكلام.... لأنك كنت صريح
في كلامك.... وواضح.... وده بالنسبالي كفاية....

- (يتهدد.... نصف ابتسامة.... يعيد كلماتها...) صريح....
وواضح.... (نصف ابتسامة أخرى.. يحرك رأسه بالنفي
باستهزاء...) هلا.... أنا عمري ما ضحكت على حد.... يمكن
أكون راجل متخلف من وجهة نظرك... أو من وجهة نظر واحد
زي حسام.... بس الأكيد إني عمري ما ضحكت على حد.... عمري
ما قلت حاجة أنا مش حاسس بيها.... عمري ما قلت كلمة
بجك لواحدة.... عمري ما ادعيت حاجة مش فيا.... عمري
ما أوهمت واحدة متحررة زيك مثلا... إني زيها.. متفتح و open

minded وبيتهياًلي هجومي عليكي إمبراح أكبر دليل على كده..... آه طبعاً بعمل حاجات كثير غلط..... وسمعتي تترّف.....

- (تجھظ بعينها مبتسمة.....)

- (بيتسم لها... يحرك رأسه بالإيجاب....) آه... أنا عارف إن سمعتي زي الأطران.... ومبضحكش على نفسي.... أنا عارف اللي فيها... بس أنا أحسن من ناس كثير..... على الأقل أنا واضح وصریح مع نفسي.... حتى كل العلاقات اللي دخلت فيها قبل كده... كنت واضح جدا مع الأطراف الثانية... حتى في علاقاتي الجنسية... اللي قدامي بيبقى عارف إن ده أخري... وإني مستحيل أتورط عاطفياً مع واحدة فيهم..... يعني..... من الآخر... أنا مبضربش حد على إيدہ... مبجربش حد على حاجة.....

- (تحقق به.....)

- (يفت دخانه بكثافة.....)

- طب ليه مش مرتاح!؟

- (بيتسم لها....) ومين مرتاح يا هلا!؟ أنتي مرتاحة!؟

- (تحرك رأسها بالإيجاب....) آه... كنت مرتاحة جدا لما كنت في London الحقيقة..... بس لما قررت أنزل أعيش هنا... هنا بدأت الأزمة.... وأديني أهو بصلح الغلط اللي عملته... وراجعة تاني... لبيئتي الطبيعية... أنت بقي!؟ فين بيئتك الطبيعية!؟!! وليه مش مرتاح!؟ مش ده مجتمعك... وأنت ابن المجتمع ده!؟!! مش ده كلامك!؟!!

- (يتنهد.....) مش عارف.....

- (تحرك رأسها بالنفي.....)

- قولي..... قولي اللي في راسك....

- (صمت قليل.....) عشان مجتمعتك كله غلط في غلط... وعك في عك... ملوش مبادئ ثابتة بيمشي عليها..... وده عاملك اضطراب كبير في نفسيتك... كل الحاجات اللي أنت رافضها... قصدي اللي مجتمعتك رافضها... أنت بتعملها في السر... معظم الناس بتعملها في السر... وهيه خايفة... بس لو ظهرت في العلن... بتبقى فضايح... اللي هوه قمة الهبل واللامنطق... أنت مش عارف أنت بتعمل إيه... واللا إيه... (بتتسم له...) وعلى فكرة أنا مصدقة جدا فكرة إنك عمرك ما قلت لواحدة إنك بتحبها.. ومصدقة جدا إنك عمرك ما حييت حد أساسا... ومصدقة أوي... أوي... إنك مش مرتاح... ومعظم الوقت مخنوق... ومضايق.....

- (صمت قليل..... يحدق بعيدا... ثم يحدق بها.....) هوه أنا وسخ بجد؟! يعني..... (يتنهد...) مستاهلش إني أتحب؟! أتحب بجد?!!!

- (تحرك رأسها بالنفي.... تنظر له بحنان...) مفيش حد ميستاهلش إنه يتحب... كلنا بشر... كلنا غلابة بشكل أو بآخر يا معتز....

- (يخفض رأسه..... ينفث دخانه.....)

- (بتتسم له...) أنت فيك حته نضيفة... حته حلوة أوي... بس أنا مش عارفة إيه مصدرها الحقيقة.....

- (ينظر لها..... مبتسماً.....)

- بتكلم جد.....

- (ينظر بعيداً...)

- هوه أنت إيه اللي رابطك بحسام?!!



- (صمت قليل...) حسام جدع..... ومحترم... وبيصون السر...
وحمول..... (يبتسم...) حمول جدا... وأنا محتاج حد
يستحملني... وهوه بيستحملني.....

- بترتاح في قعدته..... صح؟!

- (يحرك رأسه بالإيجاب...) آه... جدا....

- عارف ليه؟!

-

- لأن عقله كبير.... وبيتقبل آراء كل الناس... وفكرهم... واختلافاتهم...
ووجوده مش بيمثل ضغط على أي حد حواليه... أي حد ممكن
ييقى مرتاح قدام حسام..... شخصية مش judgmental بالمرة....
الناس مع حسام... بتحس إنها مرتاحة فعلا لأنها بتكون على
طبيعتها.... مع إن حسام... ابن المجتمع ده برده... واتربي فيه
زي ما أنت اتربيت فيه... بس الفرق الوحيد إن حسام شغل
مخه وعقله... ومسلمش رقبته لفكر مجتمع مريض.... حسام
قرر إنه يختار لنفسه مبادئ معينة يمشي عليها.... وفي نفس
الوقت... منع نفسه إنه يحكم على أي حد مخالف لمبادئه....
يعني أنت أكيد عارف إن حسام عمره ما شرب....

- (يبتسم...) لا خمرة ولا نسوان وحياتك..... ملوش في أي حاجة....

- بالضبط..... هوه مقتنع بكده.... دي دماغه... وقيس على كده
حاجات كتير أوي.... وفي نفس الوقت... عمره ما قلل من سلوك
حد... عمره ما هان حد.... عمره ما ادخل في حياة حد.... عمره
ما حكم على حد من أساسه... الناس بتحب تتكلم معاه...
الناس بتطمئنه.....

- (يطفى سيجارته.....)

- (تبتسم....) قصدي أفلك.... إعمل اللي أنت عاوزه... أنت مش صغير.. وعارف الصح من الغلط يا معتز.... وفقا لمبادئك الخاصة طبعاً... بس متعش الوهم.... متحللش لنفسك حاجات وتحرمها على غيرك.... ده الوضوح اللي بجد.... ده التوازن اللي بجد.... مش تقولي أنا عمري ما كذبت على حد وعمري ما ضحكت على حد.... أنت بتضحك على نفسك قبل أي حد.... (تنهد...) أعتقد...أعتقد إن ده اللي مخليك مضايق... و....مخنوق معظم الوقت.....
- (يحرك رأسه بالإيجاب....)
- (تحقق به مبتسمة....)
- (يبتسم لها....) إيه بقى الحطة الحلوة اللي فيا.... (يبتسم ابتسامة عريضة...) إني صاحب حسام؟!
 - (تبتسم هي الأخرى....) ما أنا قتلتك... معرفش....
 - (نصف ابتسامة.... صمت قليل.... يتنهد....) أنا مفياش أي حنت حلوة يا هلا....
 - (تعقد حاجبيها....) ده اللي هوه إزاي يعني....!
 - زي ما بقلك.... أنا إنسان بشع....
 - (تحرك رأسها بالنفي... تنظر بعيدا....)
 - (يشعل سيجارة أخرى.... يبتسم لها... صمت قليل....) أنتي حلوة أوي يا هلا....
 - (تبتسم.... دون أن تنظر له....)
 - (ينفث دخانه بكثافة.... ما زال يبتسم....) خايفة مني؟! ...
 - (تعقد حاجبيه... مبتسمة.. تنظر له....) أخاف منك ليه!
 - (تبتسم....)

- (يبتسم...) المزيك... بحب المزيك أوي....
- (تحرك رأسها بالإيجاب....)
- (صمت قليل..... يحدق بها.....)
- (تحقق به مبتسمة....)
- (يكسر الصمت.....) أنتي فعلا مش شمال.....
- (تبتسم ابتسامة عريضة.....) مش عارفة أقلق إيه... هوه المفروض إن ده إطراء؟!)
- (يبتسم...) بالنسبالي آه....
- (تعقد حاجبيها باستغراب....) طب..... شكرا....
- (يحدق بها.....) وأنا فعلا إنسان بشع.....
- (صمت قليل..... بنبرة حزن....) ليه بتقول كده.....!؟)
- (يحرك كتفيه باللامبالاة....)
- (تحقق به بحزن... ثم تبعد نظرها.....)
- (ثم.....) تخيلي.... أنتي قد إيه جميلة.... وقد إيه نضيفة معايا في كلامك.... في نفس الوقت الي أنا هموت وأعمل معاي علاقة فيه....
- (تحقق به.... تبدو عليها علامات الصدمة.....)!!)
- (يبتسم..... بحزن.... ينفث دخانه....) مش بقلك..... زبالة....
- (صمت قليل.....)
- (يتنهد..... يبتسم.....)
- هوه..... هوه أنا عجبك!؟!

- (بيتسم ابتسامة عريضة....) آه طبعاً عجباي.... عجباي زي ما أي بنت حلوة بتعجبني..... أنا بضعف قدام الجمال يا "هلا"....

- بس كده؟! ده اللي عجبك فيه؟! إني حلوة!؟

- (يحرك رأسه بالإيجاب.....) ده اللي أنا بشوفه... وبعدها دماغي بتقف.... ما بشفش ولا بحس بحاجة تانية.....

- (تحرك رأسها بالإيجاب.... تنظر بعيدا.....)

- (بيتسم....) زبالة!؟

- (تنظر له....) معرفش....

- (بيتسم ابتسامة عريضة...) فعلا.....!!؟

- (تبتسم له.....)

- (بيتسم لها....) يلا بينا!؟

- (ما زالت تبتسم.....) نشرب قهوة ونمشي.....

ينفث دخانه بكثافة... يحرك رأسه بالإيجاب.... يطلب من النادل فنجاني قهوة..... وقد كان..... خمس عشرة دقيقة من الصمت.... ينظر لها تارة.... تنظر له بابتسامة تارة..... ثم يحددان بنظرهما بعيدا..... ثم....

- معاكي عربية....؟

- (تحرك رأسها بالنفي...)

- تحبي أوصلك!؟

- (تبتسم... تحرك رأسها بالإيجاب...) أحب توصلني...

وفي السيارة... لم يتبادلا أطراف الحديث... بل اكتفيا بالاستماع إلى بعض مقطوعات "معتز" المفضلة..... الجو رائع.... و"معتز" يقود

بأقل سرعة ممكنة..... وتكتفي "هلا" بالنظر إلى "مؤشر" السرعة...
ثم الابتسام له... يتسم هو الآخر.. دون أن ينظر إليها.....
وها هو منزل "هلا"....

- (يمد يده للسلام...) فرصة سعيدة..

- (تمد يدها هي الأخرى للسلام.....) أنا أسعد....

- (يتسم لها.....)

تغادر السيارة..... وأمام باب السيارة قبل أن تقوم بإغلاقه.....
يتسم له... "على فكرة..... أنت مش ذكي أوي زي ما أنت متخيل....."..
يحدق بها... ثم تغادر هي.....

بعد مرور ساعة..... يُهاتف "معتز" صديقه "حسام"....

- فينك؟!!

- في البيت....

- أنا جايلك.... سلام.

- سلام..

يقوم بطرق الباب... ها هو "حسام" نصف عاري مرة أخرى....
يقف أمامه... يحدق به....

- إيه اللي حصل؟!!

يقوم بدفعه... يتجاوزه إلى داخل المنزل.... يجلس على الأريكة....
يتجه الآخر ليجلس بجواره....

- (يكرر...) إيه اللي حصل?!!

- (يحرك رأسه بالنفي.....)

- (يحدق به..... دون حديث.....)

- (بيتسم له.....) أبوك لا أبو معارفك يا أخي.....
- (يتنهد.....)
- (يخفض رأسه..... يحرك رأسه بالنفي.....)
- (صمت قليل....) قتلتك غير أي حد أنت قابلته.....
- (يحدق به..... عيناه لامعتان....) خطفتني... بنت الجزمة...
خطفتني يا حسام.....
- (يحرك رأسه بالإيجاب.....)
- (يحرك رأسه بالنفي بشكل هستيري.....) لا لا لا لا لا لا... أنا
مش مصدق إني حاسس باللي أنا حاسس بيه دلوقتي.... لا لا لا
لا لا... أنا مش فاهم فيه إيه..... قلبي واجعني.... وإيه قلبي
دي كمان!!! يعني إيه قلبي دي أساسا!! أنا معرفش معنى
الكلمة دي!!!!!!!
- (بيتسم له.....)
- (يحدق به.....) وإيه اللي أنت عامله في نفسك ده!!!! (يضره
على صدره) ما تقوم تستر نفسك واللا تلبس حاجة!!!!
- (بيتسم متجها إلى الغرفة....)
- دقيقة.... يعود ليجدّه في الشرفة.... يقف بجواره....
- البت مسافرة يا حسام...
- (يحرك رأسه بالإيجاب....)
- مسافرة..... مسافرة ومش راجعة تاني..... مسافرة... ومش
راجعة تاني!!!!
- آه.... مسافرة بكره....
- (يجحظ بعينه....) بكره!!!!!!!

- (يحرك رأسه بالإيجاب.....) بكرة... الساعة 11 بالليل...
- (يصدق به..... دون حديث.....)
- (يضع يده على كتفه.....)
- (يعض على أسنانه... يشعر بالغضب.....)
- (يتنهد..... ما زال يضع يده على كتفه...)
- أنا عاوز أنام.....
- (يحرك رأسه بالإيجاب.....) ادخل نام!!.....

وهكذا... اتجه إلى غرفة النوم في منزل "حسام".... رمى بجسده على السرير دون أن يقوم باستبدال ملابسه..... قام بغلق هاتفه..... الكثير من التحديق في اللاشيء..... وها هو النعاس... فالنوم.... وفي صباح اليوم التالي.... يستيقظ.... الساعة الواحدة بعد الظهر.... يتجه إلى الصالة حيث "حسام".... المزيد من الأعمال الورقية.... يتجاوزها بلا كلمات.... يتجه إلى باب المنزل.... يستوقفه صديقه.... "معتز"!!!!!!... ولكن الآخر... يتجاوز الباب مغادرا..... دون إجابة....

يتجه بشكل لا إرادي إلى منزل "هلا".... يقوم بإيقاف سيارته بعيدا.... ينتظر..... لا يعلم ماهية نواياه... وما هو مقدم عليه... ولكنه.. يكتفي بالانتظار.... ساعة... الثانية.... الثالثة..... وما زال ينتظر.... الساعة الآن.... الثامنة مساء.... ها هي "هلا".... تقوم بحمل حقائبها.. تتجه إلى سيارة الأجرة..... دقائق.... تتحرك السيارة.... يتبعها... بحذر شديد... وها هو "المطار"..... ما زال يراقبها.... وها هي تتجه إلى داخل "المطار".... وقبل أن تعبر بوابة الدخول بلا رجعة.... يقف صارخا باسمها... "هلا".....

. تتسمر في مكانها.... لا تنظر إلى الخلف.... يكرر هو..... "هلا...."
... هنا تلتفت إليه.... يتقدم هو بخطوات ثابتة باتجاهها.....
يقف أمامها.... دون حديث... تتسمر أمامه.... لا حديث..... يقوم
بإزاحة خصلات شعرها من على وجهها.... عيناه لامعتان..... يقوم
بتحريك أصابع يده في وجهها بحنان.... تحديق به... عيناه لامعتان
هي الأخرى..... لا حديث..... هنا.... يقوم بضمها إلى صدره بقوة...
ثلاث دقائق..... قام بضمها إلى صدره دون حديث... ثلاث دقائق...
تتشبث هي بقميصه تارة... تحيطه بذراعيها تارة أخرى..... تنتهد
بقوة.... ثم تقرر أخيراً... دفعه بحنان بعيداً عنها..... تهمس له
بحزن.... "أشوفك على خير"..... يمسك يدها.... تفلتها هي بحنان.....
تتجه إلى الداخل.... تنساب دموعها على وجنتيها..... يقف هو بلا
حرك.... يخفض رأسه.... يتنهد بقوة..... يتسم كالمجنون.... لعل
هذا هو عقاب السماء.... له... على كل قلب قد قام بإيلامه.... على
جرح قد تسبب فيه.... آخر ما قد يخطر في بال رجل كـ "معتز"...
أن يقع في غرام امرأة كـ "هلا"... امرأة لا يعلم عنها شيئاً.... قصة
حب... لا تتجاوز العشر ساعات.... بلا ذكريات.... لم تترك له شيئاً....
سوى عذاب الـ "ماذا لو..." وضمة صدر لم تتجاوز الثلاث دقائق.....
من قال إن الحياة ليست بعادلة يا "معتز".....

أنتي كويسة؟

- الساعة التاسعة صباحًا... يطرق "خليل" باب مكتبها... مكتب
"عليه"....
- اتفضل!...
- يتجاوز الباب بابتسامة... تعقد حاجبها دون أن تتخلى عن
عملها على لوحة مفاتيح الـ"لاب توب" تكرر مشيرة إلى الكرسي....
- "اتفضل"!
- (يبتسم لها....)
- (دون أن تترك عملها...) أنا معاك....
- يتنهد... يطرق "عم صبحي" الباب... ليتجاوز به فنجاني قهوة....
- صباح الخير أستاذة عليه...
- (تبتسم لعم صبحي بابتسامة) صباح الورد... بس أنا مطلبتش
قهوة....
- (يضع فنجاني القهوة على المكتب) أستاذ خليل هو هو اللي
طلبهم.... (يستأذن.. ثم يُغادر المكتب)

يرتشف "خليل" قهوته.... "علية... سيبى اللي في إيدك واشربي قهوتك"!

- (تتنهد.. تُحدق باللاب توب...)
- (بيتسم لها) علية....
- (تُحرك رأسها بالإيجاب... تضع اللاب توب جانبًا... تُمسك بفنجان قهوتها)
- (يُمسك بعلبة سجائره... ممكن!؟)
- (تُحرك رأسها بالإيجاب....) مفيش مشكلة....
- (يُشعل سيجارته....)
- (ترتشف قهوتها....) دي قعدة شغل....!؟
- (ينفث دخانه محررًا رأسه بالنفي....)
- (تُحرك رأسها بالإيجاب....)
- (يُحدق بها بابتسامة....)
- (ترتشف قهوتها....)
- (والمزيد من الصمت....)
- (تبتسم عاقدةً حاجبيها....) إيه؟!؟
- (بيتسم لها....) أنتي كويسة!؟
- (تُحرك رأسها بالإيجاب.... نبرة جافة...) آه كويسة...
- (ما زال بيتسم....)
- خليل.... في إيه؟!؟
- (ما زال يُحدق بها... ينفث دخانه.. وقد اختفت الابتسامة من على وجهه...)

- (تتنهد... تكرر... خليل... في إيه؟!
- (يُحَدِّقُ بِهَا لِلْحِظَاتِ... يَقِفُ مُسْتَعِدًّا لِلْمَغَادِرَةِ...) مَفِيش حَاجَةَ... كَمَلِي شَغَل...
- (تَجْحِظُ بِعَيْنَيْهَا.....)
- (قَبْلَ أَنْ يَتَجَاوَزَ بَابَ الْمَكْتَبِ... يَلْتَفِتُ إِلَيْهَا...) أَنَا جَنْبِكَ لَوْ احْتَجَّتِي حَاجَةَ... (ثُمَّ يُغَادِرُ الْمَكْتَبَ.....)
- تَعْقِدُ حَاجِبِيهَا قَلِيلًا... تَفَكَّرُ بِمَا حَدَثَ لِلتَّو؟!... يُقَاطِعُ تَفَكِيرَهَا مَكَامِلَةً دَاخِلِيَةً...
- أَلُو؟!
- عِنْدَكَ مَعَادُ السَّاعَةِ اتْنَيْنِ... مَتَنَسِيش...
- (تَعْقِدُ حَاجِبِيهَا...) مَعَادُ إِيهِ؟!
- شَرِكَةُ "سَمَارَا" يَا عَلِيَّةُ!!
- آه... آه... تَمَام... تَمَام
- (صَمْتٌ قَلِيلٌ) عَلِيَّةُ... أَنْتِي كَوَيْسَةُ؟!
- (تَعْقِدُ حَاجِبِيهَا) هُوَ فِي إِيهِ النَّهَارَةَ... أَنَا تَمَام...!!!!
- طَيِّب... مَتَنَسِيشُ مَعَادُكَ.. وَاتْحَرِكِي بِدَرِي شَوِيَّةٍ عَشَانَ الطَّرِيقِ هَيِّبَقِي زَحْمَةَ
- تَمَام....

تُنْهِي الْمَكَامِلَةَ... تَتَّجِهُ إِلَى الْمَرْأَةِ... تَتَفَقِدُ هَيَأْتَهَا... تَبْدُو جَمِيلَةً... وَأَنْيَقَةً.. وَبِصْحَةِ جَيِّدَةٍ... إِذْنَ... لَمْ هَذَا السُّؤَالُ؟!!!! تَتَنَهَّدُ... ثُمَّ تَعُودُ إِلَى مَكْتَبِهَا... لِتَتَوَاصَلَ عَمَلَهَا بِجَهْدٍ مَبَالِغٍ بِهِ... وَفِي تَمَامِ السَّاعَةِ الْوَاحِدَةِ تَتَّجِهُ إِلَى الْاجْتِمَاعِ الْمَتَّفِقِ عَلَيْهِ فِي أَحَدِ الْمَطَاعِمِ..... هَا هُمْ مَدْرَاءُ شَرِكَةِ "سَمَارَا" يَنْتَظِرُونَ قَدُومَهَا... تُلْقِي التَّحِيَّةَ ثُمَّ تَجْلِسُ...

تسأل عن الحال والأحوال بلباقةٍ..... دقائق... لتسأل... "ممكن
نبدأ الاجتماع؟!"... يُجيبها أحد الحضور... "دقائق..." تعقد هي
حاجبها... دقائق أخرى... ليطل "مختار"... مدير شركة "سمارا"...

- (يبتسم...) مساء الخير...

- (تعقد حاجبها بابتسامة...) مختار؟!

- (يعقد حاجبيه هو الآخر مبتسمًا...) عليه؟!

- (تبتسم ابتسامةً عريضةً...) أنت...؟!

- (يُحرك رأسه بالإيجاب...) أنا مدير الشركة الجديد...

- (تُحرك رأسها بالإيجاب...) تمام... تمام... (تبتسم..) مبروك...

- (يُحذق بها مبتسمًا... يتنهد...) يلا؟!

- (تُخرج أوراقها...) يلا...

ينتهي الاجتماع... يرحل الجميع... يبقى "مختار"... يبتسم لـ

"عليه"...

- (تبتسم له...) مبروك...

- (يبتسم مُحرِّغًا رأسه بالإيجاب...)

- (تنهد مبتسمًا ثم تقف استعدادًا للمغادرة..) طيب... أنا

همشي... ابقى طمني عليك...

- (يبتسم...) مستعجلة؟!

- (تحرك كتفيها باللامبالاة... تبتسم) مش عارفة...

- (ما زال مبتسمًا) طب لو مش مستعجلة... خليكي شوية...

- (تُحذق بالكرسي للحظات...)

- (يُحذق بها مبتسمًا...)

- (تقوم بسحب الكرسي...) okay
- أنتي كويسة؟!
- (تعقد حاجبيها مبتسمة...) فعلاً!!!!
- (يعقد حاجبيه هو الآخر...) في إيه؟!
- (تُحرك رأسها بالنفي... ابتسامة خفيفة) مفيش.... (تتنهد) عامل إيه؟! إيه جديدك؟!
- (يُشعل سيجارة...) يعني... جبت عربية جديدة... و...
- (تُقاطعه...) أنت رجعت من ألمانيا إمتة؟!
- (بيتسم) من فترة...
- فترة قد إيه؟!
- ست شهور....
- (تُحرك رأسها بالإيجاب.... تنظر بعيداً...)
- (ينفث دخانه... يُحدق بها...)
- (ما زالت تنظر بعيداً... يسود الصمت..)
- (ينفث دخانه...) اتكلمي....
- (تنظر إليه...) أتكلم أقول إيه؟!
- (بيتسم....) قولي الي أنتي عاوزه تقولييه يا عليه... قولي...
- اتكلمي.. أنا سمعك.... وهجاوبك.....
- (تتنهد...) مفيش.... مش عاوزه أقول حاجة....
- (يُحدق بها للحظات....) هوه أنتي ليه كده!!!!!!
- (تُحرك رأسها بالنفي...) ليه كده إزاي؟!

- (يُشير إليها...) كده!!! ليه جافة كده؟! ليه التعامل معاكي
صعب أوي كده...!!?
- (تعقد حاجبها...) مالك يا مختار!!?
- (ينفث دخانه...) مليس... (ثم ينظر بعيدًا...)
- (لحظات... تشير للنادل بإحضار فنجان قهوة مضاعف...)
- يسود الصمت... ينفث "مختار" دخانه بعيدًا... يُحضر النادل
القهوة... وقد كان....
- (يكسر "مختار" الصمت...) أنتي عارفه إنك كنتي عاجباني أوي...
أول ما اتعرفنا في البداية... فعلا.. كنتي عاجباني....
- (تبتسم... لحظات صمت) أنا كمان... كنت مشدودالك....
- (يُحدق بها قليلا... ثم ينفث دخانه بعيدًا...) وإيه اللي
حصل...!?
- (لحظات صمت....) اللي حصل إن أنت بعدت....
- (يُحدق بها ...) مسألتيش نفسك بعدت ليه!?
- (تُحرك كتفها باللامبالاة...) سألت طبعًا... ومفهمتش.... بس
احترمت قرارك... أكيد عندك سبب....
- أكيد طبعًا.. مفيش حاجة في الدنيا من غير سبب... أنتي بقى..
مكنش عندك فضول تعرفي إيه السبب؟! واللا أنتي الموضوع
مكنش فارق معاكي للدرجة!?
- (تتنهد مبتسمة...) عاوز إيه يا مختار!?
- (يجحظ بعينه... لحظات صمت...) مش عاوز حاجة....
- (تُبعد نظرها... ترتشف قهوتها...)
- (يطفيئ سيجارته...) طيب... اممم... أنا هستأذن....

- (تحقق به وهو يُغادر مقعده....)
- (يربت على كتفها قبل المغادرة....) سلام...
- يُغادر "مختار" المقهى... ليترك "عليّة" في وضعٍ نفسي سيئ... ولكنها سرعان ما تُلقي "اللوم" على "مختار".... هذا طبعه... وهذه عادته... "الهروب"... تتنهد... ترتشف قهوتها... لكنها ما زالت تشعر بحالةٍ من الإحباط.... حالة من التراجع... تتجه بعدها إلى مقر الشركة... تطرق باب مدير الشركة... "خليل"...
- (تبتسم له....) ممكن آخذ من وقتك دقائق؟!
- (يُشير إلى الكرسي... تعالي....)
- (تُحقق به بابتسامة....)
- (يُحقق بها... دون ابتسامة...)
- (بتردد....) إممممم... أنا..... كنت عاوزه أجازة....
- (يعقد حاجبيه....) أجازة؟!
- (تُحرك رأسها بالإيجاب...) آه أجازة... أعتقد من حقي!! أنا عمري ما طلبت منك حاجة زي دي!!
- (يبتسم...) عليّة... أنا مرفضتش طلبك... أنا بس مستغرب..
- عشان زي ما قولتي... عمرك ما طلبتها قبل كده....
- (تُحرك رأسها بالإيجاب...) تمام... هكتبك الطلب وأقدمهولك..
- (ثم تقف للمغادرة...)
- (يُناديه...) عليّة....
- (تلتفت إليه..)
- أنتي كويسة يا حبيبتني?!

- (تتنهد بغضبٍ شديدٍ..... لحظات صمت) لا.. مش كويسة!!
ممكن أمشي؟!)
- (يقف... يقترب منها... طب إهدي... تعالي نتكلم شوية....
- (تُحرك رأسها بالنفي....) مش عاوزه... (تنظر بعيدًا... نبرة خافتة) مش قادرة....
- (يُحدق بها ... يبتسم) لا... هنتكلم...
(تنظر إليه....)
- انزلي استنيني في الكافيه اللي قدام الشركة... نص ساعة وهجيلك... تكوني هديتي شوية....
(تتنهد....)
- (يبتسم لها....) انزلي...!!
- (تُحرك رأسها بالإيجاب... ثم تُغادر المكتب..)
تتجه إلى المقهى المتفق عليه... يسود الليل.... الساعة الآن..
السابعة مساء....
- اتأخرت؟!)
- (تُحرك رأسها بالنفي مبتسمةً...)
- (مازحًا) حتى لو اتأخرت... هتعملي إيه يعني.. هتمشي؟!...
مش هتمشي!
- (تبتسم) لا.. كنت همشي...
(يُشعل سيجارة) تـؤ... مكنتيش هتمشي... أنتي محتاجة
تتكلمي....
- (تتنهد.... تنظر بعيدًا...)

- (ينفث دخانه....) عليه.... أنتي مش كويسة... أنتي حالتك مش تمام بقالك فترة... دي أول حاجة لازم تعترفي بيها عشان نعرف نتكلم من غير مقاوحة فارغة....
- (تُحرك رأسها بالإيجاب...) تمام.... أنا مش تمام يا خليل....
- حلو..... مالك بقى!؟
- (تُحرك كتفها باللامبالاة) مش عارفة....
- (ينفث دخانه بكثافة...) أنتي ليه بتصعبي كل حاجة على نفسك!؟
- (تبتسم بألم) إزاي يعني!؟
- (يتنهد..... لحظات صمت....)
- (صمت قليل.. تبتلع غصتها....) أنا شفت مختار النهاردة....
- (يعقد حاجبيه...) مختار!؟
- (تبتسم...) بقى مدير شركة "سمارا" الجديد.... قابلته في الاجتماع....
- (يعقد حاجبيه) إيه الصدفة الغريبة دي!؟
- (تُحرك رأسها بالإيجاب) خلص الاجتماع... واتكلمنا بعدها شوية...
- وكلامك معاه هو اللي قلبك القلبة دي!؟
- (تُحرك رأسها بالنفي) مش عارفة.... أنا مضايقة... مش عارفه هو السبب... واللا أنا مضايقة من زمان وجهه هوه كمل عليه.... (تتنهد) مش عارفه... مش عارفه...
- (يبتسم) لا... بس أنتي مضايقة من فترة يا عليه.... روحك مطفية.... وناس كتير في المكتب واخده بالها....

- (تُحَدِّقُ بِهِ بَعِينِينَ حَزِينَتَيْنِ)
- (يَتَنَهَّدُ... قَلِّكَ إِيَّاهُ؟! قَوْلَتُوا إِيَّاهُ يَعْنِي؟!)
- (تُحْرِكُ كَتْفَيْهَا بِاللَّامْبَالَةِ) يَعْنِي... فَكَّرَنِي بِأَنَّهُ كَانَ مَعْجَبًا بِبَيْتِهِ...
وَسَأَلَنِي لِيَهُ لَمَّا بَعْدَ مَا سَأَلْتُوهُ عَلَى السَّبَبِ...
- وَقَوْلْتُمَا إِيَّاهُ?!)
- (تَبْتَسِمُ بِأَمٍّ) مَقْلَتَش... سَكَتَ زِي الْحَمَارَةِ... سَابَنِي وَمَشِي...
- (نَصْفَ ابْتِسَامَةٍ) حَقَّهُ الصَّرَاحَةَ...
- لَاء... لَا يَا خَلِيلَ مَشَ حَقَّهُ... هُوَ إِلَيَّ مَشِي... هُوَ إِلَيَّ سَابَنِي...
سَابَنِي مِنْ قَبْلِ مَا الْحِكَايَةُ تَبْتَدِي أَصْلًا... سَابَنِي وَبَعْدَ...
هَرَبَ... مَشَ مَطْلُوبَ مِنِّي أَبَدًا إِيَّيْكَ أَدُورَ عَلَيْهِ وَأَسْأَلُهُ هَرَبْتَ
لِيَهُ؟! مَكْنَشَ فِيهِ بَيْنَا حَاجَةَ تَدِينِي الْحَقَّ إِيَّيْكَ أَسْأَلُهُ السُّؤَالَ دَه!
أَقْلِّكَ عَلَى حَاجَةَ كَمَانَ... حَتَّى لَوْ كَانَ فِيهِ بَيْنَا حَاجَةَ فَعَلًا...
مَكْنَتَشَ هَسْأَلُهُ... إِلَيَّ يَمِشِي دَه.. بِيَقَى مَقْرَرٌ إِنَّهُ مَاشِي...
عَارَفَ هُوَ بِيَعْمَلُ إِيَّاهُ... وَطَالَمَا مَجَاشَ وَاتَكَلَّمَ... بِيَقَى أَنَا
مَسْأَلَشَ... أَسِيبُهُ يَمِشِي...
- (يَتَنَهَّدُ مَبْتَسِمًا... يَنْفِثُ دَخَانَهُ) صَح...صَح... وَمَشَ صَح... سَاعَاتِ
كَلَامِكَ بِيَقَى صَح... وَسَاعَاتِ لَاء... كُلَّ حَالَةٍ وَلِيَهَا ظُرُوفَهَا... أَنَا
اتَعَامَلْتُ مَعَ مَخْتَارٍ قَبْلَ كَدِهِ... أَهْ طَبَعًا كَانَ فِي نِطَاقِ الشُّغْلِ
وَكَانَتْ فِتْرَةٌ قَلِيلَةٌ... بَسْ أَقْدَرُ أَقْلِّكَ مَبْتَسِمًا بِالثَّقَةِ... إِنْ مَخْتَارَ
مَشَ مِنَ الرَّجَالَةِ إِلَيَّ بَتَهْرَبَ... أَكِيدُ شَافَ مِنْكَ حَاجَةَ خَلْتَهُ
بِيَأْسٍ وَيَبْعَدُ... حَاجَةَ مَتَخَلِيشَ الْمَوْضُوعِ بِيَتَدِي أَصْلًا... حَاجَةَ
هُوَ مَتَأَكَّدُ إِنْ الْكَلَامَ فِيهَا مَشَ هِيَجِبُ أَيَّ تَتِيجَةَ... فَقَرَّرَ إِنَّهُ
يَبْعَدُ.....
- (نَبْرَةٌ هَادِئَةٌ...) أَنْتَ لِيَهُ وَاحِدَ صَفْهِ؟! لِيَهُ جَائِ عَالِيَا أُوِي كَدَهُ!!

- (يُحرك رأسه بالنفي...) واللّه العظيم ما واخذ صفه... أنا واقف
بره... أنا شايف الوضع أكثر منك... والأهم... أنا عارفك يا
علية.....

- (تبتسم بألم...) عارفي؟!!

- (يبتسم) آه... عارفك... عارف إني معرفكيش... ومحدش يعرفك...
أنتي مبتسمحيش لحد إنه يقرب منك... من "علية"...
مبتشاركيش همومك مع حد... أجدع بنت قابلتها في حياتي...
دايما واقفة مع الكل... سند لكل اللي حواليلي... بتدي... بس
مبتخديش... مبتخليش حد يسمعك... (يبتسم) عليه أنا عمري
ما شفتك بتعيطي حتى..... ليه بتعملي كده؟! ليه قاسية على
نفسك أوي كده?!!

- (تحقق به بحزن شديد.....)

- (يُمسك يدها) عليه أنتي حد كويس... أنتي إنسانة كويسة
فعلا... متستهليش اللي بتعمله في نفسك ده... شاركى...
اتكلمي... خدي... اتسندي على اللي حواليلي.....

- (تدمع عيناها... تُحقق بيده التي تُمسك يدها)

- (يربت على يدها بحنان...) عيطي... اضعفي... (يبتسم) عادي
والله... أنتي إنسان مش هولاكو يا عليه.....

- (تبتسم.. تتدارك ضعفها.. تقوم بسحب يدها.. تبتلع غصة
بكائها) إمممم... هوه أنا.....

- (مبتسمًا) أنتي إيه?!!

- (بتزدد) تفتكر... لو كلمت مختار... هيرد عليا؟! الموقف النهاردة
كان سخيف أوي..... تفتكر يقبل يشوفني?!!

- (بيتسم) هيقبل.... أنتي بتقولي إنه فكرك إنه كان معجب بيكي..
ولسه بيسأل... كلميه.... هيقبل.... وهيجي....
- (تُحدق بهاتفها.....)
- (يتنهد مبتسمًا... يُمسك هاتفها) خدي كلميه وأنا معاي...
عشان لو أخرجك ألحق أنقلك على الطوارئ!!
- (تبتسم ابتسامة عريضة...)
- (بيتسم لها بحنان..) يلا....
- تُمسك هاتفها... القليل من التردد... ثم تُقرر أخيرًا مهاتفته...
نصف دقيقة اتصال..... ولكن بلا إجابة... تضع هاتفها جانبًا...
خيبة أمل....
- (تبتسم لخليل...) مردش....
- يمكن وراه حاجة... استني شوية....
- (تُحرك رأسها بالنفي مبتسمَةً...) لا.. هوه مردش عشان مش
عاوز يرد... صدقني موقف النهارده كان سخيف....
- (بيتسم ابتسامةً عريضةً) أنتي واثقة يعني!؟
- (تبتسم بأم...) آه.... واثقة....
- (يُحرك رأسه بالنفي مبتسمًا.. ينظر بعيدًا...)
- (تتنهد...) ما علينا... بقلك إيه... اسحبنى من حوار "سمارا"
ده.... ممكن تحط "نورا" مكاني.... العرض كبير ودي فرصة كبيرة
بالنسبالنا.. وأنا مش تمام الفترة دي.... مش هبقى مركزة أوي
ال....
- يُقاطع حديثها اتصالً من "مختار"... بيتسم "خليل" لها ابتسامةً
عريضةً.... "رد يا عم الواثق أنت... "تبتسم.... ثم تستقبل المكالمة....

- ألو... ..
- ألو مختار....
- أنا آسف جدا يا علية... كنت ناسي التلفون في السيارة.....
- (بخجل...) لا عادي ولا يهملك..... أنت...
- (صمت قليل.....) أنا إيه؟!
- (بتردد...) إممممم... ممكن أشوفك؟!
- (صمت قليل....) ممكن جدا...
- (تبتسم...) تمام... دلوقتي؟!
- أنتي فين؟!
- في Amadious اللي قصاد الشركة... عارفه؟!
- آه... آه... عارفه... تمام... أنا جايلك....
- هستناك.... باي.
- باي.
- بتبسم لخليل ابتسامة خجل..... بيتسم لها هو الآخر....
- علية... أنتي كلمتي مختار ليه؟!
- (تُحدق به.. صمت قليل...) هجاوبه على سؤاله.....
- (يُحرك رأسه بالإيجاب....) تمام....
- (تبتسم له....) أنت كمان إنسان كويس.....
- (بيتسم) مش أوي واللله... بس بحاول... بحاول... (يتنهد بعمق... يقف استعدادًا للمغادرة....) طيب... أنا همشي... اقعدني مع نفسك شوية... قبل ما مختار يبجي.....
- (تُحرك رأسها بالإيجاب.....)

- يرحل خليل.... تمر نصف ساعة.... فالساعة..... يطل "مختار"....
- (يبتسم لها....) hi
- (تُحدق به بابتسامةٍ....) أنا آسفة....
- (يعقد حاجبيه) على إيه!؟
- على حاجات كثير.....
- (يبتسم) قولهم... قولي الحاجات الكثير دي... عاوز أعرفها....
- (ابتسامة لطيفة) يعني.... آخرهم... الموقف السخيف بتاع النهاردة....
- ده آخرهم.... أولهم!؟
- (لحظات صمت....) أولهم... إني مسألتكش أنت بعدت ليه....
- (يبتسم....) تمام....
- (تُحدق به قليلا.... تتنهد....) مختار... أنت بعدت ليه!؟
- (يبتسم....) أنتي اللي كنتي بتبعديني يا عليه.... أنتي اللي قولتيلي ابعدي....
- (تُحرك رأسها بالنفي...) مش حقيقي....
- لا حقيقي.... أنا فعلا كنت معجب بيكي جدا... وكنت حاسس نحيتك بحاجة... وكنت متأكد في البداية إنك حاسة بنفس الإحساس.... عنيكي كانت بتقول كده.... عنيكي بس.... تصرفاتك كانت حاجة تانية.... كل تصرفاتك كان بتقولي ابعدي... أنا كويسة وأنا لوحدي.... أنا مش محتاجاك في حياتي.... كنتي بتحطيني في ركن الصاحب.... وأنا مكنتش عاوز الركن ده معاك... كنت عاوز أبقى أكثر من كده.... عشان كده بعدت....
- (تُخفض رأسها... نبرة خافتة....) بس أنا كنت عاوزاك....

- (يبتسم...) فعلا؟!
- (تنظر إليه بابتسامة أم....) فعلا....
- (يُحرك كتفه باللامبالاة) إزاي؟! عاوزاني ليه؟! عاوزاني ليه وأنتي على طول جامدة ومكتفية... على طول ساكتة ومبتتكلميش ومبتشتكيش... على طول مسيطرة على كل حاجة بالمللي في حياتك... حتى لما كنت بقلك تاكلي؟!؟! على طول شبعانة!! على طول مش محتاجة حاجة!! ده إيه؟! ده اسمه إيه؟! عاوزاني ليه؟! عاوزاني ليه يا عليه?!?
- (لحظات صمت... تدمع عيناها...)
- (يُحدق بها....) أنتي بتعيطي!?
- (تُخفض رأسها....)
- (صمت قليل.... نبرة حنان...) عليه.. أنا آسف...
- (ترفع رأسها مبتسمة بعينين دامعتين...) أنا اللي آسفة...
- (يبتسم لها بحنان....) عليه... اتكلمي!!
- (تقوم بتجفيف دموعها... تنظر بعيداً....)
- (يقوم بإشعال سيجارة... يُحدق بها)
- (تتنهد... تنظر إليه مبتسمةً....) أنا بقالي سنين عايشة لوحدي... وضع معين اتحطيت فيه... غصب عني... (تبتسم بألم) يعني.. زي ما يقولوا... قدر... (تُخفض رأسها..) ما علينا.... (تنظر إليه مجدداً) اتعودت أعمل كل حاجة لوحدي... ولنفسي... اتعودت محتجش حد... حتى في أبسط الأمور... الموضوع كبير معايا... بقيت أحس إني عبء على أي حد... بتكسف أطلب حاجة من حد... (تبتسم بألم.. بتردد) أنا.. مبعرفش أقول إني... موجوعة.. أو مضايقة... (تدمع عيناها مبتسمة) والله ما بعرف... عبء...

بحس إني عبء... على أي حد يا مختار... مش متخيلة إني ممكن أقعد مع حد أقوله إني محتاجة حاجة... أي حاجة... ثقيلة أوي على قلبي.... (تمسح دموعها المتساقطة بابتسامةٍ عريضةٍ) مش تقولي جامدة ومكتفية ومش عارفة إيه... (تُحرك رأسها بالنفي)... مش حقيقي....

- (ينظر إليها بحزن شديد....)

- (تبتسم بألم...) عارف... أنا ساعات بحس إني نفسي أحس بالشفقة... نفسي أصعب على حد... أنا مبصعبش على حد يا مختار....

- (يُمسك يدها...) عليه....

- (تُفلت يده بحنان.. تبتسم بألم) عاوزني أتكلم... أديني اتكلمت... أديني عرتلك كل ضعفي اللي كان نفسك تشوفه..... (تنظر في عينيه مباشرةً) مبسوط؟!

- (يُحرك رأسه بالنفي...) لا... مش مبسوط يا عليه....

- (تبتسم ساخرةً.. تنظر بعيداً....) مفيش حد مكتفي بنفسه يا مختار.... مفيش حاجة منفسوش يلاقي بني آدم يشاركه حياته... بس في إنسان الظروف بتخليه كده... عشان يقدر يحمي نفسه... أنا ده اللي عملته... وده اللي وصلني للمرحلة دي... (تنظر إليه) أنت متخيل أنا كام مرة كان نفسي أترمي في حضنك وأقلقك اسمعني..؟! (نبرة باكية) أنت متخيل قد إيه بُعدك وجعني؟! أنا عارفة إنه مكنش فيه بينا حاجة بشكل واضح.... بس كان ممكن يبقى فيه...! أنت اللي هربت...! هربت وأنا مكنتش فاهمة....!! يمكن كان مفروض أسألك...! يمكن!! بس أنت هربت... هربت يا مختار... هربت ووجعتني... خلتنني

أقول إن أنا صح... كل اللي بعمله صح..... إني مينفعش أحتاج
لحد.... ولا أتعلق بحد....

- (نبرة حنونة...) أنا آسف....

- (تبتلع غصة بكائها... تبتسم....) خلاص... مش مهم....

- (يبتسم لها...) لا.. مهم...

- (تنظر إليه....)

- (يُحرك رأسه بالإيجاب) مهم.... عارفة.... (يبتسم) أنا اللي
طلبت إنك تبقي مسئولة عن التعاقد مع شركتنا.... وده كان
شرط من شروطتي....

- (تعقد حاجبيها...)

- (يُحرك رأسه بالإيجاب...) عليه... أنا كمان بخاف على نفسي....
وده اللي خلاني أمشي من قبل ما حاجة تبتدي بينا... كنت
حاسس إني هتعلق بيكي... في نفس الوقت... كنت شايف إنك
شخص مش مناسب... لأني راجل بحب المشاركة... في كل حاجة...
الوحش قبل الحلو... بحب أسند وأتسند... يمكن ده اللي شدي
ليكي في البداية... كنت شايف فيكي السند... والقوة... بس
لما لقيتك رافضة إنك تشاركيني حياتك في المقابل... مشيت...
مشيت بس كنتي على طول في بالي... (يبتسم) عارفة... كنت
حاسس إن فيه حاجة ناقصة... حاجة غلط... حاجز.. أنا مش
فاهمه... (لحظات صمت... يتنهد) عليه.. أنا شايف إننا ندي
لبعض فرصة تانية.... أنتي بجد عجباتني.... أكثر من عجباتني
كمان.... جزء مني متعلق بيكي بشكل غريب....

- (تُحدق به....)

- أنا عارف إنك خايفة.... وعارف كمان إن اللي زيك بيعرف يقدر
كويس أوي... وأنا راجل بعرف أدي....
- (تبتسم بخجل...) أنت فعلا حنين أوي....
- (يبتسم لها...) ده حقيقي... بس مش كل الناس... أنا ببقى حنين
معاكي بشكل تلقائي... عشان ببقى عاوز أبقى حنين عليكى....
أنا ببقى مبسوط لما ببقى حنين عليكى يا عليه.....
- (تدمع عيناها مبتسمةً.... تُحرك رأسها بالنفي) أنا ممكن أموت
منك دلوقتي على فكرة....
- (يبتسم ابتسامَةً عريضةً...)
- (تتساقط دموعها.. ما زالت تبتسم) أنا بتكلم جد... أنا عمر ما
حد حن عليا قبل كده....
- (يمسح دموعها...)
- (تزيح يده بحنان مبتسمة...) بس....
- (يبتسم... إيه!؟)
- (ابتسامَة عريضة تمتزج بدموعها) هموت والله....
- (يبتسم ابتسامَة عريضة.... يعتدل في جلسته) تاكلي؟؟!!
- (تبتسم.....) يا لهوي.... ده أنا هموت من الجوع!!!!

المُضحك المُبكي

تُجري "ريهام" اتصالاً هاتفياً بـ "علي" ... لا إجابة...
تُهاتفه للمرة الثانية..... لا إجابة.....

تضع هاتفها جانباً... تتنهد... تُشعل سيجارةً نسائيةً بنكهة
التوت.... تنفث دخانها بكثافةٍ..... تُحرق بهاتفها... تفكر بإعادة
الاتصال به مرةً ثالثة... ولكنها... تُفضل الانتظار قليلاً.... وبعد مرور
عشر دقائق... يُهاتفها رقم غريب... تُسارع بالإجابة... أغلب الظن
أنه "علي"....

- ألو!!!!

- ألو.... ريهام... أنا مي....

- (تنهد.. تشعر بقليلٍ من خيبة الأمل....) أيوه يا مي....

- إزيك؟!

- تمام الحمد لله.... أنتي عامله إيه؟!

- أنا كويسه.... فاضيه؟! كنت عاوزه أتكلم معاكي شويه....

- (تصمت قليلاً.... تُفكر بـ "علي".... ماذا لو أعاد الاتصال بها....)

- (تلاحظ صمتها الغريب.... تُحاول تجنب الإحراج....) بصي لو مشغوله ممكن نتكلم بعدين مش مشكلة....
- أنتي فين؟!
- أنا بلف بالعربية شويه....
- أيوه فين يعني؟! أنا في وسط البلد.... لو قريبه تعالي....
- أنتي قاعده فين؟! Windsor coffee!
- آه.... قريبة؟!
- نص ساعة وأكون عندك.... يناسبك؟!
- تمام... بس حاولي متتأخريش....
- لا لا... نصاية ويمكن أقل كمان.... عاوزه حاجه أجهالك وأنا جايه؟....
- لا لا.... متتأخريش بس والنبي....
- والله ما هتأخر.... أنا جنك أصلا....
- طيب.... مستنياكي.... سلام.
- سلام..
- تُنهي مكالمتها.... ثم تُحدق برقم "علي".... ما زالت تُفضل الانتظار.... وبعد مرور نص ساعة بالتمام والكمال.... تطل "مي" ... تجلس أمامها... تبتسم لها.... دون حديثٍ....
- (تبتسم لها باستغراب....) مالك يا مصيبة... هبتي إيه?!
- (تبتسم ابتسامَةً عريضةً....) لسه ما هببتش... بس ناويه أهبب....
- (تُشعل سيجارَةً.... تُحدق بها....) طب إرغي....

- (تصمت قليلاً.....) هتجوزه.....
- (تتنهد... نصف ابتسامة.....)
- (تنظر بعيداً... صمت قليل.....)
- (تطرق بأصابعها على الطاولة... تنفخ دخانها بكثافة... تُحدق بها.....)
- (تنظر إليها... تبتسم بآلم..... بصوتٍ خافتٍ....) مفيش حل تاني.....
- (بنبرةٍ حادةٍ....) لا فيه.... فيه إنك متجوزهوش.... وتكملي حياتك بشكل طبيعي لحد ما ربنا يرزقك بابن الحلال اللي تحبيه بجد ويبقى راجل وقد المسئولية... فيه إنك تستني عشان تعيشي حياة طبيعية زي أي بنت ربنا خلقها.... فيه إنك مش قليلة يا مي..... فيه إنك أبدا مش قليلة عشان تختاري الحل الرخيص ده.....
- (تبتسم بسخرية.....) شعارات... كلها شعارات... وأنا بصراحة زهقت.... زهقت ومليت وقرفت.... أنا كلها كام شهر وهيبقى عندي ثمانية وثلاثين سنة يا ريهام.... عاوزاني أستني إيه أكثر من كده.... أستني إيه؟! أستني لما فرصتي في الخلفة تنعدم.... أستني إيه... أستني إيه وأنا كل يوم بصحى على زعيق وشتايم وقرف وإهانة وبهدلة كإني لسه عيلة في أولى جامعة.... أستني إيه?! هتفرق في إيه؟! بالله عليكي هتفرق في إيه... أمال لو مكتتيش عارفه كل حاجة... وعارفه الأرف اللي أنا عايشه فيه من ساعة متخرجت واشتغلت لحد دلوقتي.... أربعتاشر سنة ذل واستغلال ومهانة وبتقوليلي استني.... أستني إيه يا شيخة.... أستني إيه!.....

- (تحرك رأسها بالنفي.... تنفث دخانها بشراهة.... يبدو عليها الاستياء... هي تدرك تماما ما تمر به صديقتها... وفي حديثها كثير من المنطق... ولكن... لا يمكنها أن تخبرها بأن تمضي قدمًا في اتخاذ قرار سيئ كهذا..... تصمت.... تُحدق بها كثيرًا.... تنظر بعيدًا.....) ماشي يا مي... بس..... (تتنهد...) أنا فعلا مش قادرة أوافقك على قرار زي ده.... مقدرش أقلقك روحي اتجوزي واحد أصغر منك بست سنين مبيشتغلش وعمره ما هيشغل وهيفضل طول عمره عايش عالية عليكي وعلى فلوسك وتعبك..... مش ناقصك حاجة يا بنت الناس.... مش ناقصك حاجة... والله ما ناقصك حاجة.... دكتورة زي القمر... مثقفة ومتربية.... وعندها خبرة كبيرة في الحياة... دمك خفيف.... كل حاجة... عندك حاجة.... ويا ستي لو على موضوع الخلفة فده في إيد ربنا قبل أي حاجة.... مش أنا اللي هقلقك كده يا مي.....
- (تبتسم بألم....) أي كلام.... والله العظيم أي كلام.... اللي إيده في الامية مش زي اللي إيده في النار.... الكلام ده تقوله لو أنا إنسانة طبيعية عايشة في وسط ناس طبيعيين.... كنت هقلقك ماشي يا ستي.... هتنيل على عيني وأستنى.... يمكن جدا أساسًا مكنتش هفكر في الموضوع ده كله على بعضه.... بس ده مش الواقع.... الواقع إني عايشة مع أب وأم معندهم مش ذرة رحمة... وأخ متسلط قذر.... حتى فلوسي اللي بجبها من تعبتي وشقايا زي ما بتقولي والله والله يا بنتي ما عارفه أتهنى بيها..... طلباتهم مبتخلصش..... ويا ريت سايبني في حالي بعد كل ده.... شتايم وتهزيق وضرب وإهانة قدام اللي يسوى واللي ميسواش.... قوليلي هتفرق في إيه لما أتجوز طارق.... على الأقل.... هيبقى ليا بيتي لوحدي.... بتاعي... هبقى الأمرة الناهية فيه... ويمكن ربنا يرزقني بحتة عيل يعوضني عن حاجات كتير اتحرمت

منها..... وأهو أدام الناس هيبان إني واحدة عايشة طبعي....
معاها راجل زي القمر طول بعرض..... ومحدث هيجرح فيا
بالكلام في الراحة والجاية... ولو على الفلوس... ما أنا كده كده
أنا اللي بصرف... سواء هنا واللا هناك..... أنا اللي بصرف.....
بس في بيتي.... هيبقى الوضع غير..... هبقى أنا الكل في الكل.....
صدقيني أنا المستفيدة في الأول والآخر..... مقارنة بوضعي الحالي
في بيت أهلي.... أنا اللي هبقى كسبانة.....

- (تتهند بسخونة.....) بس أنتي عارفة إنه مبيحبكيش يا مي....

- (تبتسم....) عارفه.... لا هوه بيحبني ولا أنا بحبه يا ريهام....
هوه الموضوع كله على بعضه صفقة..... والطرفين هيقوا
ربحانين فيها.... هوه هيلاقى اللي هيصرف عليه... وأدام الناس
هيبان سي السيد اللي اتجوز دكتور زي القمر... وأنا هيبقى
عندي بيتي لوحدي... محدش هيقدر يهني تاني يا ريهام....
قدام الناس هبقى متحامية فيه.... وزى ما قتلتك..... إن شاء
الله ربنا يرزقني بطفل يعوضني... طفل أعيش عشانه وليه.....
(تتهند....) وبعدين طارق مش شخص سيئ.... هوه يمكن ما
يحبنيش.... بس هوه مش شخص سيئ.... يمكن لو اتجوزنا ربنا
يصلح حاله ويهديه.... يمكن.... متعرفيش.... ويا ستي لو ده
محصلش.... أنا هبقى مرتاحة.... والله هبقى مرتاحة!!!

- (تُحدق بها باستنكار.....) إزاي يعني.... هتبعي مرتاحة إزاي...
هتبعي مرتاحة وأنتي بتصرفي على شحط زي ده.... هتبعي
مرتاحة وأنتي قائمة بدور الراجل والست في البيت.... هتبعي
مرتاحة وأنتي عايشة مع راجل عارفه إنه معاكي بس عشان
تصرفي عليه!!!!!! في إيه يا مي!!!!!!

- (تُحرك رأسها بالإيجاب.... بنبرة هادئةٍ) آه..... آه هبقي مرتاحة..... صدقيني لو كنتي مكاني هتفهمني قصدي... هتحسي كلامي... (تصمت قليلا.... تدمع عيناها...) ريهام... افهميني... أنا معتش قادرة أحب.... أنا معدش عندي ثقة في حد... أنا فقدت عاطفتي ورجبتي كلها في الرجالة.... أنا نفسي أبقى أم... بس.... والله العظيم ما عاوزه حاجة غير كده.... عارفه... لو البلد دي فيها قانون يسمحلي إني أتبنى طفل من غير جواز... والله العظيم كنت عملتها من زمان... وأخدتاه واختفيت.... بس للأسف... أنتي عايشة تحت رحمة مجتمع ظالم بكل المقاييس... فاكرة لما حاولت أمشي وأسبهم وأستقل بنفسي عملوا إيه.... فاكراه... فاكراه والا مش فاكراه!!!

- (تنفث دخانها.... تُحرك رأسها بالإيجاب.... يبدو عليها الاستياء الشديد....)

- (تبتسم بأم... فضحوني... في كل حته... في الشغل... وفي سكني الجديد... وفي كل حته.... واضطريت أرجع ليهم تاني.... عاوزاني أعمل إيه... أروح فين... وأستنى ليه!!!!!! عاوزاني أستنى إيه يا ريهام!!!.... (تتنهد بسخونة.... بصوت خافت...) أستغفر الله العظيم....

- (تربت على يدها بحنان.... تتنهد...) طب أنتي عاوزاني أقلك إيه يا مي... واضح إنك جاية وواحدة قرارك خلاص.... عاوزاني أقلك إيه....

- (تبتسم لها...) أنا معنديش حد غيرك... عاوزاكي تبقي معايا.... جنبي....

- (تتنهد...) بس أنا مش مقتنعة ولا موافقاكي على اللي هتعمليه.... أبدا مش موافقاكي يا مي...

- (تحرك رأسها بالنفي.... تبتسم...) مش أنتي كل اللي فارق معاي
إني أكون مبسوطة!!!
- (بنبرة حنون....) طبعًا....
- خلاص..... خليكي معايا وبس.... أنا عارفه مصلحتي فين.....
صدقيني... مش كل حاجة في الدنيا بتبقى على هوانا..... ساعات
بيبقى أقصى حاجة بتوصلها... إنك تتفادي الأسوأ المؤلم...
بالسيئ المريح.....
- (تبعد نظرها..... تتنهد....) أنا مش مقتنعة بكلامك يا مي.....
بس.... (تنظر إليها....) أنا معاي في أي حاجة هتقررني إنك
تعملها ما دام شايفه إنها هتحسن من وضعك وهتبسطك.....
مش هسيبك.....
- (تربت على يدها بحنان.....) مش عايزه منك أكثر من كده يا
ريهام..... خليكي معايا بس.....
- يهتز هاتف "ريهام" ... تشير "مي" إليه... (تلفونك بيرن.....)
تُسكّه بحماس..... وها هو "علي" يهاتفها بعد طول انتظار.....
تبتعد قليلا عن الطاولة..... ثم تجيبه....
- علي.....
- (يتنهد....)
- (تصمت قليلا.....)
- أنتي فين؟!
- في Windsor وسط البلد....
- لوحدي؟!
- كنت لوحدي... دلوقتي مي معايا....

- (يصمت.... لا إجابة....)
- علي.....
- إيه يا ريهام....
- عاوزه أشوفك.....
- خلصي مع مي وكلميني....
- (تصمت.....)
- (يُكرر) ريهام..... خلصي مع مي وكلميني.... هستناكي.....
- متخافيش.....
- (بنبرة انكسار....) ماشي....
- سلام.....
- سلام.....
- تعود لطاولتها حيث "مي" تنتظرها.... تلاحظ علامات الحزن
- على وجهها.....
- علي!!؟
- (تُحرك رأسها بالإيجاب....)
- (تُحدق بها.... بألم....)
- (تبتسم لها.... بعينين دامعتين.... بنبرة خافتة...) بحبه.... بحبه
- ومش عارفه أنساه.... مش عارفه.....
- (تتنهد....) يا أختي الحب ده لعنه..... لعنه....
- (تتساقط دموعها دون بكاء....) حاولت والله.... والله العظيم
- حاولت.... مقدرتش.... بحبه.... بحبه بكل ذرة في جسمي وعقلي

- (مُمسك بها تفهها..... تُحَدِّقُ بِرَقْمِ "عَلِي" كَثِيرًا.... تُرَاقِبُهَا صَدِيقَتَهَا
بِهَدْوٍ.....) أَنْتِي مَشْرَبْتِيشِ حَاجَةَ عَلِي فِكْرَةَ....

- (تَصْفَعُهَا مَجْدَدًا عَلِي وَجَنَّتْهَا...) مَشِ عَاوَزَهُ أَشْرَبَ حَاجَةَ....
كَلِمِيهِ بَقِي.... تَحْبِي أَقْوَمَ طَيِّبَ عَشَانَ تَكَلِمِيهِ!!!!!!
هَنَا يَطْلُ "عَلِي"... يَقِفُ أَمَامَ طَاوَلْتَهُمَا.... (لَا مَتَكَلَّمْهُوْشَ.... هُوَ
جَالِكُ بِنَفْسِهِ أَهْوْ...)

تَقْفِزُ رِيهَامَ مِنْ مَقْعِدِهَا.... تَحْتَضِنُهُ بِقُوَّةٍ.... يَرِبْتُ عَلِي ظَهْرَهَا
بِحَنَانٍ... يَضْمَعُهَا قَلِيلًا..... يُقْبَلُ جِيئِنَهَا.... تَفْلَتُهُ.... تَبْتَسِمُ لَهُ....

- (يَمْدُ يَدَهُ لِلسَّلَامِ....) إِزِيكَ يَا مِي....

- (تَقْفُ لَهُ... تَمْدُ يَدَهَا لِلسَّلَامِ.... تَبْتَسِمُ لَهُ....) الْحَمْدُ لِلَّهِ تَمَامًا....
أَنْتِ عَامِلٌ إِيْهِ؟....

- (يُحْرِكُ رَأْسَهُ بِابْتِسَامَةٍ....) الْحَمْدُ لِلَّهِ....

- (تَبْتَسِمُ مِي لَهَا.... مُمَسِّكٌ بِحَقِيبَتِهَا اسْتِعْدَادًا لِلْمَغَادَرَةِ.....)
طَبَّ أَنَا هَسْتَأْذِنُ بَقِي....

- (يَبْتَسِمُ لَهَا عَلِي....) لَا.... خَلِيكِي قَاعِدَةٌ.... أَنَا عَاوَزُكَ فِي
مَوْضُوعٍ....

- (تَنْظُرُ لَهُ بَانْدَهَاشٍ....) عَاوَزْنِي أَنَا؟!!!

- (يُحْرِكُ رَأْسَهُ بِالْإِجَابِ....) آه... مِمَكْنِ تَعْدِي لَوْ سَمَحْتِي?!!!

- (تَعُودُ لِمَقْعِدِهَا.... تَنْظُرُ لـ"رِيهَامَ" الَّتِي يَبْدُو عَلَيْهَا الْإِنْدَهَاشَ
هِيَ الْآخَرَى.....)

- (يَنْظُرُ عَلِي لِرِيهَامَ.... يَبْتَسِمُ لَهَا) أَعْدِي حَبِيبِي....

يَجْلِسُ ثَلَاثَتُهُمَا عَلَى الطَّاوَلَةِ.... كَثِيرٌ مِنَ الصَّمْتِ....

- عَلِي: تَشْرَبُوا إِيْهِ؟!

- ريهام: أنا هاخذ قهوة زيادة.....
- مي: (تبتسم بلطف...) هاخذ زيها....
يشير للنادل.... يطلب منه بلطف ثلاثة فناجين من القهوة....
وقد كان.....

دقائق من الصمت.... يتجنب "علي" النظر للفتاتين... يشعل
سيجارته.... الكثير من الغموض... ولا أحد قادر على كسر حاجز
هذا الصمت.... إلى أن أتى النادل بالقهوة.....

- (يرتشف قهوته... ثم ينظر لريهام...)

- ريهام: علي... في إيه؟!!!!

- (ينظر لها... عيناه تحملان الكثير من الحديث... ولكن دون
إجابة.....)

- مي: علي..... في إيه.... رد علينا?!!

- (ينظر إليها هي الأخرى.... دون إجابة....)

- (تُمسك ريهام يده بحنان...) علي... في إيه يا حبيبي?!

- (يتنهد بسخونة... يُحدق بكلتيهما... يبدو عليه الاستياء.... ثم
يقرر أن يكسر حاجز الصمت...) اللي هعمله دلوقتي... تقريباً
أسوأ حاجة هعملها في حياتي.... (بيتسم...) لا مش تقريباً... اللي
هعمله دلوقتي.... أكيد هتبقى أسوأ حاجة هعملها في حياتي
كلها.....

- (تُحدق به كلتا الفتاتين بذعرٍ شديدٍ....)

- (يتنهد.... ينظر لريهام....) ريهام... أنتي أحسن بنت قابلتها في
حياتي كلها.... حرفياً... من غير أي مبالغة... أنا فعلاً مقابلتش
حد زيك قبل كده... ومعتقدش إني ممكن أقابل حد يحبني

قد منّتي حبتيني..... وعارف إني هعيش طول عمري ندمان إني
مقدرتش أحبك ربع الحب اللي أنتي حبهولي..... حاولت على
قد مقدر... بس للأسف الحياة مبتمشيش كده..... والله العظيم
حاولت..... بس..... (يتنهده...) مقدرتش... قلبي كان مع واحدة
تانية..... (ينظر لمي...)

- (هنا تُصاب مي بالذعر... تجحظ بعينها...)
- (يُحذق بـ "مي"...) غصب عني حبيتك... والله ما كان بإيدي.....
حاولت كده مصدقش اللي أنا حاسه... حاولت أفنّع نفسي
إني كل اللي أنا حاسس بيه نحيتك شوية إحساس بالتعاطف
والشفقة عشان ظروفك اللي بتمري بيها..... بس للأسف... ده
مكنش صح... أنا فعلا بحبك يا مي..... بحبك وأنا عارف إنك
عمرك ما حبتيني ولا حيتي غيري.....
- (تُصاب ريهام بجمود لا تستطيع الحراك... تتساقط دموعها
بشراسةٍ من عينها... في صمت تام.....)
- (بعينين دامعتين... يُمسك يد ريهام بقوة.....) والله العظيم أنا
ما أستاهل كل دموعك دي... أنا أوسخ بكتير من إنك تعطي
بسببي يا ريهام... أنا مستاهلكيش.....
- (بنبرةٍ حادةٍ جدا... تُحدثه مي) آه... عايز إيه يعني أنت
دلوقتي مش فاهمينك?!!!!!!
- (بيتسم لها...) مش عاوز حاجة..... أنا عارف إنكوا شايفني
دلوقتي أقذر إنسان في الدنيا.....
- (بنبرةٍ حادةٍ بسخرية... تحدثه مي) لا يا راجل متقلش كده...
أقذر إيه بس... ده أنتا معدي المرحلة دي بسنين ضوئية!!!

- (تنظر إليها ريهام.... تتساقط دموعها بقوة... بنبرة خافتة
جدا.....) بس.... بس يا مي.....

- (تقفز من مقعدها.... تجلس بجوارها....) بس إيه.... بس
أنتي..... (تكفف دموعها بيدها من على وجنتي ريهام....)
اييييييش.... متعيطيش..... والله العظيم مهتعيطي.....
اييييييش.....

- (تُحدق بها.... دون حديث... ودموعها لا تتوقف عن الانهمار.....)

- (يُحدق علي بالفتاتين.... يُدرك جيدًا ما قد فعله للتو.... يشعر
بانفطار قلب "ريهام".... وأن صديقتها "مي" في موقف لا تُحسد
عليه....) ريهام.... أنتي كنتي عاوزه سبب تكرهيني عشانه..
عشان تعرفي تنسيني.... وأديني بقدمهولك.... اكرهيني قد ما
تقدري.... وانسيني.... حاولت أبعد عنك من غير ما أجرحك....
بس أنتي أصريتني تعرفي الحقيقة... حتى لو مكنش ده أبدا اللي
أنتي متوقعاه..... تمسكك المخيف بيا كل يوم أكثر من اللي
قبله كان بيقتلني.... مكنتش عارف أعمل إيه.... حاولت أفتنعك
بألف حاجة غير الحقيقة.... عشان تبعدني.... ومصدقتنيش....
وفضلتني تحومي حواليا.... مكنش فيه حاجة غير الحقيقة هيه
الي هتقنعك.... هيه الي هتنسيكي..... والله العظيم عمري ما
قصدت أوجعك ولا أجرحك بالشكل ده.... بس... محدش بيختار
قدره... وأنا قدري إني حبيتها.....

- (تتساقط دموع ريهام بكثافة أكبر وأكبر.... تبدأ بالنواح
المكتوم.... تدفعها مي بقوة إلى صدرها.... تضمها بقوة.... ثم
تلکم علي بقوة في كتفه....) قوم!!!!!! قوم غور من هنا!!!!!!

- (يُحدق بها.... بهما.... يُدرك بشاعة ما قد فعله.....)

- (تلكمه بقوة أكبر مرات متتالية... وما زالت تحيط ريهام
بذراعها....بنبرةٍ حادّةٍ جدا) قوم بقلك.... امشي من هنا!!!!!!
امشي!!!!

- (يقف استعدادًا للمغادرة.... يُحدق بهما.... يستمع إلى صوت
نحيب ريهام... صوت انفطار قلبها الدافئ.... كل ذنبها أنها أحته
بصدق وبإخلاص.... بعينين دامعتين.... بصوت مختنق....) أنا
آسف.... والله العظيم آسف....

- (تُحدثه مي... بنبرة حادة.... غاضبة....) غور!!!!

- (ينظر إليهما لمرةٍ أخيرة.... ثم يُغادر المكان...)

تبكي ريهام بحرارةٍ على صدر "مي".... تضمها الأخرى بقوةٍ....
تُقبل جبينها.... تُخبرها أنه لا يستحق كل هذا البكاء.... تُخبرها
أنها الأفضل... وأنه رجل شرقي آخر... أناني.... لا يستطيع الرحيل في
سلام دون أن يُخلف وراءه الكثير من الأذى والحطام.... تُخبرها أنها
ستكون بخير... وأنها الآن ستتححرر من لعنة حب ذلك الأبله... الذي
اعتقد لوهله أنه سيستطيع التفريق بين صديقتي عُمر.... معتقدًا
أن كل النساء سواسية.... تُقبلها بحرارةٍ على وجنتها.... تُكفف كل
دموعها أولاً بأول.... تبسم لها... تُخبرها أن قلبها الدافئ سيتعافى مع
الأيام.... وأنه لو خيراً... لبقى.... تُخبرها أنها ستتذكر تلك التجربة
بعد سنواتٍ طوالٍ كدعابةٍ سخيفةٍ حين تحتسيان القهوة في شرفة
منزلها وبين ذراعيها طفلة جميلة تُشبه والدتها.... تُخبرها أنها تُحبها
كثيراً.... تُهدئ من روعها.... تُخبرها مجدداً أنها تحبها كثيراً....
كثيراً.....

- (تفلت ريهام ذراعيها برويةٍ... تشعر الآن أنها أفضل بقليل....
تبسم بخجل لها... تُحدق بها....)

- (تبتسم لها هي الأخرى.... ما زالت تكفكف بيدها دموعها من على وجنتيها.....)

- (ما زالت تُحدق بها..... تبتسم... كم هي ممتنة لوجودها الآن.....)

- (تبتسم لها.... تصمت قليلاً....) تيجي نقفل تلفوناتنا ونسافرنا يومين أي حته... لوحدنا?!!

- (تُحرك رأسها بحماس شديد.....)

- (تبتسم لها.....)

- (ثم... بصوت خافت... دلوقتي?!?!.....)

- (تُحرك رأسها بالإيجاب....) دلوقتي....

- طب..... وأهلك?! والشغل?! وطارق?!

- (تبتسم....) they can wait If not .. let them burn in hell
.....

تحتضنها بقوة..... ثم تقرران السفر بعيداً معاً... لمدة لا بأس بها من العزلة.... لإعادة ترتيب كل الأفكار.... للهدنة.... للبحث عن القليل من السلام..... وليحترق العالم... إن لم يمكنه الانتظار.....

ما بعد الحب

رائحة سجائر ..

يفتح عينيه رويداً... يجدها تجلسُ على حافة السرير.. تُدخن
سيجارة... تحمل كوباً من القهوة في يدها الأخرى... تُحدق به
مبتسمةً

- - مساء الخير ...

- (يفرك عينيه.. نبرة هادئة) أنتي دخلتي إزاي؟

- (ما زالت تبتسم) الباب كان مفتوح

- (يعتدل قليلا في جلسته) نعم؟!

- (تناوله كوب القهوة) ده بجد على فكرة... كلمتك كثير مردتش...

عديت عليك لقيت الباب مفتوح... اتخضيت.. دخلت لقيتك

نايم... عملت الكوباية المحترمة دي... واستنيتك تصحى

- (يتنهد... يرتشف القهوة)

- عادي... ممكن تكون نسيت تقفله وراك.. بتحصل ...

- (يُحرك رأسه بالإيجاب).. أنتي بتعملي إيه هنا؟!

- (تجحظ بعينيها مبتسمة)

- (يعبث بشعره) قصدي يعني.. إيه اللي جابك!؟
- (تقف مغادرة الغرفة) لا أنت كلامك زي الأرف.. فوق كده وأنا برة ...
- صبا ..
- (تلتفت)
- الساعة كام!؟
- عشرة... (تبتسم) بالليل... إحنا بالليل يا تري... (ثم تُغادر الغرفة)
- (يُتمتم مغادرًا السرير) ما أنا عارف إننا بالليل... يا خفيفة الظل !!
- يقف أمام المرأة... يرتشف قهوته... يقترب كثيرًا من المرأة... كثيرًا
- لذلك الحد الذي لم يعد يُمكنه من رؤية ملامحه
- أنت بتعمل إيه!؟
- (ينتفض)
- (تبتسم له...) بتعمل إيه!؟
- (يتنهد... نبرة انفعال) اطعلي برة يا صبا ...
- (تحقق به في غضب شديد)
- (يُكرر.. نبرة هادئة) صبا ...
- تغادر الغرفة... وما هي إلا لحظات حتى يسمع صوتًا أشبه بصوت انفجار صغير... نعم... لقد غادرت منزله... يتنهد... يُمسك بهاتفه... يُجري اتصالا...
- تنزل!؟
- (صمت قليل) أنزل.... قهوة برعي!؟
- لا لا... خلينا نقعد في مكان نضيف... مش طالبة دوشة ...

- ماشي ... سلام.
- سلام.
- وبعد مرور ساعةٍ.. وفي المكان المتفق عليه
- (يشعل سيجارة)
- (يحدق به)
- (بيتسم له ... ثم يقوم بطفيها... يطلب من النادل "شيشة" بطيخ)
- (يتنهد) آسف بجد... بس أنا فعلا بحاول أبطلها ...
- (بيتسم) الشيشة تمام؟!!
- آه... عادي ...
- (ما زال يبتسم) طب وتبطل السجائر.. ليه علاقة بتقل دمك؟!!
- (بيتسم هو الآخر) مش أوي.. بس... آه.. يعني
- بس أنت إيه اللي خلى الموضوع يضرب في دماغك فجأة كده؟
- (يعقد حاجبيه) موضوع إيه؟.. آه.. السجائر.. لا هوه من زمان في بالي.. بس المرادي نويت أعملها بجد ...
- آه.. ليه بقى?!!
- (نصف ابتسامة) يعني.. بقيت أقرف منها... ملهاش لازمة..
- يحضر النادل "الأرجيلة" ... ينفث بها قليلا... يُناولها لـ "أسامة..
- (ينفث دخانها) تمام.. تسلم ..
- يحدق "تركي" بالتلفاز... يبدو شاردًا قليلا...

- (يُقاطع أسامة شروده) طب تقل دمك وقلنا نقص نيكوتين
وعمال تهرش وبتاع... بس سرحانك وتوهانك ده إيه؟! نيكوتين
برده؟!

- (بيتسم.. صمت قليل) أنا صحيت لقيت صبا جنبي عالسرير ...

- (يجحظ بعينيه) عريانة?!?!

- (بيتسم ابتسامة عريضة) عريانة إيه يا أخي !!!

- أمال إيه جنبي على السرير دي؟!

- (يُحرك كتفه باللامبالاة) صحيت لقيتها أدامي... بتقول إن الباب
كان مفتوح...

- أوباللا... لا كده مش صح...

- (نصف ابتسامة.. ينظر بعيداً) آه والله.. لقيتها ماسكة كوباية
القهوة وبتشرب سيجارة وبتتفرج عليا وأنا نايم.. وحاجة في
منتهى الرعب يعني!!!!

- (بيتسم ابتسامة عريضة) لا.. كده مش صح فعلا... طب..
عملت إيه؟

- (يتنهد) هكون عملت إيه يعني ...

- ما أكلتهاش جوزين أقلام ليه على خلقتها؟

- (بيتسم هو الآخر) كان نفسي والله...

- أيوه عملت إيه يعني?!?!!

- (يُحرك رأسه بالنفي) معملتش حاجة... هيه مشيت...

- (يعقد حاجبيه) لوحدها كده؟!

- (يُحرك كتفه باللامبالاة) يعني... أفشت عليها شوية... وهيه
اضايقت ومشيت...

- (يتنهّد) بقلك إيه... البنت دي بقت خطر عليك...
- (بيتسم)
- (ينفث دخان الأرجيلة) لا متضحكليس... أنا بتكلم بجد !!
- (بيتسم بهدوء) صبا غلبانة يا أسامة... كل الموضوع إنها متعلقة
- بيا بزيادة... بزيادة أوي... (يتنهّد) وأنا مش عارف آجي عليها
- أكثر من كده... كتير أوي بتصعب عليا...
- (يحدق به .. صمت قليل) هوه أنت قتلها إنك بتحبها!؟
- أقسم بالله عمري! ولا حتى لمحتلها ولا عشمتهما بحاجة ...
- أمال في إيه؟! إيه سر الهوس ده؟!؟
- (يحدق به قليلا... يحرك رأسه بالإيجاب) هوس... أيوه... هوه
- هوس ...
- أيوه هوس... أنت عندك شك في حاجة زي دي؟!؟
- (يحدق به قليلا... ثم يشرّد باتجاه التلفاز)
- (ينفث دخانه.. يحدق به) مالك يا تركي!؟
- (لا إجابة)
- تركي ...
- (يتنهّد... ثم ينظر إليه) أعمل إيه معاها!؟
- (يعقد حاجبيه) ثواني بس.. هو أنا ليه حاسك مدي الموضوع
- أكبر من حجمه... ما تقطع معاها عادي.. قلها متكلميش
- معايا تاني... إيه بقى..؟ إيه الصعب في الموضوع؟! أنت ليه أصلا
- معملتش معاها كده لحد دلوقتي!؟
- (يحدق به)

- (ينفث دخانه بكثافة) ولا أنت عجبك الموضوع؟!!!
- (ما زال يُحدق به)
- (يُحرك رأسه بالإيجاب...) اممم.. يبقى عجبك الموضوع ...
- (يتنهد محركا رأسه بالنفي) لا.. مش حكاية عاجبني... بس ...
- بس إيه؟
- (بيتسم) فكرة إن فيه حد متعلق بيك للدرجة دي.. حد مخلصك للدرجة دي... الفكرة نفسها... يعني... غريبة... و(صمت قليل)
- مش سهل إنك تقرر في لحظة إنك تنهيه من حياتك....
- تركي... ده اسمه هوس... الهوس ده مرض... مش حب
- لا.. ده حب... بس حب للدرجة الهوس ...
- (نصف ابتسامة) ماشي.. هجاريك.. حب يا سيدي.. آخرته إيه بقى الحب ده؟! آخرته إيه وأنت أصلا مبتجهاش ولا عمرك هتجها... عارف يا تركي... المشاعر اللي من النوع ده... لو مكنتش جاية من الطرفين وبنفس الدرجة... نهايتها بتبقى وحشة أوي... أوي... نهايتها زي نهاية الأفلام كده... يا هتقتلك... يا هتموت نفسها... لو اتماديت في علاقتك بالبنت دي... لو منتهش المهزلة دي حالا... النهاية هتبقى سيئة... هتبقى مرعبة يا تركي....
- (يتنهد) المشكلة إني عارف إن كلامك صح... أنا أصلا ساعات بخاف منها... عندها... عندها فيها كمية حب تخوِّف....
- (يحرك رأسه بالنفي مبتسماً) برده هتقلي حب... ده اسمه....
- (يقاطعه) يا سيدي أيا كان... مش هنقف عند النقطة دي... أنا عارف إن كلامك صح.. وصدقني أو لا... أنا كمان خايف عليها... البنت فعلا كويسة... غلبانة وبييمة الأب... وناقصها

حنية واهتمام بشكل يوجع القلب.... أنا بجد مش عارف أعمل إيه... نفسي أخليها حواليه.. فعلا مش عاوز أحرمها مني... مش عاوز أوجعها... وفي نفس الوقت الموضوع مش واخذ المنحى ده خالص.... من سيئ لأسوأ... وكل مدى بتتعلق بيه أكثر.... (يحرك رأسه بالنفي)، مش عارف.. مش عارف....

- (يحدق به بقوة...) اقطع.... العلاقة دي لازم تنتهي... أنا قعدت مع صبا مرة واحدة... وفعلا مكنتش مرتاح... ومحبتش أبدا إني أكرر التجربة تاني... وأهو... إحساسي طلع في محله...

- (يخفض رأسه.... يتنهد)

- (يعقد حاجبيه.. تركي.. أنت فيه حاجة تانية مخبيها عني!)

- (يحرك رأسه بالنفي....) هات سيجارة!!!....

- بلاش... أنت ماشي كويس... بلاش ...

- مش قادر... هات سيجارة!!....

- (يتنهد بأسف)...

- هتجيب واللا أقوم أشترى علبة من بره؟

- (يناوله سيجارة)

- (يشعلها ثم ينفث دخانها بكثافة)

- (يشعر بالاستياء.. يحرك رأسه بالنفي)...

- (صمت قليل) أنا كان عندي علاقة قديمة في حياتي.... علاقة

شبيهة بعلاقتي بصبا... بس.. أنا كنت الطرف المهوروس... كانت

بنت عادية جدا... مكنتش فيها أي مميزات... الحاجة الوحيدة

اللي كانت بتميزها... أنها كانت رفضاني... الموضوع الأول كان

عند... كنت صغير بقى وشايف نفسي... وكانت فكرة إنها رفضاني

جاية على كرامتي أوي... فضلت وراها... وكل مدى رفضها ليا
كان بيزيد... وعنادي إني أوصلها كان بيزيد... لحد ما الموضوع
قلب بهوس زي ما بتقول... بقيت حافظ كل تفاصيلها... بقيت
براقب حركة عنيتها وشفايفها... بتحب إيه.. بتكره إيه... مين
صحابها.. بتصحى الساعة كام... كنت حرفيا بتملها الرضا ترضى...
كانت بتعاملني بشكل سيئ... هيه أصلا كانت شخص سيئ...
وكتير كنت بسأل نفسي أنا متمسك بيها ليه... وعلى الرغم
إني عمري ما لقيت الإجابة... فضلت متعلق بيها... لدرجة إني
عرفت إنها على علاقة بواحد صحتي... علاقة جنسية... وبرده
ما انسحبتش... كنت بغفرلها كل حاجة.. أي حاجة... كان نفسي
بس إنها تبقى معايا... تحبني ولو ليوم واحد... تنام في حضني
زي ما نامت في حضنه... ولو ليوم واحد... كنت متأكد إنها لو
عملت ده... هقدر أنساها... (يتنهد ...)

- (يحدق به..) وإيه اللي حصل..!؟
- (بيتسم) سافرت... فجأة... اختفت... كان سفرها أمر واقع ...
مقدرتش أعمل حاجة... قعدت فترة طويلة بستعيد توازني بعد
ما اختفت... كل اللي أنا فاكره إني كنت موجوع أوي... موجوع
لدرجة إني كنت حاسس إني دي نهاية العالم... بس.. في النهاية...
قدرت أنساها ...
- ونسيت!؟
- (يحرك رأسه بالإيجاب) نسيت... ساعات بتيجي على بالي..
وببقى نفسي أشوفها... بس دي لحظات وبتعدي ...
- (ينفث دخان الأرجيلة) وأنت خايف توجع صبا.. زي ما هيا
وجعتك!؟

- (بيتسم) أسامة... صبا فعلا مش سيئة... بالعكس... إنسانة
كويسة جدا.. قلبها طيب... وحنونة... على عكس البنت الثانية
تمامًا... وأنا كمان شخص مش سيئ... أيا كان اللي صبا حساه
تجاهي... مينفعش أعاقبها عليه بإني أأذيها... أوجعها... هيه ما
أذتنيش في حاجة... هيه كل اللي عملته إنها حبتني.. حبتني
أوي....

- (يتنهد) هتذيك... زي ما كنت أنت زمان بتفكر تئذي البنت
الثانية... (بيتسم) ولا إيه؟! ما فكرتش في ده؟! ما فكرتش
تأذيها!?

- (بيتسم.. يُحرك رأسه بالإيجاب) فكرت... بس مقدرتش

- (يحرك رأسه بالإيجاب) طيب.. يعني الفكرة موجودة... يعني
وارد إنها تحصل.. وده عامة عواقب أي حاجة في الدنيا بتوصل
لدرجة الهوس... التطرف... الجنون... ده مش طبيعي... المشاعر
دي مش طبيعية.. دوافعها مش طبيعية... الموضوع ببطل يبقى
حب.. بيوصل لمرحلة كده... مبيقاش حب بيبقى أي حاجة
ثانية... بس مش حب يا تركي

- (يتنهد...) مش عارف... (ينفث دخانه) كلامك منطقي جدا...

- وفكك من موضوع السجائر ده... كمل اللي كنت ماشي فيه...
يا ريت أنا عندي الشجاعة إني أخد القرار ده

- (بيتسم) وإيه اللي منعك؟ متدوس ...

- (بيتسم هو الآخر) بحبها ...

- (يحرك رأسه بالإيجاب) أنا بقيت أنام بشكل غريب الفترة دي...
عندي خمول مش طبيعي ...

- هروب ...

- (يعقد حاجبيه) إيه؟! -
- هروب.. النوم الكثير ده.. النوم فوق احتياجاتك الطبيعية.. ده
اسمه هروب ...
- هروب من إيه؟
- من الواقع ...
- (بيتسم.. ينظر بعيدًا) يمكن.... بس أنا مش مضيق... أنا تمام...
عندي إحساس غريب فعلا باللامبالاة... حاسس إني بقيت شبه
مؤخرة الخرثيت....
- (بيتسم ابتسامة عريضة) عارفها الفترة دي.... هتاخذ وقتها
وتعدي....
- (ينظر إليه مبتسمًا) ولا متعديش ...
- (بيتسم محركا رأسه بالنفي)
- (يتنهد بعمق.. يطفئ سيجارته.. يستعد للمغادرة) طيب... أنا
كده تمام.. أروح أكمل نوم بقى ...
- (يعقد حاجبيه) تصدق إنك معندكش دم.. منزلي عشان الساعة
دي.. ده أنا كنت فاكرك هتسهر للصبح ...
- (يتمطع مبتسمًا) لا صبح إيه.. بقلك نوم كثير ولا مبالة وهروب
وبتاع
- (يحدق به مبتسمًا)
- (لاقطا مفاتيح سيارته) إيه هتعمل إيه؟! تحب أوصلك في حته؟! -
- لا.. اتكل أنت على الله... أنا هدخل سينما ...
- لوحدك؟! -
- آه لوحدي... إيه هخاف يعني !! -

- أنت دماغ والله يا ابني... يلا سلام..

ثم يُغادر "تركي" متجهًا إلى بيته

تمضي الأيام... يوم.. فالثاني... فالسادس.. فأسبوع بلا اتصالٍ من "صبا"، اختفت تمامًا... يشعر "تركي" بشيء من الغرابة... بشيء من الفقد ... من الوحشة... ولكنه بخير... هو أفضل حال على أية حال

الساعة الآن... الواحدة بعد منتصف الليل.... "تركي" غارق في النوم ... يستيقظ على رائحة السجائر مجددًا.... يستيقظ ليجدها تجلس على حافة السرير... تتساقط الدموع من عينيها... تدخن بشراهة... يستيقظ ليحقد بها.... تحقد به هي الأخرى....

- (يتنهد) إيه... الباب كان مفتوح برده؟!

- (ينفث دخانها بقوة.. تتساقط دموعها)

- (ينظر للأسفل) وبعدين يا صبا.. وبعدين ...

ترمي عقب السيارة على الأرض.... تقترب منه كثيرًا.... تضع يدها على وجهه.... ما زالت دموعها تتساقط

- (نبرة خافتة) تركي... أنا بحبك ...

- (يحقد بها في حزن شديد)

- (تقترب منه أكثر.. تقبله من شفثيه) أنا بحبك ...

- (يدفعها بلطف) صبا

- (تتجاهل ردة فعله.. تقترب أكثر... تُقبله بعمقٍ.. تردد) أنا بحبك ...

يُبادلها القُبلات... يجعلها طريحة الفراش... يُقبلها بقوة... يبدأ بفك أزرار قميصها... تُقبله هي بشغفٍ.... تهمس له بنبرة باكيةٍ في أذنه: "بحبك"... يتجمد جسده... يتعد عنها... يُحقد بها.... يقف..

يبتعد عن السير... ما زال يُحدق بها... يُحرك رأسه بالنفي مراراً
وتكراراً ...

- (نبرة خافتة) تري ...
- (ما زال يُحرك رأسه بالنفي) مش هينفع.. صبا.. مش هينفع ...
- (تبكي) ليه... ليه؟! !!
- عشان أنا كده هبقى راجل وسخ.. وأنا عمري ما كنت راجل
وسخ... أنا كده هبقى بستغل حبك ليا... هبقى بستغلك...
(يتنهد) صبا... أنا מבجكيش ... لما بعدتي الفترة اللي فاتت...
اتأكدت... أنا فعلا מבجكيش... (يخفض رأسه) ولا عمري هحبك
...
- (تقف.. ثم تقترب منه) مش مهم... مش مهم... أنا بحبك... أنا
بحبك حب يكفيننا إحنا الإثنين...
- (يحرك رأسه بالنفي) صبا ...
- (تشرع بالبكاء) تري... أنا بحبك ...
- (يبتعد عنها للخلف)
- (يعلو صوت بكائها.. تقترب منه كثيراً) بحبك ومش قادرة
أبعد... مش قادرة...
- (يقوم بصفعها بقوة على وجهها) كفاية!!!!!!
- (تحقق به.. تشعر بالصدمة.. تتساقط دموعها بقوة)
- (يتنهد.. نبرة هادئة) كفاية... كفاية يا صبا ...
- (تبكي... وتبكي)
- (يقترب منها... يضمها إلى صدره.. يضمها بقوة) كفاية ...
- (تبكي بين ذراعيه) عارفة... والله عارفة ...

- (يضمها بقوة أكبر)
- (تبكي) أنا آسفة
- (يبعدها بلطفٍ عن صدره.. يبتسم لها.. يمسح دموعها)
- (تنظر للأسفل.. تشعر بالذل والضعف)
- (يرفع رأسها.. يبتسم) نتكلم؟!)
- (تحرك رأسها بالإيجاب)
- يُمسك يدها ويتجه إلى "الصالة"....
- تشريي إليه؟
- (تحرك رأسها بالنفي)
- طيب... هعمل فنجانين قهوة وأجريك ..
- (تحرك رأسها بالإيجاب)
- دقائق.. ليعود بفنجاني قهوة... يجلس بجوارها... يُشعل سيجارة ...
- (تبتسم.. تبدو هادئة نوعًا ما) مش كنت بطلت؟
- (يبتسم هو الآخر) مش عارف... هحاول تاني... بس مش الفترة دي ...
- (تحرك رأسها بالإيجاب)
- (ما زال يبتسم) صبا ...
- (تحرك رأسها بالنفي.. نبرة انكسار) متقلش حاجة توجع ...
- (يتنهد) يا ريت كان ينفع... صبا.. أنتي بنت جميلة... فعلا جميلة ... من بره.. ومن جوه... واللي أنتي حساه نحيتي ده مش حب... الحب اللي يخليكي تهيني نفسك للدرجة دي... مبيقاش حب... ولو حب... يبقى حب مرضي .. حب مؤذي... ولو أنا

وافقت إني أكمل معاكي في العلاقة دي تحت أي مسمى... أبقى
إنسان مش سوي.. إنسان سيئ... أنا مش خسران حاجة لما
أجاريكي في اللي أنتي بتعمليه ده.. صدقيني مش هبقى خسران
حاجة... مش هخسر حاجة غير احترامي لنفسي ...

- (تُحَدِّقُ بِهِ بَعِينِينَ حَزِينَتِينَ)

- (يَبْتَسِمُ لَهَا .. صَمَتَ قَلِيلَ) صبا... أنا إنسان عادي... عادي
جدا... إنسان زي أي إنسان ممكن تقابليه... تعلقك بيا المرعب
ده.. ملوش أي أساس... التعلق اللي يخليكي تطلعي نسخة على
مفتاح بيتي وتدخلني عليا بيتي في نص الليل ... التعلق المرضي
ده... ملوش أساس... أنا عمري ما عشمتهك بحاجة... عمري ما
إديتك حاجة أصلا تخليكي تحبيني... بالعكس... أنا كتير أوي
باجي عليكي.. وبأذيكي من غير ما أقصد... وده أكبر دليل إن
اللي أنتي حاساه تجاهي ده مش حب... مفيش حب بيتبني
على معاملة سيئة... على عدم اهتمام... على تجاهل... مفيش
حب بيتبني على وجع يا صبا..... فهماني?!

- (تَحَدِّقُ بِهِ ... تَحْرُكُ رَأْسَهَا بِالْإِيجَابِ)

- (يَبْتَسِمُ لَهَا)

- (تَتَنَهَّدُ... تَشْعَلُ سِجَارَةً)

- (مَا زَالَ يَبْتَسِمُ.. يَنْفُثُ دِخَانَ سِجَارَتِهِ) واللله هتبقى تمام وزى
الفل كمان... وبكرة تلاقي الراجل اللي يحبك ويبقى حنين
عليكي ويعوضك عن كل حاجة وحشة شوفتها في حياتك... بس
مش كده.. مش بالطريقة دي.. مفيش حب بيبجي بالعافية يا
صبا... (يَبْتَسِمُ لَهَا بِحَنَانٍ) صح!!?

- (تَنْفُثُ دِخَانَهَا... تُحَدِّقُ بِهِ بِقُوَّةٍ... تَبْتَسِمُ) صح ...

- حاسة بيايه؟! -
- (تعقد حاجبيها مبتسمة) فعلا؟! عاوز تعرف؟! -
- (يحرك رأسه بالإيجاب) -
- (تبتسم.. تحرك كتفها باللامبالاة) مش عارفة.. بس مش موجوعة زي ما كنت متخيلة
- (يبتسم)...
- (تحرك رأسها بالنفي) مش متخيلة القدر لو كان وقعني في راجل تاني غيرك... كان ممكن يعمل فيا إيه.... كان ممكن يوصلني لإيه..... (تنهد ثم تعطل في جلستها) تري.... أنا حقيقي أسفة
- (يبتسم) أنا كمان أسف... أسف إني محاولتش أنهي الموضوع ده من زمان.. أسف إني كنت أناني... أسف مكنتش واضح معاي كفاية
- (تحقق به قليلا... تمد يدها للسلام) صحاب؟! -
- (يُحقق بيدها... بتردد..) صبا ...
- (تبتسم) والله صحاب.... مش أكثر... مش عاوزه أخسرك ...
- (يتنهد) صبا
- (تبتسم ابتسامة عريضة) هتسلم ولا أطلع عليك الجنونة تاني؟! -
- (يبتسم.. ثم يمد يده للسلام) ماشي.. بس حركة كده.. حركة كده
- (تقاطععه) مش هيحصل.... مش هيحصل لأني مش هقبل إني أخسرك... أنت اللي زيك يتعدوا على الصوابع عد يا تري
- (يحرك رأسه بالإيجاب مبتسماً) -
- (تقف استعدادًا للمغادرة) يلا... أنا همشي

- أوصلك؟! -

- لا لا.. معايا العربية

- (يحرك رأسه بالإيجاب ...)

- (تتجه إلى الباب... ثم تعود أدراجها... تبتسم له.. تُخرج مفتاح منزله من حقيبتها... تضعها على الطاولة.. تغمز له) نسيت ده

...

تمضي "صبا" في طريقها... تُغادر منزله... تدّعي أنها بخير... ولكنها... تحترق من الداخل... فهي على الرغم من حبها الجنوبي له... تؤمن يقينا الآن... أن لا حيز لها في قلبه... تعلم أنها قد تمادت كثيراً... أنها قد فقدت احترامها أمامه... تعلم أن كل ترهاته عن أنها إنسانة جيدة قلبا وقالبا... هي كلمات تخرج من باب الشفقة والعطف... لا أكثر.. لا أقل... ولم يبق لها أي طريق آخر إلا أن تحتفظ به "كصديق"... حتى لا يصبح وجوده في حياتها ضرباً من المحال بعد الآن... تحبه كثيراً... كثيراً كمثل هذا الذي ما بات يُشبهه الحب... تعلم أنها مريضة به... وكيف لا... هو رجل رائع... ليته لم يكن كذلك.. ليته لم يكن حنوناً مهذباً راقياً... كبطل لقصة خرافية... تعلم الآن أنها رهينة الأيام والوقت... لعل ذلك الوقت يشفي جروحاً تخترق اللحم والعظام لتصل إلى الروح... لعل الأيام تدور... لتتناسى.. فتتسى... فتمضي بندبة جرح قديم... لعلها الأيام... لعله الوقت

فاطمة

في الساعة الواحدة بعد منتصف الليل:-

تستقبل روان مكالمة هاتفية... رقم غريب....

- ألو...

- (نبرة باكية).. روان..... أنا فاطمة...

- (نبرة فزع....) فاطمة؟... مالك في إيه؟ رقم مين ده.... أنتي فين؟

- أنا.. (بنبرة باكية).. أنا في البيت... ده رقمي الجديد...

- (نبرة قلق....) مالك يا فاطمة؟ ولادك كويسين؟ جوزك كويس؟

- (نبرة باكية....) كلهم بخير... أنا اللي مش كويسة يا روان....

أنا... (ثم تبكي)...

- طيب... طيب..... اهدي... أنا هلبس وهجيلك حالا...

- (نبرة توتر....) لا لا لا... متجيش... الساعة واحدة يا روان... مش

عاوزه طارق يحس بحاجة....

- (لحظات صمت.....) فاطمة... الموضوع شكله كبير.. أنا مبجش

كلام التلفزيونات ده بجد... أنا هجيلك الصبح من بدري...

هتفتحي عيني هتلاقيني أدامك... ادخلي دلوقتي اتوضي
وصليلك ركعتين... وادخلي نامي...

- (تصمت قليلا... ثم تبكي بعنف... تبكي بلا توقف).....
- (نبرة قلق شديدة.....) إيه ده في إيه؟ فاطمة؟ في إيه؟!!!!
- (باكية....) متسبنيش يا روان... خليكي معايا.....
- (تتنهد بقوة... لحظات صمت... نبرة هادئة....) أنا معاكي...
أنتي فين في البيت؟
- (تبتلع غصة بكاء...) أنا في أوضة المخزن... مش عاوزه حد
يسمعني....
- (نبرة حانية هادئة...) طيب ما تدخلني فنجان قهوة..
وأنا معاكي على التليفون... وأنا كمان هدخل هعمل فنجان...
وبلاش أوضه المخزن دي... خليكي في البلكونة... الجو حلو أوي
النهاره...
- (تحرك رأسها بالإيجاب...) ماشي... خليكي معايا...
- أنا معاكي أهو..... (لحظات.....) دخلتي المطبخ؟
- آه... بدور على البن... مش عارفه طارق لما بيدخل المطبخ
يضيع كل حاجة...
- (صمت قليل....) غيرتي رقمك ليه يا فاطمة؟
- (نصف ابتسامة...) مش عارفه... أهو تغيير... أي أكشن.....
- هممم..... (تتنهد... لحظات صمت....) لقيتي البن...؟!
والكنكة على النار.....
- (تبتسم...) ده شيء هايل...
- (تبتسم...) بس يا روان والله ما طالباي خالص....

- أنا عملت قهوتي؟ وأنتي؟
- لا لا... أنا بحب أعملها براحة.. كذا وش فوق بعض...
- (تبتسم...) طول عمرك صعبة مزاج يا بت يا فاطمة... وبتحبي
تعملي كل حاجة براحة وبحب... مشربتش أحلى من قهوتك
لحد يومنا هذا... أي والله يا بنتي....
- (تصمت قليلا).. تعرفي إنك أكثر إنسانة بتفهمني في الدنيا دي
يا روان....
- (تبتسم...) آه عارفه.. وشامه ريحة سجايك من هنا كمان..
مش قلتي هتبطلي الهباب ده يا فاطمة....
- (نبرة مزاح...) كنتي بطلتيها أنتي الأول يا حبييتي... أنتي عارفه
إن الموضوع مش سهل... متتفزلكيش...
- إحنا الاتنين لازم نبطلها يا فاطمة.. بس أنا مش أم... كده أنتي
بتئذي عيالك.... مش من حقك....
- ما تظيطيش يا روان... أنا مبطلاها من ساعة ما اتجوزت.. أنا
بس رجعتها الكام يوم اللي فاتوا لأن نفسيتي مدمرة.... وعمري
ما بشربها أدام الأولاد ولا حتى طارق.... أنا عملت القهوة....
- طيب... طلعتي البلكونة؟
- (تتنهد...) الجو حلو أوي فعلا... أوي...
- مش قلتك... عاوز حزن الجو ده... حزن مين اللي بيكسر
العضم ده... عارفاه طبعًا؟
- (نصف ابتسامة.... لحظات صمت...) عارفاه طبعًا؟ ولا أعرف
شكله أصلا... أسمع عنه.. زيي زيك يا حبي... (ثم تنهيدة
عميقة)

- (نبرة حانية....) مالك يا فاطمة..!؟
- مش مبسوطة... مش مبسوطة يا روان... أنا تعيسة أوي... (نبرة أم.....) أوي...
- ليه يا فاطمة... إيه اللي ناقصك؟
- ناقصني... إني أحس.... (تحرك رأسها بالنفي....) مبقتش أحس....
- متخافقة مع طارق؟
- (نصف ابتسامة...) يا ريت متخافقه معاه.. خناقة إيه يا روان اللي هتخليني بالشكل ده....
- طيب.. أنا هسكت خالص... وأنتي هتتكلمي... قولي كل اللي حاسه بيه....
- (لحظات صمت..... ثم تبكي....)
- أنا كده مش فاهمة حاجة... ومش عارفه أساعدك يا فاطمة....
- (تبكي أكثر....)
- (تتنهد... تستغفر الله...) طيب عيطي... عيطي يا فاطمة... أنا معاكي....
- (تبكي....) أنا مش حاسه بحاجة يا روان مش حاسه بحاجة.... حاسه إني مش عايشه... حياقي كلها من ساعة ما بصحى لحد ما بنام.... كلها... فاضيه... على قد ما هيه زحمة... زحمة أوي.... فاضيه.... أوي... وسريعه أوي....
- إيه اللي ناقصك؟ إيه اللي ناقصك يا فاطمة؟
- (تهدأ قليلا).. لو هنتكلم بالورقة والقلم... أنا فعلا مش ناقصني حاجة... معايا بنت وولد أي ست في العالم تتمناهم.. وراجل

طيب مش حارمني من حاجة.. ومستوى مادي معقول أوي....
مش ناقصني حاجة.... بس.... (ثم تشرع في البكاء مرة أخرى...)
- مش مبسوطة.....

- (تبكي) أبدا... أبدا... مش مبسوطة أبدا يا روان... (ثم تبكي
أكثر)...

- فاطمة يا حبيبتني... مفيش حاجة من غير سبب... مفيش
حاجة في الدنيا دي كلها بتحصل كده... فجأة... من غير سبب...
اتكلمي... أكيد في سبب... تعالي ندور مع بعض... نفكر هنا..
وهنا....

- (نبرة باكية....) تفتكري اتسرعت؟

- في إيه بالضبط؟ جوازك من طارق؟

- آه...

- أنتي بتسأليني أنا..؟ وعامة معتقدش إنك اتسرعتي..... أبدا..
أنتوا فضلتموا مخطوبين سنة ونص... وطارق إنسان كويس وطيب
ويحبك.. وده كلامك أنتي مش كلامي أنا....
- روان..

- (بهدهوء تام...) إيه يا فاطمة؟

- (نبرة حزينة....) أنا بحب عيالي أوي....

- أكيد طبعًا... في أم ما بتحبش عيالها يا فاطمة؟!...

- (نبرة باكية....) روان....

- أنا آسفة.... كملي....

- (تبكي...) بس ساعات... بحس إني مش قادرة حتى إني أضحك

في وشهم....

ساعات... ببقى حزينه أوي.... لدرجة إني مش طايقه أسمع كلمة
ماما... (تبكي أكثر) روان.. أنا ساعات ببقى نفسي أغمض عيني
وأفتحها... ألاقهم اختفوا.. هما... وطارق... والبيت... كل حاجة....
كل حاجة.... بس أول ما بتخيل حياتي من غيرهم.... بجري عليهم..
وبعضهم.... وبعيط أوي.... (تبكي..) أنا تعبانه أوي يا روان... أوي...

- (تصمت....)

- (ابتسامه ساخره باكية...) أكيد بتقولي عني إني إنسانه حقيره
دلوقتي....

- (تحرك رأسها بالنفي...) مستحيل... أنتي لسه من شويه
بتقوليلي... إني أكثر إنسانه فهمامي في الدنيا يا فاطمه... أنا
فاهماتي وحساي.... بس مش قادره أفهم السبب اللي وصلك
للمرحله دي....

- (لحظات صمت....) طارق....

- (تعقد حاجبها...) ماله؟

- هوه اللي وصلني لكل اللي أنا فيه ده....

- إزاي يا فاطمه.. ده طارق طيب أوي...

- (تحرك رأسها بالنفي سريعاً....) مش كفايه... واللله العظيم ما
كفايه يا ناس... أنتوا كلكوا بتحكموا عليه من الساعة أو الاتنين
الي بتشوفوه فيها... آه طارق مفيش أطيّب منه... بس....
(تتنهد بحزن...) بس....

- بس إيه...؟

- مش عارفه أوصلهاك.... مش عارفه (ثم تبكي)...

- يا الله.... طيب اهدي شويه... فنجانك خلص؟

- ملمستوش... زي ما هوه...
- (تبتسم...) يا خسارة الخماشر وش اللي عملتيهم...
- هعمل فنجان تاني... بس هسيب المبايل هنا في البلكونة...
- ماشي... خدي وقتك...

- بعد مرور خمس دقائق.....
- (تمسك الهاتف...) روان؟
- (نبرة حنون...) عنيتها..
- (تبتسم...) افتكرتك روحتي....
- لا.. بس خلصت نص علبة السجاير وأنتي جوه...
- (تبتسم...) وأنا كمان... في غرزة في المطبخ دلوقتي...
- فاطمة... هوه طارق عارف إنك رجعتي تشربي سجاير..؟
- (ترتشف قهوتها...) مفروض إنه عارف... بس ولا بيجمالي سيرة...
- يعني إيه مفروض؟
- (تتنهد...) يعني لو ما شفشف.. يبقى شمها... يبقى شايف الطفي
- على الأقل.. عارف يا بنتي عارف... بس متكلمش...
- (تعقد حاجبيها...) غريبة يعني... مع إنه بيكره الموضوع ده
- أوي... وطلعت عينه لحد ما خلاكي تبطليها..
- (تبتسم ساخرة..) ما تفهميش... إحنا الاتنين عاملين عبط عن
- حاجات كثير... تحسي إن معدش عندنا طاقة حتى للخناق....
- (لحظات صمت...) حاسة إني بدأت أفهم....

- (تصمت قليلا) عارفة يا روان... حتى الجنس معاه بقى ممل...
(تحرك رأسها بالنفي...) لا هوه مش بقى ممل... هوه طول
عمره ممل... بس أنا كنت دايمًا بديله أعذار... من ساعة
متجاوزنا وأنا بديه أعذار... كنت بقول ملوش تجارب.. زي ما
أنا مليش تجارب... ساعات بقول جاي تعبان... وأعذار كثيرة
بقى... بس... ده مطلعش حقيقي... بعد أربع سنين... أقدر
أقلك إنه كل الأعذار دي كذب... الحقيقة إن هوه كده... ده
مفهومه عن الجنس... شوية تمارين رياضية صامتة... وحاجة
تقرف... قهر يا بنتي... قهر!!!!

- ده موضوع كبير على فكرة... حاولتي تتكلمي معاه فيه؟

- (ترفع حاجبها...) حاولت؟... (تبتسم...) هيه مرة... مرة يتيمة...
حاولت أفهمه إن إحنا محتاجين نجدد ونبتكر أي حاجة جديدة
عشان نكسر الملل والروتين... قلتها لوالد من غير تجريح.. قلتها...
بمنتهى الأدب والحنية... لقيته بصلي كده... وبعدين ضحك...
وقلي... إنه خلاص حفظني صم... ومهما عملنا وابتكرنا... مفيش
حاجة هتفرق معانا... وإن دي طبيعة الراجل عامة... إنه يميل...
عشان كده ربنا حلله يتجوز أربعة... ومحاضرة طويلة عريضة...
وانتهى الموضوع على كده يا روان... وما انفتحش تاني...

- بس غلطان أوي على فكرة... كل كلامه غلط تقريبا... كان لازم
تردي عليه...

- والله يا حبيبتى رديت... وفهمته إن ده مش صح... وإن في ميت
ألف مليون حاجة ممكن تتعمل ترجع العلاقة أقوى وأحلى
من الأول... بس لا حياة لمن تنادي... هوه مقتنع إن الحياة
الجنسية ذروتها أول ثلاثة شهور.. بعد كده كله بيبقى عادي
جدا... مجرد واجبات زوجية... قهر بقلك... قهر... الحاجة

دي لو متعلمتش بحب وبإحساس عالي وفن.. أقسم بالله بتبقى
أقدر حاجة في الدنيا.. وبتحسي إنك كارهة نفسك وقرفانة حتى
تبصيله... بتحسي كده إنك رخيصة... حتى لو ده جوزك...
(لحظات صمت... نبرة حزينة....) بجد يا روان... بتحسي إنك
رخيصة... أوي....

- لازم تحلي الموضوع ده مع طارق يا فاطمة... لازم تتكلمي معاه
تاني!!

- أتكلم معاه في حاجة هوه أصلا مش مقتنع إنه غلطان فيها...
يا بنتي أنا والله ساعات بحس إنه بيعمل الموضوع ده بس
رفع عتب كده...

- ممكن يكون في واحدة تانية في حياته?!!

- (نصف ابتسامة...) شكيت طبعاً... ومشيت وراه.. وراقبت
تلفوناته وكل حركاته... يا بنتي أنا جوزي ممكن ياخذ شهادة
عالمية في الاحترام... من البيت للشغل ومن الشغل للبيت...
وبالليل في القهوة مع أصحابه اللي متربي معاهم من صغره...
وهكذا.. هيه دي حياة طارق....

- (لحظات صمت...) في حاجة تانية غير موضوع الجنس؟

- (تتنهد بعمق....) آه طبعاً فيه... قيسي على كده كل حاجة
تانية في حياتنا... مفيش شغف يا بنتي في أي حاجة... بصته
ليه... فاضية يا روان... فاضيه.. أوصلهالك إزاي دي بس!!!! بقيت
حاسة إني عايشة مع جهاز كمبيوتر مفرغ من العاطفة.. حد
طيوب... بيشغل كتير أوي عشان يجيب فلوس كتيرة أوي...
يدخل عياله مدارس نظيفة... نساfer سفرية حلوة كل أجازة...
نجيب لبس من أماكن كويسة... كل فترة نتزواج زي الحيوانات..
يمكن الحيوانات عندها مشاعر عننا وهكذا.... عارفه يا روان....

مش بيتلاعب بعقلي كده... مش بيغيريني بحوار زي الناس...
مش يحاول يشدني ليه... بيتعامل معايا كأني قدره اللي عمري
ما هسيبه لأي ظرف من الظروف... كأني ورثه من أهله مثلا...
مش بيحركني... مش بيخليني أروح البيت وأنا مشتقاله... عقلي
ده لاغيه أساسا.. أنا عقلي مش موجود يا بنتي... بيتعامل معايا
زي ما بيتعامل مع عياله... بيسكتني طول اليوم... أعمل أنا
إيه بطيبته يا روان قوليلي قصاد كله ده... أنا بجد تعبانة...
حاسه إني كارهة حياتي أوي...

- (لحظات صمت.....) في حد تاني في حياتك يا فاطمة؟ (نبرة
صارمة) ومتكذّيش عليه...!!!!

- (تصمت قليلا...) لا يا روان... أنا مفيش حد في حياتي.. وحياة
عيالي أنا ما في حد في حياتي... وعشان أبقى صريحة معايا
أكثر... أنا فعلا الفترة دي حاسة إني هشة جدا... وضعيفة جدا...
ومحتاجة حد جدا... يكون معايا.. ويحسّسني بقيمتي... خايفة
من نفسي أوي يا روان... خايفة أخونه أوي... أنا فعلا حاسة إني
ممکن أخونه مع أول فرصة... (لحظات صمت.....) ثم تشرع
في البكاء)... شفتي وصلني لإيه... شفتي!!!!

- فاطمة...

- (تبكي.....)

- حاسة إن مشكلتك مع طارق ممكن يكون ليها حل؟ ممكن
تقعدي تتكلمي معاه تاني... وثالث... والكلام يجيب نتيجة..
ويبدأ يتغير...؟ تقدرني عملي كده؟

- (تبتلع غصة البكاء... تهدأ قليلا...) لا يا روان... مفيش حل
لأي مشكلة... طول ما الطرف الثاني مقتنع إن مفيش مشكلة
أصلا... أتكلم معاه في إيه؟ سراب؟ هوه مش شايف غير إني

بقيت إنسانة نكدية ومؤرفة.... وإني بتكلم في هيافات وبتلكك على طول عشان أتناق معاه.... وبعدين على فرض إنه اقتنع بكلامي.... وحاول يتغير.. صدقيني.. مسألة وقت.. وهيرجع زي الأول... الحاجات دي ما بتتطلبش.... الحاجات دي يا موجودة... يا مش موجودة.... الاهتمام والدلع كون إنه يكون متعود وحبيب يكسر الروتين في كل حياتنا على طول.... بوسة الصبح... كلمة حبيبتني.... الطبطة.... الحاجات دي مينفعش تتطلب.... لما تتجوزي هتفهمني أكثر يا روان.....

- يبقى لازم تتطلقي من طارق....

- نعم؟ اتجننتي ولا إيه؟

- آه اتجننت.. عشان بقلك أنهي حياتك التعيسة مع راجل بطلتي تحببه من زمان لدرجة إنه بقى معنديش أي مانع إنك تخونيه لو جتلك فرصة كويسة.... اتجننت!!!!

- يا سلام.. والموضوع بقى سهل كده واللا إيه؟

- آه سهل... مقارنة بالمصايب اللي هتهل عليكي لو ما اطلقتيش... سهل أوي كمان...

- يا روان...

- (تقاطعها...) سمعتك للآخر.. تسمعيني للآخر.... الموضوع مبقاش أخره شوية برود وهروب من حل المشاكل... لا لا.. الموضوع بعد كده هيكبر.. وهياخد أبعاد تانية... هتلاقني نفسك بتعبي أكثر... وهوه بيعبي أكثر... وهتفجروا في وش بعض... وصوتكوا هيعلا أكثر وأكثر... وهتخدوا العيال في رجليكوا.. وتجيلهم عقد وأمراض نفسية... العيال اللي ما بقتيش قادرة تبصي في وشهم من كتر ما أنتي عندك نقص في العاطفة والحنان.... كرهك الخفي لأبوهم... خلاكي تقصري في واجباتك معاهم....

خلاكي ترجعي تشربي سجائر تاني بعد ما قعدتي سنين بتحاوي
تبطليها... والله أعلم إيه اللي هيجي بعد السجائر... وأنتي
أستاذة في خلق الأعذار....

- وعلى فرض إني فعلا عاوزه أطلق.... مين هيساعدني ويدعمني؟
مين هيحس بيه؟ عاوزاني أقلهم إيه أصلا؟ أنتي متخيلة واحدة
زي أمي دي مثلا هتقتنع لو قتلها إني عاوزه أطلق عشان
مش حاسه حاجه ناحيته.. وإنه بارد وفاضي وممل... هترزني
جوزين إقلام وهتقولي إني سافلة ومتربتش... وطول ما جوزي
بيعاملني كويس وما بيمدش إيده عليا ويصرف كويس عليا
وعلى بيته وعياله يبقى هوه كده راجل تمام.... عاوزاني أتحمى
في مين؟ أنتي بتستعبطي!!!

- معتقدش إنك محتاجة تتحمي في حد... أنتي إنسانة عندك
34 سنة.. وعندك وظيفة محترمة بتدخلك دخل كويس تقدري
تتكفلي بنفسك وبعيالك بجانب الفلوس اللي طارق هيبعتها
لأولاده كل شهر.... وبعدين مع احترامني لوالدتك... هيه عمرها
ما هتحس بالعذاب اللي أنتي حاسه بيه ده أصلا... يا بنتي
أنتي مستعدة تعيشي حياتك كلها بالمنظر ده؟ لو مستعدة
تعيشي كده بالمنظر ده.. وتتحولي مع الوقت من زوجة وأم
محترمة لزوجة خائنة ولعوب... يبقى إنسي كل كلامي.. ولا كأني
قتلتك أي حاجة....

- روان.... (ثم تبكي)..

- اطلقي يا فاطمة.... وخدي فرصة تانية في الحياة... الطلاق مش
نهاية العالم... اطلقي وأنتي إنسانة لسه بتحترمي نفسك... لو
فقدتي احترامك لنفسك... أو حتى ثقتك في نفسك... مفيش حاجة



في الدنيا هتخليكي مبسوطة بعد كده..... خدي فرصة ثانية في الحياة مع راجل يستوعب طبيعتك وشغفك وطبايعك.....

- (تبكي)... وعيالي يا روان....

- هيبقوا معاي وفي حضنك.... وهيتربوا في جو نفسي أحسن كثير أوي من اللي أنتي عايشاه دلوقتي... إوعي تكوني فاكرة إن العيال مش حاسين بالتوتر اللي في البيت.. حتى لو لسه أطفال.. كل المشاعر دي بتوصلهم... وبتتخزن في عقلهم الباطن... وبتتحول لعقد... صعب تتفك.... وبعدين.. مش يمكن لما تطلقي وتعيشي مع عيالك.. تحسي إنك بطلتي محتاجة راجل؟ وإنك كده مكتفية ومبسوطة... ممكن أوي؟ محدش يعرف بكره فيه إيه....؟ أيا كان اللي هيحصل... هيبقى أفضل كثير أوي من وضعك الحالي.... اللي أنتي بنفسك... قلتني ملهوش حل.... وعمره ما هيتغير....

- (نبرة باكية...) يعني أعمل إيه دلوقتي.... أعمل إيه؟

- تهدي... ده أهم حاجة... عشان طول ما أنتي متوترة كده وبتعيطي.. مش هتعرفي تفكري صح.. صوت زعلك وحزنك مغطي على صوت الحق والمنطق والعقل.... اهدي خالص.... واعزلي نفسك عن أي ضغوط.... ممكن تأثر على قرارك... اللي يخصك أنتي وجوزك وبس... مش حد تاني.... هتعددي مع طارق بعد ما تهدي.... وتكلمي معاه بهدوء في كل حاجة.... ونقوليله أنتي حاسه بإيه بالظبط.... يمكن عمرك ما إديته الفرصة إنه يعبر صح عالي جواه... يمكن تربيته كراجل شرقي في مجتمع متخلف... مش مخلياه يفتح معاي مواضيع حساسة وخاصة زي الجنس... حتى بعد 4 سنين جواز.... يمكن يكون مظلوم... ومقهور زيك... يمكن؟..... لو حسيتي إن الكلام مش

جايب همه.... قوليله إنك بتفكري في الطلاق.... وإنك توصلتي
للقرار ده بعد ما شفتي إن مفيش حل.... ده طبعاً بعد ما
هتكوني فكرتي صح.... ولوحدك...

- (لحظات صمت...) كلامك صح أوي... أوي... أنا هعمل كده..
(تبتلع غصة بكائها) لازم أعمل كده....

- (تبتسم...) آه والنبي غيري البجامة المعفنة اللي أنتي لابساها
دي قبل ما أطلع..

- (تعقد حاجبيها...) إيه ده؟ أنتي فين؟

- أنا تحت من ساعة ما كلمتيني ومستنية الشمس تطلع.. عشان
سي طارق ميحسش بحاجة....

- (تبتسم ابتسامة عريضة.... ثم تشير إليها من الشرفة بحماسة)...

- (تشير إليها...) أنا طالعالك... اجري اعمليي حلة قهوة واللا
حاجة...

- (نبرة باكية.....) أنا بحبك أوي... أوي...

- (تبتسم.....) اجري....



ولن أسامح

- تجلس الصديقتان على طاولة الطعام في منزل "سارة"....
- (دون أن تنظر إليها... نبرة خافتة....) سارة....
- (تبتسم لها...) إيه يا حبييتي... مبتكليس ليه؟ طبقك زي ما هوه متلمسش..!؟
- (ترفع عينها...تنظر إليها... تبدو مُجهدة...) سارة...
- (تُحرك رأسها بالنفي..) مالك يا حنين؟
- (لحظات صمت.. تُخفض رأسها...) ياسر عاوز يتجوزني....
- (ترك الملعقة مندهشة ثم ابتسامة عريضة) إيه؟
- (تتنهد... تكرر...) ياسر طلب إيدي يا سارة....
- (تحرك كتفيها بالاستغراب... تعقد حاجبيها) طب ده أحلى خبر في الدنيا... مالك مضايقة ليه...!؟
- (تدمع عينها وتُحدق بالطعام)...
- (لحظات صمت.. تحددق بها) في إيه يا حنين... أنتي مبتحبوش؟
- (ابتسامة أَلْم... مبحوش؟ (بنبرة باكية)...أنا بعشقه يا سارة....
- (تحرك يدها بالاستغراب..) الله.... آمال إيه مالك... زعلانه ليه....!؟

- (تحقق بها بعينين دامعتين)...
- (ثم بنبرةٍ عاليةٍ) مالك يا بنتي ما تنطقي...!!؟
- (تخفض رأسها.. نبرة خافتة..) وطبي صوتك يا سارة... أنا مستحمة صوتي بالعافية....
- (تطبق على شفتيها... لحظات صمت) طيب... أنا آسفة... بهدوء أهو..... مالك؟ في حد ثاني في حياتك؟
- (نظرة استنكار) لا طبعًا...
- مش عاوزه تتجوزي دلوقتي؟
- (تشرع في البكاء....)...
- (ثم يعلو صوتها مرة أخرى) وبعدين يعني... أفهم أنا إيه طيب دلوقتي....
- (نبرة باكية خافتة) وطبي صوتك لو سمحتي....
- (تنهيدة غضب)... أنا هسكت خالص... لما تحبي تتكلمي أنا مش راحة في حنة....
- (يزيد وتر بكائها حتى تبكي بشكل هستيري)...
- (تغير سارة مقعدها على الفور وتجلس بجانبها وتضمها إلى صدرها) في إيه يا حنين... أنا مش فاهمة حاجة؟..... (تمسح على رأسها بحنان...) خلاص متتجوز هوش يا حبييتي... مفيش حاجة تغصبك إنك تتجوزيه إهدي.... إهدي....
- (تبكي أكثر....) أنتي مش فاهمة حاجة يا سارة.... مش فاهمة حاجة....
- طيب إهدي.... إهدي وفهميني....
- (تبكي على صدرها أكثر)....

- (تمسح على رأسها).... حنين.....
- (ترفع رأسها من على صدر صديقة العمر... ثم تنظر إليها بعينين باكيتين)....
- (تبادلها بنظرات تعجب مخلوطة بالقلق الشديد ثم تمسك يدها).... إهدي....
- (نبرة خافتة....) أنا مش Virgin.... (ثم تمتلئ عيناها بدموع أكثر...)
- (تحقق بها في ذهول وصدمة)... يعني إيه؟
- (تبعثد عن صدرها.....) أنا مش virgin يا سارة.....
- (لحظات صمت....) إزاي يعني.... لا مش فاهمة.... يعني إيه؟
- (ثم تبكي بشدة)....
- (تهزها بعنف...) لا لا لا لا لا..... اتعديلي هنا وفهميني..... يعني إيه مش virgin.....!!
- (لا إجابة.... ثم تستمر في البكاء)....
- (نبرة غاضبة) بطلي زفت عياط.... وفهميني حالا دلوقتي.... إمته؟ مين أصلا؟ وإزاي؟ إزاي؟
- (تبكي....) براحة عليا الله يخليكي... أنا حاسه إني هموت....
- (تنظر لها نظرات غضب ممزوجة بعطف وقلق ثم تنهيدة ساخنة) أومي اغسلي وشك لو سمحتي وفوقي.... عاوزه أفهم كل حاجة... كل حاجة يا حنين!!!
- (تنظر إليها بعين دامعة...) حاضر....

سنة يا سارة... وكنت خائفة... ولوحدي..... كان الحل الوحيد إني
أسيبه يمشي وأكمل حياتي طبيعي من غير ما أحسس حد حواليا
بحاجة..... وقررت إني أفضل طول عمري كده... لوحدي....

- (تحرك رأسها بالنفي...) غلطانة..... وغبية... كان مفروض
تلجأ لهم..... وبعد ما يفرموكي ويعلقوكي من رقبتك... كانوا
هيجبيوا الكلب ده من رقبتة... دول أهلك يا حبييتي.....
محدث كان هيخاف عليكي قدهم..... لكن إنك تسيبيه يمشي
كده عادي..... إزاي قدرتي تعمليها... إزاي هانت عليكي نفسك
أصلا.....

- (تخفض رأسها... تبتسم بألم) كنت فاكرة إن عقاب ربنا ليا... إني
أفضل طول عمري لوحدي... مكسورة... أتاري عقاب ربنا ليا
أصعب بكتير أوي... (ثم تبكي)... خلاني أقابل ياسر... وأحبه...
أحبه أوي... (نصف ابتسامة ساخرة... تمتزج بالبكاء) لا... ويطلع
بني آدم محترم... ويحترمني ويقدرني... ويخاف عليا... ولما
ييجي يقلي عاوز أتجوزك... أحس أد إيه أنا رخيصة وحقيرة...
وتافهة... وضعيفة.....

- (تحقق بها...) أنتي فعلا حاسة إنك رخيصة؟

- (تصمت قليلا)... بس أنا تبت والله العظيم..... ومن ساعة ما
الحيوان ده ما غار في ستين داهية... وأنا محافظة على نفسي...
أقسم بالله العظيم محد لمسني من بعده... أقسم بالله...
(ثم تبكي)... مصدقاني؟

- (تنهيدة...) مصدقاي يا حنين....

- (تمسح دموعها بيدها...) طيب... هوه معقول إني أعيش طول
عمري بدفع تمن غلطة عملتها من اتناشر سنة يا سارة?...
مش ربنا غفور رحيم..... صح؟ (ثم تبكي) يعني... أنا عارفة إني

غلطانة وأستاهل ضرب الجزم..... بس والله العظيم.... أنا كنت لوحدي.... وكان هوه اللي جنبني..... حسسني ساعتها بكل حاجة حلوة كان نفسي أحسها..... حسسني بالأمان والحب والدفا اللي عمري ملقتهم في بيتنا.... أنا عارفه إنه مش عذر يا سارة... والله عارفه..... بس ساعتها... كنت معمية... ومكنش عندي أي خبرة في الحياة... من كتر ما والدي الله يسامحه... كان قافل عليا أنا وإخواتي البنات... مكنش عندي أي احتكاك بالعالم الخارجي يا سارة..... مكنتش أعرف أي حاجة... مكنتش أعرف يعني إيه جنس أصلا... تخيلي... بغلة عندها عشرين سنة... مكنتش فاهمة أي حاجة.... هوه عرفني كل حاجة في الدنيا دي..... كنت طيارة معاه في السما..... الله يسامحك يا بابا... يمكن لو مكنش قافل علينا أوي كده... يمكن لو حياتي كان فيها مساحة من الحرية... يمكن لو كانت حياتي طبيعية... يمكن لو كان عندي شوية خبرة في الحياة..... يمكن لو كان فهمنا الصح من الغلط بدل الشخط والنظر والزعيق في البيت طول النهار... يمكن لو ما كنتش بخاف منه أكثر من إني أحبه..... يمكن... يمكن... ده كان يحميني من غلطة عمر زي دي..... يمكن... (ثم تبكي...) بس ربنا غفور رحيم يا سارة..... ربنا غفور رحيم..... والله أنا ما عارفه..... بس أنا غلطت غلطة كبيرة... أنا زنيت يا سارة..... معقوله يغفرهالي..... بس أنا تبت والله العظيم تبت.... (تحرك رأسها بالنفي سريعاً) مش عارفه... مش عارفه.....

- إهدي يا حنين... ربنا غفور رحيم... وما دام توبتي توبة نصوحة وربنا مطلع على نيتك... أكيد هيسامحك... وهيساعدك في الأزمة دي..... ربنا أحن علينا من نفسنا يا بنتي....

- (تنظر إليها بعينين دامعتين ثم تضحك بنصف ابتسامة ساخرة....)

- (تعقد حاجبيها) بتضحكي على إيه.... مش مصدقاني؟ عندك شك في رحمة ربنا.....

- (تحرك رأسها بالنفي) أبداً.... بس افكرت حاجة....

- إيه؟....

- (تبتسم) افكرت لما بابا كان بيحذرنى من إني أصاحبك وبيقول عنك متبرجة وسافرة والمشي معاكي هيجبلي شبهة وهياأذي سمعتي.... خليه ييجي يتفرج علينا دلوقتي.... ويشوف المتبرجة السافرة بتقول إيه لبتته.... بنته الي مبدأتش تركعها إلا بعد ما مشيت معاكي.... بنته الي عمرها مفكرت تركعها في بيته رغم الضرب والمهانة الي كنا بنشوفها كل يوم.... قد إيه كان ظالم.... ومفتري....

- (تحرك رأسها بالنفي) عيب تقولي كده على والدك على فكره... مهما عمل فيكي... هوه في الآخر وفي الأول وقبل أي حاجة أب.... كان خايف عليكي بجد... وكان فاكر إنه كده بيحميكي من نفسك ومن المجتمع.... وبعدين ما هوه اتربى كده.... وكبر لقى نفسه بيعمل الي جدك كان بيعمله.... وحكمه على شكلي الخارجي منطقي بالنسباله.... لأنه عايش طول عمره في وسط بيحكم على الناس كده.... متمرّيش كل أغلاطك على أهلك يا حنين... طبعا كل كلامك صح... وأكد لو كان إداكي جزء من الحرية وكان عاملك باحترام وحنينه كان ممكن يغير حاجات كتير.... بس أنتي بردو كنتي عارفه إن الي عملتيه ده حرام.... وعملتية بردو.... أنا مش عاوزه أقعد أقطم فيكي كتير... الي حصل حصل... وعمر ما البكا هيرجع الي راح.... خيلنا نفكر هنعمل إيه دلوقتي.... مع ياسر.... ناويه على إيه؟

- ياسر.... (ثم تبكي) والله أنا بحبه أوي..... ياسر ده أحسن راجل
في الدنيا كلها..... ياه..... (نصف ابتسامة.....) قد إيه العقاب
قاسي بجد.....

- (تتنهد....) أنتي ناويه تقويله؟

- (نبرة صارمة...) آه طبعًا هقله..... عمري ما هخدعه... ياسر
ميستهلش مني كده... أبدًا..

- (ترفع حاجبيها....) آه..... اممممم..... أنتي اتجننتي صح؟

- لا متجننتش... عاوزاني أبني معاه حياي عالغش.....

- لا هوه أنتي كده مش هتلقني تبني معاه حياتك أصلا يا
حبيبتى..... كده هوه هيسيك ويا ريت هيسيك عادي... لا
هيسيك وهوه مش طايق يبص في وشك... يا بنتي هوه ياسر
ده من شيكاغو مثلا... ده شاب مصري يا ماما..... شرقي...
عارفه يعني إيه شرقي.....

- (لحظات صمت) عارفه إن الموضوع فيه مخاطرة كبيرة..... بس
يمكن يقدر إني صارحته بحاجة زي دي بدل ما أغشه وأخدعه...
ياسر متفهم أوي أوي.....

- (نصف ابتسامة) ياسر متفهم أوي؟ هوه ده فستان كتافه
عريانة مختلفين عليه وهتقنعيه بيه؟ أنتي مجنونة واللا إيه
متفوقى..... عاوزه تروحي تقويله إنك مش بنت وإنك غلطتي
مع واحد قبله ويقلك... خلاص يا حبيبتى أنا مسامحك ما
دام صارحتيني... بدل ما كنتي غشتيني وكذبتى عليا..... في إيه
متتكلمي كلام ناس عاقلين.....!!!!!!

- (تحقق بها) يعني عاوزاني أصلح غلطة بغلطة.....!؟

- لا لا لا... أنا مفهمش الكلام العبيط ده... أنا اللي أعرفه إن الله ستار رحيم... ولو فعلا توبتك نصوحة وندمانة من قلبك... ربنا هيسامحك ويستر عليكى ويساعدك تبدئي حياة نظيفة مع راجل محترم... ده اللي أنا شايفاه صح....
- (نبرة حزن..) وهوو ذنبه إيه في كل ده....
- (تتنهد....) يا بنتي ذنبه إيه يعني إيه؟!... دي أقدار.... لو مكتوبله يتجوزك هيتجوزك... يمكن تكووني أنتي تكفيره ذنوب قديمة عملها قبلك... يمكن يكون ربنا بعته ليكي يعوضك عن الأيام الهباب اللي عيشتيها قبله.... ألف يمكن ويمكن... دي حكمة ربنا ومحدث بيّفهمها غيره....
- (تحرك رأسها بالنفي..... لحظات صمت) أنا هقله يا سارة.... هقابلة النهاردة وهقله....
- اختيارك... أنا قلتلك عالي هيحصل مسبقاً.... اختيارك.... أنتي حرة....
- (تحقق بها...) هقله.... لازم أقله.... وهوو يختار....
- (تبتسم...) وعلى فرض إنه قبل... وده مستبعد جدا... تفتكري هينسهالك؟ لا طبعاً... عمره ما هينسهالك.... وهيفضل طول الوقت شاكك فيكي... ومع أول خناقة هيعايرك بيها... وهيمن عليكى بأنه سامحك.... وحياتك معاه هتبقى جحيم... ربنا ستر عليكى كل السنين دي بحكمته ومشيتته ورحمته عشان يديكي فرصة تانية في الحياة... وأنتي جاية بغبائك... تضيعي كل ده بقرار زي ده.....
- مش هقدر... صدقيني.... أنا بحبه أوي... إحساسي بالذنب نحيته ممكن يموتني.... أنا هقله... واللي يحصل يحصل....

- (تحرك رأسها بالنفي.... تبعد نظرها...) أنتي حرة يا حنين....

وفي الليل....

- (يحدق بها بابتسامة حب....) شكلك حلو....

- (تبتسم له)

- (يمسك يدها) وحشتيني أوي....

- (تبتسم له دون رد)....

- (يعقد حاجبيه وابتسامة جميلة) إيه السينما الصامته دي...!؟

- (تبتسم له....) أنت بتحبني أوي....

- (يبتسم باستغراب...) دي معلومة ولا سؤال...؟

- (تحرك رأسها بالنفي...) لالا... أنا عارفه إنك بتحبني أوي....

- (بحنان..) طيب ما أنتي كمان بتحييني أوي....

- (بنبرة حزينة....) أوي.... بحبك أوي....

- ومالك بتقولها وأنتي زعلانة أوي كده....

- (صمت قليل... تحدق به....) في حاجة لازم تعرفها قبل ما نتجوز....

- (يُحدق بها.... يشعر بالقلق....)....

- (تطبق على فمها....) قبل أي حاجة... عاوزاك تعرف حاجة

واحدة... أنا عمري ما حبيت حد في الدنيا دي كلها قدك...!

وعشان أنت أكثر إنسان محترم قابلته في الدنيا دي.... لازم أقلك

على اللي أنا جايه أقلهولك النهاردة... يمكن لو كان راجل تاني

الي قاعد مكانك... يمكن كنت خبيت عليه.... ومكنتش فتحت

الموضوع من أساسه....

- (نبرة حازمة...) حنين..... في إيه!!؟
- (نبرة مرتعشة....) حاجة تانية.... أيا كانت ردت فعلك على اللي هقوله دلوقتي.... فأنا مش هتكلم ولا هعترض ولا هلوم عليك في أي حاجة.... وهرضى باللي هتقرره.....
- (يُحرك رأسه بالنفي... يكرر) في إيه يا حنين!؟
- (تصمت قليلا.....) iam Not virgin...
- (يُحدق بها طويلا... يقع تحت تأثير الصدمة.... ثم بعد صمّتٍ طويل...!) نعم؟!؟
- (تُحرك رأسها بإمءة خفيفة) علاقة قديمة.... من اتناشر سنة... قبل ما أعرفك وتعرفني... علاقة بدفع تمنها لحد دلوقتي.... علاقة سابت جوايا جحيم وانعدام ثقة بكل اللي حواليا... علاقة كان أقل خسائرها... حنة غشاء وشوية دم.... علاقة خلتنني أتمنى الموت كل يوم لمدة اتناشر سنة.... علاقة كان سببها أب ظالم متحكم قاسي... خلاني أرمي نفسي في حزن أول كلب يقولي بحبك.... عمري ما تخيلت إن ممكن حد يبجي يقولي بحبك... إذا كان أبويا نفسه مبيحبنيش.... أو على الأقل ده اللي كنت حاساه ساعتها.... علاقة خلتنني أكفر بالحب من أساسه... (تبتسم له بحنان... بعينين دامعتين) لحد ما ظهرت أنت.... رجعتلي روحي.... عاملتنني بكل احترام وحنية واهتمام.... عرفتنني يعني إيه تفاصيل.... خلتنني أحب حياتي.... بعد ما كان كل نفس يبطلع من صدري بيحرق جسمي وإحساسي بالذنب محاصرني.... أنا ممكن أحلفلك بدل المرة مليون دلوقتي... إني من ساعتها وأنا محافظة على نفسي.... وإني مستغلّتش وضعي أبداً.... وإني توبتي لربنا هوه أعلم بيها.... بس ده مش مهم.. المهم.... إني مش عاوزه حاجة من الدنيا دي كلها غير إنك

- تسامحني..... وتساعدني إني أبدأ معاك صفحة جديدة... عارفه
 إن اللي بطلبه منك دلوقتي صعب... أوي... أوي... بس أنا
 عشانه إنك تفهم... وتحس... وتسامح... (لحظات صمت...
 تتساقط دموعها) متجلدنيش يا ياسر... مترمينش للوحل تاني...
 - (يُحدق بها طويلاً..... يحجز على أسنانه بغضبٍ... يشير للنادل)
 هات الحساب لو سمحت...
 - (بنبرة باكية).... ياسر.....
 - (يترك الحساب على الطاولة)... ثم يُغادر...
 - (تبكي) ياسر.....
 - ولم يلتفت.....

- الساعة الثانية عشرة بعد منتصف الليل.... يهاتف "ياسر" صديقه
 "كريم"
 - أنت فين يا كريم؟
 - (يُمازحه) طب ارمي السلام، أي حاجة... بقالك قرن مكلمتنيش
 وأول متكلمني تقولي أنت فين يا كريم..؟
 - محتاج أتكلم معاك شوية... وبالمرّة أشوفك... أنت واحشني
 جدا.....
 - طيب.. تعالالي عالقهوة اللي تحت البيت هستناك هناك.....
 - ماشي... نصاية وأكون عندك..... سلام.
 - سلام..

وفي المقهى.....

- ياسر باشا...

- (يحتضنه...) إزيك يا ابني... واحشني والله عامل إيه؟...

- الحمد لله... وأنت أخبارك إيه.. لسه السياسة واكله دماغك....

- (يجلس...) لا سياسة إيه يا عم... خلاص... توبت....

- عين العقل والله يا ابني....

- (يُحرك يده باللامبالاة...) سيبك بس من الكلام ده... أنا عاوز

أخذ رأيك في موضوع يخص واحد حبيبي... جه أخذ رأيي وأنا

معرفتش أرد عليه.. موضع صعب ومُعقد... قلت آجي أفكر

معاك بصوت عالي... يمكن نقدر نساعده....

- (بيتسم...) تشرب إيه الأول...!؟

- نسكافيه...

- وحياة أمك!! هات يا ابني اتنين شاي براد هنا وزود النعناع...

وواحد شيشة قص عشان نمخمخ مع الأفندي....

- (بيتسم)...

- إيه بقى.. ماله صحبك؟

- (تنهيدة عميقة)....

- (يعقد حاجبيه...) يا ساتر يا رب هوه اتشل؟

- غسل ياض...!

- (بيتسم ابتسامة عريضة...) لا ومن الملكة كمان...

- (بيتسم..) متحرص بقى.. خليني أتزفت أحكي.....!!

- ماشي.... احكي.....

- دلوقتي... صبحي ده بيحب واحدة... بيحبها أوي..... وكان بي فكر
يتجوزها..... وفعلا طلب إيدها... بس بعد كده صارحته...
وقالتله إنها مش بنت.. وإنها كان ليها علاقة قديمة من اتناشر
سنة..... دلوقتي هوه مش عارف يعمل إيه... هوه بيحبها
أوي.... وفي نفس الوقت مش قادر يتقبل فكرة إنها مش بنت
دي نهائي.....

- (يخفض رأسه مبتسمًا....) آه.. رجولته ناقحة عليه يعني....

- حاجة زي كده... يعني.....!! أنت عبيط واللا إيه... ما طبعا
رجولته ناقحة عليه هوه البيه مش من هنا واللا إيه.....

- (نصف ابتسامة....) مش أوي..... ما علينا... قولي... البنات
كويسة؟

- (يُحرك يده بالاستغراب...) يعني إيه كويسة؟

- كويسة؟ محترمة بنت ناس دماغها حلوة... كده.....!؟

- والله مفروض إنها كويسة... قبل اللي عرفه ده مفروض...
مفروض إنها كويسة... مكنش حبها يعني..... بنت ناس.....
(نصف ابتسامة...) مفروض إنها بنت ناس.....

- عارفين بعض بقالهم قد إيه؟

- ثلاث سنين....

- (يُحرك رأسه بالإيجاب....) ثلاث سنين حلوين... يعني.... مفروض
إنه عرفها كويس... وعرف تفاصيل شخصيتها وقدر يُحدد هيه
كويسة بجد واللا لا....

- أنت بتتكلم في إيه.... إيه علاقة ده باللي عرفه عنها..!!!!!!

- (بيتسم....) لا....!!! قصدك باللي هيه اعترفته بيه.....

- (يُحرك رأسه بالنفي....) مش هتفرق....
- (يعتدل في جلسته.... نبرة قوية...) لا، تفرق يا حبيبي... تفرق أوي كمان.... البنت دي اختارت بكامل قواها العقلية إنها تصارحه ومتغشوش.... في حين إن كان أدامها اختيار أسهل إنها تعمل عملية وتغشه ولو قلب قرد مكنش هيعرف.. أنا دكتور وبقلك.... الحاجات دي بقت أسهل من دور البرد.....
- وده مبرر يعني يخليه يسامحها.. إنها اعترفته...!!!!
- (صمت قليل...) قولي يا ياسر.... هوه صحبك ده مكنش ليه علاقات جنسية قبل كده...
- (يُحرك كتفه باللامبالاة...) كان ليه وهوه صغير... مرتين ثلاثة يعني... بس الكلام ده من زمان.. وخلص ربنا هداه....
- (نصف ابتسامة....) سبحان الله نبرة صوتك اتغيرت أوي وأنت بتتكلم عليه.....
- (بيتسم بسخرية....) آه... أنت هتقعد تقولي بقى راجل وست... والاتنين زي بعض والجو ده... لا يا حبيبي.... الاتنين مش زي بعض وعمرهم مهيكونوا زي بعض... دي أسطوانة مشروخة والكلام فيها ضياع وقت وقلّة قيمة.....
- (بيتسم ببرود....) أنت اتشججت كده ليه... ده واضح إنه حبيبك أوي يعني....
- (يُخفّض رأسه... يتنهّد...) يعني... أعرفهم هما الاتنين من زمان... فمضايق عليهم... وعليه أكثر....
- (بيتسم....) آه... طيب... قولتلي بيحبها أوي؟
- أوي....
- ويعرفها من ثلاث سنين؟

- آه...

- ومشفش منها أي حاجة وحشة طول الفترة دي... كانت مخلصالوا
يعني...؟

- لأقصى درجة.....

- وهيه اللي اعترفته إنها مش بنت...

- آه....

- (يُحرك رأسه بالإيجاب...) طيب... اسمع بقى الكلمتين دول
وقلهم لصاحبك... البنت دي لو مكنتش بتجبه حب خرافي كان
عمرها ما كانت هتقله حاجة زي دي... هيه صعب عليها تضحك
عليه وتستغفله... واستحرمت تبدأ حياتها معاه بكذبة... البنت
دي أحسن من بنات كتير أوي أوي لسه محتفظين بعذريتهم.....
والبنت دي هتقدر تحافظ عليه وتخاف ربنا فيه... وكلنا
بنغلط..... ومحدش ليه الحق إنه يبرر لنفسه ويحرم على
غيره..... الغلط غلط... واضح وبين... للجنسين... وقوله كمان...
إنه لو مش عاوز يكمل... يحاول ينهي معاهها برحمة وإنسانية
من غير ما يغلط فيها ولا يقل أدبه عليها... ونصيحة مني
قوله... خدها... وسامحها... جازي دي اللي تدخلك الجنة... لما
ترحمها وتصدقها وترجعها ثقتها في الناس من تاني... وتساعدنا
إنها تبني أسرة مع راجل بتجبه... وتعوضها عن الصراع النفسي
اللي عاشته طول الاتناشر سنة دول..... جازي تكون دي تكفيرة
ذنوبه هوه شخصيا... عن حاجات عملها زمان وهوه ناسيها...
على الأقل دي عارفها وحافظها وبيحبها أوي زي ما بتقول...
أحسن ما يلبس غصب عنه... أصل هيه كده... تجبها يمين...
شمال.. هيه كده... وأنت ونواياك بقى..... كل واحد أدري
بأعماله..... واللا إيه يا صاحبي!!؟

- (يُحَدِّقُ بِهِ... لِحِظَاتٍ صَمْتٍ...) شَايِكَ بَرْدًا.....
- (يُحَدِّقُ بِهِ هُوَ الْآخِرُ.....) اَطْلُبْ غَيْرَهُ.....
- (يَقِفُ مَغَادِرًا...) أَنَا هَمَشِي... عِنْدِي شِغْلٌ بِكَرهِ الصَّبْحِ...
- مَا شِئِي...
- سَلَامٌ...
- بِقَلْبِكَ إِلَيْهِ..... سَلْمِي عَلَى حَنِينٍ... الْبِنْتُ دِي كَوَيْسَةَ وَجِدْعَةَ
وَبِتَحَبُّكَ... غَيْرِ أَيِّ وَاحِدَةٍ عَرَفْتُهَا فِي حَيَاتِكَ.....
- (يَبْتَسِمُ...) يُوَصِّلُ... سَلَامٌ..
- سَلَامٌ...
- سَلَامٌ...
- سَلَامٌ...
- سَلَامٌ...

(هَاتِفٌ حَنِينٌ يَدُقُ السَّاعَةَ 5 صَبَاحًا)

- أَلُو... يَاسِرُ...
- (يَبْتَسِمُ... تَتَجَوَّزِينِي؟)

أُمَانِي الْعَرُوبِي

الفهرس

| | |
|-----|--------------------------|
| 5 | الإهداء |
| 7 | المقدمة |
| 9 | قهوة مانو |
| 29 | كاميليا والقدر |
| 53 | قدرها لتشفع |
| 83 | غرفة الأحلام |
| 101 | القطيع |
| 137 | حافظه حرارية |
| 159 | لأنها ماهرة |
| 181 | لعنة الماضي |
| 193 | ليالي بنت الأربعين |
| 199 | جالها عريس |
| 213 | ماذا لو؟! |
| 259 | أنتي كويسة؟ |
| 277 | المضحك المبكي |
| 293 | ما بعد الحب |
| 309 | فاطمة |
| 323 | ولن أسامح |





